

Wedau Mark



The Gospel of Mark in the Wedau Language of Papua New Guinea

Wedau Mark
The Gospel of Mark in the Wedau Language of Papua New Guinea
Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

PDF generated using Haiola and XeLaTeX on 18 Apr 2025 from source files dated 31 Aug 2023
aa19f3e3-98fb-51fa-9c53-3906edc75f11

Contents

FRT	1
INT	2
Genesis - Karena	3
Exodus - Oputawanana	26
Leviticus - Levi ai kauga	43
Numbers - Au Mutulua	45
Deuteronomy - Tarawatu Viruaina	52
Joshua	56
Judges - Taurauetara	58
1 Samuel	59
Samuel Viruaina	68
1 Kings - Gulagulau Naona	71
2 Kings - Gulagulau Viruaina	81
Chronicles Viruaina	87
Ezra	88
Nehemiah	89
Job	90
Psalms - Wela ma Pari	94
Proverbs - Nuaulaula Riwai	103
Ecclesiastes - Tauviararamana	107
Isaiah	112
Jeremiah	123
Lamentation	127
Ezekiel	129
Daniel	131
Hosea	132
Amos	133
Jonah	134
Micah	137
Zechariah	138
Mark	139
Apasol	166

**Buka Vivivireina
Parivainuaḡana Wadubona Ġuta Vinevine
ma
Mark ma Acts**

**Translation of The Gospel of Mark and Acts in the Wedau
language,
Milne Bay Provins, Papua New Guinea.**

**Buka Vjivireina
Parivainuaḡana Wadubona Ġuta Vinevine ma Mark ma Acts**

**Translation of The Gospel of Mark and Acts in the Wedau language,
Milne Bay Provins, Papua New Guinea**

© VITAL/SIL PNG 2010

Milne Bay Province
Papua New Guinea.
Printed in Ukarumpa.
2016, 700 Printed
wed
ISBN 9980 0 3979 5

© Wycliffe Bible Translators 2016

Illustrations:

By Horace Knowles and are used by permission of
 © The British and Foreign Bible Society, 1954, 1967, 1972
 Additions and amendments by Louise Bass
 © The British and Foreign Bible Society, 1994

© VITAL/SIL PNG 2010

*Translation of The Gospel of Mark in the Wedau language,
 Milne Bay Provins,
 Papua New Guinea.*

Printed in Ukarumpa.

Preface - Pariverena

Nature & Purpose of book
 Translation principles
 Text followed
 Orthography
 Name location & number of speakers

Genesis Karena Pariverena

Wei bukana e ririweta ma e viviegeta da menanarena mara ma dobu i tupuane. Wei bukana maiteni e viviegeta da aiai rava i kauai ma menanarena mai Israel i tupuane. Kaua gaegaei ruaga e viviegeta wei bukana au orana.

1. Kapita 1-11 e viviegeta da menanarena mara, dobu ma rava i kauai. E viviegeta da Adam ma Eve, Cain ma Abel, Noah ma ututuva ma numa gēgetelarana au Babel.
2. Kapita 12-50 e ririweta menanarena mai Israel i tupuane. E viviegeta da Abraham natuna Isaac ma gōgana Jacob ma Jacob natunatuna 12 Israel noinonii.

Wei bukana taugirumana ega wavana ita viegeta. Wate tauviararamana gelau e notanotai da Moses i girumi mai Israel aubaii da tau i ita aramanei da God i vinei da Tauna ana rava, ma aiwai i kauai mai Israel aubaii. Au gunai wei bukana Moses i girumi madega! 1,500 - 1,230 BC. - muriai Iesu i tupua.

Giruma reregana

Virarautua wadubona

God, mara ma dobu i kauai (1:1 - 2:3)

God, oroto ma wavine i kauai (2:4, 7-9, 15-25)

Apoapoe mena i vikarenei (3:1-24, 4:1-12; 25-26)

Noah ana virarautua (6:5-22; 7:1-5, 17, 23; 8:15-22; 9:1-15)

Babel ana numa gēge dewadewana (11:1-9)

Mai Israel gōgōgai

Abraham, Isaac ma Jacob

God Abram i kwatuei (12:1-7)

Abram ma Lot i vilamonei (13:5-6, 8-1)

Abram, Lot i vai-melei (14:11-16)

Melkisedek, Abram i viaiaini (18-20)

God parivainuagana bagibagina Abram maiteni i kauai (15:1-6, 12-16)

Sarai ma Hagar (16:1-3, 15)

God ana mataira terenana (17:1-21)

Nelara tonuga i nei Abraham awarina (18:1-15)

Sodom ana virarautua (23; 19:1-7, 24-26)

Isaac i tupua (21:1-5)

Hagar ma natuna Ishmael i paritawanei (21:8-14)

God Abraham ana tumaaga i raudadani (22:1-19)

Esau ma Jacob i tupua (25:19-26)

Esau, natuevou ana buderi i verenei Jacob awarina (25:27-34)

God i parivainuagana da Isaac ina viaiaini (26:1-6)

Isaac, Jacob i paritawanei Laban awarina (28:1-4)

Jacob ana rauboni au Bethel (28:10-22)

God, Jacob i viaiaini (35:9-15, 16-20, 22b-29)

Joseph, tuatana maiteni ai virarautua (37:1-8, 12-35)

Joseph ana nola au Egypt (39:1-23)

Joseph, rava ai rauboni anoi i viegei (40:1-23)

Pharaoh ana rauboni (41:1-16, 25-42, 45-49, 53-57)

Jacob natunatuna i paritawanei au Egypt (42:1-10, 21-23)

Joseph i viegana-melei (45:4-11, 25-28)

Jacob, natunatuna ma gōgōgana maiteni i nae au Egypt (46:1-7, 28-30)

Jacob, Ephraim ma Manasseh i viaiaini (48:1-6, 13-21)

Jacob, Juda i viaiaini (49:8-10, 33)

Joseph, tuatuna i vinuubai (50:15-21)

BADA, mara ma dobu i kauai

¹ Au karena, God, mara ma dobu i vitupui.

² Dobu kwakwavina ma ega aiwai ita mamae. Gimtona, gabinou i purui. Ma God Aruana, gabinou au tepana i genagenara gaira.

³ Ma God i riwa i pa, "Ina lalail!" Ma i lalai.

⁴ Ma lalalaina i nanai da i ai. Ma lalalaina ma gimtona i vilamonei.

⁵ Ma lalaina i ġorei Marai ma gimtona i ġorei Au Pom. Ma au bigai i nae ma ubaubanai i nei, au pom tagogi.

⁶ Ma God i riwa i pa, “Parata mara au tepana ina mae da waira au tepana ma waira au gabaurina ina vilamonei.”

⁷ Ma parata mara au tepana i terei da waira au dobu ma waira au mara i vilamonei.

⁸ Ma parata i ġorei Mara. Ma au biga i nae ma ubaubanai i nei, nai au pom viruaina.

⁹ Ma God i riwa, “Waira, mara au gabaurina, gabu au tagogi ona vitagogiemi ma doa alalana ina eġa.” Ma nanare i tupua.

¹⁰ Ma doa alalana i ġorei, Dobu ma waira i vivitagogieia i ġorei, Boga. Ma i 'nanai da i ai.

¹¹ Anina ma God i riwa i pa, “Dobu, tam modu ma ai ma vigogoi, modu rarauanoi nununai ma ai rarauanoi nununai, ma peii ina gogo ma ina rauano me aloi nanare, ma nanare i tupua.”

¹² Ma dobu, modu ma ai anatapui i vigogoi. Ma i 'nanai da i ai.

¹³ Au bigai i nae ma ubaubanai i nei, au pom vitonuina.

¹⁴ Ma God i riwa i pa, “Aniravilala au mara ina mae da marai ma waguvara ina vilamonei, ma iri ina vieġeta ma nanare mara ma borima.*

¹⁵ Ma tau, mara ina ravilalai da lalaina dobu ina verei.” Ma nanare i mae.

¹⁶ Ma aniravilala ġaeġae ruaġa i kauei, voġaeġaena marai i vibadei ma voaburuna waguvara i vibadei ma ubona maiteni i kauei.

¹⁷ Aniravilala au mara i terei da dobu ita ravilalai

¹⁸ da marai ma waguvara ita vibadei ma lalaina ma waguvara ita vilamonei. Ma i 'nanai da i ai.

¹⁹ Ma au bigai i nae ma ubaubanai i nei, au pom vi-four-na.

²⁰ Ma God i riwa i pa, “Sia ma lawalawai anatapui waira ona vioai ma kiu ona tupua ma ona lave au aidamo.”

²¹ Ma sia ġaeġae ma sia tapuna ma tapuna, boga au orana maemaie ma kiu tapuna ma tapuna maiteni i vitupui. Ma God, i 'nanai da i ai.

²² I viaiaini ma i riwa i pa, “Ona vinatuna ma ona vimaġaimi da boga ona vioai ma kiu ona vinatuna da ona maġa au dobu.”

²³ Ma au bigai i nae ma ubaubanai i nei, au pom vi-five-na.

²⁴ Ma God i riwa i pa, “Doa, ġamoġamo nununai ma vitupui, ġamoġamo maramaraġamai ma ġamoġamo moduei, ma ġamoġamo tetetei ma ina vinatuna da me tau nanare.” Ma nanare i tupua.

²⁵ Ġamoġamo nununai anatapui i vitupui ma tau i ina vinatuna da me tau nanare. Ma i 'nanai da i ai.

²⁶ Anina ma God i riwa i pa, “Marina, rava tana kauei me tauta ma ai kua tauta nanare. Ma tau sia ma kiu ma ġamoġamo anatapui au dobu ina vibadei, ġamoġamo maramaraġamai ma ġamoġamo moduei, ġaeġae ma muomuoi.”

²⁷ *Ma God, rava i kauei

Anina ma oroto ma wavine i kauei,
me tauna nanare.

²⁸ Rava i viaiaini ma i riwei i pa, “Ona vinatuna ma ona vimaġaimi da dobu ona vioai ma dobu ona vibadei. Taumi, sia, kiu ma aiwai anatapui au doa tetetei ona vibadei.

²⁹ Lam, modu anoi ma ai uana a revereremi ami lam.

³⁰ Ma ġamoġamo moduei ma kiu ma ġamoġamo nununai anatapui aubai; ai rugurugu a revererei ai lam.” Ma nanare i mae.

³¹ Aiwai anatapui i kaukaueia i 'nanai da i ai kua ma i vinuiai. Ma au bigai i nae ma ubaubanai i nei, aupom vi-six-na.

2

¹ Ma nanare God mara ma dobu ma anapatapuna au orana i vitupui.

² *God ana nola i vorovei ma mara au vi-seven-na i vilauvitau.

³ Ana nola i vikwai ma lamna aubaina God wei marana vi-seven-na i viaiaini ma i vovivirei.

Oroto ma Wavine

⁴ Wei lamna mara ma dobu ana virarautua. Menanare BADA God mara ma dobu i vitupui.

* 1:14: Eng. **Year**; Madeġa tagogi. ✧ 1:27: Mrk 10:6 ✧ 2:2: Exo 20:11

7 Ma BADA * God doa pokauna i vaia ma oroto i voai ma lavutu lawalawaina au giaganana i uveni ma oroto† i lawana.

8 Ma BADA God peipei Eden i paewi au maramatanei ma kampa orotona i vivitupuia i terei da i mae.

9 Ma BADA God ai inanana aiaina ma uana amna aiaina anatapui i paewi ma peipei au pouna ai vinevinei ruağa i gogo. Ai tagogi uana lamna lawana tauvereina ma ai ġelauna uana lamna nota rava ina verei da metauna aiaina ma metauna apoapoena.

15 Ma BADA God oroto au peipei Eden i terei da ita nolei ma ita paini.

16 Ma BADA God riwa bagibaginei i riwei i pa, "Ai uana anatapui au peipei am ġoanei ma ani.

17 Wate a viviġaem da nota aiiai ma nota apoapoei aina uana eġa ma ani! Mepa da u ani, tam nai au marana ma iraġe!"

18 BADA God i riwa i pa, "Oroto ainelana e mamae ma lamna eġa ita ai. Ana tauagu ana kauai da ina voagui."

19 Ma BADA God doa pokauna i vaia ma ġamoġamo anatapui ma kiu anatapui i kauai. Ma tau i nei ai oroto awarina da ita viwawai. Ma oroto aiwai i viwawai, nanare ai wava i mae.

20 Ma oroto kiu ma ġamoġamo maramaraġamai ma moduei, wava i verei. Wate Adam eġa ana tauagu ita nelaġai da ita voagui.

21 Ma BADA God oroto i kauai da i matave ma maranaina i raunuavuru kaua, torotorona tagogi i votawanei ma vinoa i pota-melei ana au gabu.

22 Ma BADA God oroto torotoronei wavine i kauai ma wavinena i nei ai oroto awarina.

23 Anina ma oroto i auepai ma i riwa,

"Ee wei tauna! Marina gelama tau gelamiuei

ma vinoa tauvioauei,

wei tauna awariu i votawanei,

lamna aubaina, ana ġorei *Wavine*.[‡]"

24 * Ma nanare i tupua ma lamna aubaina oroto, amana ma alona e vototerei ma awana maiteni e vivitagogiei.

25 Oroto awana maiteni, ana kovakovai, wate eġa ita vinimala.

3

Apoapoe mena i vikarenei

Maranai God mara ma dobu i vitupui, aiwai anatapui i ai kaua ma rava aiiai. Wei virarautu-ana lamna menanare apoapoei au dobu i rui.

1 Anina ma mota lamna terevaideġa kaukauana eġa me ġamoġamo ġelau i kaukaueia nanare. Ma mota wavine i paridadanei i pa, "Riwa kaua bo eġa da God i riwem da eġa ai uana au peipei ma ani."

2 Ma wavine i paribelei i pa, "Tauai ai uana peipei au orana ana ani.

3 Wate God i riwa da peipei au pouna, ai uana eġa ana ani bo ana vodadani. Mepa da ana ani bo ana vodadani lamna ana iraġe."

4 Ma mota wavine i paribelei, "Eġateni! Amapo eġa ma iraġe.

5 Nai maranai u ani, matam ina vikalai me God nanare ma aiaina ma apoapoena ona aramanei. Ma God i aramanei, lamna aubaina i viġaem da avena ma ani."

6 Ma wavine i 'nana da ai uana aniam aiaina ma inanana i ai kaua, ma i ġoei da ita ani da nuaulaula ita vaini, lamna aubaina tauna ai uana i vaia da i ani. Ma ġelauna awana au rivivana i mamae i verei da i ani.

7 Ma matai i kala ma i aramanei da tauai ana kovakovai, lamna aubaina ai bawara rugu-rugui i vaia da i vaturi da tupuai i tere-ġaġari.

8 Au biga ubana i opuopu ma tau i nonori BADA God au peipei i bababara nae. Ma oroto awana maiteni ai au orai BADA God i raugovaġei.

9 Wate BADA God oroto i kwatuei i pa, "Tam mepa?"

10 Tauna i paribelei i pa, "A nonorim au peipei ma tau ana kovakovau aubaina a rovo da a raugovaġem."

11 Ma BADA God i riwa i pa, "Aiiai i riwem da tam ana kovakovam? Ai uana a viġaem da avena uta ani, ma u ani bo?"

12 Ma oroto i paribelei i pa, "Wavine u verevereu, tauna ai uana i vereu da a ani."

13 BADA God wavine i riwei i pa, "Aiwai u kauai?"

Ma wavine i paribelei i pa, "Mota i moruii da a ani."

* 2:7: Yahweh bo Jehovah Exo 3:13-15. † 2:7: ... *doa pokauna i vaia ma oroto* Pona Hebrew *oroto* lamna *Adam*, ma *doa* lamna *adamah*. ‡ 2:23: Au Hebrew pona *oroto* lamna *ish* ma *wavine* lamna *ishah*. * 2:24: Mrk 10:7-8

BADA, Rava ai kovoḡa i vinolenolei

¹⁴ BADA God mota i riwei i pa, “Wei u kauēi aubaina, kovogā gaeḡaena tam awarim, eḡa me gamoḡamo ḡelauī nanare, maramaraḡamai ma moduei.

Manawamei ma matave-taitaina-nae ma am lam doa ma ani am mara au anatapuna.

¹⁵ Ana kauēi da tam ma wavine ona viḡavia nonoa, ma am epaia ma wavine ana epaia ona viḡavia. Tauna kolam ina gwadai ma tam ae karena ma ani.”

¹⁶ Ma wavine i riwa i pa: “Am nuabola ana viratai am au raumanawa, ma am iniviara ina rata am au vinatuna.

Tam u ḡoei da awam uta vibadei, wate tauna tam ina vibadem.”

¹⁷ Adam i riwei i pa, “Ma tam awam ponana u rautaniḡanei ma ai uana a viviḡaeia u ani, Tam am kauēlei doa u viapoapoeni. Tam ma nola guratana ma inim ina viara da lam ma nelaḡai, am mara au anatapuna.

¹⁸ Ma doa, donadona ma modu viganaganai ina vigogoi aubaim ma tam ma ipi da ma am.

¹⁹ Tam polapolam ina toi da lam ma nelaḡai ma nanare ma mae da ma nae me au doa. Doa pokauna a vaia da tam a kauem ma tam ma nae me doa au pokauna.”

²⁰ Orotō i aramanei da awana tauna rava anatapui aloi ma lamna aubaina i ḡorei Eve.*

²¹ BADA God gamoḡamo opina i vaia da inigāgara i kauēi Adam† awana maiteni aubai ma ini i tere-ḡaḡari.

BADA, Adam ma Eve Edenei i viopuni

²² BADA God i riwa i pa, “Orotōna aiaina ma apoapōena i aramanei, tauna marina tauta nanare. Eḡa tana voterei da urana ina vilolo-melei da lawana aina uana ina vaia da ina ani ma ina mae-nōnoa.”

²³ Ma lamna aubaina peipeiei, oroto i viopuni da doa ita ipiei. BADA, doei oroto i voai.

²⁴ Anina ma oroto i viaḡaḡana-opunei ma *cherub*‡ biāḡa au peipei Eden au maramatanei i terei ma ana dabaruma araratana i terei da i nēnae ma i nēnei ma lawana aina etanaina e gagagaloei.

4

Cain ma Abel

¹ Ma Adam awana Eve maiteni i matave ma i duama ma tevera orotona i tupua. Ma i riwa, “BADA ana aḡuei natu a vaia.” Lamna aubaina i ḡorei “Cain.”*

² Ma muriāi tevera orotona ḡelauina i ḡuni ma i ḡorei “Abel.”†

Ma maranai tauī i vilaraga, Abel tauna tauviḡamoḡamo ma Cain tauipi.

³ Mara tagogī Cain doa uana ḡelauī i neiāi da i puloei BADA awarīna.

⁴ Wate Abel nanare sipu natuevoui i vunu-naiei ma sia monamonai i apui BADA awarīna ana pulo. BADA Abel ma ana pulo i vinuāiaiei.

⁵ Wate Cain ma ana pulo eḡa ita vinuāiaiei. Ma lamna aubaina, Cain amlona i ḡaiḡai ma naona i peu.

⁶ Anina ma BADA Cain i riwei i pa, “Aiwai aubaina amlom i ḡaiḡai? Aiwai aubaina naom i peu?”

* **3:20:** *Eve* Wei wavana nonorana me Hebrew ponanei *lawana tauverena*. † **3:21:** Au Hebrew ponana oroto lamna *adamah* lamna aubaina oroto i ḡorei *Adam*. ‡ **3:24:** Arua lawalawaii gabu vivivireina taupaini. Tagogī lamna *cherub*

* **4:1:** *Cain* Wei wavana nonorana me Hebrew ponanei anona *a vaia*. † **4:2:** *Abel* Wei wavana nonorana me Hebrew ponanei anona *lavutuna tupona*.

⁷ Mepa da kaua aiaina uta kauēi, lamna ata vinuiaiāi awarim. Wate am nota da apoapoena ma kauēi, lamna ma aramanei da apoapoe am au metaeta e daradaraim da ina vovaiubaim. Wate tam ma virewapana da ma vovaiubai.”

⁸ Ma muriai Cain ana tevera Abel i riwei, i pa, “Tana nae, tana babara.” Ma maranai i ġeta au wapu, Cain i vomairi ma ana tevera Abel i vunui da i virāġeni.

⁹ Ma BADA Cain i paridadani i pa, “Am tevera Abel mepa?”

Ma Cain i paribelei, i pa, “Eġa ata aramanei! Tau au tevera taupainina bo?”

¹⁰ Ma BADA i riwa, i pa, “Aiwai u kauēi? Am tevera tarana doeī e kwatukwatu raubiwa aubaina.

¹¹ Lamna aubaina tam marina apoapoe awarim a tereterei. Am tevera tarana uramei au doa i toi da doa i matave ġaġari.

¹² Ma lamna aubaina maranai u ġoei da doa uta ipiei, lamna uana eġa ma nelaġai ma am animae eġa. Tam ma babara labalababa.”

¹³ Cain BADA i riwei, i pa, “Au kovoġa i rata kaua ma eġa tagotagogina da ana avarai!

¹⁴ Tam wei doanei e viviopuniu da naom eġa ana inana-melei. Tau ana babara labalababa ma eġa au animae. Ma rava ina nelaġaiu ma ina virāġeni.”

¹⁵ Ma BADA i paribelei, i pa, “Eġa! Aiāi da i virāġenim, ana kovoġa ina rata guratana.” Ma ana mataira Cain awarina i terei da rava ita viġaei da tauna avena ita vunui, maranai i nelaġai.

²⁵ Adam awana maiteni i matave ma Eve natui ġelauna i ġuni. Eve i riwa, i pa, “Cain ana tevera Abel i virāġeni. Ma lamna aubaina God natu orotona i vereu da Abel i raviepaiai.” Ma i ġorei Seth. ‡

²⁶ Seth natuna orotona i tupua ma i ġorei Enosh. Ma nai marana, rava, BADA wavana vivivireina viborumana i vikarei.

6

Rava ai ġo'apoapoe

⁵ Ma BADA i 'nanai da rava anatapui au dobu ai ġo'apoapoe i rata kaua ma aiwai i viogaterei ma i vinua-notenotei anatapui apoapoei.

⁶ BADA i 'nanai ma orana i viara kaua ma i vinuabola da aiwai aubaina rava i kauēi.

⁷ Ma BADA i riwa, “Tau rava a kaukaueia ana vipupui dobu au anatapuna ma nanare ġamoġamo ġaeġaei ma ġamoġamo au doa tetetei ma kiu au aidamo. Nuanuau i bola-kauēi da tau i kauēi.”

⁸ Wate BADA Noah i 'nanai ma i vinuāiaiei.

Noah ana virarautua

⁹⁻¹⁰ Noah ma ana epaepaeia ai virarautua wenanare.

Noah natunatuna nelarai tonuġa: Shem, Ham ma Japheth. Noah ana ġo'apoapoe eġa, tauna ainelana rava aiaina eġa me aiāi ġelauna nai au marana. Ma God maiteni i bababani nonoa ma ana au viaiaina i mamae.

¹¹ Rava ai ġo'apoapoeleī dobu i viapoapoeni God au matana ma viġaigaiawa dobu i oai.

¹² Ma God i 'nanai da rava ai ġo'apoapoe i rata kaua ma lawana apoapoena i maemaeleī.

¹³ Ma God Noah i riwei, “Rava pupunana a vivinua-notenotei. Aubaina rava ai ġo'apoapoe dobu i oai, lamna aubaina rava ma dobu anatapuna ana vipupui.

¹⁴ Lamna aubaina a ġoei da wei ma kauēi. Waga ġaeġaena ai bagibaginei ma voai tam aubaim. Ma babalaraġi ma koltei au orana ma au doa ma pasi.

¹⁵ Wenanare ma voai. Waga ana manawa 140 mita ma ana dabora 22 mita ma ana ġae 14 mita*

¹⁶ Ma poewi ma gavogavo aburuna ma voterei poewa ma biribiri au poui, ive ma madeġa aubaina. Ma au ririvana, metaeta ma terei. Ma vatara, au gabaurina, au pouna ma au tepana ma voai.

¹⁷ —Ona rautaniġana! Tau marina ututuva ana paritawaneiai au dobu ma aiwai anatapui lawalawaii ina amoa.

¹⁸ Wate marina tau parivainuāġana bagibagina ana kauēi tam maiteni. Tam, awam, ma natunatum awawai maiteni au waga ona rui.

¹⁹⁻²⁰ Ma ġamoġamo anatapui, wavinena ma orotona ma vigerui, kiu, ma ġamoġamo au doa tetetei ruaruāġei ava ina rui da ina lawana.

²¹ Ma lam taputapuneī ava ma vaia da taumi ma ġamoġamo aubaii.”

²² Ma God aiwai anatapuna i ririweia; Noah i kauēi.

‡ 4:25: Seth Wei wavana nonorana me Hebrew ponanei anona i vereu. ma ana dabora, 50 cubits ma ana ġae 30 cubits.

* 6:15: Hebrew pona ana manawa 300 cubits

7

Ututuva i vikarei

¹ Ma BADA Noah i riwei, “Tam ainelam rava jijimanim au dobu wei au marana. Lamna aubaina tam ma am numa ravai anatapumi au waga ona geru.

² Ma BADA ġamoġamo i vianinei aniam ma pulo aubaina, ororotoi 7 ma waivinei 7 ma vaia. Ma BADA ġamoġamo eġa ita vianinei, orotona tagogi ma wavinena tagogi ma vaia.

³ Ma nanare kiu ma vaia, ororotoi 7 ma waivinei 7. Wei ma kau ei da ġamoġamo da kiu anatapui lawalawaii ina mae ma ina vinatuna.

⁴ Ma au pom 7 au murina ma garewa ana paritawaneiai da mara 40 ma au pom 40 ina atuna. Ma aiwai au dobu a kaukaueia, e mamae ma e lavulavutu anatapui ina pupu.”

⁵ Anina ma BADA anatapuna i ririweia, Noah i kau ei.

¹⁷ Ma au pom 40 au orana ututuva i rarata ma waga i tenam epa.

²³ Anina ma BADA anatapuna lawalawaii au dobu i pupuna-pai, rava ma ġamoġamo ma kiu ma ġamoġamo tetetei, anatapui i viamoai. Noah ma tau i aiavoi au waga i gerugeru, tau i ava i lawana.

8

Ututuva damona

¹⁵ Ma God Noah i riwei i pa,

¹⁶ “Tam ma awam ma natunatum ana awawai waga ona oputawanei.

¹⁷ Ma ġamoġamo lawalawai anatapui ma taravaina-opunei, kiu anatapui, ġamoġamo au doa tetetei da ina vinatuna ma ina maġa da dobu ina vioai.”

¹⁸ Ma Noah awana ma natunatum ma awawai waga i opu-tawanei.

¹⁹ Ma ġamoġamo anatapui, kiu ma ġamoġamo ġelau i au doa tetetei, ai au dam nununai nanare waga i opu-tawanei.

²⁰ Ma Noah pulo aniapuna i voai BADA awarina ma ġamoġamo aiiai, kiu aiiai tagotagogi ava taputapuna i apui pulo aniapuna au tepana.

²¹ Ma maranai BADA pulo ġabuna i laġoni ma au nuanuana i pa, “A aramanei da rava melamelaiei ai nota i apoapoe. Wate dobu eġa ana viapoapoeni ma eġa melanai lawalawai anatapui ana pupuna-melei me a kau ei nanare.

²² Ma maranai dobu e mamae

paewa ma tuaruta,

ubauba ma vibola,

bodu ma omra,

garewa ma madeġa,

maratom ma au pom,

ina mae-nonoa ma eġa ina kwa.”

9

BADA ana Parivainuaġana bagibagina Noah maiteni i kau ei

¹ *Ma God Noah natunatum maiteni i viaiaini ma i riwei i pa, “Ona vinatuna ma ona vimaġaimi da dobu ona vioai.

² Ana kau ei da ġamoġamo ġaeġae ma ġamoġamo tetetei, iana ma kiu, anatapui ina rovoemi. Ma au urami ana terei da ona vibadei.

³ Aiwai anatapui lawalawai ami aniam. Modu anoi ma ai uana a veremi, wate marina aiwai anatapuna a vereveremi ami aniam.

⁴ *—Wate vioa taratarana eġa ona ani, aubaina tara au orana lawana e mamae, ona voterei da tarana ina toi tawanana ma muriai ona ani.

⁵ Ma mepa da ġamoġamo rava i viraġeni. Tau ana raubiwa, wate nanare rava, rava turana i viraġeni. Tau ana raubiwa.

⁶ *Tau rava a kau ei me tau inatau nanare,

ma lamna aubaina Rava ai ai i viraġena,

rava ġelauna tauna ina viraġeni.

⁷ *Ma tam natunatum ina maġa da am epaepaia dobu ina maena-pai.”

⁸ Ma God Noah natunatum maiteni i riwei i pa,

⁹ “Ona rautaniġana wei marina, Tau au parivainuaġana bagibagina taumi ami epaepaia maiteni a kaukauei.

¹⁰Ma ġamoġamo lawalawaii anatapuna, kiu ma ġamoġamo numei ma moduei ma anatapui wagei i opuopu, ma ġamoġamo anatapui muriai au dobu ina mae.

¹¹Wei riwanei au parivainuaġana bagibagina taumi maiteni a terei da eġa melanai ututuwa ġelauna ana paritawanana-meleiai au dobu da purapura lawalawaii ina vipupui.”

¹²Ma God i riwa, “Parivainuaġana bagibagina a kaukauei taumi ma anatapui lawalawai maiteni anatapui muriai e nenei. Wei parivainuaġana mairana wenanare:

¹³Warilolo au apau ana terei da ina vimataira da tau au parivainuaġana bagibagina a terei tau ma taumi ma anatapui lawalawai au dobu maemaei.

¹⁴Maranai mara e ġuvaġuvai ma warilolo au apau e eġa eġa,

¹⁵lamna ina vieġeu da au parivainuaġana bagibagina tau ma taumi ma anatapui lawalawai au dobu. Ma eġa melanai ututuwa lawana ina vipupui.”

11

Babel ana numa ġeġe dewadewana

¹Au naona rava anatapui au dobu pona tagogi ma riwa tagogina i bababaniei.

²Nai maranai rava i vaġavaġai nae au maramatanei ma wapu au ġaeġaena i ġeta au Shinar * ma kampa i mae.

³Ma i babani vivira i pa, “Ona nei, doa tana vaia ma brik tana pasi ma tana apui da ina bagibagi.” Ma nanare ai numa brikiei i voai ma koltei i ampasi.

⁴Ma tau i riwa, “Ona nei melagai ġaeġaena tana voai tauta aubaita ma numa ġeġe dewadewana tana voai da ina ġae au mara da wavata tana kauie ma eġa tana vilamoneta dobu au anatapuna.”

⁵Anina ma BADA i ġairai da ravai melagai ġaeġaena ma numa ġeġe dewadewana i voavoia ita inanai.

⁶Ma BADA i riwa i pa, “Wei tau rava tagogi ma pona tagogina e bababaniei. Wei lamna karena, aburuna ava aiwai ai au nota anatapuna ina kauana-paiei.

⁷Ona nei tana ġaira da noi ravai ai pona tana vinua-raġaraġai ma ina babani labalababa.”

⁸⁻⁹Anina ma BADA rava anatapui ai pona i vinua-raġaraġai ma i vilamonei dobu au anatapuna, lamna aubaina nai melagaina i ġorei Babel.[†] Ma melagai ġaeġaena voana i voterei. BADA tau i vilamonei dobu au anatapuna.

12

BADA, Abram i kwatuei

¹*BADA Abram i riwei i pa, “Am dobu, am rava ma amam ana dam ravai ma netawanei ma ma nae dobu ana viatataiem kampa ma mae.

²Ma am epaepaia ai dam ana viratai,
ma ana viaiainim,

ma ana kauie da wavam ina rata,
ma tamei viaiaina ina nei rava awarii.

³Ma aiai i viaiainim, tau ana viaiaini,
ma aiai i parivai-apoapoenim, tauna ana parivai-apoapoeni,
ma tamei dam anatapui au dobu ana viaiaini.”

⁴⁻⁵Ma BADA i ririweia nanare, Abram awana Sarai ma maiana Lot* Haran i opu-tawanei, Abram ana madeġa 75. Ai purapura, ai ġamoġamo ma ai laralaraga ma i vomairi Canaan aubaina.

⁶I ġeta Canaan ana au parata ma i verautua da au gabu vinevinena, Shekem melagaina ġaeġaena au ririvana. Ma kampa au Moreh[†] ai ġaeġaena au ġouna i rauġaravu. (Nai maranaina mai Canaan, nai au dobuna i mamei.)

⁷*Kampa BADA i viatataeana-melei ma i riwa i pa, “Wei dobuna Canaan am epaepaia ana verei.” Ma Abram pulo aniapuna, i voai BADA awarina ma pulo i apui. Mepa BADA i viatataeana-melei lamna au gabuna aniamapu i voai.

13

Abram ma Lot i vilamonei

* **11:2:** Babilon au paratana. † **11:8-9:** *Babel* Nonorana me Hebrew ponanei *nuaraġaraġa*. ☆ **12:1:** Act 7:2-3

* **12:4-5:** Abram ana tevera Haran natuna Lot. † **12:6:** Mai Canaan weka ai god morumoruna i vimae-ġaeġaeni.

☆ **12:7:** Act 7:5

⁵ Maranai Lot, Abram maiteni i vaḡavaḡai, Lot maiteni ana ḡamoḡamo maḡamaḡai ma ana numa ravai ma ana tauvilaraga.

⁶ Ma tau i ai ḡamoḡamo i maḡa guratana ma gabu eḡa tagotagogina da anapui ita ḡamoi,

^{7a} Ma lamna aubaina eḡa tagotagogina da tau i ita mae-gogona.

⁸ Anina ma Abram Lot i riwei i pa, “Ma rautaniḡana, tauta tara tagogi ma eḡa tana viparipariniḡai ma ata taunola avena ita viḡaiḡaiawa vivira.

⁹ Weka tana vilamoneta ma ata naei tana nae. Doa au naota e inainanai. Metauna e ḡoeḡoei ma nae ma kampa ma mae. Mepa da tam ma nae au oiena, tau ana nae au kelakela. Mepa da tam ma nae au kelakela, tau ana nae au oiena.”

¹⁰ Anina ma Lot matana i tawanei da waira Jordan wapuna ma Zoar melagaina au paratana. Ma i 'nanai da waira i maḡa ma doa maumaurana me BADA ana peipei,* me doa maumaurana au Egypt. (Nai marana BADA eḡa Sodom ma Gomorah ita vipupui.)

¹¹ Ma Lot waira Jordan wapuna i vinei tauna aubaina ma i nae au maramatanei. Tau nanare i vilamonei.

¹² Abram au Canaan i mae ma Lot Sodom au ririvana i mae.

¹³ Ma mai Sodom ai lawana i apoapoe kaua ma ḡo'apoapoe i kaukauei BADA au matana.

¹⁴ Ma Lot Abram i netawanei ma muriai BADA Abram i riwei i pa, “Mepa u mamae lana, matam ma tawanei au lavaratei ma au rauanaḡei ma madeḡa e gogogolana ma mepa madeḡa e neneulai.

¹⁵ †Dobu anapupuna e inainanai tam ma am epaepaia ana vere-nonoemi.

¹⁶ Ma am epaepaia ana kauai me doa pokauna ma aiai da pokau e iaiavi lamna am epaepaia tagotagogina ina iavi.

¹⁷ Dobuna anapupuna taumi a vereveremi, ma nae ma dobuna ana manawa ma ana dabora ma babarani.”

¹⁸ Ma nanare Abram ana numagara i naiei Mamre ana ai ḡaeḡaena au ḡereḡerena au Hebron i mae ma kampa pulo aniapuna i voai ma pulo i apui BADA awarina.

14

Abram, Lot i vai-melei

¹¹⁻¹² Gulagului 4 Sodom ma Gomorah ai purapura ma ai lam i kwalei. Abram maiana Lot au Sodom i mamae i vaia ma ana purapura maiteni i vaia ma i nae.

¹³ Abram tauna Hebrewei ma Mamre ana ai ḡaeḡaena au ḡereḡerena i mamae. Ai taniwagana wavana Mamre tauna Amoriei, varevareina Eskol ma Aner. Anapui Abram ana tauagu, ḡavia au marana. Ma oroto tagogi ḡavia i rovoei da i rovo-nae ma i ḡeta Abram awarina ma i vibenabenamei.

¹⁴ Ma maranai Abram i nonori da tau maiana Lot i vaia. Tauna ana sorodia vinevinei ana au melagai tuputupuai 318 i kwatuei. Ma ḡaviḡaviai i votaḡoi da i ḡae au Dan.*

¹⁵ Waguvarai ana sorodia i ḡutai ma ḡaviḡaviai i viagaḡei da Damaskas i verautuini da au Hobah i ḡeta ma kampa i vovaiubai.

¹⁶ Purapura anapui i vai-melei. Maiana Lot ma ana purapura ma waivine ma rava ḡelau.

Melkisedek, Abram i viaiaini

¹⁸ Melkisedek tauna Salem† ai gulau ma God AIDAMO TELARANA ana pirisi pulo tauapuina. Palawa ma wine i neiai,

¹⁹ ma Abram i viaiaini ma i pa,

“God AIDAMO TELARANA mara ma dobu taukaueina,
ina viaiainim.

²⁰ Ma God AIDAMO TELARANA am ḡavia au uram i terei,
lamna aubaina tana voepapai.”

Ma Abram aiwai ana sorodia maiteni i tami i vitagogiei da ḡuta 10 i kauai. Ma ḡuta tagogi i votawanei ma Melkisedek i verei.

15

BADA, Parivainuaḡana bagibagina Abram maiteni i kauai

* 13:10: Eden peipeina, Gen 2:8. † 13:15: Act 7:5 * 14:14: Lamna melagai ḡaeḡaena au lavaratei Canaan ana parata au ḡereḡerena. † 14:18: Jerusalem.

¹ Ma muriai BADA Abram ana au rauboni i riwei i pa, “Abram eġa ma rovo. Tau am taugagalo am pulo ġaeġaena.”

²⁻³ Ma Abram i paribelei i pa, “Oo BADA God. Tau eġa natunatu, ma am pulo eġa ina voaguii. Tam eġa natu orotona uta vereu ma lamna aubaina au iraġe au murina, Eleasar au taunola Damaskasei au vigulau ina vaia.”

⁴ Anina ma BADA i riwana-melei i pa, “Eġa! Tauna am vigulau eġa ina vaia, wate natum orotona tamei ina tupua, tauna am vigulau ina vaia.”

⁵ Anina ma BADA tauna i taravaina-opunei au doa ma i riwei i pa, “Ma ġoutata au mara ma ubona ma inanai, mepa da tam tagotagogina da uta iavi. Lamna am epaepaia ina maġa me ubona nanare. Eġa aiai tagotagogina da ina iavi.”

⁶ Abram, BADA riwana i vitumaġanei ma lamna aubaina BADA i riwa da Abram rava jijimanina.

¹² Ma maranai madeġa i neneulai ma Abram i matave-nuavuru kaua. Ma gimtona ma rovo ġaeġaena i nei ma i purui.

¹³ *Ma BADA i riwei i pa, “Wei ma aramana-kauei! Am epaepaia ina vitaomana au dobu ġela ma kampa ina vitaunola. Ma dobuna ravai* tau i rau-iviapoapelei da madeġa 400 ina kwa.

¹⁴ †Wate muriai tau nai dobuna ravai ana kovoġi ma am epaepaia ina vipurapura kaua ma ina nememei.

¹⁵⁻¹⁶ Ma mai Amori† ai ġo’apoapoe ina rata guratana, ma nai maranaina ana kovoġi ma ana viaġaġana-opunei wei au dobuna. Ma lamna aubaina am epaepaia eġa ina nei laġilaġina i da kimta au vi-four-na. Wate tam, Abram ma magura kaua ma ana nuaubam ma iraġe ma ina doboim.”

16

Sarai ma Hagar

¹⁻³ Abram au Canaan i mae madeġa 10 i kwa, awana Sarai aipoi ma eġa ita vinatuna. Sarai ana taunola wavinena Egyptei wavana Hagar. Ma Sarai Abram i riwei i pa, “BADA i viġaeu da eġa ata vinatuna. Ma nae au taunola maiteni ma matave, mepa da ina vinatuna, ma tevera ana vinatunei.” Abram, Sarai ponana i voteletelei ma Hagar i vaia ma i viawanei.

¹⁵ Ma Hagar i vinatuna da Abram natuna orotona i tupua. Ma Abram, natuna i viwavai Ishmael.

17

BADA ana mataira terenana

¹ Maranai Abram ana madeġa 99 ma BADA i vieġana-melei Abram awarina ma i riwei i pa, “Tau God VIVIREWAPANA KAUKAUANA.* Au naou ma babara ma kaua aiaina ava ma kauei

² da nanare au Parivainuaġana bagibagina ana vovai-virewapani tau ma tam awarita ma am dam ana vimaġa-guratei.”

³ Ma Abram i mae-ġaira au doa ma i raudune. Ma God Abram i riwei i pa,

⁴ “Tau au navanava au parivainuaġana bagibagina tam maiteni wenanare: Ana kauei, da dam patarana maġamaġai tam ina viamanem.

⁵ Ma marina wavam Abram, † ana terevirai da Abraham;‡ aubaina marina ana kauei da dam patarana maġamaġai ina viamanem.

⁶ Ma ana kauei da am epaepaia ina maġa ma am damei gulau maġamaġai ina nei.

⁷ Au parivainuaġana bagibagina ana vovai-virewapani, tau ma tam ma am epaepaia muriai e nenei da tau am God ma tau ai God.

⁸ *Canaan dobuna taputapuna marina e mamee-gubai, tam am epaepaia maiteni ana vere-nonoemi aubaimi ma tau, tau ai God.”

⁹ Ma God Abraham i riwei i pa, “Ma au parivainuaġana bagibagina, tam ma am epaepaia maiteni ona voteletelei.

¹⁰ †Wei taumi ami au navanava parivainuaġana bagibagina ona voteletelei, ami nelara anatapiu inii ina bori.

✧ 15:13: Exo 1:1-14; Act 7:6 * 15:13: Mai Egypt. ✧ 15:14: Exo 12:40, 41; Act 7:7 † 15:15-16: Nai maranai, mai Amori ma mai Canaan au dobuna Canaan i mamee. * 17:1: God vivirewapana kaukauana. Hebrew *El-Shaddai*. † 17:5: Abram. Wei wavana nonorana Hebrew ponaiei anona viwavalatonana. ‡ 17:5: Abraham. Wei nonorana me Hebrewie anona *dam maġamaġai amai*. ✧ 17:8: Act 7:5 ✧ 17:10: Act 7:8

¹¹ Ma taumi inimi ona bori, lamna ata parivainuāgana matairana.

¹² Roaroa melamelai nelarai i tupua ma au pom 8 au murina inii ona bori. Wei kauana ona kauēi, natunatumi nelarai ma ami taunola natunatui nelarai ma nelara anatapui am au numa e vivitaunola.

¹³ Riwa kaua, maranai roaroa nelarai i tupua am au dam bo maranai taunola o gimarai, tauī au mataira lamna inii ona bori. Lamna au parivainuāgana matairana au tupuami ina mae-nonooa.

¹⁴ Wate aiai orotona nai matairana ega au tupuana, lamna au parivainuāgana bagibagina i viaigai ma lamna aubaina tauna ina viravaḡela.”

BADA, Sarai i parivainuāgani

¹⁵ God Abraham i riwei i pa, “Awam ega ma ḡorei Sarai, wate ma ḡorei Sarah. §

¹⁶ Tau ana viaiaini ma natum orotona ina vitupui. Anina ma ana viaiaini da ina vidam ḡaeḡae aloi. Ma dam ai gulau maḡamaḡai taunei ina opu.”

¹⁷ Abraham i mae-peu ma i raudune ma i mutu-kaka ma au nuanuana i pa, “Amapo oroto ana madeḡa 100 ma ina vinatuna bo? Ma Sarah ana madeḡa 90 ma ina vinatuna bo?”

¹⁸ Ma Abraham God i riwei i pa, “Ma Ishmael menanare, uta viaiaini bo ega?”

¹⁹ Wate God i riwa i pa, “Ega! Awam Sarah natum orotona ina vitupui ma ma viwawai Isaac.* Au parivainuāgana bagibagina tauna awarina ma ana epaepaia awarii ina mae-nonooa.

²⁰ Ma Ishmael aubaina, am nuabola a nonori. Ana viaiaini ma natunatumi ana vimaḡai ma ana epaepaia ana vituai. Tauna dam 12 ai babada amai ma ana epaepaia ai dam ana vimaḡai.

²¹ Wate au parivainuāgana bagibagina ana kauēi Isaac maiteni. Ma wei marana nanare, madeḡa ḡelauna Sarah, Isaac ina vinatunei.”

18

Nelara tonuḡa i nei Abraham awarina.

¹ Au benai Abraham ana numagara au metaetana i kiakiala.

² I taepai ma nelara tonuḡa i 'nanai i maimairi. Maranai i 'nanaanai i ruba da au naoi i mae-ḡaira ma i raudune.

³ Ma i riwa i pa, “Au bada. Mepa da u notai da tau anina, ega ma tutelareu.

⁴ Waira ana neiāi da aemi ana oḡai ma ona vilauvitau ai au ḡouna.

⁵ Lam ana veremi da ina vovai-virewapanimi ma muriai ona vaḡai. Taumi o notaiu da o nei.”

⁶ Tauī i paribelei, “Anina u ririweia ma kauēi.”

⁷ Anina ma Abraham laḡilaḡina i nae au numagara ma Sarah i riwei i pa, “Laḡilaḡina, am palawa aiaina baikena ma vaia ma palawa ma apui.”

⁸ Ma i ruba ma bulumakau orotona ḡaubona i vaia da ana taunola i verei ma i vokaukauēi.

⁹ Anina ma Palawa ma mereki ma mereki ravi taputapui ma sia i neiāi tauī awarii au ḡou da i am ma tauna i mae-paini.

¹⁰ Tauī i paridadana i pa, “Awam Sarah mepa?”

Tauna i paribelei i pa, “Tauna numagara au orana.”

¹¹ Tauī tagogi Abraham i riwei i pa, “Riwa kaua da wei au marana nanare madeḡa au ḡelauna ana nenememei, lamna awam Sarah tevera orotona ina ḡuni.”

Ma Sarah, ravai au muri numagara au metaetana, i rarautaniḡana.

¹² Sarah ma Abraham i magura kaua ma Sarah ana vinatuna ana mara i kwa.

¹³ Sarah i mutu-kaka ma i riwana-melei, “Tau ma awau a magura kaua ma au vinatuna ana mara i kwa. Ma amapo tagotagogina da duama ana morelanei bo?”

¹⁴ BADA Abraham i paridadanei i pa, “Aiwai aubaina Sarah i kaka ma i riwa, “Tau a magura kaua ma riwa kaua da ana vinatuna bo?”

¹⁵ Aiwai i pipipi guratana BADA au matana? Me a ririwem nanare, ana nememei awarim wei marana nanare madeḡa au ḡelauna ma awam Sarah tevera orotona ina ḡuni.”

¹⁶ Sarah i rovo ma i bovi ma i riwa i pa, “Tau ega ata kaka.”

Tauna i paribelana i pa, “Ega! Tam u kaka.”

Sodom ana virarautua

¹⁶ Maranai nelara tonuḡa i vomairi da ita nae, Abraham tauī maiteni i nae da au etanai ita tuterei. Ma tauī i 'nana ḡaira au Sodom,

§ 17:15: Sarai - Sarah: Wei wavai ruaga anoi wavalatona natuna wavinena. God Sarai wavana vouna i verei da ita viatataiei da tauna dam ḡaeḡaena aloi. * 17:19: Isaac. Wei wavana Hebrewēi anona i kaka.

17-19 ma BADA ana au nota i pa, “Aiwai marina ana kauēi, eġa ana tere-govaġi Abraham awarina. Abraham ana epaepaia ina vidam ġaeġaena ma vivirewapanana ma taunēi dam anatapui au dobu ana viaiaini. Tauna a vinei da natunatuna ina riwei ma tau natunatui ina riwei da BADA ana lawana ina votaġotaġoi da aiaina ma jijimanina, ina kaukauei da tau Abraham a paripari-vainuaġania ana kauēi.”

²⁰ Ma BADA Abraham i riwei, “Tau, vikaruwaġawaġa maġamaġau i nonori da Sodom ma Gomorah melagaii ravai ai ġo’apoapoe i rata guratana.

²¹ A ġaiġaira da ana inani da wei vikaruwaġawaġana riwa kaua bo eġa.”

²² BADA Abraham maiteni i maimairi ma nelara ruaġa i nae au Sodom.

²³ Abraham i nei BADA awarina ma i riwa i pa, “Riwa kaua da rava aiiai ma vipupui rava apoapoei maiteni?”

²⁴ Mepa da rava aiiai 50 au melagai, amapo melagaina ma vipupui bo? Ma rava 50 notaiei ma melagaina eġa ma vipupui?

²⁵ Lamna eġa ita ai, ma eġa ma kauēi. Tam eġa rava aiiai ma viraġeni rava apoapoei maiteni. Nai kauai e kaukauei rava aiiai awarii, kauana tagogina rava apoapoei awarii e kaukauei, eġateni! Tam rava anatapui au dobu taetareina ma ma etarana-kauelai tapa?”

²⁶ BADA i riwa i pa, “Mepa da rava 50 aiiai ana nelaġai au Sodom, dobuana ana voterei tauai ai ġo’aiiai aubaina.”

²⁷ Abraham i paribelei i pa, “Au BADA tau am molaka, wate tau wei babanina a vikarei aubaina amapo ana paridadana me.

²⁸ Mepa da rava 50 aiiai ma 5 ina deġa, amapo melagaina ma vipupui bo?”

I riwa i pa, “Mepa da rava 45 kampa ana nelaġai lamna eġa ana vipupui.”

²⁹ Abraham i paridadana me i pa, “Mepa da rava aiiai 40 ava kampa u nelaġai?”

I riwa i pa, “Mepa da kampa 40, amapo eġa ana kauēi.”

³⁰ Abraham i riwa i pa, “Au BADA, eġa awariu ma ġaiawa ma vianineu da ana babani me, mepa da 30 ava kampa ma nelaġai?”

I riwa i pa, “Mepa da 30 ava ana nelaġai, amapo eġa ana kauēi.”

³¹ Abraham i riwa i pa, “Tau wei babanina a vikarei, mepa da 20 ava kampa ma nelaġai?”

I riwa i pa, “Mepa da 20 ana nelaġai lamna, eġa ana vipupui.”

³² Abraham i riwa i pa, “Au BADA, eġa awariu ma ġaiawa ma vianineu da mara tagogi ava ana babani me. Mepa da 10 kampa ma nelaġai?”

I riwa i pa, “Mepa da 10 ana nelaġai, amapo eġa ana vipupui.”

³³ Maranai BADA Abraham awarina i babani vorove, tauna i nae ma Abraham i nae ana au melagai.

19

¹ Ma raviravai anela ruaġa au Sodom i ġeta, Lot melagai au metaetana i kiakiala.* Maranai Lot tau i ‘nanai, i vomairi da i nae awarii ma i raudune.

² Ma i riwa i pa, “Au babada, tau ami taunola a nei, ona nei au au numa. Aemi ona oġai ma ona matave. Maratomtomai ona vomairi da ami au aninae ona nae.”

Ma tau i paribelei i pa, “Eġa! Tauai weka au deba ana matave.”

³ Ma i riwana bagibagi da maiteni i nae ana au numa. Lot, palawa eġa *yist*[†] maiteni i apui ma tau i am.

⁴ Ma ita matave ma mai Sodom nelarai laralaragai ma magumaguri anatapui i nei da numa i kwaipipini,

⁵ ma tau Lot i kwatuei i pa, “Nelara ruaġa waguvarai i nenei awarim, tau mepa? Ma opuneiai awariai da ana viawawanei.”

⁶ Ma Lot i opu tau awarii ma au murina metaeta i gudui.

⁷ Ma i riwei i pa, “Au rava a vivibaġaimi, eġa wei kauai apoapoei ona kauēi.

⁸ Ona rautaniġaneu, tau natunatu waivineu ruaġa, tau matatapu. Ana opuneiai awarimi da ami ġoana nanare ona kauēi. Wei nelarai a neiai au numa lamna tau au taomana ma eġa aiwai awarii ona kauēi.”

⁹ Ma Sodom nelarai i paribelei i pa, “Ma maeria! Tam dobu ġela ravam weka e mamae-gubai ma marina u ġoei da ma vibadabada. Marina ana viapoapoena-kauem eġa me tau ruaġa!” Ma tau Lot au metaeta i dudu ratui da gudu ita rikai.

¹⁰ Wate nelara ruaġa numa au orana urai i tere-opune i ma Lot i taina-ruiei awarii ma metaeta i gudui.

¹¹ Ma nelara anatapui au metaeta matai i viaipotai mara tupona ava da eġa tagotagogina metaeta ita inani.

* **19:1:** Melagai, ġaimēi i gari-kwaviroi; ma metaeta tagogi bo ruaġa i tereterei. Weka i kiakiala ġimara bo viboruboru ma i vivigatara. † **19:3:** Eng. *Yeast*.

12-13 Anina ma nelara ruağa Lot i riwei i pa, “Tauai marina wei dobuna ana pupuni. BADA, vikaruwağawağa mağamağau i nonori wei melagaina ravai awarii ma Tauna, tauai i paritawanelai da dobuna ana pupuni. Am dam ravai ġelau i weka e mamae bo eğa? Natunatum nelarai ma waivinei ma poipoiam ma am rava aiavo i au melagai maemaei; ma taravaina-opunei!”

14 Ma Lot i opu natunatuna ai ġopapara awarii ma i riwei i pa, “BADA marina dobuna ina pupuni. Lağilağina, wei dobuna ona oputawanei.” Ma tau i notai da tauna i vivinama.

15 Ma mara karena i tereterei ma anela Lot i vivibağai da ita volağilağina. Ma i riwa i pa, “Eğa ita ai da ma irağe maranai BADA wei dobuna ina pupuni. Lağilağina awam ma natunatum maiteni ona opu.”

16 Wate Lot i tatavira. BADA i ġoei da Lot ita vilawani. Ma anela Lot awana maiteni ma natunatu i urai i vojijini ma melagaiei i taravaina-opunei.

17 Maranai melagai i opu-tawanei ma anela tagoği tau i riwei i pa, “Ona ruba ami lawana aubaina! Eğa au murimi ona inana ma eğa au wapu ona tumairi dadana. Ola aubaina ona ruba da ami lawana eğa ona vine-boai.”

23 Ma madeğa i gogogo ma Lot ana numa ravai maiteni au melagai Zoar i ġeta.‡

24 Lamna maranai BADA salpa araratana marei i paritawanana ġaireia i me ġarewa, Sodom ma Gomoraħ melagaii au tepai. §

25 Ma melagaii, wapu, rava anatapui ma aiwai gogogoi i aragibui.

26 Ma Lot awana i vivimuri, i mae-tavirei ma i ravi-taputapui.

27 Ma ubaubanai boiboği Abraham i vomairi ma i nae mepa BADA maiteni i bababani lana.

28 Ma i 'nana ġaira Sodom ma Gomoraħ ma wapuna ana taputapuna ma kampa bau potopotona i 'nanai i ġeğae.

29 Maranai God nai melagaii ma wapuna i pupuni, tauna Abraham eğa ita notavai-nuavurui. Ma lamna aubaina God Lot i paritawana-opunei ma muriai nai melagaina i vipupui.

21

Isaac i tupua

1 Ma BADA Sarah i viaiaini ma i paripari-vainuağani nanare i kauai.

2 Ma God mara i vinevineia nanare, Sarah i duama ma i vinatuna. Natuna orotona i tupua, Abraham i magura ma natuna i tupua.

3 Abraham natuna i viwawai Isaac.

4 †Ma au pom 8 au murina Abraham natuna inina i bori me God i ririweia nanare.

5 Abraham ana madeğa 100 maranai wei kauai i tupua.

Abraham, Hagar ma natuna Ishmael i paritawanei

8 Isaac i rata ma i viedai ma Abraham lam ġaeğaeana i vokaukauei ma i am gogona.

9 Ma Sarah Ishmael i 'nanai Isaac i vivinamei. Ishmael lamna Abraham natuna ġelauna, ana taunola Hagar Egyptei i ġuniğunia.

10 Ma Sarah Abraham i riwei, “Tauvola wavinena ma natuna ma viopuni! Eğa ata ġoei da tauna am buderi ina vaia. Natu Isaac ainelana am buderi ina vaia.”

11 Abraham wei riwana i nonori ma i vinuabola kaua aubaina tauna natuna Ishmael.

12 Wate God Abraham i riwei i pa, “Eğa natum ma alona ma vinuabolei. Am epaia Isaac wavam ina mairiei. Aiwai Sarah i ririwem ma kauai.

13 Wate am taunola wavinena natuna ana epaepaia ana vimağai ma ana dam ina rata aubaina tauna tam natum.”

14 Ubaubanai boiboği Abraham tamaina i vokaukauei ma waira i ġui ma Hagar i viavarai. Ma wavine natuna maiteni i paritawanei da i nelabalababa au mutulua.

22

BADA, Abraham ana tumağana i raudadani

1 Madeğa mağamağa i kwa ma muriai God Abraham ana tumağana i raudadani. God i riwa i pa, “Abraham!”

Abraham i paribelei i pa, “Tau weka!”

‡ 19:23: Hebrewei wava Zoar anona Aburu. § 19:24: Salpa lamna ġaima logalogana. Maranaina e ararata, lamna i vibola kaua ma puğuna i apoapoei. † 21:4: Gen 17:12; Act 7:8

² Ma God i riwa i pa, “Natum tagotago Isaac nuanuam pouna, ma taravaini ma ona nae au dobu Moriah. Ma ola ana viatataem, kampa natum ma puloei aniamapu.”

³ Mara i tom ma ubaubanai boiboği, Abraham i vomairi, ai i edari pulo apunana aubaina ma ana donki i vokaukauei. Ma ana taunola ruağa ma natuna Isaac i taravaini ma anatapu i nae gabu God i ririweiana kampa.

⁴ Tau i pom tonuğa i babara ma Abraham i taepai ma gabu aueia i 'nanai.

⁵ Ana taunola i riwei i pa, “Weka ona mae. Donki ona paini. Tau natu maiteni ana nae nore ma God ana viborumei. Ma airuağa ana nememei awarimi.”

⁶ Ma Abraham ai i tavana Isaac i viavarai. Tauna naipi ma ai mutuara i voai ma i negogona.

⁷ Tau i nena ma Isaac i riwa i pa, “Amau!”

Abraham i riwa, “Ee, ma babani natu!”

Isaac i riwa, “Ai ma ai mutuara awarita wate pulo aubaina sipu natuna mepa?”

⁸ Abraham i paribelei i pa, “Natu, God sipu ina vereta pulo aubaina.” Ma airuağa i babara nae.

⁹ Maranai gabu God i ririweiana i ġeta, kampa aniamapu ġaimi i voai ma ai i vatari. Ma natuna Isaac urana ma aena i raġini ma aniamapu au tepana, ai i vatavataria kampa i vimataveni.

¹⁰ Abraham urana i viloloi da naipi i vaia da natuna ita virāġeni.

¹¹ Wate lamna maranaina BADA ana anela marei i riwa, “Abraham, Abraham!”

Abraham i paribelei, “Tau weka!”

¹² Ma BADA ana anela i riwa, “Eġa natum ma virāġeni! Eġa aiwai apoapoena awarina ma kauēi! Tam natum tagotago eġa uta nuanei ma marina a aramane i da tam anina God e vivivirei.”

¹³ Abraham i taepai ma sipu orotona i 'nanai, donana ai raġaraġai potopotona au orana i tapaēi. Ma i nae ma sipu i virāġeni ma sia taputupuna i apui ana pulo God awarina, natuna epaiana.

¹⁴ Ma lamna aubaina wei dobuna i ġorei, “BADA ina verena.” Lamna marana da marina rava e ririwa, “BADA ana au ola ina verena.”

¹⁵ Ma BADA ana anela marei Abraham i ġorei

¹⁶ “BADA i riwa, “Tam u voteleteleu ma natum tagotago eġa uta nuanei. Tau wavauei a paripari-vainuaġanim da

¹⁷ anina ana viaiainim ma am epaepaia ana vimaġai me ubona au mara ma bubu au gera. Tau i ai ġavia ina vovaiubai ma ai melagai ina vaia.

¹⁸ *Ma am epaepaia wavaiei dam anatapu i dobu ana viaiaini. Tam u voteleteleu aubaina wei ana kauēi.”

¹⁹ Ma Abraham natuna maiteni i nae me ana taunola awari ma anatapu i nae me au Beersheba. Ma kampa i mae.

25

Esau ma Jacob i tupua

¹⁹ Wei lamna Abraham natuna Isaac ana virarautua. Isaac amana Abraham

²⁰ Isaac ana madeġa 40 ma Rebekah i ravaġi. Rebekah tauna Leban novuna aburuna; amai Bethuel. Tau i mai Aram au Padan-Aram i mamae.

²¹ Rebekah aipoi ma Isaac i raupari BADA awarina da awana ita voagui. BADA ana pari i nonori ma Rebekah i duama.

²² Raġaraġa i vivitua au manawa aubaina Rebekah i nae ma BADA i vibaġai, “Aiwai aubaina wei e tuputupua awariu?”

²³ BADA i riwa i pa:

“Roarora ruağa au manawam ina vidam ruağa,
ma vinatuna da dam ruağa ma tau i nae viġavia vivira.

Tagogi ina virewapana telara

ma magurina aburuna awarina ina vitaunola.”

²⁴ Ana vinatuna ana mara i ġeta ma riwa kaua da raġaraġa nelarai i ġuni.

²⁵ Natuevou opina lebalebarina ma inina ororona ma lamna aubaina i viwawai Esau.*

²⁶ Natuna ġelauna i tuputupua turana au ae karena i vojijina ma i opu ma i viwawai Jacob.†

Isaac ana madeġa 60 ma awana raġaraġa i vinatunei.

Esau, natuevou ana buderi i verenei Jacob awarina

* 22:18: Act 3:25 * 25:25: Mai Hebrew ai pona, inina ororona nonorana me Esau. † 25:26: Mai Hebrew ai pona, Jacob anona ae karena i vojijini. Wei lamna awanaina, anona lamna amkwalakwalana.

²⁷ Maranai raġaraġa i vilaraġa, Esau tauna rava aroarona. Wate Jacob rava genugenuana ma au numa maemaena.

²⁸ Isaac ana ġoana ġaeġaena Esau, aubaina sia moduei i vunuvunui amna i ġoei. Wate Rebekah, Jacob i ġoana-kauei.

²⁹ Mara tagogi Jacob gwada i vivitavi ma Esau i aroaro da i nei ma inina i garigari ma am i 'raġe-kaua.

³⁰ Ma Jacob i riwei i pa, "Tau am a iraġe kaua. Nai gwada lebalebarina ma taraġui da ana ani!" (Wenanare i riwa aubaina wava i verei Edom.)[‡]

³¹ Ma Jacob i riwa i pa, "Tam natuevou, Mara muriai amata ana buderi voġaeġaena ma vaia. Marina ma riweu da am buderi tau ma vereu ma gwada ana verem."

³² Esau i riwa i pa, "Tau am a iraġe kaua ma natuevou buderina amapo eġa ina voaġuii, anina ma vaia!"

³³ Ma Jacob i riwa i pa, "Marina ma parivai-nuaġani da am buderi tau ma vereu." Ma Esau i parivainuaġana da natuevou buderina Jacob ina verei.

³⁴ Ma Jacob gwada i taraġui ma palawa da Esau i verei ma Esau i am ma i uma ma i vomairi da i nae. Wenanare i kauei lamna Esau ana buderi eġa ita vinuabolei.

26

BADA i parivainuaġana da Isaac ina viaiaini me Abraham

¹ Gomara ġaeġaena i nei au Canaan, me wariaġa Abraham ana au mara i tupua nanare. Ma Isaac ana dam maiteni i ġaira au melagaġi ġaeġaena wavana Gerar, kampa mai Philistia ai gulau Abimelek i mae.

² Ma BADA Isaac awarina i eġa ma i riwa i pa, "Eġa ma ġaira au Egypt, ma dobu ana riwem kampa ma mae.

³ *Weka ma mae-gubai, tam maiteni ana mae ma ana viaiainim. Wei dobuna anatapuna tam ma am epaepaia ana veremi. Ma Abraham aiwai a parivainuaġani ana kauei aubaimi.

⁴ Am epaepaia ana vimaġai, ai maġa me ubona au mara ma wei dobuna anatapuna tauri ana verei. Am epaepaia awariei dam anatapui au dobu ana viaiaini.

⁵ Abraham ponau i nonori ma au babani ma au viararamana ma au tarawatu i voteletelei, lamna aubaina wei ana kauei am epaepaia aubai."

⁶ Anina ma Isaac au Gerar i mae.

28

Muriani Isaac i nae da au Beersheba i mae. Maranai tauna i maġura kaua (ma matana i oaoa) natuna orotona keikeina Jacob, amana i morui tauna i viaiaini me tauna natuevou. Maranai tuana Esau wei i nonori, tauna amlona i ġaiġai kaua ma i ġoei da Jacob ita viriġeni.

Isaac, Jacob i paritawane Laban awarina.

¹ Isaac Jacob i kwatuei, i viaiaini ma i riwei i pa, "Eġa au Canaan awam ma vaia,

² wate ma vomairi ma ma nelaġilaġina au Padan-Aram, ġoġam Bethuel ana au dam ma kampa avum Leban natunatuna waivinei e mamae, kampa awam ma vaia.

³ Ma God VIVIREWAPANA KAUKAUANA am tavine ina viaiaini ma ina viuaim ma natunatum ina vimaġai ma tam dam borui ġaeġaei ina viamanem.

⁴ *Ma tam am epaepaia maiteni ina viaiainim me Abraham i viaiaini nanare, da dobu marina e mamae-gubai, God Abraham i vereverea tam ma vibuderiei."

Jacob ana rauboni au Bethel.

¹⁰ Jacob Beersheba i netawane ma i nenaie au Haran.

¹¹ Madegā i neulai ma gabu au tagogi, * i ġeta ma i raupirai da i matave ma ġaima tagogi i vaia ma i viuutane.

¹² Ma i rauboni da tete i 'nanai, karena au dobu ma damona au mara ma God ana anela i ġeġae ma i ġaiġaira.

¹³ *Ma BADA, au ririvana i maimairi ma i riwa i pa, "Tau BADA, Abraham ma Isaac ai God, dobu e matamatave lana tam ma am epaepaia ana veremi.

‡ 25:30: Mai Hebrew au pona, *Edom* anona *Lebalebarina*. * 26:3: Gen 22:16-18 * 28:4: Gen 17:4-8 * 28:11: Gabu vivivireina. * 28:13: Gen 13:14-15

14 *Ma am dam ana vimaḡai da me doa pokauna ma ai parata ana viratai au lavaratei, rauanaḡei ma karuwabuei. Ma am epaepaia maiteni taumiei rava anatapui au dobu ana viaiaini.

15 Ma notai da tau au ririvam a mamae ma ana painim am au vaḡai. Ma ana neiana-meleiaim wei au dobuna. Eḡa ana voterem da aiwai a parivainuaḡanim ana kauēi.”

16 Jacob i matave vomairi ma i riwa i pa, “BADA anina weka e mamae ma tau eḡa ata aramaneii”

17 Jacob i rovo kaua ma i riwa i pa, “Wei dobuna i vinirovorovo ḡaḡa! Wei anina God ana numa, Mara ana metaeta.”

18 Ubaubanai boiboḡi Jacob i vomairi ma ḡaima i viviuutaneia i vaia ma i vitura-mairini da ita vimataira. Ma *Olive monamonana* i buloi ḡaima au tepana da i vovivirei God aubaina.

19 Dobuna i ḡorei Bethel† (Melagaina au naona i ḡoreḡorei Luz).

20 Ma Jacob, BADA awarina i parivainuaḡana, “Mepa da tam au ririvau ma mae ma ma inana vaiteteu au vaḡai, lam ma gara ma vereu.

21 Ma lawalawaiu ana nememei amau awarina, lamna maranaina Tam tau au God.

22 Ma wei matairana a tereterei, weka ana viborumem, Ma aiwai u verevereu ana gimai da ḡuta 10 ma ḡuta tagoḡi ana veremelem.”

35

BADA, Jacob i viaiaini

9 Jacob, Padan-Aramei* i nememei au Bethel. God i eḡa me Jacob awarina ma i viaiaini

10 ma i riwei i pa:

“Tam wavam Jacob,

wate marina eḡa ina ḡorei Jacob

ma wavam vouna Israel.†”

Ma i viwawai Israel

11 *ma i pa:

“Tau God VIVIREWAPANA KAUKAUANA

Ma vinatuna guratana ma ma vimaḡaimi

Am epaepaia ina virava-ḡaeḡaei ma dam borui ḡaeḡaei awarime i ina tupua

ma gulagulau maḡamaḡau i ina viamanei.

12 Dobu, Abraham ma Isaac a verei,

marina tam ana verem

ma am epaepaia

muriai wei dobuna ana verei.”

13 Ma God i babani vorovei ma i netawanei.

14 *God weka Jacob awarina i babani lamna matairana Jacob gana i vimairini. Ma au tepana

wine i waḡi ana pulo‡ ma *Olive monamonana* i buloi.‡

15 Weka God Jacob awarina i babani ma lamna aubaina wei gabuna i ḡorei Bethel.*

Rachel ana iraḡe

16 Muriai Jacob ana dam maiteni Bethel i voterei ma i vaḡai, ma tau i uama i rata da au Ephrath ita ḡeta. Ma Rachel malana i vaia da ina vinatuna ma vinatuna i voiana-guratei ma ana iniviera i rata kaua.

17 Ma i voivoia ma iniviera i rata ma tauvipipiavoia i riwa, “Eḡa ma rovo! Tevera orotona ḡelauna i tupua!”

18 Wate Rachel i rairaḡe ma ana lavutu au damona ma tevera i viwawai “Ben-Oni.”† Wate amana i viwawai, “Benjamin.”‡

19 Ma Rachel i rāḡe ma eta e nenea au Ephrath (marina wavana Bethlehem) au ririvana i doboi.

* 28:14: Gen 12:3; 22:18 † 28:19: Wavana Hebrewēi anona *God ana numa*. * 35:9: *Padan-Aram Wei dobuna Aram au wapuna au Mesopotamia. Haran lamna melagai tagoḡi wei au dobuna.* † 35:10: *Jacob anona amkwalakwalana. Israel anona God maiteni i viḡaiḡaiawa.* * 35:11: Gen 17:4-8 * 35:14: Gen 28:18, 19 ‡ 35:14: *Wine i puloei pulo ḡelau maiteni. Jacob mataira i kauēi da tauna i verena-melei God awarina.* § 35:14: *Jacob wei gabuna i vovivirei God viborumana aubaina.* * 35:15: *Bethel anona God ana numa.* † 35:18: *Ben-Oni lamna anona au iniviera natuna.* ‡ 35:18: *Benjamin lamna anona au oiena natuna. Lamna anona au ḡoana bo au tauaḡu ḡaeḡaena.*

²⁰ Ma Jacob gana i vimairini Rachel ana kokoaga au tepana da i vimataira. Matairana amadodo e mamae.

Isaac ana i 'raḡe

^{22b} Jacob natunatuna nelarai 12:

²³ Leah natunatuna:

Reuben; Jacob ana natuevou

Simeon, Levi, Judah, Isakar, ma Zebulun.

²⁴ Rachel natunatuna:

Joseph ma Benjamin.

²⁵ Bilhah - Rachel ana taunola wavine natunatuna:

Dan ma Naphtali.

²⁶ Zilpah - Leah ana taunola wavine natunatuna:

Gad ma Asher.

Wei lamna Jacob natunatuna anatapai au Padan-Aram i ḡuni.

²⁷ *Ma Jacob i nememei amana Isaac awarina au Mamre au Kiriath-Arba; marina e ḡoreḡorei Hebron. Abraham ma Isaac wariḡa wei dobuna i mae-gubai.

²⁸ Isaac i mae da ana madeḡa 180

²⁹ ma i magura kaua, i lavutu tawanana ma iraḡe ma amamana i votaḡoi. Natunatuna Esau ma Jacob amai i doboi.

37

Joseph, tuatuana maiteni ai virarautua

¹ Jacob ana dam maiteni kampa i mae, wariḡa amana weka i mae, mai Canaan ai au dobu.

² Wei lamna Jacob natunatuna maiteni ai virarautua.

Joseph tauna laraga ana madeḡa 17. Tauna tuatuana maiteni, amai awawana Bilhah ma Zilpah natunatui, amai ana sipu ma *gote* i paipaini. Wate Joseph tuatuana ai kaua apoapoe ḡelau amai i vibenabenamei.

³ Jacob ana au magura Joseph i tupua ma lamna aubaina natuna nuanuana i vai-kauei, eḡa me natunatuna ḡelau nanare. Ma gara girugirumana, maiana ḡaeḡaena i kauei ma Joseph i verei.

⁴ Maranai tuatuana i 'nanai da amai Joseph i ḡoana-guratei eḡa me tau, ma ai ora-apoapoe ai tevera awarina i rata ma eḡa ita bababani kaua awarina.

⁵ Waguvara tagogi Joseph i rauboni ma maranai tuatuana ana rauboni i riwei, tau ai ora-apoapoe i virata-guratei.

⁶ Joseph i riwa, "Ona rautaniḡana ma au rauboni ana riwemi.

⁷ Anataputa au wapu *witi* ta bawabawai. Ma tau au bawa au pouna i mairi ma taumi ami bawa i kwaviviroi ma i raudunelei!"

⁸ Ma tuatuana i riwa, "Tam u notai da ma vibada bo? Ma tam ma vibadelai bo?" Ma Joseph ana babani ma ana rauboni aubaina tau amloi i ḡaiḡai guratana.

Joseph i gimarei

¹² Mara tagogi Joseph tuatuana amai ana sipu ma *gote* i taravaini ma i naiei au Shekem ma kampa i paini.

¹³ Ma Israel (wavana ḡelauna Jacob) Joseph i riwei i pa, "Tuatuam au Shekem sipu ma *gote* e paipaini. A ḡoem da ma nae tau awari."

Joseph i vianina ma i riwa, "Anina ana nae."

¹⁴ Amana i riwa i pa, "Ma nae tuatuam ma ḡamoḡamo ma i 'nanai, tau anina bo eḡa, ma na nememei da ma riweu." Ma Joseph i paritawanei. Hebron wapuna i netawanei ma i nae.

Maranai au Shekem i ḡeta,

¹⁵ ma kampa au wapu i kwavikwaviviro ma oroto tagogi tauna i 'nanai ma i riwei, "Aiwai e baibaiei?"

¹⁶ Joseph i paribelei, “Tau tuatuu a baibaiei, tau i ai sipu ma gote e paipaini. Uta riweu tau mepa?”

¹⁷ Tauna i paribelei i pa, “Tau i nae. A nonori i bababani i pa, “Tana nae au Dothan.”

Anina ma Joseph tuatuaana i votaḡoi da au Dothan i nelaḡai.

¹⁸ Maranai tuatuaana matai i tawanei ma Joseph i 'nanai i nenei ma i aramanei da tauna. Muriai da ita ḡetai tau i oga i tarai da tauna ita viragēni.

¹⁹ Tau i babani vivira i pa, “Taurauboni e nenei.

²⁰ Ona nei tana vunui ma waira dogona paipairana au orana tana tawana ḡairei. Ma tana riwa da ḡamoḡamo moduei tauna i viragēni. Ma tana inanai ana rauboni mena ina ḡoa.”

²¹ Wate Reuben ai ogatara i nonori, ma i ḡoei da ana tevera ita gagaloei ma i riwa i pa, “Eḡa ana lawana tana vaitawanei.”

²² “Eḡa tana viragēni. Tana tawana ḡairei waira dogona paipairana au orana weka au mutulua ma eḡa tupuana tana vodadani.” Reuben wenanare i babani aubaina i ḡoei da ana tevera ita naiana-melei amana awarina.

²³ Maranai Joseph i ḡeta tuatuaana awarii, tauna i vojijini ma ana gara girugirumana i ḡiḡi-tawanei.

²⁴ Ma i vaia ma i tawana ḡairei waira dogona au orana.

²⁵ Ma tau i kiala da i amam ma i taepai da dam mai Ishmael i 'nanai au Gilead da i nenae au Egypt. Tau i gimara lam anitavidagiai ma bunama *mur** au kamel i vigerui.

²⁶ Judah varevareina i riwei i pa, “Aiwai aiaina tana vaia mepa da ata tevera tana viragēni ma tana moru.

²⁷ Ona nei ma tana gimarei dam mai Ishmael awarii ma eḡa urataiei tarana ina toi, tauna ata tevera, tara tagogi.” Ma varevareina i vianina.

²⁸ *Ma maranai taugimara mai Midian† i ḡetai, Joseph tuatuaana tauna dogoei i taina-epai ma i gimarei mai Ishmael awarii mai ana silva 20 ana ruva nanare ma tau i naiei au Egypt.

²⁹ Muriai Reuben i nememei da au dogo i 'nana ḡaira, ma Joseph kampa eḡa ma i vinuabola kaua ma ana gara i sikai.

³⁰ Ma i nae me ana roaroa awari ma i riwa, “Ata tevera kampa eḡa. Aiwai ana kauiei?”

³¹ Anina ma tau i gote i vunui ma au tarana ana gara i virai.

³² Ma ana gara i naiei amai awarina ma i riwei i pa, “Tauai wei garana a nelaḡai. Ma inanai wei natum ḡarinei bo eḡa?”

³³ Amai gara i 'nanai ma i riwa, “Anina wei tau natu ana gara. Ḡamoḡamo ḡaḡaiawai natui i vunui. Oo natu! Ḡamoḡamo natu i uta-sikasikai.”

³⁴ Ma Jacob i vinuabola kaua ma ana gara i sikai. Ma ḡamoḡamo opina i oteni ma natuna i moguei da nawaravi biaḡa i kwa.

³⁵ Ana numa ravai i nae awarina da ita vinuaubai. Wate tauna vinuaua i geduaiei ma i riwa i pa, “Ana tou ma natu ana moguei da au dogo ina tereḡaireu ma ana nae mepa natu i nenelana.” Ma natuna i touei.

39

Potiphar awana, Joseph i rauoḡarei

¹ Dam mai Ishmael Joseph i ḡairei au Egypt, ma Potiphar tauna i gimara da ana taunola. Potiphar tauna Egypte ma sorodia ai bada ḡaeḡaena.

² *BADA Joseph i mae-ratui ma i voagui da anatapuna aiaina i kaukauei ana bada aubaina. Tauna Potiphar ana au numa i mae.

³ Potiphar i 'nanai da BADA Joseph i mae-ratui ma i voagui da aiwai anatapuna i kauana-kauai,

⁴ ma wei Potiphar i vinuauaiei ma Joseph i terei da tauna aubaina ina nola, ma ana taunola numa au orana, ma ana purapura anatapuna ina vibadei.

⁵ Nai marana da i nenai, Joseph awarinei ma BADA Potiphar ana numa orana ravai ma ana purapura anatapui au numa ma ana au wapu i viaiaini.

⁶ Anina ma Joseph vaivai i verei da Potiphar ana purapura anatapui i paini, ma ana bada ana nola da am ava ina paipaini.

Joseph i tupua da karawata ma inanana aiaina.

* **37:25:** *Mur* Myrrh. Wei dobuna ravai ai bunama ḡabuabuna ma ana nola i maḡa. ✱ **37:28:** Act 7:9 † **37:28:** Buka taugirumana dam wavai ruaḡa i terei, mai Ishmael ma Midian, wate mepa da tau i dam tagogi. ✱ **39:2:** Act 7:9

⁷ Kampa eġa ita mae-pora ma ana bada awana Joseph i 'nana rauoġarei ma i riwei i pa, "Ma nei tana matave."

⁸ Wate Joseph i geduai ma wavine i riwei i pa, "Ma i 'nana, tau au bada weka i tereu da a vivipaipai ma lamna aubaina tauna eġa aiwai numa au orana ina vinuabolei. Tauna ana purapura anapuna au urau i terei.

⁹ Tau au rewapana wei au numana nanare tauna, ma eġa aiwai ita nuanei anina tam ainelam. Menanare da kaula apoapoena ana kauai da God au matana au goa ina apoapoe."

¹⁰ Wavine marana patapatai Joseph i rarauelari da maiteni ita matave, wate Joseph i gedugeduai ma i nene-tawanei.

¹¹ Mara tagogi Joseph i nae au numa da ita nola, ma kampa eġa taunola ġelau.

¹² Ma Potiphar awana i nae ma Joseph ana au kareko i voa ma i riwa i pa, "Ma nei tana matave!" Wate Joseph i ruba-opu au doa ma kareko wavine au urana i voterei.

¹³ Wavine i 'nanai da Joseph i ruba-opu ma ana gara au urana i voterei,

¹⁴ ma wavine ana taunola i kwatuei da i nei ma i riwa i pa, "Weka ona inana! Wei Hebweina awau i neiai awarita, i vinameta. I nei awariu ma i ġoei da ita viawawaneu wate tau garara a vikarei.

¹⁵ Ma i nonori a garagarara ma i ruba-opu ma ana kareko i ruba-tawanei."

¹⁶ Ma wavine kareko i paini da awana i nememei au numa.

¹⁷ Ma wavine riwana tagogina awana i riwei i pa, "Wei Hebweina tam u neiai awarita, i vinameta. I nei ma i ġoei da ita viawawaneu.

¹⁸ Wate maranaina a garagarara, tauna i ruba-opu ma ana kareko au ririvau i voterei."

¹⁹ Potiphar awana ana babana i nonori ma amlona i ġaiġai kaula.

²⁰ Anina ma tauna Joseph i vaia ma panipani au numana i tawana-ruiei, mepa gulau ana panipani e mamae ma kampa i mae.

Maranai Joseph au panipani-numana

²¹ *BADA Joseph i mae-ratui ma i viaiaini, lamna aubaina da panipani taupainina Joseph i vinuaiiei.

²² Ma tauna Joseph i terei da panipani ravai ita vibadei ma nola au urana i terei.

²³ Panipani taupainina ana nuabola eġa aiwai, aubaina Joseph aiwai anapuna i paipaini. Ma BADA tauna i mae-ratui ma i voagui da aiwai anapuna i kauana-kauai.

40

Joseph, tau i rauboni anoi i vieġei.

¹ Ma mara tagogi Pharaoh * ana wine taupainina ma palawa tauapuina babadai, i kauana-boai Pharaoh awarina.

² Pharaoh amlona i ġaiġai babadai ruaġai awari.

³ Ma i vaia ma panipani au numana i terei mepa Joseph i mamae lana, sorodia ai bada ana au numa.

⁴ Sorodia ai bada wei ruaġai i naiei Joseph awarina ma tauna ravai i paini. Tau i mae-guratana au panipani numana.

⁵ Waguvara tagogi babadai ruaġai panipani au numana i rauboni. Ma ai rauboni anoi taputapunei ava.

⁶ Ma ubaubanai maranai Joseph i nei awari ma i 'nanai da tau eġa ita vinuaiiei.

⁷ Ma ruaġai i paridadanei, "Aiwai aubaina naomi i peu?"

⁸ Tau i paribelei, "Tauai airuaga a rauboni ma eġa alai da ai rauboni anona ita vieġelai."

Joseph i riwa, "God ainelana rauboni e vivieġai. Ami rauboni ona riweu."

⁹ Anina ma wine taupainina ana rauboni Joseph i riwei, "Au rauboni au orana grape ġoroġorovana a inana i naou.

¹⁰ Ma ġoroġorovana raġaraġana tonuġa. Ma i raurugu ma i talai ma anona tapina i magura.

¹¹ Pharaoh ana aniuma kelakana a vovojijini ma grape a purai ma au kelaka a buloi da Pharaoh a verei."

¹² Ma Joseph tauna i riwei, "Am rauboni anona wei. Grape raġaraġana tonuġa, anona lamna au pom tonuġa.

¹³ Au pom tonuġa au murina, Pharaoh ina tere-opunem ma am au nola ina tere-melem. Ma tam, Pharaoh ana aniuma kelakana au urana ina tere-melei, me au noana nanare.

* 39:21: Act 7:9 * 40:1: Mai Egypt ai wavalatona i ġorei Pharaoh. Wei lamna ana vaivai ma eġa wavana.

¹⁴ Wate maranai wei gabuna u opu-tawanei ma aiwai anatapuna ina ai-me. Tau ma notaiu, am i viaiai ma kauēi da au nuabola Pharaoh ma pariverei da panipani-numanei ina tere-opuneu.

¹⁵ Pharaoh ma riwei aiwai awariu i tupua. Mai Hebrew ai au dobu i daneneu ma weka i neiāiu, wate tau ega aiwai ata kauana-boai ma weka au dogo i tawaneu.”

¹⁶ Ma palawa tauapuina i 'nanai da Joseph nuaiari riwana i viegai ma i riwa, “Tau nanare a rauboni. Palawa irigana tonuga au kolau a terei.

¹⁷ Iriga au tepana, lamna palawa apuapunana tapuna ma tapuna Pharaoh aubaina, wate kiu i nei ma au kolau, au iriga palawa i amam.”

¹⁸ Joseph i paribelei i pa, “Am rauboni anona wei. Iriga tonuga lamna au pom tonuga.

¹⁹ Apom au vitonuina, Pharaoh panipani-numanei ina tere-opunem da uam ina borituini ma tupuam ai au tepana ina vitakei ma kiu ina nei ma vioam ina ani.”

²⁰ Ma au pom au vitonuina, lamna Pharaoh ana tupua marana ma torela gaegeaena i kauēi, ana gabemani babadai aubaii. Ma ana *wine* taupainina ma palawa tauapuina panipani-numanei i tere-opunei ma i neiāi Pharaoh awarina, ana gabemani babadai au matai.

²¹ Ana *wine* taupainina, ana au nola i tere-melei me au naona nanare. Ma tauna, Pharaoh ana aniuma kelakana au urana i tere-melei.

²² Wate ana sorodia i egari da ana palawa tauapuina uana i borituini ma tupana ai au tepana i vitakei. Joseph menanare rauboni i viviegeanei, nanare i tupua.

²³ Wate *wine* taupainina, Joseph nuanuana i vuru ma ega ita vinua-notenotei.

41

Pharaoh ana rauboni

¹ Ma madega ruaa i kwa, ma Pharaoh i rauboni da tauna waira Nile au adana i maimairi.

² Ma bulumakau 7 aiāi ma dododoi wairei i geta ma waira au adana gidagida i amam.

³ Ma bulumakau 7 apoapoei ma kirakirama wairei i getai da bulumakau aiāi au ririvai i raumairiei waira au adana.

⁴ Bulumakau 7 apoapoei ma kirakirama i vomairi da bulumakau 7 aiāi ma dododoi i lawana-pai. Anina, ma Pharaoh matana i kala.

⁵ Ma i matave me ma mara viruaina i rauboni da *witi* aina tagogi ma rovei 7 aiāi ma dododoi i 'nanai.

⁶ Anina ma *witi* rovei 7 muriai i gogogo wate rauanaa i ravi da i jinajina.

⁷ Ma *witi* rovei jinajina i 7 i vomairi da *witi* rovei dododoi 7 i lawani. Anina ma Pharaoh matana i kala ma i aramanei da i rauboni.

⁸ Ubaubanai Pharaoh nuanuana i bolai ma riwa i paritawanei da rauboni tauviegai ma nuaulaulai anatapui au Egypt i nei. Ma ana rauboni i riwei ma ega aiāi ravana da ana rauboni anona ita viegei.

⁹ Ma *wine* taupainina Pharaoh i riwei, “Amadodo ana rupena da tau a kauana-boai.

¹⁰ Mara tagogi tam amlom i gaegeai palawa tauapuina ma tau awariu, da u paniai ma sorodia ai bada ana au noma a mae.

¹¹ Ma waguvara tagogi tauai tagotagogi ava a rauboni ma ai rauboni anoi taputapunei ava.

¹² Laraga Hebrewei kampa tauai maiteni, tauna sorodia ai bada ana taunola. Ai rauboni a riwei ma tauna ai rauboni anona i viegelai

¹³ Ma tauna aiwai i ririweia nanarena i tupua. Tau u tere-meleu au au nola ma palawa tauapuina u viragei.”

¹⁴ Ma Pharaoh, Joseph ana riwa i paritawanei ma panipani-numanei lagilagina i neiāi. Joseph i viamgari ma ana gara aiaina i oteni. Ma i naiei Pharaoh awarina.

¹⁵ Ma Pharaoh Joseph i riwei, “Waguvarai a rauboni ma ega aiāi au rauboni anona ita viegeu. Wate rava i riwa da maranai tam rauboni e nononori, lamna anona e viviegeai.”

¹⁶ Joseph i paribelana, “Tau ega tagotagoga, wate God am rauboni anona ina verem da oram ina viubai.”

²⁵ Joseph i paribelei, i pa, “Oo bada, rauboni ruaai anoi tagogina. God aburuna ava da aiwai ina kauēi lamna gulau i viatataiei.

²⁶ Bulumakau dododoi 7, ma *witi* rovei aiāi 7, lamna maura madegana 7.

²⁷ Bulumakau kirakirama i 7 muriai i nei, ma *witi* rovei jinajina i 7, lamna anona amapo madegana 7 au orana gomara.

²⁸ —Aiwai a ririweia, nanare ina tupua. God i viatataiem da aiwai ina kauēi.

- ²⁹ Madeġa 7 au orana, lamna maura ġaeġaena Egypt au anatapuna.
- ³⁰ Wate au murina, gomara ġaeġaena ina mae da madeġa 7 da Egypt ana maura marana rava nuanuai ina vuru ma gomara rava ina vipupui.
- ³¹ Gomara ina rata kaua da maura marana nuanuata ina vuru.
- ³² God i vianina da wei ina tupua ma eġa barana ina uama, lamna aubaina rauboni ruaġa i verei.
- ³³ —Au bada, tam, oroto nuaulaulana ma notanotana uta vinei da Egypt ita vibadei.
- ³⁴ Wei uta kauei, babada uta terei Egypt au anatapuna da tuaruta au marana ġuta vi-five-na ita vaia madeġa 7 maura au marana.
- ³⁵ Ma rewapana ma verei da au maura, tau lam ina tami da au anara ina vidamni ma ina paini.
- ³⁶ Wei lamii ina tereriei rava aubaii maranai madeġa 7 gomara au Egypt ina nei. Ma wei taunei, mai Egypt eġa am ina iraġe.”
- ³⁷ Anina, ma Pharaoh ana gabemani maiteni oga-tarana i vianinei.
- ³⁸ Ma i riwei i pa, “Mepa rava ġelauna tana nelaġai me Joseph ma God Aruana tauna au orana e mamae?”
- ³⁹ Anina ma Pharaoh, Joseph i riwei, “God wei anatapuna i viataiaiem, eġa ai ai ġelauna nuaulaulana ma notanota kauana me tam.
- ⁴⁰ *Tam ana terem da au dobu ma vibadei ma au rava anatapui am riwa ina voteletelei. Tau Pharaoh, ma am rewapana tau ainelau au rewapana eġa ina ġetawanei.”
- ⁴¹ Ma Pharaoh i riwa, “Marina tau a vinem da Egypt anatapuna ma vibadei.”
- ⁴² Ma Pharaoh au urana ana vigulau *ringna* i votawanei ma Joseph au urana i terei,* ma gara maiana ġaeġaena i vioteni ma sein goldei au uana i tere-taġonei.
- ⁴⁵ Ma Pharaoh Joseph wava Zaphenath-Paneah,† i verei ma mai On ai pirisi Potiphera ‡ natuna guguinina Asenath, Joseph i verei da awana. Anina ma Joseph, dobu Egypt i vibadei.
- ⁴⁶ Joseph ana madeġa 30 ma wei vibadana i vaia. Ma Joseph, Pharaoh i netawanei ma Egypt i naeni ma i tivirevirei.
- ⁴⁷ Maura ġaeġaena i nelaġai madeġa 7 au orana.
- ⁴⁸ Joseph ai maura ġelau i tami maura madeġana 7 au orana au Egypt, ma au melaga i nununai i tere-kauei ma i paini. Melaga i anatapui ai lam au anara i terei.
- ⁴⁹ Joseph lam i vidamni da olana i mairi me bubu au gera ma iavana i kauana-avei aubaina lam i rata dewadewa.
- ⁵³ Ma maura madeġana 7 au Egypt au damona i ġeta.
- ⁵⁴ *Ma gomara madeġana 7 i raukarei, me Joseph i ririweia nanare. Gomara dobu au anatapuna, wate Egypt au anatapuna lam i mamae.
- ⁵⁵ Maranai mai Egypt raumolaġau i vikarei, tau Pharaoh i vibaġai lam aubaina. Ma tau i riwei da ita nae Joseph awarina ma tauna aiwai i ririweia ita kauei.
- ⁵⁶⁻⁵⁷ Maranai gomara Egypt anatapuna i vaia, Joseph anara i votawatawanei ma lam mai Egypt awari i gimarei. Anina ma gomara i rata kaua dobu au anatapuna da rava anatapui i nei Joseph awarina au Egypt lam gimarana aubaina.

42

Jacob, natunatuna i paritawanei au Egypt

- ¹ Ma au Canaan Jacob i nonori da au Egypt lam ma natunatuna nelarai i riwei, “Aiwaina da o mamae labalababa?
- ² *Anina ona rautaniġana! A nonori da lam au Egypt. Ona ġaira kampa ma aubaita lam ona gimarai da tana lawana ma eġa tana iraġe.”
- ³ Anina ma Joseph varevareina ten i ġaira au Egypt da lam ita gimarai.
- ⁴ Wate Jacob eġa Joseph ana tevera oiena Benjamin ita paritawanei aubaina i rovo mepa da aiwai apoapoena awarina ita tupua.

* 41:40: Act 7:10 * 41:42: Mataira da Joseph, Pharaoh ana rewapani ma ana riwei i nolanola. † 41:45: *Safenat-panea* Egypt ai pona anona *God* i bababani ma i lawana. ‡ 41:45: *On* Wei lamna dobu wavana, ma wavana ġelauna lamna *Heliopolis*. Wei au dobuna rava, madeġa i raudunelei. * 41:54: Act 7:11 * 42:2: Act 7:12

⁵ Tau i rava gēlaui maiteni i nae au Egypt da lam ita gimarai aubaina gomara gāeḡaena dobu Canaan maiteni i vaia.

⁶ Joseph i vibada gāeḡaena au Egypt ma tauna lam i gimagamarei dobu anapui ravai awari. Varevareina i gētai ma Joseph au naona i mae-gaira au doa ma i raudune.

⁷ Joseph tau i 'nanai ma maratagogi i aramanei da tau aiavo ma i kauana-melei da apamina tau eḡa ita aramanei. Ma riwa bagibaginei i vitara-virevirei, "Tau mi meiei o nei?"

Tau i paribelei, "Tau ai Canaan e nei da lam ata gimarai."

⁸ Joseph tuatuaana i 'nanai da i aramanei, wate tau ai tevera i vinua-nainei.

⁹ *Ma ana rauboni wariḡana i notai ma i riwei, "Tau mi i paritawanemi da ai dobu ana gōkokokara ota inana bo."

¹⁰ Tau i paribelei, "Oo bada eḡa! Tau ai am laralaraga a nei da lam ana gimarai."

²¹ Ma tau i babani vivira, "Nai maranaina ata tevera ana ora-viarana agu i toutouei awarita ma, eḡa tata rau-nu'apoapoelei. Tauta ata wavu lamna kovoḡana marina ta vaivaia."

²² *Reuben i paribelei, "Nai maranaina a riwemi, 'Eḡa ata tevera ona vodadani!' Wate tau mi eḡa ota rautaniḡaneu. Marina ata tevera tarana kovoḡana ta vaivaia."

²³ Joseph Egypt ponanei i bababani ma rava gēlauna tau ai ponei i paripari-verei. Wate tau eḡa ita aramanei da Joseph ai babani i nononori.

45

Joseph i vieḡana-melei

⁴ Joseph varevareina i riwei, "Ona nei au gēreḡereu." Ma tau i nei au gēreḡerena. Ma i babani, i pa, "Tau ai tevera Joseph, mai Egypt awari o gimareu.

⁵ Wate eḡa orami ina bolai, ma eḡa ami rava maiteni tau o gimareu aubaina ona viamparipari. Wate God au naona i paritawaneu da rava ata vilawani.

⁶ Wei gomarana dobu e viviapoapoeni marina madeḡa ruaḡa i kwa. Wate madeḡa five gēlauna e mamae da eḡa tana ipi bo tana tuaruta.

⁷ God i aipari-tawaneu da tau mi ma ami dam ravai maiteni ata vilawanimi, ma ami dam avena ita pupu.

⁸ Ma eḡa tau mi weka ota paritawaneu wate God, ma tauna i tereu da Pharaoh ana taunola ai bada gāeḡaena ma ana numa ma aiwai anapuna au Egypt a vivibadei.

⁹ *Marina laḡilaḡina ona nae me amau awarina ma ona riwei, 'Natam Joseph wenanare i riwa, God i tereu da Egypt anapuna a vivibadei, ma tam laḡilaḡina ma ḡairai awari.

¹⁰ Tam au gēḡereu ma mae au Goshen; ma nanare natunatum ma ḡoḡoḡam ma am ḡamoḡamo ma aiwai anapuna ḡarime.

¹¹ Gomara madeḡana five amapo e mamae, aubaina tau lam ana verem. Mepa da wei eḡa ana kauē tam ma am dam ma am laraga ma am ḡamoḡamo anapui ina vinuapoapoe ma ina raumolaḡau."

²⁵ Anina ma Joseph tuatuaana Egypt i opu-tawane ma i nae me amai Jacob awarina au Canaan.

²⁶ Ma tau Jacob i riwei, "Natam Joseph lawalawaina e mamae, ma tauna marina Egypt e vivibadei." Jacob i vinuanaina ma nai babani eḡa ita vitumaḡanei.

²⁷ Wate tau aiwai anapuna Joseph i ririweia amai i parivere. Ma Joseph ana anigeru i paritawane da Jacob ita vigerui da ita naiei au Egypt. Maranai wei i 'nanai, Jacob ana nota i nememe.

²⁸ I pa, "Tau marina a aramanei da natu lawalawaina e mamae, ma ana nae da ana inana ma muriai da ana iraḡe."

46

Jacob, natunatuna ma ḡoḡoḡana maiteni i nae au Egypt.

¹ Anina ma Jacob ḡarinei anapuna maiteni i nae au Egypt. Ma au Beersheba i ḡeta, ma kampa pulo i apui amana Isaac ana God awarina.

² Ma waguvarai God rauboniei awarina i babani i pa, "Jacob! Jacob!"

Ma tauna i paribei, "Tau weka."

³ God i riwa, “Tau God, amam ana God. Egypt ġairana eġa ma rovoei, aubaina tau am epaepaia ai dam boruna ana vimaġai kampa.

⁴ Tau maiteni tana nae au Egypt ma am epaepaia ana neiana-meleiai wei au dobuna. Joseph amapo au ririvam, maranai ma iraġe.”

⁵ Jacob, Beersheba i voterei, ma natunatuna nelarai amai i vojijini, ma anatapui awawai ma natunatui maiteni, au anivigeru Pharaoh i paripari-tawaneiana i geru.

⁶⁻⁷ ✧ Ai ġamoġamo ma ġariei anatapuna au Canaan i vaivainia i naiei au Egypt. Anina ma Jacob, natunatuna nelarai ma waivinei ma ġoġoġai ma ana numa ravai anatapui i nae au Egypt.

²⁸ Jacob Judah i aiparitawane i au Egypt da Joseph ita riwei da au Goshen ita nebelei. Maranai i ġeta.

²⁹ Joseph ana chariot i gerui ma i nae au Goshen. Maranai amana i nebelei, i taragwabei ma i tou guratana.

³⁰ Jacob Joseph i riwei, “Naom a inanai ma a aramanei da tam lawalawaim, marina ana nuaubau ana iraġe.”

48

Jacob, Ephraim ma Manasseh i viaiaini

¹ Wei kauai au murina, rava Joseph i riwei, “Amam i doria.” Anina ma natunatuna Manasseh ma Ephraim i taravaini ma i nae amana da ita inanai.

² Rava tagoġi Jacob i riwei, “Natum Joseph i ġetai da ina inanaim.” Jacob doridorianana ma i voguratei da i vomairi ma ana animatave au tepanai i kiala.

³ ✧ Anina ma Jacob natuna Joseph i riwei, “God VIVIREWAPANA KAUKAUANA awariu i eġa au Luz (Bethel) au Canaan ma i viaiainiu.

⁴ Ma i riweu, ‘Natunatum ana vimaġai ma am epaepaia ai dam ana viratai; wei dobuna am epaepaia ana verei da ina viġariana-nonoei.’

⁵ –Ma lamna aubaina ġoġoġau ruaġa Manasseh ma Ephraim au Egypt tuputupuai muriai da a nei; lamna tau ana vaia da natunatu me natunatu Reuben ma Simeon.

⁶ Roarora muriai i tuputupua lamna tam ġarime; ma ai buderi Ephraim ma Manasseh awarier i ina vaia.”

¹³ Anina ma Joseph natunatuna ruaġa i neiai Jacob awarina, Ephraim amana au oiena lamna Jacob au kelakelauna ma Manasseh amana au kelakelauna lamna Jacob au oiena

¹⁴ Wate Jacob uraoiena i tere-taġonei ma Ephraim au kolana i terei avena da tauna umau, ma ura-kelakelauna i tere-taġonei da Manasseh au kolana i terei avena da tauna natuevou.*

¹⁵ Anina ma Joseph† i viaiaini i pa,

“God. Tam Amau Isaac ma ġoġau Abraham ai God,

God taupainiu au lawana au anatapuna,

¹⁶ Ma am anela taugagaloeu au anatapuna wei roarorai ma viaiaini!

Ma wavau ma amamau wavai awarii ina mae-nonoa

ma a raraupari da ai dam ma viratai au dobu.”

¹⁷ Wate maranai Joseph i ‘nanai da amana aiwai i kaukauei ma tauna eġa ita vinuiai; ma amana urana Ephraim au kolana ita vaitawane i ma Manasseh au kolana ita terei.

¹⁸ Joseph amana i riwei, “Amau eġa nanare. Wei tauna natuevou uraoiem au kolana ma terei.”

¹⁹ Wate Amana i riwa, “Natu! Tau a aramanei aiwai a kaukauei. Manasseh maiteni ana dam ina rata kauan. Wate ana tevera wavana ina rata ma ana dam ina rata dewadewa eġa me tuana.”

²⁰ Anina ma Jacob roarora nai marana i viaiaini i pa,

✧ 46:6-7: Act 7:15 ✧ 48:3: Gen 28:13-14 * 48:14: Tau i nota da au oiena kialana lamna kauan bo nota ġaegaena ma eġa me au kelakelauna kialana nanare. Lamna aubaina Jacob nimana au oiena tevera au kolana i teretere tauna amapo viaiaina ġaegaena ina vaia eġa me ġelauna nanare. Lamna aubaina Joseph i baiei maranai Jacob nimana au oiena tevera umauna au kolana i terei. † 48:15: Maranai Jacob ġoġoġana i viaiaini, tauna Joseph i viaiaini.

“Mai Israel wavam ina latoni maranai e viviaiaina, tui ina riwa,
 “Tauai a raraupari da God ina viaianim me Ephraim ma Manasseh i viaiaini nanare.”
 Wenanare lamna Ephraim wavana i ailatoni ma muriai Manasseh wavana.

²¹ Ma Israel, Joseph i riwei, “Tau aburuna ava da ana irage. Wate God awarim ina mae da ina naiana-melem au Canaan, amamam ai au dobu.”

49

Jacob, Judah i viaiaini

⁸ Judah, varevareim ina voepaepaim,
 ma amam natunatuna ina raudunelem
 aubaina tam am g̃avia au uai ma voa ma ma vovaiubai.

⁹ Judah natu, tam me lion natuna,
 ana sia i am vorovei da i amruruna ma e matamatave,
 ega aiai ana matave ina viapoapoeni!

¹⁰ Gulau ana jigona Judah ina vojijini
 ma ana epaepaia ina vibada nonoa,
 anina da jigona taniwagana ina nei
 maranaina dobu anatapai ravai tauna ina raudunelei ma ina viborumei!”

³³ *Ma Jacob natunatuna awarii i babani vorovei, ma tauna ana au animatave i rauvirai ma i 'rage.

50

Joseph, tuatuaana i vinuaubai

¹⁵ Ma maranai Jacob i 'rage, Joseph tuatuaana i rovo ma i riwa, “Mepa da Joseph amlona ina g̃aiḡai ma ina raubiwa, kua apoapoena awarina ta kauai aubaina.”

¹⁶ Ma lamna aubaina riwa i paritawanei Joseph awarina i pa, “Amata maeninai ma wenanare i riwelai i pa,

¹⁷ Joseph wenanare ona riwei, “Tuatuam kua apoapoe kaukauana awarim i kauai. Wate a goei da ai kua apoapoe ma nota-tawanei.” “Tauai amam ana God a vovoeapaepai, ma a vivibaḡa-guratem da ai go'apoapoe ma nota-tawanei!” Maranai Joseph wei riwana i nonori tauna orana i viara kua ma i tou.

¹⁸ Anina ma tuatuaana i nei ma au naona i mae-peu ma i riwa, “Ma inanaiai tauai am taunola a nei!”

¹⁹ Wate Joseph tauai wenanare i riwei, “Tau ega ona rovoeu, tau ega God da ana kovoḡimi.

²⁰ Wariaga o goei da ota viapoapoeniu wate God i virai da aiaina i kauai da rava maḡamaḡau i vilawani ma ega ina pupu.

²¹ Anina, ega ona rovo! Tau ana painimi, natunatumi maiteni.” Ma nanare i babani da orai i rauei.

Exodus Oputawanana

Jacob dam gaeḡaena i vitupui au Egypt

¹ Jacob natunatuna ana awawai ma natunatui anataupui maiteni i ḡaira au Egypt. Taui wawai wenanare:

² Reuben, Simeon, Levi, Judah;

³ Isakar, Zebulun ma Benjamin;

⁴ Dan, Naphtali, Gad ma Asher.

⁵ Jacob natunatuna ma ḡoḡoḡana nelarai, anataupui ai maḡa 70 i ḡaira, Joseph au Egypt maemaena maiteni i 'avi.

⁶ Muriai Joseph ma varevareina ma nai kimtana i 'raḡe-pai,

⁷ *Wate ai epaepaia - mai Israel, i vinatuna guratana da dam gaeḡaena i vitupui ma Egypt anataupuna i voiai.

Pharaoh mai Israel i rau-iviapoapelei

⁸ *Madeḡa maḡamaḡai au murina Pharaoh vouna i vibada au Egypt, ma Joseph ma aiwai i kauai eḡa ita aramanei.

⁹ Pharaoh ana rava i riwei, "Ona inana, mai Israel i maḡa guratana ma i virewapana kaua eḡa me tauta.

¹⁰ *Tauta tana viogatara da menanare tana kauanei da ai vinatuna eḡa ina rata guratana. Ma mepa da wei eḡa tana kauai ma maranai ḡavia ina nei, ma taui ḡavia maiteni ina vitagogiei da ina viḡavieta, ma ina opu-tawaneta."

¹¹ Ma nola babadai i terei da mai Israel nolei i vunuvunui. Wei babadai mai Israel i egari da taon gaeḡaei ruaga i voai wawai Pithom ma Rameses, ma kampa Pharaoh ana lam ma purapura ḡelau i vidamni.

¹² Mai Egypt amapo da taui i rau-iviapoapelei, wate mai Israel amapo da i vivinatuna ma ai dam i rarata au Egypt. Ma lamna aubaina mai Egypt mai Israel i rovoei.

¹³⁻¹⁴ Ma taui mai Israel i egari da nola vivitaina i kaukauei ma i vinuapoapoe. Ma brik i kaukauei ma doa i gwadai da brik anipasina, ma wapu nolai maiteni i kaukauei. Mai Egypt nolei mai Israel i vunuvunui ma eḡa ita rau-nuapoapelei.

²² *Pharaoh ana rava i riwei, "Maranai wavine Hebrowei tevera orotona i ḡuni, teverana au waira Nile ona tawanei. Wate maranai tevera wavinena i tupua, ona voterei da ina mae."

2

Moses i tupua

¹ Maranai wei kauai i tuputupua, oroto tagogi Levi ana damei ma wavine ana damei i ravaḡi,

² *wavine i raumanawa ma natuna orotona i ḡuni. Ma wavine i 'nanai da natuna inanana aiaina i tupua, ma natuna i tere-govaḡi da nawaravi tonuḡa i kwa.

³ Wate eḡa tagotagogina da ita teregovaḡa-nonoiei ma iriga waira modunei* voavoana i vaia ma koltei gavogavo i pasi-tomeni da waira eḡa ina rui. Ma tevera au iriga i poi ma waira modui au orai i terei au waira Nile.

⁴ Tevera tuana wavinena aueia i mae ma ana tevera i vineneḡanei da ita inanai awarina aiwai ita tupua.

⁵ Ma Pharaoh natuna gugunina i ḡairai da ita toa. Ma ana taunola waivinei waira au adana i bababara-nae. Pharaoh natuna iriga i 'nanai modu au orana ma ana taunola i paritawanei da irigana ita neiai.

⁶ Maranai Pharaoh natuna iriga i votawanei ma tevera i toutou i 'nanai, nuanuana i bolai ma i riwa, "Wei mai Hebrew natui."

⁷ Tevera tuana wavinena i nae ma Pharaoh natuna i vibaḡai, "Anina bo eḡa da ana nae ma tataovao Hebrowei ana baiei da tevera ina viḡuḡui ma ina ḡamoi?"

⁸ Wavine i vianina ma i riwa, "Anina, ma nae!" Ma tevera i nae ma alo oina i taravainiai.

⁹ Ma Pharaoh natuna wavinena i riwei, “Wei teverana ma viḡuḡui aubaiu ma ana vimaiei.” Ma wavine teverana i naiei ana au numa ma i ḡamoi.

¹⁰ *Ma tevera i eda ma i naiei Pharaoh natuna awarina ma tauna i vaini da natuna. Ma Pharaoh natuna i riwa, “Au waira a sinaepai.” Lamna aubaina ana viwawai Moses.[†]

Moses ana rovona Egypt i ruba-tawanei.

¹¹ *Maranai Moses i vilaraga, ma i nae da ana rava oina ita raugenari, ma i 'nanai menanare mai Egypt ana rava i egari da i nolanolola ma i rau-iviapoapoelei, ma i 'nanai Egyptei Hebrewei i vunuvunui.

¹² Moses i 'nana viravira ma eḡa ai ai ita inanai, anina ma Egyptei i viraḡeni ma au bubu i doboi.

¹³ Ma marana i tom Moses i naeme, da ana rava ruaḡa i viḡaiḡaiawa i 'nanai ma ḡaiawa tauvikareina i riwei, “Aiwai aubaina turam Hebrewei e raviravi?”

¹⁴ Ma orotona i riwa, “Ai ai i terem da ma vibadelai bo ma rauetaralai? Tam ma viraḡeniu me Egyptei u viraḡeni nanare bo?” Kampa Moses i rovo ma i riwa, “Rava boibogi i aramanei tau aiwai a kau ei.”

¹⁵ *Pharaoh wei riwana i nonori ma i ḡoei da menanare Moses ina viraḡenei, wate Moses Egypt i ruba-tawanei ma i nae au Midian ma waira dogona au adana i kiala.

3

Moses kampa mai Midian ai pirisi pulo tauapuna maiteni i mae, ma natuna Zippora i ravaḡi.

God Moses awarina i babani

¹ Moses poiana Jethro ana sipu ma gote i ḡamoḡamoi - Jethro lamna mai Midian ai pirisi pulo tauapuna. Mara tagogi Moses ḡamoḡamo i naiei au mutulua au gia dewadewana ma au Sinai i ḡeta, God ana au ola.

² *Kampa BADA ana anela Moses awarina i eḡa, inanana me ai menamenana, ai rugurugui au orana da i ḡeḡae. Moses ai i lebalebara i 'nanai wate aina ruguruguna maiteni eḡa ita ararai.

³ Moses i vinua-notanota, “Wei lamna aiwai? Aiwai aubaina ai e lebalebara wate ai eḡa ita ararai? Ana nae au ḡereḡerena ma ana tuvirevirei.”

⁴ Maranai BADA i 'nanai da Moses i nenei au ḡereḡere da ita tuvirevirei, God ai menamenana au orana Moses i ḡorei, “Moses! Moses!”

Ma i paribelei, “Ee, Tau weka.”

⁵ BADA i riwa, “Eḡa ma neguratanai. Wei gabuna au tepana e maimairi lamna doa vivivireina, lamna aubaina am ae uma ma votawanei.”

⁶ Tau amamam Abraham ma Isaac ai God.” Maranai Moses wei babanina i nonori i rovo kaua ma naona i tere-govaḡi da avena God naona ita inanai.

⁷ Anina ma BADA i riwa, “A inanai menanare mai Egypt natunatu e rarau-iviapoapoelei. Ma ai tou agu aubaina i ḡetai awarii da vibadabadai awarii ata vaitawanei. Menanare e vinua-apoapoelei a aramanei.”

⁸ Lamna aubaina a ḡairai da natunatu Egypt awari ana vaitawanei ma ana opunei da dobu wapuna ḡaeḡaena ma doana maumaurana ina maeni. Kampa marina mai Canaan, mai Hitti, mai Amori, mai Perisi, mai Hivi ma mai Jebus e mamae.

⁹ Ai tou a nonori. A inanai menanare mai Egypt tau i rarau-iviapoapoelei.

¹⁰ Tau a paripari-tawanem, marina ma nae vibadabadana Pharaoh awarina da mai Israel au Egypt ma taravaina-opunei.”

¹¹ Wate Moses i riwa, “Tau ai ai da ata nae Pharaoh awarina ma mai Israel ata taravaina-opunei?”

¹² Ma God i paribelei, “Tau tam maiteni ana mae. Maranai ravai Egyptei ma taravaina-opunei. Taumi wei au olana ona rauduneleu. Lamna ina vimataira da Tau a pari-tawanem.”

¹³ Wate Moses i riwa, “Maranai ana nae au rava awarii ma ana riwei, ‘Amamata ai God i paritawaneu awarimi.’ Ma tau i ina paridadaneu, ‘Tauna wavana ai ai?’ Ma aiwai ana riwei?”

* 2:10: Act 7:21 † 2:10: Moses Au Hebrew ponana ana nonora me sinaepai.

* 2:11: Act 7:23-28

* 2:15: Act

7:29 * 3:2: Act 7:30-34

¹⁴ God Moses i riwei, "TAU MAEMAE-NONOAU.* Wei mai Israel ma riwei, Tauna wavana, TAU MAEMAE NONOAU. i paritawaneu awarimi.

¹⁵ Mai Israel ma riwei, "TAU BADA, amamami ai God, Abraham, Isaac ma Jacob ai God, tauna i paritawaneu awarimi.'

—Wei Tau wavau Maemae-Nonoana, kimta anata-pui wenanare wavau ina ġorei."

Wei au murina Moses i naeme poiana ana au dobu, ma i nae au Egypt. Ma kaula anata-pui i tuputupua tuana Aaron ma Israel babadai i riwei. Ma Moses ma Aaron i nae Pharaoh awarina ma i riwei, "BADA i paritawaneia awarim da ata riwem da natunatuna mai Israel ma vianinei da ina opu au mutulua da pulo ina apui tauna awarina."

Egypt gulauna i riwa, "Tau eġa ana vianinei da nanare ina kauai. Tau i eġa aiwai ġelauna ina kauai ma ina nola."

Ma God kaula ma ġamaġauna aniba ma vi'nirovorovoi i kaukauai mai Egypt awarii, wate Egypt ai gulau amapo da i viviġa. Waira i vitara wate amapo da Egypt ai gulau kolana i vobagibagi. Mai Egypt ai ġamoġamo i vi'rairaġelana ma mai Egypt tupuai paramaitua i oai, Wate amapo da mai Egypt ai gulau eġa mai Israel ita voterei da ita nae.

11

Moses, natuevou au Egypt ai iraġe i vinolenolei

¹ Ma BADA Moses i riwei, "Anivinuabola tagogi ava ana neiai Pharaoh ma Egypt awarii. Ma au murina tauna ina voterei da ona nae ma lamna maranaina ina viaġaġana-opunemi.

² Ma nae ma mai Israel ma riwei, 'Anatapumi ona nae ma mae-turami Egyptei ona vibaġai da ai via goldei ma silvei ina veremi."

³ BADA i kauai da mai Egypt mai Israel i vivirei. Pharaoh ana gabemani babadai ma rava anata-pui au Egypt Moses i vivirana-kauai.

⁴ Ma Moses i nae ma Pharaoh i riwei, "BADA e ririwa, 'Nubautuva nanare tau Egypt anata-puna ana babarani.

⁵ Natuevou nelaarai au Egypt anata-pui ina iraġe, Pharaoh natuevouna orotona, amana ana epaepaia, awarina ina vikarei, ma ina ġaira da taunola awarina ina ġeta, waivinewiti taugudaina natunatui maiteni. Ġamoġamo natuevou anata-pui ina iraġe.

⁶ Ma dobu Egypt au anata-puna tou ġaegaena ina gae, rorova eġa nanare ma eġa melanai nanare ina tupua me.'

⁷ Wate eġa aiwai apo-poenai mai Israel awari ina tupua, eġa auou tagogi, rava tagogi, bo ġamoġamo ina gwauei. Ma kampa ona aramanei da TAU BADA, mai Israel ma mai Egypt awariei a vivilamonei.

⁸ Am gabemani babadai anata-pui ina ġairai awariu ma au naou ina mae-ġaira ma ina raudune ma ina riwa, 'Laġilaġina ma ruba-nae am rava tauvotaġotaġoim anata-pui maiteni.' Lamna au murina tau ana nae." Moses meji orana i oai ma Pharaoh i netawane.

⁹ BADA Moses i riwei, "Pharaoh tam eġa ina rautaniġanem. Wenanare ina tupua da tau kaula babai ana kauai au Egypt."

¹⁰ Moses ma Aaron kaula ġaegaie ma babai i kauai Pharaoh au matana wate BADA Pharaoh orana i vibadoi da mai Israel eġa ita paritawane.

12

Raġona karena

¹ BADA, wenanare i babani Moses ma Aaron awarii au Egypt,

²*"Marina da e nenai wei nawaravina lamna nawaravi tagogi ma weka ona vikarei da ami madeġa ona iavi.

³ Ona vinolanola mai Israel anata-pui awarii, 'Au pom ^vi—10⁻na wei au nawaravina oroto tagotagogi ava sipu ġaubona bo *gote* ġaubona ina rautani ana numa ravai aubai. Ġamoġamo tagogi numa tagogi aubaina.'

⁴ Mepa da numa tagogi ana rava i viruġa ma sia i rata guratana, lamna mae-turai maiteni sia ina ġutai rava ai maġa ma ai am ana au ruva nanare.

* **3:14:** Pona Hebrewi, *Tau maemae-nonoau* nonorana me *Yahweh*. Vipanipani au Babilon i kwa ma mai Jew i nememei au murina, tau i vitumaġana da wava *Yahweh* lamna vivivireina ma eġa ai ai ina latoni. Aubaina da ai au buka giruma ġaegaie wei wavana i girumi da eġa melanai ina latoni ma *Adonai* (bada) i latolaton i epaiana. Ma riwa BADA muomuonei i girumi lamna God wavana. * **12:2:** Ai madeġa iavana (Calenda) weka i vikarei

⁵ Ġamoġamo e rarautani lamna orotona ma ana madeġa tagogi ma aiaina eġa ana apoapoe aiwai.

⁶ Ona ġamo-kauei da au pom ^v_i-14⁻na wei au nawaravina. Ma maranai madeġa e arearere, mai Israel anatahui ai ġamoġamo ina viraġeni.

⁷ Metauna au numana sia e aniani kampa tara ina taraiġui ma metaeta au tepana, au gabaurina ma au ririvana ina pasi-naiei.

⁸ Waguvaranaina tagogina tau siana ai moniana au tepana ina apui, ma palawa eġa yist maiteni ma sipeni viviġorai maiteni ina ani

¹¹ Anatahui wenanare ona am, vaġai vigara ona vigarei: Ami ae uma ona oteni, ami jiġona au urami. Ma ona am laġilaġina. Wei lamna BADA ana Raġona torelana.

¹² –Wei waguvaraina, Tau Egypt ana naeni ma ġamoġamo da rava natuevoui ororotoi anatahui ana viraġeni, ma Egypt ai god anatahui ana tuvaidoedoei. Tau BADA.

¹³ Wate tara au metaeta ina vimataira da taumi kampa o mamae. Ma maranai wei matairana ana inana, ana raġonimi. Ma eġa aiwai apoapoena awarimi ina tupua maranai mai Egypt ana kovoġi,

¹⁴ Wei torelana ona nota-nonoei madeġana patapatana, da TAU BADA aiwai a kauei nu-anuami eġa melanai ina vuru. Ami epaepai anatahui wei marana ina vivirei ai mara au anatahuna.”

Palawa eġa yist maiteni ana torela

¹⁵ “Au pom 7 au orana Palawa eġa yist maiteni ona ani. Ma torela au karena, au numa yist anatahui ona tawanei. Ai ai da palawa yist maiteni i apui ma i ani, wei ravana anina da mai Israel ai damei ona viopuni.

¹⁶ Au pom tagogi torela au karena ona vitagogiemi ma nanare torela au damona, ma BADA ona voepapai ma ona viborumei. Wei au marai eġa ai ai ina nola dadana, Wate ami lam ava ona lauvoa.

¹⁷ –Taumi palawa eġa yist maiteni torelana ona kauei da eġa nuanuami ina vuru aubaina wei au marana, mai Israel au Egypt a taravaina-opunei. Am epaepai wei torelana ina kaukauei madeġana au patapatana.”

Raġona

²¹ Ma Moses Israel dam nununai babadai i kwatuei ma i riwei, “Ona nae ma sipu bo gote natuna orotona ona vunui ma ami numa ravai maiteni Raġona torelana ona ani.

²² Rugurugu ona turautuvi sipu au tarana au aboma ma ami numa metaetana au tepana ma au adana ona pasi. Ma eġa ai ai numa ina opu-tawanei da ubaubanai.

²³ Ma waguvarai BADA Egypt anatahuna ina naeni ma mai Egypt ai natuevou ina viraġeni. Wate maranai tara ina inana metaeta au tepana ma au adana, BADA wei numana ina raġoni ma irage-anelana ina viġaei da eġa ina rui da ina viraġenimi.

²⁴⁻²⁵ –Ma maranai BADA dohu i paripari-vainuaġanimi ona ġeta, taumi eġa nuanuami ina vuru da madeġana patapatana Raġona torelana ona kaukauei. Taumi natunatumi maiteni wei tarawatuna ona vojijina-nonoei.

²⁶ Maranai natunatumi ina paridadana, ‘Wei torelana anona aiwai?’

²⁷ Ma taumi ona paribelei, ‘Wei torelana lamna Raġona vieġualau pulona BADA awarina, aubaina wariġa au Egypt BADA mai Israel ai numa i raġoni, ma mai Egypt ai natuevou i pupuni, ma tauai natunatuai i voterei.’ Ma mai Israel i mae-ġaira au doa ma BADA i raudunelei.

²⁸ Ma mai Israel i nae ma BADA aiwai Moses ma Aaron i riweia i kauei.

Natuevou nelarai i 'raġe

²⁹ Waguvarai nubautuva BADA natuevou nelarai anatahui i viraġeni au Egypt. Pharaoh natuna, ana epaia awarina i vikarei, ma i ġaira da panipani ai natuevou nelarai awari. Ma ġamoġamo ororotoi natuevou anatahui maiteni i pupuni.

³⁰ Waguvara au pouna Pharaoh ma ana gabemani babada ma mai Egypt anatahui i vomairi. Numa tagotagogi ava au Egypt tevera tagogi i 'raġe, ma tou ma tarakwatu ġaeġaena i ġae.

³¹ Pharaoh wei waguvaraina Moses ma Aaron ai riwa i paritawanei da i nei awarina ma i egari, “Ami rava mai Israel maiteni ona vomairi ma au dohu ona oputawanei! O vivibaġei nanare ona nae ma ami BADA ona voepapai!

³² Taumi ami ġamoġamo anatahui ona vaia ma ona opu, ona nae, wate ami God ona vibaġai da ina viaiainiu.”

³³ Mai Egypt anatahui mai Israel i egari da ina vipaparana ma Egypt ina opu-tawanei ma i riwa, “Mepa da eġa ona nae tauai anatahui ana iraġe.”

³⁷ Mai Israel dohu Rameses i netawanei ma i babara-nae au Sukoth. Nelara anatahui 600,000 nanare, waivine ma roaroa eġa ita iavi.

³⁸ Patara ġaeġaena ġelauna i vomairi mai Israel maiteni. Tau i ġamoġamo boruna ġaeġaena maiteni i nae.

³⁹ Maranai mai Egypt i viaġaġana-opunei tau i eġa ai tamaina ita vokaukauei ma laġilaġina i opu, tau palawa pasipasi nonoana eġa yist maiteni i vaia ma palawa bagibagina i apui.

⁴⁰ *Mai Israel madeġa 430 i mae au Egypt.

Raġona torelana ana tarawatu

⁴³ Ma BADA Moses ma Aaron i riwei,

Raġona torelana ana tarawatu wenanare:

Dobu ġela wei torelana eġa ina ani.

⁴⁴ Ami taunola gimagimarana ma inibori i vaia wei torelana ina ani.

⁴⁵ Taomana ma taunola maia aubaina e nolanola tau i eġa ina ani.

⁴⁶ Raġona sipuna numa tagogiava au orana ona ani, ma eġa sia aiwaina ona opunei au doa ma gelamina eġa ona gai.

⁴⁷ Mai Israel anatahui Raġona torelana ina ani.

13

Natuevou vovivirana

¹ BADA Moses i riwei,

² “Natuevou nelarai au Israel anatahui ona vovivirei Tau awariu. Roaroa ma ġamoġamo natuevou ororotoi au Israel anatahui, Tau ġariuei.”

Moses mai Israel i riwei,

¹¹ “BADA ina ruiemi mai Canaan ai au dohu ma dobuna ina veremi, noinoimi i paripari-vainuaġani nanare.

¹² Natuevoumi nelarai ma ami ġamoġamo natuevou ororotoi anatahui BADA ona verei,

¹³ Wate sipu orotona BADA ona verei ma awarina *donki* natuevouna ona gimara-melei, ma mepa da eġa ona gimara-melei, lamna *donkina* uana ona gomui. Taumi natunatumi nelarai natuevou ona gimara-melei.

¹⁴ —Ma mara au murina, natunatumi ina vitara-viravira, ‘Aiwai aubaina wei ta kaukauei?’ Tam ma paribelei, ‘BADA urana vivirewapananei i taravaina-opunelai, panipani numanei au Egypt.

¹⁵ Pharaoh orana i bagibagi ma eġa mai Israel ita voterei da ita nae. Lamna aubaina BADA natuevou anatahui au Egypt i viraġeni, rava ma ġamoġamo anatahui. Lamna aubaina tau ġamoġamo natuevouna BADA a verevere ma natuevou orotona a gimagimara-melei.’

¹⁶ Wei gimara melanana lamna me mataira au uram ma au muruam e oteoteni ma wei e vivimataira da BADA urana vivirewapananei Egypte i taravaina-opunelai.”

²⁰ Mai Israel Sukoth i voterei ma mutulua au giana au Etham i mae-gubai.

²¹ Ma marai BADA i vinoa me apau maimairina ma waguvarai BADA i vinoa me tuatua araratana maimairina ma lalalainei tau i rau-etaraveni. Ma lamnei, tau marai ma waguvarai i bababara.

14

Pharaoh mai Israel i viaġaġana-opunei

⁵ Maranai riwa i ġeta Pharaoh awarina, da mai Israel i ruba. Pharaoh ana gabegabemani maiteni ai nota i virai ma i riwa, “Tauta aiwai ta kaukauei? Ma ata taunola ta voterei da i nepai!”

⁶ Anina ma Pharaoh ana chariot i vokaukauei, ma ana sorodia i vaia ma i nae.

⁷ Ana sorodia anatahui 600 vinevinei ai au chariot i geru, ma chariot ġelau i Egypt maiteni i nae.

⁸ BADA, i kaukauei da Pharaoh, Egypt ai gulau nuanuana i vopotai ma mai Israel i viaġaġana-taġoei, Mai Israel ana tepatorai i nena.

⁹ Mai Egypt ana sorodia i viaġaġa, Pharaoh ana horse ma chariot anapui ma horse babadai ma ana sorodia anapui, maiteni i viaġaġa da au gera i mamaelana, i votani dobu Pi-Hahiroth, Baal-Sephon au baba ġelauna.

¹⁰ Maranai Pharaoh i tuturiai, mai Israel i taepai da i 'nanai ma i rovo kaukua da orai i sisi, ma BADA awarina i garara agu aubaina.

¹¹ Ma mai Israel Moses awarina amlou i ġaiġai i pa, "Au Egypt eġa kokoaga da u taravaina-opunelai da weka au mutulua ana iraqe bo? Aiwai u kauai awariai?"

¹² Tauai au Egypt a riwem, 'Ma voterelai ma ana mae ma Egypt ai taunola!' I ai kaua da tauai ata mae Egypt ai panipani, ma eġa au mutulua ata iraqe."

¹³ Moses ana rava i paribelei, "Eġa ona rovo! Ona mairi jijina ma ona inana menanarena BADA ina vilawanimi amadodo. Mai Egypt amadodo o inainanai eġa melanai ona inana-melei.

¹⁴ BADA aubaimi ina viġavia. Taumi ona mae-genuatau."

Israel boga au pouna i babara damana

¹⁵ Ma BADA, Moses i riwei, "Aiwai aubaina awariu agu e toutouei? Mai Israel ma riwei da ina vidagu.

¹⁶ Am jiġona ma voepai da ma viloloi boga au tepana ma boga ina vilamonei, ma mai Israel boga au pouna doa au alalana ina babara damana.

¹⁷ Tam ma raubiga, Tau mai Egypt a vitepatorai da mai Israel ina viaġaġei. Maranai Pharaoh ana vovaiubai, ana sorodia, chariot ma ana horse sorodiali, rava Tau ina voepaepai.

¹⁸ Tau Pharaoh ana vovaiubai, ana chariot ma ana horse sorodiali da mai Egypt ina vivivireu ma ina aramanei da TAU BADA."

¹⁹ Anina ma God ana anela, mai Israel ai eta tauravenia i nae ma mai Israel au muri i mairi. Ma apau maimairina au naoi i nei ma tau i muri i mairi.

²⁰ Apau mai Israel ma mai Egypt au poui i mairi, ma maranai au i pom, apau lalalaina mai Israel i verei ma mai Egypt au waguwaguvareina i mae. Ma lamna aubaina mai Israel ma mai Egypt ai au gabu i mae-genuatau.

²¹ Moses ana jiġona i viloloi boga au tepana ma BADA kariwabu ġaeġaena i paritawanei, ma boga i vilamonei, kariwabu i ruba da mara i tom da doa boga au pouna i alala.

²² Ma mai Israel boga i damani doa au alalana, Ma boga olana i mairi au oiei ma au kelakelau.

²³ Anina ma mai Egypt, Pharaoh ana horse ġelau, chariot ma taurubeina mai Israel i votaġoi da au boga i rui, mai Israel au murii.

²⁴ Ubaubanai boiboġi BADA apau maimairina ma ai tuatwana araratana au orana ma i 'nana ġaira ma mai Egypt i viaiġoaġoi.

²⁵ Ma chariot ana aniruba i viapoapoeni da ruba i kauana-avei. Ma mai Egypt i riwa, "BADA mai Israel e vovoagui, ma e viviviġavieta, lamna aubaina tana ruba-tawanei!"

²⁶ Ma BADA Moses i riwei, "Am jiġona ma viloloi boga au tepana da boga ina nememei, mai Egypt au chariot ma sorodia horse au tepana anapui ina puru-pai."

²⁷ Madeġa i ġoġoġo ma Moses urana i viloloi boga au tepana, ma laġilaġina boga i naeme ana au gabu. Mai Egypt ita ruba wate BADA tau i boga i viorereni.

²⁸ Boga i naeme ana au gabu ma mai Egypt sorodia anapui i ruirui au boga i monu. Eġa aiai tagogi ita lawana.

³¹ Maranai mai Israel i 'nanai da BADA wei kauana vivirewapanana i kauai mai Egypt awarii, tau BADA i virirana-kauai ma i vitumaġanei ana taunola Moses maiteni.

15

Moses ana wela

¹ Anina ma Moses mai Israel maiteni wei voepaepa welana i ravi BADA awarina: Tau ana wela BADA awarina ma ana voepaepai, aubaina ana ġavia i vipupui,

ma horse ma chariot taugeruii au boga i viorerena-naiei,

² BADA au rewapana ġaeġaena,

ma welei ana voepaepai;

Tauna i vilawaniu Tauna au God ma ana voepaepai,

Amamau ai God ma lamna aubaina ana vimae-ġaeġaeni ma ana voepaepai.

³ Tauna wavana BADA.

Tauna ġavia ravana.

- 4 Pharaoh ana chariot ma ana sorodia au boga i viorereni;
Ana sorodia vinevinei au Boga Lebalabarina i monui.
- 5 Gabinou i wanaiwaği da tau i purui;
ma i monu boga au gabaurina me ġaima.
- 6 Oo BADA ura-oiem vivirewapana kaukauana,
ura-oiem am ġavia e viviaimutumutui.
- 7 Tam ġeġetelaram
ma tau i viġaviem u vovaiubai.
Am meji araratana u paritawanei
da tau i aragibui me ai ragorago.
- 8 Boga au tepana u uvena ma boga olana i mairi,
i mairi genuatau me biribiri,
ma gabinou i alala.
- 9 Am ġavia i riwa, “Ana viaġaġei,
ana vojijini,
ai purapura ma ai maura anatapui ana ġutai,
ma aiwai a ġoeġoei ana vaia,
Au sod ana lavui ma ana vipupui.”
- 10 Wate lavutumei u uvena,
ma gabinou tau i purui;
i monu me ġaima rabama au ġaeġaena.
- 11 BADA, mepa god ġelau me tam bo eġa? Eġateni!
Tam anina vivivirem,
am rewapana i rata dewadewa da tauai a rovorovoem,
Tam kau babai ma virewapanai taukaeina.
- 12 Tam uraoiem u viloloi,
ma doa am ġavia i lawani.
- 13 Am rava u vaimelai ma u rauetaraveni am nuavaina patupatutunei,
Ma am rewapanei u taravaina-naiei am au animae vivivireina.
- 14 Dobu ġelau wei riwana i nonori ma orai i sisi kaua.
Mai Philistia orai rovo ina vioai.
- 15 Edom gulagulaui ina rovo kaukaua,
Moab nelara rewapana ini ina sisi.
Canaan maemaei anatapui inii i wanagwadai.
- 16 Rovo ġaeġaena anatapui orai i oai,
uram ana rewapanei tau i mairi kwakwa me kokoitau,
ma am rava ina verautua BADA,
da ravai u vaivai-melai ina verautua.
- 17 BADA ma taravaina da am au ola ina raunuma,
Gabu u vinevineiana,
tam uramei voavoaina.
- 18 BADA ina vibada nonoa.

19 Mai Israel doa au alalana i babara damana. Wate maranai mai Egypt ai horse ma ai chariot taugerui i rui au boga, BADA waira i neiana-meleiai da anatapui i purui *Lamna aubaina Moses ana rava maiteni wei welana i ravi.*

Miriam ana wela

20 Peroveta Miriam, Aaron novuna tambourine i vaia ma waivine anatapui, tauna i votaġotaġoi ma tambourine i vikalokaloei ma i ara.

21 Miriam wei welana i ravi, “Tana raua BADA awarina, aubaina tauna ġavia i vilamolamonei ma horse ma chariot taugerui au boga i viorereni.”

Waira viviġorana i aii

22 Anina ma Moses mai Israel i taravaini da Boga lebalabarina i netawanei ma i nae au Shur mutuluana. Aupom tonuġa au mutulua i babara wate waira eġa ita nelaġai.

23 Maranai au waira vuvura Marah i ġeta da ita uma wate wairana umana i viġora da eġa ita uma, lamna aubaina wei dobu wavana Marah.*

24 Ma rava Moses awarina i pariġai i pa, “Aiwai tana umai?”

* 15:23: Au Hebrew pona *Mara nonorana me viġora*.

²⁵ Anina ma Moses i paritou BADA awarina agu aubaina, ma BADA ai tupona i viatataiei. Ma wei aina i tawanei au waira ma waira i viaini aniuma aubaina.

Nai au gabuna BADA ana tarawatu rava i verei ai lawana aubaina, ma ai votelatela i raudadani.

²⁶ BADA i riwa, “Mepa da riwau ona nonora-kauei ma kauga aiiai ona kauei au matau ma riwau anatapuna ona voteletelei, da kovoḡa mai Egypt a vereverei, eḡa ana veremi. Tau BADA tauvilawanimi.”

²⁷ Muriai tau i nei au Elim kampa vuvura 12 ma mutulua ai me pa 70 i maimairi ma kampa waira au adana i mae mara aburuna.

16

God Israel lam i verei

¹ Anina ma mai Israel Elim i netawanei ma i nae au mutulua wavana Sin, wei dobuna lamna Elim ma Sinai au poui. Egypt i opu-tawanei nawaravi tagogi ma wiki ruaga i kwa ma wei au dobuna i ḡeta.*

² Mai Israel Moses ma Aaron awarii i ḡaiḡaiawa.

³ Ma i riwei, “BADA boiboḡi au Egypt ita virageniai! Kampa sia nauai a kiala kwaviviroi ma ai ḡoanei a amam, wate taumi o taravaina-opunelai au mutulua da am-iraḡe ana iraḡelei.”

⁴ Anina ma BADA Moses i riwei, “Lam marei ana paritawana-ḡaireiai me garewa. Au pom patapatana rava ina opu ma lam au pom tagogi ruvana ava ina vaia. Wei taunei rava ana raudadani da riwau bagibagina ina voteletelei bo eḡa.”

⁵ Au pom ^v*i*—6⁻ *na* au pom ruaga ruvana ina tami da ina vokaukauei.

¹¹ BADA Moses i riwei,

¹² “Mai Israel ai ḡaiawa a nonori. Ma riwei, ‘Raviraviai taumi sia ona ani, ma ubaubanai lam ona maurei. Ma lamna maranai ona aramanei da Tau BADA ami God.’”

¹³ Raviraviai kiu iviki boruna i nei da tau i maemae lana gabuna i vioai. Ma ubaubanai ḡelauna doa anatapuna turuvani i vioai.

¹⁴ Maranai turuvani i paira ma purapura avavai me palawa nanare doa au tepana i mae.

¹⁵ Maranai mai Israel wei purapurai i ‘nanai ma i vinuanaina ma i vitara-viravira vivira i pa, “Wei aiwai?”

Ma Moses rava i riwei, “Wei aniam BADA i veremi.”

¹⁶ BADA ruwana bagibagina lamna wei, “Rava tagogi lam ana au ruva ina tuarui. Nau muomuoi ruaga[†] ruvana ona tuarui, rava tagogi au numa aubaina.”

¹⁷ Aiwai i ririweia nanare mai Israel i kauei, ḡelau ruva ḡaeḡaena i tami ma ḡelau ruva aburuna i vaia.

¹⁸ Wate maranai i ruvai ma i ‘nanai da rava anatapui ruva i vaia da tagotagogina, Tau da ruva ḡaeḡaena i tami eḡa aiwai ita mae-terei ma tau i da aburuna i tami ma i nelaḡai da lamna tagotagogina tau aubaii. Numa nununai ravai lam ruvaruvana i vaia.

¹⁹ Anina ma Moses i riwa, “Eḡa aiiai lam ina tereriei da au maratoma aubaina.”

²⁰ Wate rava ḡelau Moses eḡa ita rautaniḡanei ma lam ḡelau i tereriei ma ubaubanai motamota lam i oai ma i bova, ma Moses amlona i ḡaiḡai tau awarii.

²¹ Ubaubanai patapatana tau lam ai au ruva i tuarui, ma maranai madeḡa i vibola ma lam i viwaira da i amoa.

²² Ma au pom ^v*i*—6⁻ *na* tau i pom ruaga ruvana nanare i tuarui, ma melagai babadai i nei da Moses i parivere.

²³ *Moses tau i riwei, “BADA riwa bagibaginei wenanare i riwa, ‘Maratoma lau vitau vivireina Sabate ana mara, Tau aubaiu. Aiwai apuna o ḡoḡoḡeia amadodo ona apui ma aiwai vitavana o ḡoḡoḡei amadodo ona vitavi. Ma aiwai i mae-terei, ona tereriei au maratoma aubaina.’”

²⁴ Ma tau lam i tereriei ma eḡa ita bova ma ita motamota me Moses i ririwa nanare,

²⁵ Moses i riwa, “Wei lamna amadodo ona ani, aubaina amadodo Sabate, lau vitau ana mara vivivireina i teri BADA aubaina. Ma amadodo amapo lam au doa eḡa ona nelaḡai.

²⁶ Au pom 6 lam ona tuarui, wate au pom ^v*i*—7⁻ *na* Sabate, amapo lam eḡa ona nelaḡai.”

²⁷ Ma au pom ^v*i*—7⁻ *na* rava ḡelau i opu da lam ita tuarui wate eḡa aiwai ita nelaḡai.

²⁸ Anina ma BADA, Moses i riwei da rava i riwei i pa, “Mara biaga au tarawatu ma au viaramana ona rau-aḡaiḡai?”

* **16:1:** Mai Israel au pom 15 nawaravi tagogi (madeḡa weka iavana i vikarei) ma Egypt i opu-tawanei. † **16:16:** Hebrew ai ponei lomer ana ruva lamna 2 Ltr ruaga wei lamna ruva tagogi ana ruva. ✱ **16:23:** Exo 20:8-11

²⁹ Ona notai da Tau BADA, Sabate a veremi, ma au pom *v*ⁱ-6⁻na lam a veremi da au pom ruağa aubaina. Ma rava anapui au numa ita mae ma avena ita opu.”

³⁰ Ma au pom *v*ⁱ-7⁻na rava i vilauvitau.

³¹ Rava mai Israel wei lamna i ġorei “*manna*.”

³⁵ *Ma mai Israel manna i amam da madeğa 40 i kwa. Taui manna i amam da Canaan ana au parata i ġeta.

17

Waira kirei i opu

¹ *Mai Israel mutulua Sin i netawanei, ma mepa BADA i ririweia nanare kampa i mae-nae. Taui au Rephidim i raugaravu, wate kampa eğa waira da rava ita uma.

² Anina ma taui Moses maiteni i viparipariniġai i pa, “Waira ma verelai da ana uma!” Ma Moses i paribelei, “Aiwai aubaina o paripariniġaieu? Aiwai aubaina BADA o raraudadani?”

³ Wate rava nuanuai i arelana-kauei waira aubaina ma Moses i eni i pa, “Aiwai aubaina Egypte u tere-opunelai da natunatuia ma ai ġamoġamo maiteni nuarelana ana iraġelei?”

⁴ Ma Moses i paritoutou BADA awarina i pa, “Aiwai ana kauei wei ravai awarii? Taui ġaimi marina ina viraġeniu.”

⁵ BADA Moses i paribelei, “Israel babadai ġelau ma taravaini ma kwapu taunei Nile u raviravia ma vaia ma ma vnao.

⁶ Tau kampa au naom au kira ana maimairi au Horeb. Kira ma ravi da waira ina opu da rava ina uma.” Ma Moses nanare i kauei Israel babadai au matai.

⁷ Moses wei dobuna i ġorei Massah * ma Meribah, † aubaina weka mai Israel Moses maiteni i viparipariniġai ma BADA i raudadani maranai i riwa, “BADA weka tauta maiteni bo eğa?”

Mai Israel ma mai Amalek i viġaiġaiawa

⁸ Mai Amalek i nei ma Mai Israel maiteni i viġaiġaiawa au Rephidim.

⁹ Moses Joshua i riwei, “Rava ma vinei da ona nae mai Amalek maiteni ina viġaiġaiawa. Au maratom tau ola au tepana ana mairi ma God ana kwapu ana vovojjini.”

¹⁰ Ma Joshua mai Amalek maiteni i viġaiġaiawa me Moses i ririweia nanare. Moses, Aaron ma Hur i ġae ola au tepana.

¹¹ Maranai Moses urana ana kwapuna i voepai mai Israel i vivirewapana wate maranai urana i teretere-ġairei mai Amalek i vivirewapana.

¹² Moses urana i garigari ma Aaron ma Hur ġaima i neiaj da i terei ma au tepana Moses i kiala. Aaron ma Hur, Moses au ririvana i mae, tagogi au navanavana ma ġelauna au navanavana ġelauna ma urana i voepai ma i vojijini da madeğa i neulai.

¹³ Ma Joshua ana sorodia maiteni Amalek ai sorodia sodiei i vovaiubai.

18

Jethro poiana Moses i raugenari

¹ Moses poiana Jethro, mai Midian ai pirisi pulo tauapuna i nonori aiwai anapuna BADA i kaukaueia Moses ma mai Israel awarii; ma menanare Egypte i taravaina-opune.

⁵ Moses poiana - Jethro, Moses awana ma natunatuna nelarai ruağa i nei da Moses ita raugenari au mutulua. Weka Moses ana rava maiteni i raugaravu God ana ola au ġereġerena.

⁶ Jethro riwa i paritawanei Moses awarina da taui i nenei.

⁷ Ma Moses i opu da poiana ita nebelei. Tauna i mae-ġaira ma poiana i raudunelei ma i vigialaġolaġonei. Taui i vieġualau vivira ma i rui Moses ana au numagara.

⁸ Ma BADA aiwai i kaukaueia Pharaoh ma mai Egypt awari mai Israel aubai; ma apoapoe anapui au eta i nebelei; ma menanare God taui i vilawani; anapui poiana i pariveri.

⁹ Ma Jethro nuanuana i ai kava maranai i nonori menanare BADA aiwai anapuna aiaii i kauei mai Israel aubai maranai Egypt urai vivirewapana awariei i tere-opune.

* 16:35: Jos 5:12 * 17:1: Num 20:2-13 * 17:7: Hebrew ponanei, *Massah* anona raudadana † 17:7: Pona Hebrew, *Meribah* anona viparipariniġai

¹⁰ Jethro i riwa i pa, “Voepaepa BADA awarina. Tauna Pharaoh ma mai Egypt awarii i vai-tawanemi. Ee, Egypt urai vivirewapanana awariei i vai-tawanemi.

¹¹ Marina a aramanei da BADA i ġetelara eġa me god ġelau nanare. Aubaina BADA ġoġogulagulai mai Egypt ai kua apoapoe mai Israel awarii aubaina i kovogi!”

Jethro Moses i vinua-terenei

¹³ Ma marana i tom, Moses ana au anikiala i kiala da ita rautetara. Ma rava Moses i mairi-kwavi viroi ma i vipaipai ubaubanai da madeġa i ġaira.

¹⁴ Maranai Jethro i 'nanai aiwai anataputa Moses i kaukauei rava aubaii. Tauna i vitara-viravira i pa, “Wei aiwai rava awarii e kaukauei? Aiwai aubaina ainelam wei e kaukauei, ma wei ravai e maimairi pompom da am riwa ita nonori?”

¹⁵ Moses i paribelei i pa, “Tau wei a kaukauei aubaina rava e nenei awariu da ita aramanei aiwai God e ġoġoġe da ita kaui.

¹⁶ Maranai rava ruaga e viviamparipari. Tau i nenei awariu da a teretere-vaijijimani; ma God ana riwa ma ana tarawatu a ririwei.”

¹⁷ Moses poiana i riwa i pa, “Aiwai tam e kaukauei lamna eġa ita ai.

¹⁸ Nola e kaukaueia i vitai kua da tam ainelam eġa tagotagogina uta kaui. Tam ma rava ona voirairaġe.

¹⁹ Ma rautaniġana ma ana vinuaterenem; ma God awarim ina mae. Tam anina da rava ma raviepaiai God au naona ma ai viamparipari ma neiai awarina.

²⁰ God ana parivai-araramana ma ana tarawatu ma viararamani ma tau i viatataiei da menanare ita maenei ma aiwai ita kaui.

²¹ Wate am patara awariei nelara ġelau araramanii ma God e viviborumei ma eġa amk-walakwalai ma vinei da rava ina vibadei: ġelau rava 1,000 ina vibadei; ma ġelau rava 100; ma ġelau rava 50; ma ġelau rava 10 ina vibadei.

²² Tau i rava ai viamparipari ina tere-vaijijimani. Wate aiwai da i piripiri, ina neiai awarim. Tau i voaguim da am vita ina avarai ma ina votelatelai.

²³ Mepa da God i ririweia ma kaui amapo eġa ma voirairaġe ma rava anataputi ana nuaiiai ina nae ai au numa.”

²⁴ Moses poiana i rautaniġanei ma aiwai anataputa i ririweia i kaui

²⁵ Ma Moses mai Israel araramani i vinei da rava 1,000 i vibadei, ma 100, ma 50 ma 10 i vibadei.

²⁶ Wei babadai, rava ai viamparipari i teretere-vaijijimani ma aiwai da i piripiri i neneiai Moses awarina. Ma kua telatelai i teretere-vaijijimani.

²⁷ Anina ma Moses poiana Jethro i vieġalauei, ma Jethro i naeme ana au dobu.

19

BADA i vieġana-melei au ola Sinai

² Mai Israel Rephidim i netawanei da i nae au mutulua wavana Sinai. Ma kampa ola au karena i rauġaravu.

³ Ma Moses i ġae au ola da God ita nebele. Ma BADA ola au tepana ma Moses i ġorei i pa, “Wei mai Israel Jacob noinoina ma riwei.

⁴—Taumi matamiei o inanai aiwai mai Egypt awarii a kaui ma me manubada natunatuna au papena e avavarai nanare a avaraimi ma a neiana-melemi awariu.

⁵ *Mepa da ona voteleteleu ma au parivainuagaġana bagibagina ona vojijina-kau i lamna dam anataputi au dobu awariei taumi ana vinemi nuuanuau pouna. Avena da dobu anataputa Tau ġariuei.

⁶ Wate taumi aubaii ona vipirisi, ma ami dam ona vovivirei tau ainelau aubaii, wei babani mai Israel ma riwei.”

⁷ Ma Moses i ġaira me ma dogadogara i kwatuei ma aiwai anataputa BADA i ririwei i parivere. i

⁸ Ma rava anataputi i paribelana gogona i pa, “Tauai aiwai anataputa BADA i ririwei ana kaui.” Ma Moses ai paribelana i ġaiana-melemi BADA awarina.

⁹ BADA, Moses i riwei, “Tau apau potopotona au orana ana nei, da rava ina nonoriu Awarim ana bababani da ina vitumaġana-nonoem.” Anina ma aiwai rava i ririwei Moses BADA i riwei.

¹⁰ Ma BADA Moses i riwei, “Ma ġaira ma rava ma voagui amadodo ma au maratom da orai ina oġai da tau ina viborumeu. Ma ai gara ina oġai.

11 Ma ina vokaukua au pom vitonuina aubaina. Nai maranaina Tau ana ġairai au Ola Sinai, rava anatapui au matai.

12 Parata ma tere-kwavirovi au ola. Ma riwa bagibaginei ma riwei ma pa, ‘Ona inana-kaua da eġa au ola ona ġae bo ola ona tapedadani. Aiai da ola i tapedadani ina irage.’

13 Mepa da rava bo ġamoġamo wei paratana i voraġoni, taumi eġa nai ravana bo ġamoġamona ona vodadani wate ġaime i bo aierei ona viraġeni. Wate maranai taure ponana i rarata lamna rava ina ġae au ola.”

14 Ma Moses olei i ġaira memei ma ana rava i riwei da orai i vokaukauei da God ina viborumei ma ai gara i oġai.

15 Ma i riwei, “Ona vokaukua mara vitonuina aubaina, marina da nai marana eġa ona viawawana.”

16 Ubaubanai au pom vitonuina, waiparara, namanamara ma apau potopotona ola i purui, ma taure i tou. Maratagogi rava anatapui kampa i mamae i rovo kaukua ma i sisi.

17 Ma Moses rava i ravana-opunei da God ita nebelei. Tau i ola au karena i mairi.

18 BADA ai araratanei i ġairai ola Sinai au tepana. Ma bau potopotona olana i puru-pai. Bau kampa i ġeġae me modu potopotona e ararai nanare, ma olana anatapuna i vigugui.

19 Ma taure ponana i rarata. Ma Moses i babani ma God i paribelei ponana nonorana me waiparara.

20 BADA i ġairai ola Sinai au tepana ma Moses i kwatuei da ita ġei ola au tepana. Ma Moses i ġae.

20

God ana tarawatu 10

1 Ma God i babani ma wei riwai i latoni,

2 TAU BADA ami God, panipaniei au Egypt a taravaina-opunemi.

3 Taumi eġa god ġelau i ona raudunelei, Tau ainelau ona rauduneleu.

4 Taumi eġa aiwai au mara bo au dobu bo boga au orana dobu au gabaurina kokoitau i ona kau ei da ona raudunelei.

5 *Taumi eġa kokoitau i ona raudunelei bo ona viborumei, aubaina TAU BADA ami God ununurana. Ma taui i gedugeduaieu ana kovoġi da kimta au ^vi-4-ⁿa.

6 Wate taui aiavoi nuanuau e vaivaini ma au tarawatu e vovojjini au nuavaina maemaenonoana ana verei da kimta tausan nanare.

7 Taumi eġa BADA ami God wavana ona vinamei. Aiai da BADA wavana e vivinamei ina kovoġi.

8 *Sabate eġa nuanuami ina vuru ma ona notanotai ma ona vovivirei tau awariu.

9 Aupom 6 ami nola ona kau ei.

10 Wate au pom ^vi-7-ⁿa lamna Sabate, lauvitau marana, i vovivirei BADA ami God aubaina. Wei au marana eġa aiai ina nola: eġa tam, natum orotona bo wavinena, am taunola orotona ma wavinena, bo am ġamoġamo, ma dobuġela ravai awarim e mamae.

11 *Aubaina au pom six au orana BADA mara ma dobu i kau ei; boga ma anatapui au orana. Wate i viluvitau au pom au ^vi-7-ⁿa. Lamna aubaina BADA Sabate i viaiaini ma i vovivirei.

12 *Amam ma alom ma vivirei, da am lawana ina manawa au dobu, BADA am God e vereverem.

13 *Eġa ma viraġena.

14 *Eġa ravaġela awana ma viawawanei.

15 *Eġa ma danene.

16 *Eġa ma viwavu-moru

17 Eġa ravaġela ana numma ma vikwinei. Eġa ravaġela awana ma vikwinei, bo ana taunola orotona bo wavinena, ana bulumakau, ana donki, bo aiwai ġelau i ġarinei.

21

Rau iviapoapoe ai Tarawatu

12 “Aiai rava ġelauna i ravi da i viraġeni, nai ravana ina viraġeni.

13 *Wate mepa da i vunu-boai da i viraġeni. Tauna ina ruba dobu a vinevineia kampa.

¹⁴ Wate rava i vioga da i viragēna, ma ana lawana aubaina i ruba pulo au aniapuna, ravana ina taravaina-opunei ma ina viragēni.

¹⁵ —Aiai amana bo alona i ravi, nai ravana ina viragēni.

¹⁶ —Aiai da rava gēlauna i danenei da i gimarei bo awarina ma i nelaḡai, nai ravana ina viragēni.

¹⁷ *—Aiai da amana bo alona e parivai-apoapoeni nai ravana ina viragēni.”

22

Tarawatu am lawana aubaina

¹⁶ “Mepa da oroto wavine matatapu i gwalai da i viawawanei, ma eḡa aiai wei wavinena ita rautani da ita ravaḡi. Nai orotona wavine mataopana ina vimaiei ma ina ravaḡi.

¹⁷ Wate mepa da amana i viḡa, lamna maranai oroto matatapu ana mataopa ina vimaiei wavine amana awarina.

¹⁸ *Aiai wavinena e paraparauma lamna ina viragēni.

¹⁹ *—Aiai ḡamoḡamo i viawawanei lamna orotona ina viragēni.

²⁰ —Aiai pulo i apui god gēlauna awarina ma eḡa tau BADA awariu lamna nai ravana ina viragēni.

²¹ —Eḡa dobuḡela ravai ona ḡoa-boai, ona notai da taumi mara tagogi o mae dobuḡela ravami au Egypt.

²² —Eḡa kaikaiababa ma kedakeda ona ḡoa-boai.

²³ Mepa da nanare ona kauēi ma tau i ina tou awariu agu aubaina, Tau BADA, ai tou anina ana nonori ma ana voagui.

²⁴ Ma Tau ana meji guratana ma ḡavia au orana ana viragēnimi. Awawami ina vikaibaba ma natunatumi eḡa amamai.

²⁵ —Mepa da mane u unelei molamolakana awarina, lamna eḡa mane gēlauna au tepana ma vibaḡei.

²⁶ Mepa da rava gēlauna ana kwama u vaia da manena ina veremelem ma muriai ma vere-melei, ana kwama ma vere-melei muriai da mādēḡa ina ḡaira.

²⁷ Kwamana lamnei e purupuri da inina e vivibola. Bo aiwai gēlauna e mamae da ina vipuruei? Mepa da kwama eḡa uta veremelei ma tauna awariu i tou agu aubaina ma Tau ana paribelei aubaina Tau rau-nuapoapoeu.”

23

Rau-nuapoapoe

¹ *Eḡa riwa moru ma vituai. Ma eḡa au numa-etara moruei kaua apoapoe ravana ma voagui.

² Eḡa patara ma ḡovaivaitei ma ḡo’apoapoe ma kaukauei. Maranai au numa etara e maimairi eḡa moruei ḡo’apoapoe patarai ma voagui.

24

Israel BADA ana parivainuaḡana i vianinei

³ Moses i nae mai Israel awari ma BADA ana viararamana ma ana tarawatu anapui i riwei ma rava anapui pona tagoginei i paribelei i pa, “Tauai BADA aiwai i ririwei anapuna ana kauēi.”

⁴ Ma Moses, BADA aiwai i ririwei anapuna i girumi. Ubaubana i boiboḡi i vomairi ma pulo aniapuna i voai ola au karena ma ḡaima ḡaeḡae 12 i vimairini Israel ana dam 12 i vimatairei.

⁵ Anina ma Israel laralaragai i paritawanei da ḡamoḡamo i vununaiei ma pulo i apui BADA awarina ma bulumakau ḡelau i vunui da ai viturana ma mae-kaua pulona.

⁶ Moses ḡamoḡamo tarai navanavana i ḡunaiei au aboma ma navanavana gēlauna pulo aniapuna au tepana i voiwaiwaḡi.

⁷ Ma parivainuaḡana bagibagina bukana i vaia ma rava awarii i ’avi. Tau i paribelei, “Tauai aiwai anapuna BADA i ririwei ana kauēi, ana babani ana voteletelei.”

⁸ *Ma Moses aboma i vaia ma tara i voiwaiwaḡi rava au tepai. Ma i riwa i pa, “Wei taranei ata tarawatu i vovai-virewapani ma i vianinei.

—Maranai BADA tarawatu i veremi, Tauna parivainuaġana bagibagina taumi maiteni i kauiei.”

¹² BADA, Moses i riwei, “Ma ġei awariu au ola ma weka ma mae, ma ġaima dabadabai ruaġa au tepai, riwau ma au tarawatu a girugirumia ana verem da mai Israel ma viararamani.”

¹³⁻¹⁴ Ma Moses ana taunola Joshua maiteni i vokaukaura da ita ġae au ola. Ma Moses babada awarii i babani i pa, “Weka ona painiai da ana opu-memei. Aaron ma Hur e mamae, mepa da ami pariparigai aiwai da ona nae awarii.”

¹⁵ Ma Moses i ġeġae au ola ma apau ola i purui

¹⁶ Ma BADA ana boruma i peu au ola Sinai. Ma au pom six apau ola i purui, ma au pom au *v_i-7ⁿ* na BADA apau au orana ma Moses i ġorei.

¹⁷ Mai Israel i taepai ma ola au tepana BADA ana boruma i 'nanai me ai arata ġaeġaena ai menamenana ma bauna potopotona.

¹⁸ Ma Moses i ġae au ola ma apau au orana i rui. Ma au ola i mae au pom 40 ma waguvarai 40.

25

God ana numagara vivivireina

God Moses i riwei da rava ita parivere i da ai ġoanei ita verena, kaua maġamaġauiei da *God ana numagara vivivireina aubaina*.

⁸ “Rava Numa Gara Vivivireina ina voai, da tau i maiteni ana mae.

⁹ Numa gara ma orana purapurai ana viatataiem nanare ona voai.”

Parivainuaġana bokisina

¹⁰ “Ma bokisi ai *acaciei* ina voai, ana manawa 110 cm, ma ana dabora 66 cm, ma ana ġae 66 cm.

¹¹ Ma gold aiainei ma viaitani au orana ma au doa, ma au tepana ana via goldei ma terekwaviroi.

¹² Ma ana loji 4 ma vokaukauri ma au aena 4 ma terei; ma au baba ġelauna loji ruaġa ina mae ma au baba ġelauna loji ruaġa ina mae.

¹³ Ma ai *acaciei* anipawe ma kauiei, ma goldei ma viaitani.

¹⁴ Ma anipawe au loji bokisi au babana ma ravai, da ina pawei.

¹⁵ Anipawe au loji ina mae, eġa ina taina-lavui.

¹⁶ Ma au tarawatu ġaima dabadabai ruaġa au tepai a girugirumia bokisi au orana ma terei.

¹⁷ —Ma uġu*, gold aiainei ma kauiei, ana manawa 110 cm, ma ana dabora 66 cm.

¹⁸ Ma Cherub ruaġa ma kauiei gold gudagudanei ma uġu au giana ruaġa ma terei.

¹⁹ Ma Cherubim ġelauna au ġia ġelauna ma Cherubim ġelauna au ġia ġelauna ma kauiei da uġu maiteni ina vitagogi.

²⁰ Ma Cherubim papei au aidamo ina viloloi, ma ina vinoa vereverena, da ġo'apoapoe tauvaitawaneina uġuna ina gagaloei.

²¹ Uġu au tepana ma terei, ma ġaima dabadabai ruaġa bokisi au orana ma terei.

²² Ma uġu au tepana, Cherubim ruaġa au poui kampa tana vinenebelana da au tarawatu ana verem rava mai Israel aubaii.”

28

Ma God nanare Moses i riwei da wei purapurai i voai, *kepakepa vinevinena ma incense aniapuna goldei, ma rampa anivojġinana rampa seven aubaii*. Ma i viararamani menanare BADA ana numagara vivivireina ina voai ma au orana gara ġamoġamo opinei ina babalaraġi da gabu ruaġa, ma gabuna ana gari ina kauiei da wei gabuna ina gari-kwaikwaipipini. Ma wate maiteni i riwei da pulo aniapuna bronzei, ma aboma ġaeġaena ina kauiei anioġa aubaina.

Pirisi ai gara

¹ Ma God i riwa, Tuam Aaron natunatuna Nadab, Abihu, Eleasar ma Ithamar maiteni mai Israel awariei ma tereriei. Ma ma viaiaini da Tau aubaii ina vipirisi pulo tauapuina.

² Ma pirisi ana ġara vivivireina ma popoi vareim aubaina da inanana ina vidualaulauna ma rava ina vivirei,

³ Rava rarau-ġaroġaroi ma nauaululai, ma ġoreiai da Aaron ana pirisi garana ina popoi da ina oteni ma ina viaiaini da aubaii ina vipirisi.

* 25:17: uġu ġo'apoapoei e vivaitani

31

God ana numagara taukaueina

- ¹ Ma BADA Moses i riwei,
² “Ma inana, Tau Besalel, Judah ana damei a vinei, tauna Uri natuna, ma Hur gōgana,
³ Ma Aruau Vivivireina a verei. Ma nuaulaula ma nota ma aramana a verei da rau-
 gārogaro anatapui awari tauna tagotagogina.
⁴ Tauna tauraugaroaro amai, *Gold*, *Silver* ma *Bronze* taunoleina aiaina.
⁵ Tauna i ai kaua gāima e boribori ma e laḡalaḡai, ma amtai awarina. Tauna rau-gārogaro
 anatapuna awarina tagotagogina.
⁶ Ma nanare Oholiab a vinei, tauna Ahisamak natuna, Dan ana au dam da ana tauagu.
 Ma nanare tauraugaroaro nuaulaula ma aramana a verei da aiwai anatapuna a ririwem
 ina kauēi.
⁷ Numagara Vivivireina ma parivainuaḡana bokisi ma uḡu ma numagara ana purapura:
⁸ kepaḡepa ma ana purapura; rampa gold aiainēi ma purapura ḡelau ma incense
 aniapunana.
⁹ Pulo aniapuna ḡamoḡamo taputapuna apuna aubaina.
¹⁰ Ma gara vinualaulauna ina popoi, gara vivireina ina popoi Pirisi ḡeḡetelarana Aaron
 aubaina ma natunatuna pirisi nolana aubaina aubai,
¹¹ monamona viaiaina aubaina ma incense BADA ana numa aubaina. Tauraugaroaro wei
 purapurai ina raugaroaroēi me a ririwei nanare.”

32

Bull natuna goldei

- ¹ *Maranai rava i 'nanai da Moses barana i uama au ola, tau i nei Aaron awarina ma
 i riwei, “Ma nei ma god ma voai da ina painita. Wei ravana Moses, Egypte i neiaita weka, eḡa
 ata aramane aiwai i tupua awarina.”
² Aaron i paribelei, “Awawami ma natunatumi waivinei ma nelarai ai loji goldei ona neiāi
 awariu!”
³ Anina ma rava anatapui ai loji i votawatawanei ma i neiāi Aaron awarina.
⁴ *Tauna i vaia ma ai au menamenana i apui da i wanagwada i ma bull natuna kokoitauna
 i voai. Maranai rava wei i 'nanai ma i riwa, “Oo mai Israel wei ami god, Egypte i tere-
 opunemi.”
⁵ Maranai Aaron wei i 'nanai ma pulo aniapuna i voai bull au naona ma i vinolanola i pa,
 “Au maratom tana torela BADA aubaina.”
⁶ Ma Ubaubana boiboḡi rava i vomairi da ḡamoḡamo taputapuna i apui ma viturana maiteni
 pulona i terei. Muriai i kiala da i am gogona ma i uma-bua guratana da i kaua labalababa.
⁷ Anina ma BADA Moses i riwei, “Ma ḡaira ma am rava Egypte u tere-opunēi. Tau i geduaieu
 ma kaua apoapoena i kauēi.
⁸ Tau me marana au tarawatu i geduaieu ma bull natuna kokoitauna i kauēi. Ma i raudunēi
 ma pulo i apui awarina ma i riwa, “Wei ami god, Oo Israel, Egypte i tere-opunemi.”
⁹ Ma BADA Moses i riwei, “Wei ravai a inanai ma a aramane tau kolai bagibagii, ma
 nuapoui eḡa.
¹⁰ Ma votereu da au meji ana vikwai tau awari ma ana pupuni. Ma tam Moses ana terem
 da am epaepaia maiteni dam patarai ḡaeḡaena ona vitupui.”
¹¹ Wate Moses God i vīgigimane i pa, “Oo BADA am rewapana ḡaeḡaenei am rava Egypte
 u tere-opunēi lamna aubaina eḡa am rava awari ma meji ma ma pupuni.
¹² Mepa da ma pupuni, Mai Egypt ina riwa, ‘Ana nota apoapoena maranai i tere-opunēi da
 au ola anatapui ita pupuni.’ Meji avena, oram ina uba, ma eḡa ma vipupui.
¹³ *Am taunola Abraham, Isaac ma Israel ma notai, tam wavamei u parivainuaḡani, ‘Tau am
 epaepaia ana vimaḡai me ubona au mara ma wei dobuna a paripari-vainuaḡani ami epaepaia
 ana vere-nonoēi.’
¹⁴ Anina ma BADA orana i uba ma eḡa apoapoena ita neiāi awari.
¹⁵ Ma Moses i ḡaira me, au urana ḡaima ruaḡa dabadabai. God ana tarawatu wei ḡaimai au
 naoi ma au murii i girumi.
¹⁶ ḡaima dabadabai lamna God ana kaua. Tauna ainelana i girumi.”

¹⁹ Maranai Moses i turiai mepa rava i rauġaravu ma bull natuna goldei i 'nanai i maimairi ma rava i arari i 'nanai. Tauna meji orana i oai ma ġaima dabadabai ruaġa i viorereni au doa. I viaigimagimai ola au karena.

²⁰ Moses bull natuna goldei i vaia ma i apui ma i tutu-gwadagwadi da i vipokau ma au waira i tawanei ma mai Israel i egari da i uma.

²¹ Ma Aaron i riwei, "Rava aiwai i kauēi awarim da u kauēi da kaula apoapoe kaukauna i kauēi."

²² Aaron i paribelei, "Au bada eġa ma ġaiawa, rava ai kaula u aramanei, kaula apoapoe ai ġai.

²³ Ma i riweu, 'god ma kauēi da ina ravenita. Ma wei ravana Moses, Egypte i tere-opunelai, tauai eġa ata aramanei aiwai awarina i tupua.'

²⁴ Lamna aubaina rava a riwei, 'Aiaia awarina via goldei ona votawanei ma i veru.' Ma ai au menamenana a tawana-ruiei ma wei bull natuna i opui!"

²⁵ Moses i 'nanai da Aaron eġa tagotagogina da rava ita vibadei, ma ana ġavia ai aniv-inama i kauēi.

²⁶ Lamna aubaina ai rauġaravu au metaetana i mairi ma i garara, "Aiai da BADA au murina, ona nei awariu!" Ma Levi ana dam i nae Moses au murina.

²⁷ Ma Moses tau i riwei, "BADA, Israel ana God e ririwa. Nelara *sod* ona lavui ma ona nae ġaravu au ġiana da ona nenememei ma dam turam ma vareim ma mae-turam ma virāġeni."

²⁸ Levi ana dam Moses i voteletelei ma nai au marana nelara 3,000 i virāġeni.

²⁹ Ma Moses i riwa, "Amadodo BADA taumi i voviviremi ma i viaiainimi da aubaina ona vipirisi pulo tauapuina, aubaina taumi BADA o voteletelei da natunatumi ma vare-vareimi o virāġeni."

³⁰ Ma maratonna Moses rava i riwei, "Taumi ġo'apoapoe ġaeġaena o kauēi wate ana ġae BADA awarina da ana kauana dadanei da ami ġo'apoapoe ina nota-tawanei."

³¹ Anina ma Moses i ġae me BADA awarina ma i riwa, "Au rava kaula i apoapoe ġaġa i kauēi. Tau i ai god goldei i kauēi ma i raudunelei!"

³² Wate marina BADA a vivibagaim da ai ġo'apoapoei ma nota-tawanei ma mepa da eġa lamna avena ma wavau am au buka ma boa-tawanei."

³³ Ma BADA Moses i paribelei, "Aiavoi ġo'apoapoei i kauēi awariu, Tau wavai au buka ana boai.

³⁴ Marina ma nae, rava ma naiei dobu a ririweia ma au anela ina ravenim. Wate mara ina ġeta da ana kovoġa, tau i ai ġo'apoapoe aubaina ana kovoġi."

³⁵ Ma BADA doria apoapoenei rava i kovogġi aubaina tau i god bull natuna Aaron i voai i raudunelei.

34

Ġaima ruaġa

¹ BADA, Moses i riwei, "Ġaima ruaġa dabadabai ma bori inanana me ruaġa u wamawamaia, ma au tepana riwana tagogina ana girumi me au naona.

² Ma vokaukauna ma ubaubanai ma ġei ola Sinai au tepana ma nebeleu."

⁴ Ma Moses, ġaima ruaġa i bori me au naona nanare. Ubaubanai boibogġi ġaimai i voai ma i ġae au ola BADA i ririwei nanare.

⁵ Ma BADA apauei i ġairai ma au ririvana i raumairiei, ma wavana i latoni, "BADA!"

⁶ *Ma Moses au naona i babara ma i viġoreġore, "TAU MAEMAE NONOANA! Tau rararunuapoapoeu ma iviu aiaina, tau eġa laġilaġina amlou ita voġaiġai.

⁷ Au nuavaina maemaena ina mae au rava awarii da kimta tausana ina kwa ma kaula apoapoe, mae-ġaeġae ma ġo'apoapoe ina nota-tawanei. Wate tauna eġa kaula apoapoe taukauei ita inana-tawanei, natunatumi ma ġoġoġai, amamai i kaukauei kovogġana e vaivaia da kimta vitonuina da vi-four-na."

⁸ Moses maratagogi i mae-peu au doa ma BADA i viborumei.

⁹ I riwa, "Au bada mepa da riwa kaula da tam nuanuau u vaia, a vivibagaim da uta vinao ma tata nae. Wei ravai orai badobadoi, wate ai kaula apoapoe ma ai ġo'apoapoei ma nota-tawanei, ma ma vai-meleiai am buderi."

Parivainuaġana bagibagina i ravivouni

¹⁰ BADA, Moses i riwei, "Ma rautaniġana! Au parivainuaġana bagibagina tam maiteni a kaukauei am patara Israel maiteni. Ma au matami kaula ġaeġae aniba kauai ana kauēi. Eġa melanai ai ai wenanare ita kauēi au dobu. Rava anatapui au ririvami e mammae, au rewapana ina inanai da tau, BADA kaula ġaeġae ana kauēi aubaimi."

²⁸ Moses kampa i mae BADA maiteni au pom 40 ma waguvarai 40, eġa ita am ma eġa ita uma nai au marana. Ma BADA ġaima au tepana parivainuagana riwai - Tarawatu 10 i girumi.

Moses naona i lalai

²⁹ Moses ġaima ruaġa au tepai parivainuagana riwai i vinimavoei ma ola Sinaiei i ġairai. Wate eġa malana ita vaia da naona i lalalai aubaina tauna BADA maiteni i babani.

³⁰ Aaron ma Israel patarai i 'nanai da Moses naona i lalalai ma awarina naena i rovoei.

³¹ Wate Moses tauri i ġorei, ma Aaron ma dogadogara i nei awarina, ma awarii i babani.

³² Ma mai Israel i riei Moses awarina ma tarawatu ola au tepana i vereverei rava i pariverei.

³³ Moses naona garei i purui maranai awari i babani-vorovei.

³⁴ Maranai Moses e ruirui au numagara da BADA maiteni ina babani, ġarana naona i purupurui lamna, e vovotawanei. Ma e opuopu memei ma BADA aiwai i riwei mai Israel e paripariverei,

³⁵ ma mai Israel, i 'nanai da Moses naona i lalalai. Lamna maranai Moses naona i purumelei da ina rui me da BADA awarina ina babani.

40

Ma Moses rava i vibaġai numa voa purapurai BADA ana numa ġara vivivireina voana aubaina, ma wate purapura vivivirei numa au orana bada vimae-ġaeġaenana aubaina, ma pirisi ai gara popona aubaina, ma rava i amverena da tagotagogina da nola ita vikwai. Bezalel ma Oholiab ma rava nolanolai nelara ma waivine wei purapurai i kauiei me BADA i ririwei nanare.

Numa gara vivivireina i vikwai

¹ Ma BADA Moses i riwei,

² "Au Numa Gara Vivivireina ma vimairini aupom tagogi, madeġa au vouna.

³ Tarawatu 10, Parivainuagana bokisina au orana ma poai, ma au naona anitereġaġara ma teretaġonei da numa garana ina babalaraġi.

⁴ Teibol ma ruiei ma au tepana aiwai i kaukauei aubaina ma terei. Ma rampa anivovijjinana ma ruiei, ma rampa ma terei

⁵ Ma incense aniapuna goldei ma terei bokisi au naona ma anitereġaġara ġelauna ma terei da BADA ana numa gara vivivireina ina gudui.

⁶ Numa gara au metaetana, au doa, pulo aniapuna ma terei.

⁷ Anirauoġa numa gara ma pulo aniapuna au poui ma terei ma waira ma vioai.

⁸ Numa gara ma pulo aniapuna anitereġaġara ma tere-kwaviviroi da dobuna ma gari. Ma au anirui anitereġaġara ma vidawei.

⁹ —Ma oil viaiainana ma vaia ma numa gara ma purapura anatapui au orana ma buloi ma ma vovivirei da vivivireina.

¹⁰ Ma pulo aniapuna ma ana purapura maiteni ma buloi ma ma vovivirei da vivivireina.

¹¹ Anioġa abomana ma ana animairi maiteni ma buloi ma ma vovivirei da vivivirei.

¹² —Aaron natunatuna ma neiai numa gara vivivireina au metaetana ma wairei ma oġai.

¹³ Ma Aaron pirisi ana gara vivivireina ma vioteni ma oilei ma vovivirei da aubaiu ina vipirisi pulo tauapuina.

¹⁴ Ma natunatuna ma neiai ma pirisi pulo tauapuina ai gara ma vioteni.

¹⁵ Ma ma buloi me amai u buloi nanare da ina vipirisi pulo tauapuina. Wei viaiainana Aaron ana epaepaia i vovivirei da mara nonoa kimtana patapatana awari ina vipirisi pulo tauapuina.

¹⁶ Moses anatapuna i kauana-paiei me BADA i ririwa nanare.

¹⁷ —Anina ma madeġa au viruaina au pom tagogi nawaravi tagogi, tauri numa gara vivivireina i vimairini.

¹⁸ Moses dogo i ġarai ma tuatua i tonei ma terewaba ma anitapejjinana i ragini.

¹⁹ Ma gara ġamoġamo opinei i ġauġauri au tepana i ebani, BADA i ririwei nanare."

²⁰ Anina ma Moses ġaima dabadabai ruaġa bokisi au orana i terei. Ma anipawe loji au orana i vionaġi bokisi au adana, ma uġuna i viaitani.

²¹ Ma bokisi i ruiei God ana au numa gara vivivireina ma anitereġaġara i terei da bokisi i mae-ġaġari, BADA i ririwei nanare.

²² Ma nanare teibol i ruiei God ana au numa gara, anitereġaġara i mae ma au doei, au laubadei i terei

²³ ma teibol au tepana palawa i pulopuloei BADA awarina i terei, BADA i ririwei nanare.

²⁴ Rampa aniterenana i vaia ma au numa gara teibol au naona, au babaġela au rauanaġei i vikialai.

²⁵ Ma rampa i apui BADA awarina, me i ririwei nanare.

²⁶ Incense aniapuna goldei aniteregāgara au naona i terei numa gara vivivireina au orana.

²⁷ Anina ma au tepana incense gābuḡabui i apui, BADA i ririwei nanare.

²⁸ Ma aniteregāgara i terei da aninae au numa gara vivivireina i gudui.

²⁹ Pulo aniapuna BADA ana numa gara vivivireina au metaetana. Au tepana gāmoḡamo ma palawa i apui me BADA i ririwei nanare.

³⁰ Ma aboma gāeḡaena numa gara ma pulo aniapuna au poui i terei, ma au orana waira i waḡi anioḡa aubaina,

³¹ ma kampa Moses ma Aaron ma natunatuna urai ma aei i oḡai.

³² Tau i aei ma urai e oḡaoḡai maranai e ruirui au numa gara bo e nena pulo au aniapuna.

³³ Ma Moses Numa gara ma Pulo aniapuna i gari-kwaviviroi. Ma aniteregāgara i terei au anirui. Anina ma Moses ana nola i kwa.

BADA ana Numa Gara Vivivireina viborimana

³⁴ Ma apau BADA ana Numa Gara Vivivireina i purui ma ana boruma numana i vioai.

³⁵ Apau numa gara vivivireina au tepana i kiala ma BADA ana boruma numana i vioai ma lamna aubaina Moses eḡa tagotagogina da ita rui.

³⁶ Ma apau i vovoepa lamna maranai mai Israel ina vaḡai au dobuḡela.

³⁷ Ma mepa da apau eḡa ita voepa lana tau i eḡa ina nae.

³⁸ Maranai mai Israel e vaḡavaḡai, BADA ana animae apau au orana numa gara vivivireina au tepana ma waguvarai tauna ai apau au orana e ararata.

Leviticus Levi ai kaua

Wei bukana wavana Leviticus, aubaina Levi ana dam e bababaniei. Taui pirisi pulo taupuna i vovoagui. Ma BADA ana Numa Gara Vivivireina i paipaini.

Pulo taputapuna apuna

¹ BADA au Numa gara Vivivireina ma Moses i kwatuei ma i riwei i pa,

² “Wei au pariverena pulo apunana aubaina. Mai Israel ma riwei ma pa, ‘Aiai da BADA awarina gamogamo e apuapui, lamna bulumakau tagogi bo sipu bo gote i gamogamo ina nei ai ana pulo.

³ –‘Mepa da gamogamo taputapuna e apuapui am pulo, ma inai da gamogamo orotona aiaina ma ega ana apoapoe aiwai. Ma nei ai Numa gara Vivivireina ana au anirui, da BADA ina vianinem.’

⁴ Ma uram gamogamona au kolana ma terei, wei e vivimataira da gamogamo i raviepaiaam da ina irage am go’apoapoe ina oga-tawanei.

⁵ Ma bulumakau BADA au naona ma viraḡeni, ma pirisi Aaron natunatuna tara, ina nei ai da pulo aniapuna au adana ina voiwaiwaga-naiei.

⁶ Anina ma Gamogamo ma opai ma ma api.

⁷ Ma Aaron natunatuna, ai ina viviri pulo aniapuna au tepana.

⁸⁻⁹ Taui sia apiapina ai araratana au tepana ina terei da ina arai, kolana da monamona maiteni. Wate amoamo da ganigani ma sia aei wairei ina oḡai, ma pirisi siana anapapuna ina apui. Wei pulona apuapunana lamna gabuna aiaina BADA ina vinuaiaini.”

Wate God Moses i riwei da rava sipu bo gote, gabubu bo bunebune ita puloei me pulo e apuapui nanarena. Tauna wate Moses i riwei da menanare wei ina puloana-nei.

3

Vieḡualau pulona

¹ BADA Moses awarina i babani i pa, “Aiai da nuauba amna aubaina ana pulo bulumakau e apuapui, ma inana-kauei da burumakauna orotona bo wavinena, aiaina ma ega ana apoapoe aiwai.

² Ma urana gamogamo au kolana ina terei ma ina viraḡeni Numa Gara Vivivireina ana au anirui. Ma pirisi Aaron natunatuna tara pulo aniapuna au adana ina voiwaiwaga-naiei.

³⁻⁴ Ma amoamo monamona ava ma kaina monamona ma ganigani ana monamonana, pirisi ina verei da ina apui nuauba pulona.

⁵ Ma Aaron natunatuna wei monamonai sia taputapuna e ararai au tepana ina terei ma ina apu-tagogiei, pulo aniapuna au tepana. Wei amgogona pulona ma gabuna i ai kaua BADA awarina.”

Ma gamogamo taupuloina ana numa ravai maiteni ma ai rava ḡelau sia mae-terenai e aniani. Wei lamna BADA ana babani bulumakau aubaina ma riwana tagogina sipu ma gote aubaii amgogona pulona.

13

Opi dorianana tarawatu

¹ BADA Moses ma Aaron i riwei i pa,

² “Mepa da ai ai kero bo paramaitua i vaia bo opina i lebara ma e notanotai da wei kerona e vivipidoriana, lamna ana rava tauna ina naiei pirisi Aaron bo natuna tagogi awarina.

³ Pirisi kero vioana ina inana. Mepa da apara au kero e vivimairiana i arapoiri ma dogona i ḡaira lamna opidoriana. Ma pirisi ina riwa da tauna ega aiaina BADA au matana.

⁴⁵ –Rava ai ai opidoriana i vaia, tauna gara wanasikasikana ina oteni, aparana ega ina jinai ma naona ina purui ma ina kwatu ina pa, ‘Tau ega ai ai! Ega ona nei au ririvau!’

⁴⁶ Maranai dorianana awarina e mamae lamna tauna anina miramirana, Tauna ainelana ina mae au tano.”

17

Tara ana tarawatu

¹⁰ ✨ Aiāi Israelieina bo jentail maiteni o mamae, sia taratarana e aniani, BADA tauna ina mae-puputei ma ana rava awariei ina bori-tawanei.

¹¹ Aiwai anātapui da lawalawāi ai lawana au tarai e mamae ma lamna aubaina BADA i riva da tara pulo au aniapuna ona voiwāiwaği da rava ai ġo'apoapoe ina vaitawanei. Tara lamna lawana, ma lamnei ġo'apoapoe e vaivai-tawanei.

18

Viawawana ana tarawatu

¹ BADA Moses i riwei i pa,

² “Mai Israel awari ma babani ma ma riwei, ‘TAU BADA ami God.’

³ Mai Egypt ai kauhā eġa ona ġovaivaitēi, Wariġa kampa o mae, marina a taratara-vainanaieimi au Canaan ma ai kauhā eġa ona ġovaivaitēi. Eġa ai lawana ona votaġotaġoi.

⁴ Taumi au tarawatu ona voteletelei ma riwau ona votaġotaġoi. Tau BADA ami God.

⁵ Mēpa da au tarawatu ma riwau ona voteletelei taumi lawana ona nelaġai. TAU BADA a riva.”

⁶ TAU BADA wei au babani bagibagii a vereverēmi, “Eġa aiāi novuna bo vareina ina viawawanei.

¹⁹ —Maranāi wavine nawaravi i vunui tauna miramirana, eġa maiteni ma viawawana.

²⁰ —Eġa oroto ġelauna awana maiteni ma viawawana, lamna tam u vimira-melem.

²¹ —Natunatumi eġa ona puloei god Molek* awarina, aubaina TAU BADA ma vinimala e neineiāi awariu.

²² —Eġa aiāi orotona, oroto ġelauna ina viawawanei, me oroto waivine e viawawanei, wei lamna ġo'apoapoe kaukauana God au matana.

²³ ✨ —Eġa aiāi orotona ġamoġamo ina viawawanei bo wavine ina verena-melei da ġamoġamo ina viawawanei. Mēpa da wei u kauēi tam u vimira-melem.

²⁴ —Eġa wei kauai ona kauēi da ina vimiramiraimi. Dam au Canaan maemaēi anātapui wei kauai i kauēi ma i vimira-melei. Lamna aubaina ana viaġaġana-opuneī ma taumi ona rui.”

19

Apoapoe terevai-jijimānina riwai

¹ Ma BADA Moses i riwei i pa,

² “Dam Israel anātapui ma tuarui ma ma riwei, ‘Taumi lawana vivivireina ona maeni. Aubaina Tau BADA ami God vivivireiu.’

¹⁷ —Eġa oram ina raviāpiai kauhā apoapoea ravana awarina, wate maiteni ona kiala da kauhā ona tere-vaijijimāni, da eġa ġo'apoapoe ona kauēi.

¹⁸ ✨ —Eġa ma raubiwa am rava awariī, eġa aiāi ma ġoaġaieī, wate rava turam nuanuam ina vaia me tam nuanuam e vaivai-melei. TAU BADA.”

20

Konaġa riwana

⁶ Aiāi ravana i ġoei da kauhā anoī ita aramāni, lamna Tau ina vibaġaiu. Eġa vinuaterena aubaina ina nae konakonaġa awariī ina bababani. Mēpa da aiāi wei i kauēi, nai ravana ana mae-puputei, ma au rava awariei ana viopuni.

24

Vimaimāia riwana

¹⁹ Mēpa da aiāi turana i vikeroi, aiwai i kaukaueia awarina nanare ina kauēi.

²⁰ Mēpa da ġelama i viaigai, ġelamina tagogi ina wanagai, mēpa da mata tagogi i viapoapoei, matana tagogi ina apoapoei. Mēpa da ivo tagogi i viaigai, ivona tagogi ina wanagai. Aiwai kerona rava ġelauna i verei, tauna nanare ina kero.

²¹ Aiāi ravana ġamoġamo i viraġeni ina vimaieī, wate aiāi da rava i viraġeni, tauna ina iraġe.

²² Wei tarawatuna taumi anātapumi aubaimi, mai Israel ma dobu ġela ravai, aubaii TAU BADA ami God.

Numbers Au Mutulua

Pariverena

Wei bukana wavana *Numbers*, aubaina au kapita 1 da kapita 4 e ririweta da Israel ana dam 12 ma ai dam nelara biağa sorodia. Wei bukana nanare Mai Israel ai mae au mutulua madeğa 38 i kwa, ma aiwai i kaukauei bo ai babara au Sinai i vikarei da i nae au Canaan lamna e bababaniei.

6

Aaron natunatuna maiteni ai Viaiaina

- ²² BADA Moses i riwei i pa,
²³ “Aaron ma natunatuna ma riwei da wenanare mai Israel ina viaiaini ina pa,
²⁴ BADA ina viaiainimi
 ma ina gagaloemi.
²⁵ BADA ivina ina ai awarimi
 ma ina paina-kauemi.
²⁶ BADA ana nuaiaina ina mae-tavirei awarimi
 ma nuauba ina veremi.
²⁷ Ma nanarena, maranai Aaron ma natunatuna Tau wavauei mai Israel e viviaiaini, ma Tau ana viaiaini.”

13

Taurauivu Canaan i tuvirevirei

- ¹ BADA Moses i riwei i pa,
² “Mai Israel ai dam 12 au orai rewapana tagotagogi ava ma vinei, da ma paritawanei da Canaan dobuna ina ivui, wei dobuna mai Israel a vereverei.”
³ Ma BADA i ririweia nanare Moses i kauiei. Mai Israel ai dam 12 babadai i paritawanei. Tau ai garavu au mutulua Paran i voterei da i nae au Canaan.

¹⁷ Maranai Moses ravai i paritawanei da dobuna ita ivui ma i riwei i pa, “Au Negev ona virautua da dobu violaolana ona naeni da au navanava gelauna.

¹⁸ Dobu ona tuvirevirei, ma ana patara ona inanai menanare, rava ai mağa ma ai rewapana bo ai gōkokokara?

¹⁹ Doa maumaurana bo eğa? Ai melagai ona tuvirevirei, garigarina bo e mamae lota?

²⁰ Doa maumaurana bo eğa? Ai e gogogo bo eğa? Ma ona kauana-guratei da ai anoi gelaui ona purai da ona neiai.”

²¹ Anina ma tau i dobuna i naeni, au mutulua Zin* i vikarei ma dobuna i naeni da au gia dewadewana au Rehob, wei lamna Lebo Hamath au geregerena.

Taurauivu i nememei

²⁵ Au pom 40 taurauivu dobu i tuvirevirei ma i nememei,

²⁶⁻²⁷ I nei Moses, Aaron ma Israel patarai awari au Paran mutuluana au Kadesh ma ai anoi au dobuna i vaivaia i viatataiei. Ma i pariverei i pa, “U paritawanelai da dobuna a ivui, marina grape ana gōu marana ma a inanai da ani ipi gabuna aiaina ma doa maumaurana, ma aina anoi gelaui a neiai da ona inanai.

²⁸ Wate kampa rava gaiğaiawai e mamae, ma ai melagai i rata kua ma i gari-kwavirovi da eğa gavia ina rui. Ma kampa mai Anak a inanai.

²⁹ Mai Amalek au mutulua Negev e mamae, ma mai Hitti mai Jebus ma mai Amori au ola e mamae ma mai Canaan au gera, Jordan wairana au ririvana e mamae.”

³⁰ Ma Caleb, rava i riwei da i genuana ma i riwa i pa, “Tana nae dobuna ravai tana virubai ma dobuna tana vaia!”

³¹ Wate taurauivu maiteni i geğae i pa, “Eğa! Ravai i virewapana kua eğa me tauta. Eğa tana viğaviei.”

³² Ma nanare tau i dobuna ana apoapoe riwana i vibabarai mai Israel awari i pa, “Nai eğa ani ipi doana aiaina ma rava manamanai ma gaiğaiawai kampa e mamae.

* **13:21:** Wei lamna dobu gaeğaena Negev au paratana i vikarei da i nae da ola Hermon au geregerena ma Hamath melagaina.

³³ Ma kampa rava ġaiġaiwai **Mai Nephili**† a inanai (Mai **Anak** noinonii) tauai a inana-meleia lamna me kapau ma nanare tauai au matai lamna tauai me kapau.”

14

Mai Israel Moses ma Aaron i viġaviei

¹ Ma nai waguvaraina rava anapupui i tou mara.

² Tau anapupui **Moses** ma **Aaron** i viġaviei i pa, “Airake au **Egypt** ata iraġe ota! Bo weka au mutulua.

³ Aiwai aubaina BADA e nainaieta wei au dobuna da ravai sodei ina viragēnita ma awawata ma natunatuta ina pani-naiei. I ai kua da tata wanavira ita au **Egypt**.”

⁴ Ma tau i babani vivira i pa, “Bada tana vinei da ina naiana-meleta au **Egypt**.”

⁵ Anina ma **Moses** ma **Aaron** i mae-ġaira da naoi au doa **Israel** patarana au matai.

⁶ **Nun** natuna **Joshua** ma **Jephune** natuna **Caleb** ruaġai, tau maiteni dobu i tuvirevirei, ai gara i sikai,

⁷ ma mai **Israel** anapupui i riwei, “Dobuna anapupunana a naeni ma a tuvirevirei ma dobu maumaurana.

⁸ Mepa da BADA nuanuana ina ai awarita ma ina ruieta dobuna maumaurana awarina, weka sia ma lam eġa anibaiana.

⁹ Wate BADA eġa ona viġaviei. Ma ravai dobuna e maemaeni eġa ona rovoei, tana viaġaġana-opunei. Tau ai agu eġa. Tauta BADA maiteni ta mamae! Ravai eġa ona rovoei!”

¹⁰ **Mai Israel Caleb** ma **Joshua** ġaimei ita viragēni wate BADA ana borumana i eġa numagara au tepana.

God Moses i riwei da ita wanavira ma ana rava ita taravaina-naiei au mutulua da etanai e nena au Boga lebalebarina ita naeni.

God i riwa da rava ina kovoġi

²⁶ BADA **Moses** ma **Aaron** i riwei,

²⁷ “Wei ravai apoapoe ai beura awariu a nonora, iauei! **Mai Israel** ai pariviravira awariu a nonori.”

²⁸ Wenanare ma paribelei, “BADA i riwa, ‘Tau wavauei a ririwa da aiwai o vivibaġei, nanare ana kauiei.”

²⁹ Taumi au mutulua tupuami urabovai ina nae. O pari-virevireu aubaina taumi ami madeġa 20 ma e ġeġae ona iraġe.

³⁰ A parivainuagami da wei au dobuna ota mae wate eġa ai ai tagogi wei au dobuna ina rui anina **Jephune** natuna **Caleb** ma **Nun** natuna **Joshua**.

³¹ Ma o ririwa da natunatumi ina vaia ai panipani, wate tau kampa ana ruiei da dobuna o gedugeduaieia ina maeni.

³² Wate taumi patarami tupuami au mutulua ina bova-nae.

³³ *Eġa ota vipatutu ma lamna aubaina natunatumi ina vinuapoapoe au mutulua ma ina kovoġi da ina viġamoġamo-nae da madeġa 40 ina kwa nai maranaina taumi kimta magurimi ona iraġe-pai.

³⁴ Aupom 40 dobuna o tuvirevirei lamna aubaina ana kovoġimi da madeġa 40, au pom tagogi maiana madeġa tagogi. Ami ġo’apoapoe aubai au kovoġa malana ona vaia.

³⁵ TAU BADA, A riwa! Tau wei ana kauiei taumi ġo’apoapoe ravami anapupui awarimi. Ami rava maiteni o vitagogiemi ma o viġavieu. Taumi anapupui au mutulua ona kwa, taumi weka ona iraġe.

20

Miriam i 'raġe

¹ Nawaravi au vouna mai **Israel** anapupui au mutulua **Zin** i ġeta ma au **Kadesh** i rauġaravu. Weka **Miriam** i 'raġe da i doboi.

Mai Israel Moses maiteni i viparipariniġai

² *Kampa Waira eġa ma lamna aubaina tau i vitagogiei ma **Moses** ma **Aaron** ai ġavia i vomairi,

³ ma **Moses** maiteni i viparipariniġai i pa, “Rorova varevareiai maiteni ata iraġe tagogi BADA au matana!”

⁴ Aiwai aubaina BADA ana rava u neiai au mutulua ana ġamoġamo da ina iraġe

† **13:33**: Mai Nephili eġa tata aramana-kauiei, wate tau rava gogogobui. Gen 6:4 e ririweta da tau meiei i nei. * **14:33**:

Act 7:36 * **20:2**: Exo 17:1-7

⁵ Aiwai aubaina Egyptei u tere-opunelai ma u neiai wei dobuna apoapoena awarina? Weka eġa ani ipi doana aiaina da witi da damala aina bo grape warami bo Pomegranates aina ina gogo, ma eġa waira aniuma!

⁶ Moses ma Aaron, patara i voterei ma i nae BADA ana numagara au metaetana ma i maepeu au doa ma i raudune. Ma BADA ana borumana i eġa.

⁷ Ma BADA Moses i riwei,

⁸ “Am jġona ma vaia ma tuam Aaron maiteni rava ona vitagogiei. Ma au matai kira awarina ma babani ma ana waira ina veremi. Nanare waira kirei ina opu da Israel patarana ina uma ai ġamoġamo maiteni.

⁹ Anina ma Moses jġona BADA au naona i vaia, i ririwei nanare.”

Moses kira i ravi

¹⁰ Ma Moses ma Aaron dam Israel i vitagogiei kira au naona ma Moses i riwa, “Ora potapotami! Ona genuana! Tauai waira kira au orana ana tere-opuniai aubaimi!”

¹¹ Ma Moses ana jġona i voepai ma kira i ravi mara ruaġa. Ma waira ġaeġaena i ruba-opu da rava ma ġamoġamo i uma.

¹² Anina ma BADA, Moses ma Aaron i riwei, “Taumi eġa ota vitumaġana-kau eu da Tau viviviremi ami dam Israel au matai, ma lamna aubaina taumi eġa wei ravai ona ruiei dobuna a vereveremiana awarina.”

Aaron i 'raġe

²³ Au ola Hor, Edom ana au parata, kampa BADA Moses ma Aaron i riwei,

²⁴ “Taumi riwau o rauġaiġaiei au Meribah ma lamna aubaina, dobu mai Israel a vereverei, Aaron kampa eġa ina rui. Tauna noinoina ina votaġoi.

²⁵ Aaron ma natuna Eleasar ma taravaia ma ma ġaei au ola Hor.

²⁶ Kampa Aaron ana pirisi garana ma votawanei ma natuna Eleasar ma vioteni. Aaron kampa ina iraġe ma noinoina ina votaġoi.”

²⁷ Moses BADA i ririwei i kau ei. Taui ola i ġaeni, mai Israel anatapui au matai.

²⁸ Moses Aaron ana pirisi garai i votawanei ma natuna Eleasar i vioteni. Ma kampa ola au tepana Aaron i 'raġe. Ma Moses ma Eleasar i ġaira memei.

²⁹ Maranai patarana i aramanei da Aaron i 'raġe ma i touei da au pom 30.

21

Mota bronzei i kau ei

⁴ Taui ola Hor i netawanei ma boga lebalebarina etanaina i vaia da Edom ita vorei. Au etanai rava amloi i ġaiġai aubaina ai vaġai i manawa,

⁵ Ma Moses ma God i eni i pa, “Aiwai aubaina Egyptei o taravaina-opunelai da au mutulua ana iraġe? Ai lam eġa! Ai waira eġa! Ma wei lam tagogina manna a amgeduaiei.”

⁶ Ma BADA mota ġaiġaiawai i paritawanei awari ma maġamaġau i ani ma i 'raġe.

⁷ Rava i nei Moses awarina ma i riwa, “Tauai ġo'apoapoena a kau ei maranai BADA ma tam a parivireviremi. Ma raupari da BADA mota ina vaitawanei.” Ma Moses i raupari rava aubaii.

⁸ Ma BADA Moses i riwei i pa, “Mota ġaiġaiawana kokoitauna ma kau ei ma ai au damona ma raġini. Maranai mota, rava aiai i ani ma i taepai da mota kokoitauna i 'nanai, ma tauna ina lawana.”

⁹ Ma Moses mota bronzei i kau ei ma ai au damona i raġini. Maranai mota aiai i ani ma ravana i taepai da mota i 'nanai ma i lawana!

Au Ola Hor da i nae au Moab

¹⁰ Mai Israel i nae ma au Oboth i rauġaravu.

¹¹ Ma Oboth i netawanei ma i nae au Iye-Abarim i mae, wei lamna mutulua, Moab au naona au maramatanei.

¹² Kampa da i nae Zered au wapuna i rauġaravu.

¹³ Ma wei dobuna i netawanei ma i nae waira Arnon au baba ġelauna au mutulua mai Amori ai au parata. (Moab ma Amori ai dobu au poui wei wairana e viviparata).

Mai Israel, gulau Sihon i vovaiubai

²¹ Ma mai Israel taupariverena i paritawanei da Sihon mai Amori ai gulau i pariverei i pa,

²² “Tauai a gōei da am au dobu ata verautua. Tauai ega ana dega ami au wapu bo grape wapuna, bo ami au waira dogona waira ana umai. Tauai gulau ana au etanai ava ana babara da am dobu paratana ana opu-tawanei.”

²³ Wate gulau Sihon mai Israel ega ita vianinei da ana au dobu ita verautua. Ma ana sorodia anata-pui i tami ma i nae au mutulua da Israel ita nebelei. Au Jahas i geta da Israel maiteni i viḡaiḡaiawa.

²⁴ Wate mai Israel i virewapana ma gulau Sihon i viubai ma ai dobu waira Arnon i gae da waira Jabok ana parata i vaia, wei kampa mai Ammon au dobu e viviparata. Mai Ammon ai parata i gagaloana-kauei ma lamna aubaina mai Israel ega ai au dobuma ita rui.

²⁵ Ma mai Israel i viḡavia da, mai Amori ai melagai i vaipai da i maeni, taon Heshbon ma melagai gelai kampa maiteni i vaia.

Mai Israel gulau Og i vovaiubai

³¹ Nanare mai Israel mai Amori ai dobu i vaia ma kampa i mae

³² Ma Moses tauivu i paritawanei da Jaser taon i tuvirevirei, ma muriai mai Israel i nae ma ai melagai anata-pui i vaia ma mai Amori kampa maemaeni i viaḡaḡana-opunei.

³³ Ma mai Israel i vira ma etanaie i gae au Bashanei. Ma Bashan ai gulau Og ai sorodia anata-pui maiteni i opui da tau i nebelei au Edrei.

³⁴ Ma BADA Moses i riwei i pa, “Ega tauna ma rovoei, aubaina tauna, ana rava anata-pui, ma ai dobu maiteni au uram a tereterei. Aiwai u kauei Amori ai gulau Sihon awarina, au Heshbon taon, nanare gulau Og awarina ma kauei.”

³⁵ Ma gulau Og i viraḡeni natunatuna nelarai ma rava anata-pui i viraḡena-pai, ega ai ai ita mae. Ma mai Israel dobuma i vaia da ai dobu.

22

Balaam Israel gaḡalana i geduaiei

¹ Ma mai Israel i vomairi da Moab au wapuna, Waira Jordan au adana i rauḡaravu, ma au baba gelauna Jeriko taon.

² Ma mai Israel aiwai i kauei mai Amori awari, Zippor natuna Balak anata-puna i 'nana-pai.

³ Mai Israel i maḡa kaua ma lamna aubaina mai Moab i rovo kaukaua, rovo ita iragelei.

⁴ Ma mai Moab mai Midian babadai i riwei i pa, “Aburuna ava ma wei patarana aiwai anata-puna au ririvata ina pupuna-pai, me bulumakau au wapu modu e amam.”

⁵ Anina ma Moab ai gulau Balak, Beor natuna Balaam ana riwa i paritawanei au Pethor, waira gaegaena wavana Euphrates au ririvana. Ana riwa wenanare, “Dam tagogi Egyptei i opu, ma dobu anata-puna e vaivaia ma marina au ririvau i rauḡaravu.

⁶ Tau i virewapana kaua ega me tau, ma nei ma ravai ma parivai-iviapoepoeni, mepa da tau ravai ana vovaiubai ma wei dobumeni ana viaḡaḡana-opunei. Aramanei da maranai tam rava e viviaiai tauna viaiaina e vaivaia ma maranai u parivai-apoapoepoeni tauna ina apoapoe.”

⁷ Ma Midian ma Moab babadai mane i vaia Balaam vimaiana aubaina ma i vomairi. Ma i geta Balaam awarina ma Balak ana riwa i pariverei.

⁸ Balaam ravai i paribelei i pa, “Weka ona matave ma au maratam BADA aiwai ina riweu ana pariveremi.” Ma babadai kampa Balaam maiteni i mae.

⁹ God i nei ma Balaam i vitara-virevirei i pa, “Aiavoi i nei awarim?”

¹⁰ Balaam i paribelei, “Zippor natuna Balak, Moab ai gulau wei riwana i paritawaneiai i pa,

¹¹ ‘Ma rautaniḡana dam gaegaena Egyptei i opui ma dobu anata-puna e vivioai. Ma nei ma aubai ravai ma gaḡalei, da maiteni ana viḡaiḡaiawa ma ana viagegei da ina vinelana.”

¹² Wate God Balaam i riwei i pa, “Ega maiteni ma nae. Ega wei ravai ma gaḡalei aubaina Tau au viaiaina awarii.”

¹³ Ubaubanai Balaam i nae ma Balak ana taupariverena i riwei, “Ona nae me ami au melagai! BADA ega ita vianineu da maitemi tana nae.”

¹⁴ Ma Moab babadai i nae me ai bada Balak awarina ma i riwei i pa, “Balaam ega ita goei da ita nei.”

Anina ma Balak babada gaegaeni i paritawanei Balaam awarina. Ma i riwei da pulo gaegaena ita verei mepa da tauna ita nei da mai Israel ita gaḡalei. Ma marina God Balaam i riwei da babadai maiteni ita nae Balak awarina ma God aiwai i riwei lamna ava ita kauei.

²¹ Ma ubaubanai Balaam i vomairi ana donki i vokaukauei ma Moab babadai maiteni i nae.

²² Wate God amlona i ǵaiǵai kaua da Balaam i nenaē, ma ana anela i paritawaneī da ana etanai i mae-tomeni. Balaam donki i gerui ma ana taunola ruaǵa maiteni i nenaē.

²³ Ma maranai donki BADA ana anela i 'nanai ana sodna au etanai i maimairi ma i tawana-ruiei au ririva. Balaam donki i kwakwapui da ita opu me au etanai.

²⁴ Ma BADA ana anela etanai ǵuriguṛirina i mae-potai, Grape ǵoroǵoroṛovai epaepana ruaǵa ǵaimeī i garigarua au poui.

²⁵ Maranai donki BADA ana anela i 'nanai ma ita deǵa lamna Balaam aena au gari i viairaturatui. Ma Balaam donki i kwapu-melei.

²⁶ Ma BADA ana anela i nae ma etanai au ǵuriguṛirina i mairi, weka eǵa gabu ita mamae-dadana da tauī ita deǵa.

²⁷ Maranai donki anela i 'nanai, i mae-ǵaira da i kiala, Balaam amlona i ǵaiǵai kaua ma ana jǵgoneī donki i kwapui.

²⁸ Anina ma BADA donki gamona i votawaneī da i babani i pa, "Aiwai apoapoena a kauēi awarim da mara tonuǵa u kwapuii?"

²⁹ Balaam donki i riwei i pa, "Tam u vikalokaloēu me bua! Awariu sod lamna marina ata viraǵenim."

³⁰ Ma donki Balaam i riwei i pa, "Tau donkina tagogina marana patapatai u gerugeruii bo? Wenanare a kauana dadaneī awarim bo eǵa?"

Balaam i riwa, "Eǵal"

³¹ Ma BADA Balaam matana i vikalai da ana anela i 'nanai ana sodna i maimairi au etanai. Ma i mae-ǵaira au doa ma i raudune.

³² Ma BADA ana anela i riwa i pa, "Aiwai aubaina am donki mara tonuǵa u ravi? Ma nonori am vaǵai lamna eǵa aiaina, Tau a nei da ata viǵaem.

³³ —Mara tonuǵa am donki i 'nanaiu ma mara tonuǵai i deǵe. Mepa da eǵa, lamna tau ata viraǵenim ma donki ata voterei."

³⁴ Ma Balaam BADA ana anela i riwei i pa, "A kauana-boai. Eǵa ata aramaneī da tam au etanai u maimairi da uta viǵaeiu. Marina mepa da u notai da eǵa ita ai au matam, tau ana nae me."

³⁵ BADA ana anela i riwa i pa, "Ravai maiteni ma nae, wate aiwai ana riwem lamna ava ma latoni." Anina ma Balaam, Balak ana babadaī maiteni i nae.

23

Mara tonuǵa Balak pulo i apui Balaam ana god awarina da mai Israel ita ǵaǵalei. Wate marana patapatai Balaam eǵa mai Israel ita ǵaǵalei. Ma God aiaina ita kauēi mai Israel awariī lamna ava i babaniei. Balaam mara 4 God ana babani mai Israel awariī i babaniei. Wei lamna ana babani viruaina.

¹⁸ Ma Balaam wei riwana i riwei i pa, "Balak, Zippor natuna ma vomairi;

ma Ma rautaniǵana kaua.

¹⁹ God eǵa rava ota, Tauna eǵa ita morumoru.

Bo ana nota ita viravirai.

Tauna aiwai i babaniei,

nanare ina tupua

Aiwai i parivainuāǵani;

nanare ina kauēi.

²⁰ I riweu da wei ravai ana viaiaini;

maranai God e viaiaina, tau eǵa tagotagogina da ana virai.

²¹ BADA ai God

tauī maiteni e mamae, ma tauī e vovoeapaepai da Tauna ai gulau.

Tauna eǵa nuabola bo apoapoe ita neineiai Jacob ǵoǵoǵana - mai Israel awari.

²² God tauī Egypteī i tere-opunei,

Aubaiī i viǵavia me bulumakau moduei.

²³ Eǵa aiāi Israel ina ǵaǵalei,

bo ina baravui.

Marina rava ina riwa,

'Ona inanaī God aiwai i kauēi mai Israel aubai.'

²⁴ Mai Israel lamna me Lion vivirewapanana.

E vovomairi da ana ǵavia e viviraǵeni

ma tarana e umaumai,

Anina ma ina rauvirai da ina matave."

24

Anina ma Balaam mara vi-four-na God riwana i babaniei, i pa:

17 “God i viatataieu da rava muriai e nenei,
a inana wate eġa laġilaġina ita nenei,

Jacob ana damei gulau ana jiġona

Ana borumana me ubona gamrina Israelie i opupu.

Moab muruai ma Seth natunatuna
anatapui kolai ina viaigwadagwadai.

18 Ana ġavia Edom ina vovaiubai
ma ai dobu ina vaia,
ma mai Israel ina virewapana guratana.

19 Gulau, Jacob ana damei ina nei
ma mai Moab mae-tereterei ai au melagai ina pupuni.”

25

Mai Israel, Baal i raudunelei

1 Maranai mai Israel au Shittim i mamae, nelara i vikarei da Moab waivinei i viawawanei.

2 Wei waivine, nelara i riwei da i nei da ai god awarii puloi i apuapui.* Ma anatapui i am
gogona ma ai godna i raudunelei.

3 Wei kauanei mai Israel Baal-Peor i voepaepai ma lamnei BADA ana meji i vikalai.

4 BADA Moses i riwei i pa, “Babadai anatapui ona vaia ma madeġai BADA au matana
ona viraġena-naiei, da tau au meji awarimi ina dauva.”

5 Ma Moses Israel babadai i riwei i pa, “Taumi tagotagogi ava ami au dam anatapui da
Baal-Peor i raudunelei ona viraġeni.”

6 Moses ma Israel patarana BADA ana numa gara au metaeta i toutou, ma au matai oroto
Israelie wavine Midiane i taravaina-ruiei ana au numa gara.

7 Maranai Aaron goġana pirisi wavana Phineas wei kauana i 'nananai, boru i voterei ma
pawasi i lavui,

8 ma Israel iei i votaġoi da ana au numa gara ma pawasiei uporana i tonai da wavine au
uporana i opu-vivira. Ma doriana apoapoena au Israel i kwa.

9 Wate wei gimna rava 24,000 i virageni.

10 BADA Moses i riwei i pa,

11 “Aaron goġana pirisi Phineas au meji mai Israel awari i viubai; da tau i eġa ata pupuni
aubaina tauna ana nota me tau au nota, rava eġa god ġelau ina voepaepaei anina Tau ava.

12 Lamna aubaina tauna ma riwei da maiteni parivainuagana bagibagina ana kauēi da ata
ruaġa tana viturana vivira.

13 Tau aubaiu ina vipirisi nonoa.”

27

God Joshua i vinei

18 *Muriai BADA Moses i riwei i pa, “Aruau Nun natuna - Joshua awarina, lamna aubaina
ma taravaini ma uram au tepana ma terei da ma vovivirei au nola aubaina.

19 Ma naei Pirisi Eleasar awarina, Israel patarana anatapui au matai ma ma viaiaini da
ina raviepaiem.

20 Ma vovai-virewapani da Israel patarana tauna ina rautaniġanei.

21 Tauna Pirisi Eleasar maiteni ina nola da ġaima e ġoreġorei urim,* awarinei au nota
ina vaivaia. Wei taunei Eleasar, ma Joshua ina aġui Israel ai au lawana.”

22 Ma BADA aiwai i ririwei, Moses nanare i kauēi. Joshua i taravaini ma Pirisi Eleasar ma
Israel patarana au naoi i vimairini.

23 Ma urana au tepana i terei ma i vinei da ana raviepaia.

* 25:2: Wei kauai lamna god ġelauna i raudunelei, ma lamnei Moab waivinei ai vitumaġana nanare i eraerawa. Maranai
Israel nelarai wei waivinei maiteni i viviawawana, tau ai god Baal i raudunelei ma i vovogui da ai dobu ita viaiaini da
ita maura. * 27:18: Exo 24:13 * 27:21: Urim lamna ġaima aburuna. Ma nai ġaemana pirisi e viviatataiei da God
ana nota i ririweta. Tauta eġa tata aramanei 29-30 Exodus ma inana.

33

God mai Israel i egari da Canaan ina vaia

⁵⁰ Mai Israel Moab au wapuna, waira Jordan au ririvana i mamae ma, mai Jeriko au baba ġelauna. Ma BADA Moses i riwei,

⁵¹ “Wei riwai mai Israel ma riwei, ‘Maranai Jordan o damani da au Canaan,

⁵² Dobuna taumaenina anatapui ona viaġaġana-opunei. Ai gana da ai kokoitau anatapui ona rika-viamoamoai.

⁵³ Dobu a veremi ona vaia, ġariemi da ona maeni.

⁵⁴ Doa ona ġutai dam damai awarii, au ġaima ina viatataiem nanare. Doa vounaina dam vounaina ona verei ma dam voaburuna nanare ana ġuta voaburuna. Wate ġaimi ana pariveremi metauna damna, metauna doana ina vaia. Dam anatapui doa ina vaia.

⁵⁵ —‘Wate mepa da nai dobuna taumaenina eġa ona viaġaġana-opunei ma o vianinei da ina mae, tau lamna me vunavuna au matami bo donadona au ririvami maemaena, ma wei vita ġaeġaena ina veremi wei au doana.

⁵⁶ Mepa da ravai eġa ona viaġaġana-opunei. Lamna taumi ana pupunimi me a viogei da tau ana pupuni.”

35

Anigagalo melagaii

⁹ Ma BADA Moses i riwei i pa,

¹⁰ “Mai Israel ma riwei, ‘Maranai Waira Jordan o damani da au Canaan o rui,

¹¹ melagai ġelau oni vinei da rava ai aniġaġalo. Maranai rava turana i vunu-boai da i ‘raġe, tau weka ina ruba da ina galaloei.’

¹² Ona riwei, ‘Weka ma mae da raubiwa ravai eġa ina vodadanim ma rauetara ma paini.’”

Deuteronomy Tarawatu Viruaina

Pariverena

Moses wei au *bukana* mai Israel i parivere i menanare ina kauanei maranai au Canaan ina rui da ina vaia da ina viġariei. Moses eġa maiteni au dobuna ina rui ma lamna aubaina i vitauririwei muriai da tauna ita iraġe. I parivainotai menanare God tau i Egyptei i taravaina-opuneiai ma au mutulua i 'nana-vaitetei. I riwana-melei menanare God ina voteletelana-kauei maranai i rui au Keinan.

Mai Greece ai ponei, wei bukana wavana* anona Tarawatu Viruaina, aubaina Moses marina mara viruaina God ana tarawatu mai Israel e vereverei. Wei lamna eġa tarawatu vouna bo tarawatu tapuna ma tagogina.

4

Moses mai Israel i egari da God ina voteletelei

¹ Ma Moses, Israel i riwei i pa, "Mai Israel Ona rautaniġana kaua! Au Tarawatu ma au viararamana anatapui ona votelatelana-kauei da ona lawana da BADA, noinoita ai God, dobu i vereveremi, ona vaia da ina viġarimiei.

² BADA ana tarawatu a ririwemi, eġa tarawatu ġelau i tepana ona viruini ma eġa ona vaitawanei. Anina ona voteletelei."

⁶ Tarawatui ona vojijina-kauei da dam ġelau i ami nuaulaula ma ami aramana ina inani. Ma tarawatu ina nonori ma ina riwa, "Riwa kaua da dam Israel lamna dam nuauaulaulai ma araramani.

⁷ Ata BADA au ririvata ma e vovoaguita maranai ta raraupari awarina. Metauna damna ġelau, ġaeġae bo muomuoi, ai God nanare ai rava awarii e kaukauei.

⁸ Tarawatui aiiai ma jijimani anatapui amadodo a ririwemi, Eġa mepa dam ġelauna aburuna bo ġaeġaena ana tarawatu jijimanina me wei."

³²⁻³⁴ Maranai BADA urana vivirewapananei Egypt ei i tereopunemi, tauna kaua babai ma viwewapanai i kauei. Mai Egypt i vipupui aubaimi. Ma i vainimi da natunatuna, ma au ola Sinai o nonori awarimi i babani, ma o nonori ai menamena au orana ma awarimi i babani, ma lawalawaimi o mae! Wenanare wariġa i tupua dadana awarii bo eġa? Eġa! Ona nae me da au karena, maranai God oroto ma wavine i kauei da marina; ma dobu au giana da dobu ġela au giana ona baiei. Kaua wenanare aniba i tupua-dadana bo eġa?

³⁹ Amadodo ona aramanei ma eġa melanai nuanuami ina vuru da BADA lamna God au mara ma au dobu. Eġa god ġelauna ita mamae.

⁴⁰ Ana tarawatu amadodo a vereveremi anatapuna ona voteletelei. Da aiwai anatapuna ina ai taumi ma ami epaepaia au murimi ma ami mae ina manawa wei au dobuna BADA e verevere-nonoemi.

6

BADA ami God nuanuami ina vaia

⁴*"Ona rautaniġana Oo Israel! BADA ata God, Tauna ava BADA.

⁵ *Nuanuami ina vaia orami anatapune i ma aruami anatapune i, ma ami rewapana anatapune i.

⁶ *Wei tarawatuna amadodo a vereveremi ona vojijina-kauei.

⁷ Natunatumi ona viararamani. Ona babaniei maranai o viboruboru numa au orana bo o bababara-nae, bo muriai da ona matave bo o matave-vomairi."

7

BADA ana rava vinevinei mai Israel

¹ *Ma Moses mai Israel i riwei, "Maranai BADA ami God i ruiemi dobuna i vereveremiana; Tauna au naomi ami ġavia anatapui ina viaġaġana-opune i: mai Hitti, mai Girgash, mai Amori,

* :: Deuteronomy ✧ 6:4: Mrk 12:29 ✧ 6:5: Mrk 12:30 ✧ 6:6: Deu 11:18-20 ✧ 7:1: Act 13:19

mai Canaan, mai Perisi, mai Hivi, ma mai Jebus. Dam seven ġaeġaei ma vivirewapana kauai eġa me taumi.

² Ma maranai BADA ami God tauri au urami i terei ma o vovaiubai lamna taumi wei ravai ona pupuni. Eġa maiteni aiwai babanina ona kauai; ma eġa ona rau-nuapoapoelei.

³ Eġa awarii ona tavine. Eġa natunatumi guguinii bo laragai ona verei da ina ravaġi.

⁴ Aubaina natunatumi ina raveni da BADA ina voterei ma god ġelau i ina raudunelei. Ma BADA ana amloġaigai awarimi ina nei ma ina pupunimi.

⁵ Wenanare awari ona kauai. Ai pulo aniapuna ona viairikarikai ma ganai ona viaigwadagwadai; ma Asherah kokoitauri ona viaigagai ma ai au menamenana ona apui.

⁶ *Aubaina BADA taumi i vinemi ma i viaiainimi Tauna aubaina. BADA rava maġamaġau au dobu ma taumi i vinemi da ġarinei.

⁷ —Ma BADA eġa ita rauoġarem ma ita vinem aubaina taumi dam patarana ġaeġaena, eġa me dam ġelau. Riwa kaua da taumi dam aburuoia au dobu.

⁸ Wate BADA nuanuami i vaia ma parivainuaġana bagibagina noinoimi maiteni i kauai. Ma lamna aubaina urana virewapananei panipani au orana i vai-melemi, Pharaoh - mai Egypt ai gulau awarina.

⁹ *Ona aramana-kauai da BADA ami God. Tauna ava God ma tauna God vipatutuna ma aiwai e ririwei e kaukai. Tauri da nuanuana e vaivaia ma ana babani e vovoteletelei, Tauna tauri nuanuana e vaivai-kauai ma e viviaiaina-kauai i parivainuaġani nanare da kimta tausani.

¹⁰ Wate taumi da BADA o rauaġaigai; Tauna eġa ina volatelatemi ma ina pupunimi.

¹¹ Nanare taumi ona inana-kauai da tarawatu ma viaramana anatapai amadodo a vereveremi ona voteletelei.”

8

BADA ami God eġa nuanuami ina vuru

² Moses ana rava i riwei i pa, “Nuanuami eġa ina vuru; menanare BADA ami God au mutulua i ravenimi da madeġai 40 da volaġota ota aramanei ma orami ana rewapana ita inana. Ma ita aramanei ana tarawatu ona voteletelei bo eġa.

³ Ee nanare! I viamiraġenimi da o volaġota ma mannei i viambagibagim. Amamami maiteni manna o vinuanainei; eġa mepa ota amdadani. I kauai da ita viaramanimi da rava eġa lam ava awarinei ita mamae, wate riwa anatapai BADA gamonei e opuopu.

¹² —Maranai o amam kaua, ma numa aiiai o maemaeni,

¹³ ma maranai ami bulumakau ma sipu borui e maġamaġa, ma e vivipurapura; ma e maumaura-kaua.

¹⁴ Ona inana-kaua da eġa ona mae-ġaeġae, ma nuanuami ina vuru! Da BADA menanare Egypt ei panipani au dobuna i tere-opunemi.

¹⁵ I taravaina-naieimi au mutulua ġaeġaena ma vi'nirovovona mota ġaigaiawai ma tanara ai dobu. Dobu paipairana ma eġa waira. Wate i kauai da kira i ravi ma waira i ruba-opu taumi aubaimi.

¹⁶ Au mutulua *manna* i veremi da o am; amamami nai lamna eġa ita am-dadani. Wei lamnei i raudadanimi da ota volaġota; da au damona ami lawana ita ai.

¹⁷ Ona inana-kaua da eġa au nuanuami ona riwa, “Tauri ai rewapanei ma ai egolei a vivipurapura ma a maura.”

¹⁸ Wate BADA am God eġa nuanuami ina vuru aubaina tauna tepanei ta maumaura, ma lamnei parivainuaġana bagibagina noinoimi maiteni i kaukai e rarauano.”

11

God aiwai i kaukaeia ona notai

¹⁸ *Moses mai Israel i riwei, “BADA riwana eġa nuanuami ina vuruvuru ma ae-tuġuna ona rereġi. Ona girumi da au urami ona raġini ma ġelau au muruami ona raġini ami mataira.

¹⁹ Natunatumi ona viaramani, ona babaniei: ami au viboruboru bo maranai o bababara bo o vililauvitau ma maranai o vovobagibagi.

²⁶ —Ona inana! Au naomi viaiaina ma kovoġa a tereterei, ma tam am ġoana.

²⁷ Marina BADA ami God ana tarawatu a vereveremi. Mepa da Ona votaġotaġoi; tauna ina viaiainimi.

²⁸ Mepa da ana tarawatu ona geduaiei ma ona mae-taviremi ma god ġelauai ona viborumei; BADA ina kovoġimi.

³² Lamna aubaina tarawatu ma viararamana a vereveremi, ona kauana-kauei da ona voteletelei.”

17

Gulau vinena

¹⁴ “Maranai BADA ami God dobu e vereveremia o ruiuriana, ma o vaia, ma numa o voanaiei da o maeni. Ma ona riwa, ‘Dam ġelauai ai gulau e mamae ma tauta menanare?’

¹⁵ Ona inana-kauei da BADA ami dam nununai awariei ami gulau ina vinevinei, ma eġa dobu ġela ravai ona vinei.

¹⁶ Ma tauna eġa ana horse maġamaġauai ina ġamoi. Ma eġa rava ina paritawanei au Egypt da horse ina gimarai. Aubaina BADA i riwa da natunatuna eġa melanai ina naeme kampa.

¹⁷ “Ma gulau eġa awawana ina maġa, ma eġa gold ma silver ina maurei da nuapouna ina vinua-raġaraġai.

¹⁸ Ma maranai i vigulau, tauna pirisi Levi ana damei maiteni ina kiala da nimanei tarawatu bukana ina giruma tauna aubaina.

¹⁹ Wei bukana au ririvana ina mae ma ina iava-nonoiei ma lamnei BADA ina vivirei ma ana tarawatu ina vipatutuei.

²⁰ Ma lamnei eġa ina terepa-melei ma ana rava ina inana-ġairei bo eġa tarawatu ina mae-puputei ma ina deġa au kelakelauna bo au oiena. Ma tauna ma ana epaepaia ina mae gulau au Israel da kimta maġamaġauai ina kwa.”

18

BADA wei kauai i geduaina-kauei

⁹ Maranai BADA dobu i vereveremiana o ruiurui, eġa dobuna taumaeni ai kava apoapoe ma vinimalamai ona ġovaivaitei.

¹⁰ “Eġa melanai:

ai ai tam natum orotona bo wavinena ma verenei da pulo aubaina ina apui;

bo ma vimata gangam, mataira aiwai ma inainanai ma muriai aiwai ina tupua, rava ma ririwei;

bo ma parauma;

bo ma ġaġala;

bo ma vigwerigweri;

¹¹ ma eġa konaġa bo arua maiteni ma babani bo arua ma ġorei da ina rui awarim.

¹² BADA tau i wei kauai apoapoe e kaukauei, i geduaina-kauei. Ma lamna aubaina aburuna ava Tauna rava wei dobuna maemaiei ina viaġaġana-opunei au naomi.

¹³ Marana patapatana BADA ami God ona voteletelei.

¹⁴ Wei ravai barabaravui ma paraparaumai. Wate aburuna ava da ai doa anatapuna ona kwalei. Ma BADA ami God e vivigaemi da wei ravai eġa ai kava ona ġovaivaitei.

God Peroveta me Moses ina paritawaneiai

¹⁵ “BADA ami God, Peroveta me tau ami damei ina paritawaneiai. Taumi nai ravana ona rautaniġane i.

¹⁶ Aubaina taumi wei lamna o vivibaġei maranai o vitagogiemi ola Horeb au karena ma o riwa, “Eġa BADA ponana tana nonori bo ai ġaeġaena menamenana tana inana-melei da tana vi’raġeraġelana.”

¹⁷ BADA i riweu, “Ai vibaġa i ai.

¹⁸ Tau ai damei peroveta ana terepai me tam nanare, Ma riwau au gamona ana terei, da aubaiu ina vitau-vibabani.

¹⁹ “Tauna wavauai ina jima, ma pariviravirai ana kovoġi.

²⁰ Wate maranai peroveta i mae-ġaeġae ma e ririwa da wavauai e jimajima wate tau eġa babani ata verei, bo god ġelauai aubai e nolanola, Nai perovetana ona viraġeni.

²¹ Mepa da o vinuanaina, ‘Menanare tana aramanei da lamna eġa BADA ita babani?’

²² Wenanare ona aramanei. Maranai peroveta i babani BADA au wavanei ma anona eġa ita tupua lamna nai babanina tauna ana babani ma eġa BADA. Lamna tauna ana vinuanotanota, nai ravana eġa ona rovoei.”

31

Joshua Moses i raviepaiai

⁷ Ma Moses Joshua i kwatuei da i nei. Ma Israel patarai au matai i riwei i pa, “Ma virewapana ma tepam ina tora. Tam wei patarai ma rui ei dobu BADA noinoim i verevereiana. Dobuna ma ġutai da Israel dam ma patai ma ma voagui da ina viġariei.

⁸ ✧ BADA Tauoina awarim ina mae ma am etanai ina raveni. Eġa melanai ina netawanem bo ina voterem. Lamna aubaina eġa ma rovo bo oram ina peu!”

34

Moses i 'raġe

¹ Ma Moses Moab wapuna i netawanei ma ola Nebo i ġaeni da au tepa dewadewana e ġoreġorei Pisgah, ma au navanava ġelauna lamna Jeriko. Weka au Pisgah BADA Moses dobu anatapuna i viatataiei, au Gilead i vikarei da i ġae au Dan.

² Ma dobu Naphtali, dobu Ephraim ma dobu Manasseh, dobu Judah, ma i nae da au Mediterranean bogana.

³ Ma BADA Moses mutulua e ġoreġorei Negev i viatataiei; ma Jordan gaubana da i nae da au Jeriko da i nae da au uama Zoar melagaina.

⁴ ✧ Ma BADA i riwa, “Wei dobuna lamna Abraham, Isaac ma Jacob a parivainuaġani da ‘ami epaepaipaia ana verei.’ A voterem da dobu matamei u inana i, wate au dobuna eġa ma rui.”

⁵⁻⁹ Muriai Moses urana Joshua, Nun natuna au kolana i terei ma i viaiaini ma nuaulaula orana i ruini. Ma lamna aubaina mai Israel Joshua i voteletelei Moses i ririweia nanare. Ma BADA ana taunola Moses, i 'raġe mai Moab ai au dobu, BADA i ririwei nanare.

Joshua

Pariverena

Wei *bukana* e ririweta da menanare mai Israel i rui au Canaan da rava kampa maemaei i vovaiubai. Ma nanare e ririweta da mai Israel menanare dobu i ġutanei ai dam 12 awari. Wei *bukanawavana* Joshua aubaina bukana au karena e ririweta da aiwai aubaina da Joshua i terei da mai Israel ai bada, maranai Moses i 'raġe.

BADA, Joshua i vinei

¹ Maranai BADA ana taunola Moses i 'raġe; ma Joshua, Nun natuna ma Moses ana tauagu i riwei,

² “Au taunola Moses i 'raġe. Marina mai Israel maiteni ona vokaukawa ma Jordan ona damani da dobu a vereveremiana kampa ona ġeta.

³ Metaui dobu i ae-lalpalapami o terei, lamna ina viġarimiei, Moses wenanare a parivainuaġani.

⁴ Ami dobu lamna mutulua Negev da Lebanon; au waira Euphrates (au maramatanei) da mai Hitti ai dobu anapuna da i ġaira madeġa e arearere lana Mediterranean au bogana.

⁵ *Eġa aiāi ina vobelem bo ina viubaim am au lawana. Tau awarim ana mae, me Moses awarina a kaukauei nanare. Tau eġa melanai ana tere-ġairem bo ana voterem.

⁶ *—Parivainuaġana bagibagina a kauēi wei ravai noinonii maiteni da wei dobuna ana verei. Lamna aubaina ma virewapana ma tepam ina tora ma am rava ma ruēi wei au dobuna.

⁷ Anina ma virewapana ma tepam ina tora; ma nuanuam eġa ina vuru da tarawatu Moses i verem, anapuna ma voteletelei. Ma ma vojjiina-kauēi da awarina eġa ma deġa au oiem bo au kelakelaum da aiwai anapuna e kaukauei ina ai.

⁸ Marana patapatai wei tarawatuna ma iaiavi. Ma marai da waguvarai ma vinua-notenotei; wei lamnei tarawatu anapuna ma aramane. Mepa da wenanare ma kauēi lamna tam ma maura ma nuaiāi ġaeġaena ma nelaġai kaua au anapuna.”

5

Raġona naona au Canaan

¹⁰ *Mai Israel au Gilgal i mae Jeriko au wapuna. Ma Aupom vi-14-na aubigai nawaravi naona tui raġona torelana i apui.

¹¹⁻¹² *Ma ubaubanai ġelauna, raġona au murina, tui witi au wapu i tuarui ma palawa dabadabai i apui ma i am. Ma ubaubanai ġelauna Manna raua i voterei, tui wei lamna eġa ita am-melei, ma ai lam wapuei i tuarui. Mai Israel eġa manna ita am-melei, lam ai au doa au dobu Canaan i vaia da i amam.

24

Muriai Joshua ma mai Israel mai Canaan maiteni i viġaiġaiawa, dobu au giana da au giana. Ma dobuna ravai i viragēni, wate ġelau i eġa ita viragēni ma maiteni i mae. Muriai Joshua dobu i ġutai Israel ana dam twelve awari. Tui i nae ma ai doa i maeni melagāi nonoana mai Canaan i voavoāia. Madeġa maġamaġai i kwa ma Joshua mai Israel i vitagogiana-melei.

Mai Israel i riwa da BADA ina vitaunolei

¹ Muriai Joshua dam anapui i ġorei da au Shekem ita vitagogiei. Maranai kampa i ġeta Joshua, dogadogara, dam babadai ma melagāi babadai i ġoreiai da ita nae BADA au naona ita mairi.

² Joshua rava anapui i riwei i pa, “BADA mai Israel ai God e ririwa, ‘Wariaġa noimi Terah ma natunatuna Abraham ma Nahor waira Euphrates au baba ġelauna i mae, ma god maġamaġai i raraudunelei.

³ *Wate noimi Abraham nai dobunei a vaitawanei ma i naiei da Canaan doana ana tapuna a viatataiei, ma ana epaepaia a vimaġai. Ma natuna Isaac a verei.

* 1:5: Deu 31:6, 8 * 1:6: Deu 31:6-7, 23 * 5:10: Exo 12:1-13 * 5:11-12: Exo 16:35 * 24:3: Gen 12:1-9; Gen 21:1-3

¹³ —‘Tau dobu a veremi ana debagauna ma ana peipeina, doana eġa ota nolei ma taon gaeġaei a vereoimi, marina o maemaeni, eġa ota voai, ma grape ma olive o amam wate eġa, taumi ota paewi.’

¹⁴ —Lamna aubaina BADA ona voteletelei ma orami taputapunei ona vipatutu. Noinoimi god morumorui kokoitau, i raraudunelei au Egypt bo au waira Euphrates ona kwajiei au modu ma BADA ainelana ona viborumei.

¹⁵ Wate mepa da BADA viborumeina o geduaiei, lamna amadodo ona vine da noinoimi ai god waira Euphrates au baba ġelauna bo marina ravai ai au dobu o mamae mai Amori ai god ona nolei. Wate tau au numa ravai maiteni BADA ana viborumei.”

¹⁶ Ma rava i paribelei, “Tauai eġa melanai ai BADA ana voterei ma god ġelauai ana viborumei.

¹⁷ BADA ata God tauoina au Egypt i tere-opuneta noinoita maiteni maranai au Egypt ta vilaraga. Ma kua vivirewapanai ma aniba i kauai au mataia. Ma ai au vaġai mana-manaina i painiai dam ġelauai au poui da wei au paratana.

¹⁸ Mai Amori ma dam ġelauai wei au dobuna i mamae wate BADA aubaiai ravai i viagaġana-opunei. Lamna aubaina tauai BADA ana borumei, aubaina tauna ainelana ata God.”

Judges Taurauetara

Pariverena

Wei au bukana Joshua ana iraḡe marana ma i nae da Samuel ana tupua marana e ririweta.

Vinevinena

Joshua au murina aiwai i tupua (Jdg 2:7-19).

2

Joshua au murina

⁷ Mai Israel BADA i viborumei maranai Joshua lawalawaina i mamae ma i 'raḡe ma kimtana magumagurii biaḡa i mamae i 'raḡe-pai, wei ravai BADA kaua ḡaeḡae i kauai i vimatematei.

⁸ Nun natuna - Joshua BADA ana taunola ana madeḡa 110 ma i 'raḡe.

⁹ Ma doa i vereverei au Timnat Herek i doboi, Ephraim au olana, wei lamna Ola Gaash ana au laubadei.

¹⁰ Anina ma wei kimtana i nepai amamai awarii ma kimta ḡelauna ai gabu i vaia. Wate tau i BADA eḡa ita aramanei ma nanare aiwai i kauai mai Israel aubai.

¹¹ Ma kaua apoapoei i kauai BADA awarina ma Baal kokoitau i raudunelei.

¹² Tau i BADA amamai ai God i votere-tawanei; Wei Godna tau i Egypte i taravaina-opunei. Ma i nae ma dobuḡela ravai au ririvai maemaie ai god i viborumei. Wei kauana BADA i viamlo-ḡaiḡaini.

¹³ Tau i BADA i voterei ma Baal ma awana Ashtoreth kokoitau i viborumei.

¹⁴ Ma BADA amlona i ḡaiḡai kaua mai Israel awari, da i veredamanei ai ḡavia awari ma tau i purapura i tama-naiei. Ma i voterei ai ḡaviai maḡamaḡai au ririvai awari, ma tau eḡa tagotagogina da ita vobelei.

¹⁵ BADA mai Israel i viḡaviei maranai i opuopu viḡavia aubaina. Lamna aubaina eḡa ita vovaiuba BADA i ririwei nanare. Ma tau i vinuabola kaua.

¹⁶ Anina ma BADA taurauetara bo ḡavia babadai i terepai, da i voagui da ai ḡavia i vovaiubai.

¹⁷ Wate tau ai taurauetara i parivirevirei ma god ḡelau i erawei ma i raudunelei. Tau i laḡilaḡina amamai i bababara lana i voterei ma BADA i rau-aḡaiḡaiei.

¹⁸ BADA mai Israel ai tou i nonori menanare ai ḡavia tau i rau-iviapoapoelei. BADA taurauetara i terei ma i voagui ma i gagaloie. Maranai taurauetara i mae, BADA mai Israel i raunuapoapoelei.

¹⁹ Wate maranai taurauetara i 'raḡe, rava, BADA i mae-puputei ma i apoapoe kaua eḡa me amamai nanare ma god ḡelau i vitaunolei ma i raudunelei. Tau i geduai kaua da ai kauai apoapoei ma ai ora pota ita voterei.

Mai Israel kaua apoapoei i kaukauei lamna ai parivainuaḡana bagibagina BADA maiteni i kaukauei i viviaigai. BADA amlona i ḡaiḡai ma ana nota i terei da mai Israel ita raudadani da ita voagui da dobuḡela ravai ita viaḡaḡana-opunei. Dobuḡela ravai mai Israel i raudadani da tau i BADA ina votaḡotaḡoi bo eḡa me amamai i kauai nanare.

1 Samuel Samuel ana buka tagogi Pariverena

Buka 4 ma Samuel ana buka i vinoa da Israel ma Judah ai vigulau riwana i parivereta, Samuel tauna wavana naenaena wei bukana tagogi au orana. Tauna mai Israel ai *taurauetara* damona. Tauna, Saul ma David au kolai monamona i waği da i vigulau, lamna aubaina wei bukana i viwavaı Samuel. Wei bukana mai Israel ai kaua e bababanieı i nae da Saul ana au irağe.

Vinevinei

Samuel ana tupua (1; 2:1-11; 3:1-21)
 Mai Israel gulau i vibagei (8:1-22a)
 Samuel Saul i buloi (9:1-3, 15-16, 10:1-2, 5-24)
 Saul i vivibada (11:14-15; 13:13-14; 15:1-4)
 BADA Saul i geduaiei (15:7-23, 27-29, 34-35)
 Samuel David i buloi (16:1-7)
 Saul David i unurei (18:7-9)
 David Saul i ruba-tawanei (21:1-6)
 Saul ana irağe (31:1-5)

Samuel i tupua

¹ Oroto tagogi wavana Elkanah, ana dam Ephraim ma ana melağai Ramah, Ephraim au olana i mae. Elkanah amana Jeroham, goğana Elihu ma noina Tohu, ma ai bariawa Zuph, ai dam Ephraim.

² Tauna awawana ruaga Hannah ma Peninah. Peninah i vinatuna ma Hannah aipoi.

³ Madegana patapatana Elkanah Ramah i netawanei ma i nae au Shiloh da BADA VIVIREWAPANA KAUKAUANA ita voepaepai ma pulo ita apui awarina. Weka Eli natunatuna Hophni ma Phineas BADA ana pirişi pulo tauapui i mae.

⁴ Maranai Elkanah pulo i apuapui ma sia sikasikana i ğutai da awana Peninah ma natunatuna i patai.

⁵ Wate awana Hannah sia vinevinena i verei aubaina awana nuanuana i vai-kauei avena da BADA i kauei da tauna aipoi.

⁶ BADA Hannah manawana i gudui ma lamna aubaina turana i vivinamei ma i vivijiboğanonoei da ita vinuabolai.

⁷ Wei kauana i mae madegana patapatana. Maranai Hannah i nae BADA ana au numa, Peninah tauna i vivinuabolai ma i vitoutouni da eğa ita amam.

⁸ Maranai Elkanah awana Hannah i paripari-dadanei, "Hannah aiwai e toutouei? Aiwai aubaina eğa uta amam? Aiwai aubaina e vinuabola, natunatum eğa lamna e vivinuabolei bo? Tau weka! Natunatum nelarai 10 epaia!"

⁹⁻¹⁰ Mara tagogi maranai tauı i am vorovei BADA ana au numa au Shiloh, Hannah orana i viara kaua ma ana toutouna BADA awarina i raupari. Pirişi Eli kampa ana au gabu tempol au metaetana i kiakiala.

¹¹ Ma i parivainuağana i pa, "Oo BADA VIVIREWAPANA KAUKAUAM. Ma inanai am taunola au ora-tou uta inanai! Ma uta notaiı ma eğa nuanuam ina vuru. Mepa da natu orotona uta vereu lamna teverana ana veremelem da ina vilaragem ana au lawana au anatapuna, ma aparana eğa ina bori-dadanei."

¹² Ma i raraupari BADA awarina ma Eli tauna ipirina i 'nainanai.

¹³ Hannah au nuanuana i raraupari ma ipirina ava i vidagudagu wate eğa babani ita opuopu. Ma Eli i notai da tauna i uma-bua,

¹⁴ ma awarina i riwa, "İna baem bo, uma bua ma voterei!"

¹⁵ Wate Hannah i paribelei, "Eğa nanare au bada tau eğa waira bagibagina ata umai, tau au nuabola i rata kaua ma lamna aubaina a toutou BADA awarina.

¹⁶ Wenanare a raraupari aubaina nuanuau i bola-kauei ma eğa ma notai da tau wavine apoapoeu."

¹⁷ Eli i paribelei, "Ana nuaubam ma nae! Ma BADA Israel ana God am vibaga ina kauei."

¹⁸ Tauna i paribelei, "Au bada egualau kaua ma eğa ma nota-boaiı." Ma i nae ma i am da orana i uba.

¹⁹ Ma ubaubanai boiboği Elkanah ana numa ravai i vomairi ma i nae da BADA i raudunelei ma i ġaira me au Ramah. Elkanah awana Hannah maiteni i matave ma BADA wavine ana pari i paribelei.

²⁰ Hannah i duama ma natuna orotona i ġuni ma wavana i ġorei Samuel ma i riwa, “Wei lamna aubaina BADA a vibaġai.*”

Samuel i puloei BADA awarina

²¹ Ma madeġa ġelauna i ġetai ma Elkanah ana numa ravai maiteni i ġae au Shiloh da pulo ita apui BADA awarina ma pulo ġelauna BADA i parivainuaġani ita kauiei.

²² Hannah eġa maiteni ita nae ma awana i riwei, “Maranai tevera ina eda ma ana ġaiei BADA ana au numa ma kampa ina mae-nonoa.”

²³ Elkanah i paribelei, “Ee nanare aiwai e notanotai da i ai ma kauiei, ma weka ma mae da tevera ina eda. Ma BADA ina voaġuim da am parivainuaġana anona ina tupua.” Ma wavine au numa i mae da natuna i eda.

²⁴ Maranai tevera i viedai ma alona i naiei au Shiloh, bulumakau orotona ana madeġa tonuġa, palawa baikena tagogi ma wine wagina ġaeġaena maiteni. Avena da tevera melamelana ma alona i naiei da Eli au urana i terei.

²⁵ Ma burumakauna i apui God awarina ma tevera i naiei Eli awarina.

²⁶ Ma Hannah i riwa, “Oo BADA e notanotai rorova tau weka a raraupari BADA awarina.

²⁷ BADA a vibaġai wei teverana aubaina ma a vivibaġei i vereu.

²⁸ Lamna aubaina marina natu a vereveri BADA awarina. Ana lawana anatapuna BADA ina verei.” Ma kampa tau BADA i voepaepai.

2

Hannah ana voepaepa

¹ Ma Hannah i raupari BADA awarina i pa, Tau a vinuaii kaua BADA awarina;

Tauna rewapanana i vereu.

A vinuaii aubaina Tam u wilwanii ma lamna aubaina au ġavia a vivinamei.

² Oo BADA eġa ai ai ġelauna vivivireina me tam; eġa mepa god ġelau anina tam ava; eġa taugagalo ġelauna me tam, ai God.

³ Tau a ririwa, “Vogulagulau ma pari-gulagulau ona voterei; Mae-ġaeġae babanina ona voterei.

Aubaina BADA ami kaua anatapui e araramanei ma ina kovoġimi.”

⁴ BADA Tam sorodia vivirewapanai ai pidu u viaiġaiġai; wate vovokokarai u vovai-virewapani

⁵ Amam iauai marina ina nola da ina am; am-irairaġei eġa am ina irage.

Wavine aipoina roaroa 7 i ġuni; wate roaroa maġamaġau aloi i netawanei ma tauna ava e mamae.

⁶ BADA, irage ma lawana e neinei; Tauna rava au kokoaga e teretere-ġairei ma e vovovai-mairini.

⁷ BADA rava ġelau i vivimaurai ma ġelau i vivigomari; ma ġelau i teretere-ġairei ma ġelau i teretere-ġaiei.

⁸ Tam rava molamolakai pokau au orana e sinasina-epai; ma rava vigigimanai loġiloġi au orana e sinasina-epai; da gulagulau maiteni e kiakiala ma vigulau tau i vigaiei.

Dobu anatapuna tam ġarime; ma aiwai anatapuna ana au animae u terei

⁹ Tam am rava patupatutui e gagagaloei; ma apoapoe taukauei e amoamo a irage Rava eġa ai rewapanai ita vovaiuba;

¹⁰ Tam am ġavia ma pupuni; am meji ina viarapawa me waiparara

BADA tam dobu ma rautare i

* 1:20: *Samuel* pona Hebrewi nonorana me God awarina agu i vibaġei.

ma am gulau ma vovai-virewapani,
ma am vinevine bulobulona ina virewapana kaua.

¹¹ Elkanah natuna Samuel i voterei ma i nae me ana au melagau au Ramah. Samuel pirisi Eli au urana i mae au Shiloh ma BADA aubaina i vitaunola.

Maranai Samuel i rarata tauna au numa gara i vovoagu da God ana nola i kaukauei. God ma rava Samuel ana nola i goana-kauai. Eli natunatuna ruaḡa pulo tauapui, pirisi apoapoei. Maranai rava i nei da ai goa apoapoe aubaina pulo i apui BADA awarina, tau i wei siai vovivirana i voviviri da i amam. Ma lamna aubaina Bada peroveta i paritawanei da Eli i riwei da tauna natunatuna eḡa ita vinua-terenei aubaina go'apoapoe i kaukauei, ma natunatuna ina viraḡena ruaḡei. Wei au murina Eli ana epaepaia laragai ma anapui ina iraḡe-pai.

3

BADA Samuel i ḡorei

¹ Wei au marai BADA eḡa rava awari ita babani bo ai au rauboni bo ai au inana ita vivieḡana-melei, mara tagotagogi ava wei i tuputupua. Tevera Samuel Eli i voagui ma BADA awarina i vitaunola.

² Eli matana i apoapoe kaua ma eḡa ita inainana kaua. Ma waguvara tagogi ana au gabu i matamatave.

³ Ma Samuel BADA ana au numa i matamatave Parivainuaḡana bokisina au ririvana ma God ana rampa au Gabu vivivireina i ararata.

⁴ Ma BADA Samuel i ḡorei, “Samuel!”

Ma Samuel i paribelei i pa, “Ee tau weka!”

⁵ Ma i vomairi ma i ruba Eli awarina ma i riwa, “U ḡoreu da a nei.”

Eli i riwa, “Eḡa ata ḡorem, ma nae me da ma matave.”

⁶ Ma BADA i viḡore me, “Samuel!”

Samuel i vomairi me ma i ruba Eli awarina ma i riwa, “U ḡoreu da a nei.”

Eli i riwa, “Natu tau eḡa ata ḡorem ma nae me da ma matave.”

⁷ BADA eḡa Samuel awarina ita babani dadana lamna aubaina ponana eḡa ita aramanei.

⁸ Anina ma mara vitonuna BADA i viḡore ma Samuel i vomairi ma i nae Eli awarina ma i riwei, “U ḡoreu da a nei.”

Anina ma Eli i aramanei da lamna BADA tevera i ḡoreḡorei.

⁹ Ma Samuel i riwei, “Ma nae me da ma matave. Mepa da ina viḡore me lamna wenanare ma riwei, “BADA ma babani, am taunola a rarautaniḡana.”

Anina ma Samuel i nae me da i matave.

¹⁰ Ma BADA i nei ma i mairi ma i viḡore me au naona i kaukaueia nanare, “Samuel, Samuel!” Samuel i paribelei i pa, “Ma babani am taunola a rarautaniḡana.”

¹¹ Ma BADA Samuel i riwei, “Tau kaua vivi-inirovorovo kaukauana ana kauai mai Israel awarii ma maranai rava riwana ina nonori tau i ora i ina sisi.

¹² Rorova a riwa nanare, Eli ana numa ravai maiteni ana kovoḡi.

¹³ A riwana-guratei da ana numa ravai ana kovoḡa-nonoei aubaina natunatuna i vijiboḡiu ma i vinimalamalaiu ma tauna natunatuna i vibae-naenaelei.

¹⁴ Riwa bagibaginei a ririwa da Eli ana numa ravai ai go'apoapoe eḡa melanai ana notatawanei. Avena da pulo ina apui awariu.”

¹⁵ Samuel ana au aravi i mae da mara i tom ma BADA ana numagara metaetai i votawatawanei. BADA aiwai Samuel i riwei tauna i rovo da Eli ita pariverelei.

¹⁶ Wate Eli Samuel i ḡorei i pa, “Samuel natu.”

Ma i paribelei i pa, “Tau weka.”

¹⁷ Eli i paridadana, “BADA aiwai i riwem? Anapapuna ma riwem ma eḡa lamna BADA ina kovoḡa-gurate!”

¹⁸ Anina ma Samuel anapapuna i riwei, eḡa aiwai ita tajijini. Ma Eli i riwa, “Tauna BADA, ma aiwai awarina i jijimana ina kauai.”

¹⁹ BADA Samuel i mae-ratui maranai i rarata ma Samuel aiwai i ririweia ma nanare i tuputupua.

²⁰ Ma Israel au giana da au giana, au Dan i vikarei da au Beersheba, anapui i aramanei da Samuel lamna BADA ana peroveta.

²¹ Mara i maḡa BADA au Shiloh Samuel awarina i eḡa ma i babani.

8

Mai Israel Gulau i vibaḡei

1-2 Samuel natunatuna ruaḡa, natuevou wavana Joel ma umauna Abijah. Maranai Samuel i magura ma natunatuna i vinei taurauetara au Israel ma i terei da au Beersheba i nola.

³ Wate tau i eḡa amai ana kaua ita vaia ma ai nuavaina mane ma lamna aubaina manelei i ḡwalai ma rauetara i vibarai.

⁴ Ma lamna aubaina Israel babadai i riei Samuel awarina au Ramah.

⁵ *Ma i riwei, “Ma rautaniḡana bada! Tam u magura ma natunatum eḡa am kaua ita ḡovaivaitai. Ma lamna aubaina tauai a ḡoei da gulau ma verelai da ina raveniai, me dobu ḡelau i ravai e kaukauei nanare.”

⁶ Wate maranai wenanare i riwa Samuel eḡa ita vinuaiia dadana, ma i raupari BADA awarina.

⁷ BADA i paribelei i pa, “Aiwai anapapuna ravai e ririwem ma kauai, tau i eḡa tam ita geduaiem wate Tau ai gulau i geduaiem.

⁸ Maranai Egypte i teretere-opunei da wei paratana, tau i marana patapatana i mae-puputeu ma god ḡelau i raraudunelei; marina nanare tam awarim e kaukauei.

⁹ Ai ḡoana ma verei wate riwa bagibaginei ma riwei menanare gulau ina kauanei tau awari.”

¹⁰ Samuel BADA ana babani anapapuna tau i gulau i vivibaḡei i riwei

¹¹ i pa, “Maranai gulau ina vidademi lamna awarimi wenanare ina kauai. Tauna natunatum i tama-naiei sorodia da ana chariot ma ana horse ina gerui ma ḡelau ana chariot au naona ina ruba.

¹² Ḗelau i sorodia 1,000 ma ḡelau 50 ina vibadei. Ḗelau ana wapu ina ipiei ma ana lam ina tuarui. Ḗelau ḡavia apiai iramei ma chariot iramai ina kaukauei.

¹³ Gulau, natunatum i guguini in eḡari da ana monamona ḡabuḡabui ina kaukauei ma ḡelau ana palawa ina apuapui ma ana taulauvoa.

¹⁴ Am wapu ma grape wapu ma nanare olive wapu aiiai avavai ina vaia da ana gabemani babadai ina verei.

¹⁵ Ma maranai ami witi ma grape ma olive o tuarui ma ḡuta 10 ona terei ma tauna ḡuta tagogi ina vaia ma ana gabemani babadai ina ḡutei.

¹⁶ Ami laraga nelarai ma guguini ma am bulumakau ma donkey vinevinei ina vaia tauna aubaina.

¹⁷ Ma ami sipu ma gote ḡuta 10 o terei ma tauna ḡuta tagogi ina vaia tauna aubaina, ma taumi ina vainimi ana taunola.

¹⁸ Maranai wei kauai i tupua ma ona tou guratana BADA awarina da gulau taumi o tereterei awarimi ina vaitawanei, wate BADA eḡa ina voaguimi.”

¹⁹ Wate rava Samuel ana babani bagibagina eḡa ita rautaniḡanei. Tau i riwa, “Tauai anapapui a ḡoei da gulau ina vidadelai,

²⁰ da tauai me dobu ḡelau i ravai nanare ma ai gulau ina raveniai ma ana opu viḡavia aubaina.”

²¹ Anina ma Samuel BADA i riwei aiwai ravai i ririweia

²² ma BADA i paribelei i pa, “Ai ḡoana ma kauai, gulau ma verei.”

Ma Samuel ravai i paritawanei ai au numa.

9

Samuel, Saul i buloi gulau

¹ Benjamin ana au dam rava tagogi wavana naenaena ma manemanena i mae wavana Kish. Tauna amana Abiel, ḡoḡana Zeror ma noina Bekorath ma ai magura Aphiah, Benjamin ana damei.

² Kish natuna Saul i tupua kaua ma laraga inanana aiaina eḡa me laraga ḡelau i au Israel, ma tevera ae manawa.

³ Maratagogi Kish ana donkey i kwako ma natuna Saul i riwei, “Am taunola ma taravaini ma ona nae donkey ona baiie!”

Saul ma ana taunola donkina i baiiana-guratei wate eḡa ita nelaḡai ma i nae da peroveta Samuel i taunola raugerani da ita vibaḡai da mepa donkey ita baiie.

¹⁵ Ma maratamna da Saul ana taunola maiteni ita ḡeta Samuel awarina, BADA Samuel i riwei,

¹⁶ “Wenanare marana au maratam oroto laragana Benjamin ana damei ana paritawaneia. Olive monamonanei kolana ma buloi da ina vimataira da tauna a tereriei da au rava Israel

ina vibadei. Tauna mai Israel ina voagui da mai Philistia ina vovaiubai. Au rava mai Israel a inamai i vinuapoopoe ma ai tou awariu agu aubaina a nonori.”

10

1 Ma Samuel olive monamonana wagina i vaia ma monamona i waḡi Saul au kolana. Ma i vigia-laḡolaḡonei ma i riwei, “Wei a kaukauei aubaina BADA i terem ana rava vinualaulaunai Israel ma vibadei.

2 Amadodo rava ruaḡa ma nebelei Rachel ana kokoaga au ririvana au Zelsah, Benjamin ana au dobu. Tau i riwem, ‘Donkina o baibaiei i nelaḡai. Ma marina amam eḡa donkey ita baibaiei wate tam e vivinuabolem, e paripari-dadana, Menanare natu ana nelaḡanei.’

5 —Ma ona nae God ana au Gibeah ola aburuna, weka mai Philistia ai sorodia i rauḡaravu. Ma ona ruirui au taon ma Peroveta borui olei ina ḡaiḡairai. Tau i gitar* ma harp, tambourine ma duraio ina vikalokaloei ma BADA ana babani ina garagararei.

6 BADA Aruana Vivivireina ana rewapanana oram ina naeni da ina vibadem, ma tau i maiteni BADA ana babani ona jimei. Ma oram ina ravivouni da tam me rava ḡela.

7 Maranai wei kauai i tupua, aiwai BADA e viviatataiem ma kauiei.”

8 Samuel i riwa, “Tam ma vinoa au Gilgal, ma kampa ana nebelem da ḡamoḡamo ana vunui ma taputapuna ana apui ma ḡamoḡamo ḡelau i ana apui viturana pulona. Wate kampa ma vipaipai aupom 7 da ana ḡetai ma riwa ḡelau ana riwei.”

Saul i terei gulau

9 Ma Saul i mae-tavirei da i netae ma God ana nota i ruini ma orana i ravivouni. Wei marana aiwai anatapuna Samuel i ririwei i tupua.

10 Maranai Saul ana taunola maiteni au ola Gibeah i ḡeta, peroveta borui i 'nanai i nenei awarii. Anina ma God Aruana Saul i ruini ma i vibadei da tauna maiteni God ana babani i garagararei.

11 Maranai ravai Saul i araramaneia Saul i 'nanai peroveta au borui i jimajima tau i orai i aupai ma ai rava i ririwei, “Riwa kaua bo aiwai i tupua Kish natuna awarina? Saul i vipervoveta bo?”

12 Ma nai dobuna ravana i paribelei i pa, “Amana aiai lamna avena aubaina maraḡela ravarava ota e viviperoveta.” Anina ma wei babanina i mae kampa, “Moina riwa kaua da Saul peroveta?”

13 Ma Saul jima i voterei ma i ḡae au ola au dobu vivivireina.

14 Muri ai maiana Saul ana taunola maiteni i nelaḡai ma i paridadanei i pa, “Mepa o nae?” Saul i riwa, “Donkey a baibaiei ma a baiana-avei da a nae Samuel awarina da ata paridadanei ḡamoḡamoi mepa.”

15 Maiana i riwa i pa, “Ma riweu Samuel aiwai i riwem.”

16 Saul i paribelei, “I riwelai da donkina i nelaḡai.” Wate maiana eḡa ita riwei Samuel aiwai i riwei, da tauna ina vigulau Israel aubaii.

17 Muri ai Samuel mai Israel anatapui i ḡorei da ita riei au Mispa da BADA riwana ita nonori.

18 Ma Samuel i riwa, “BADA Israel ai God wei e ririwemi, ‘Tau noinoimi mai Egypt vivirewapanai au urai a vaitawanei. Ma a neiaini wei au dobuna ma nanare ami ḡavia au ririvami a vovaiubai.

19 Wate amadodo tau ami God o geduaie, i kauana-guratei ami au nuabola ma ami au pipiripi.’ Ma o riwa, ‘Eḡa! Tauai gulau a ḡoeḡoei da ina vibadelai! Lamna aubaina dam damai ona opui tau ami BADA au naou.”

20 Maranai Samuel damdamai i nei ai BADA au naona ma BADA Benjamin ana dam i vinei.

21 Ma Benjamin ana dam i nei ai au naona ma BADA Matri ana epaepaia i vinei ma kampa BADA Kish natuna Saul i vinei. Ma maranai i baibaiei tauna kampa eḡa.

22 Ma lamna aubaina i raupari BADA awarina, “Tauna mepa?”

BADA i paribelei, “Tauna kampa purapura au orai e raraugovaḡa.”

23 Tau i nae da i taravaini da i nei ai, tauna rava aena manamanaina ma i mairi ma rava anatapui i votani.

24 Samuel rava anatapui i riwei, “BADA rava i tereriei da ami gulau, o inainai bo eḡa? Eḡa aiai ḡelauna au orata me wei orotona.” Ma rava anatapui i garara, “Gulau ana lawana ina manawa.”

* 10:5: Eng. lyre

11

Saul ana vigulau i vianinei

¹⁴ Muriai Samuel mai Israel i riwei, “Ona nei ma anataputa tana nae au Gilgal ma Saul ana vigulau tana vianinei ma tana amei.

¹⁵ Anina ma anatapui i nae au Gilgal ma BADA i voepaepai ma i riwei da Saul lamna tau i aigulau. Ma tau i viturana ma mae-kaua pulona i apui Bada awarina ma mai Israel siana i am ma i uma ma i vinuai-kaua.”

Saul ana madega 30 maranai i vigulau. Tauna sorodia mai Israel i rau-etaraveni da mai Ammon maiteni i vigai gaiawa da i vovaiubai. Muriai tau i mai Philistia maiteni i vigai gaiawa, Wate nai ravai ai sorodia i maga guratana aubaina da mai Israel i rovo. Saul i vipaipai da Samuel ita nae da BADA ita puloi ma muriai ita nae ita vigai gaiawa. Wate Samuel ega la gila gina ita nei. Lamna aubaina Saul pulo i apui BADA awarina. Ma BADA i viamlo-gai gaini. Ma muriai Samuel i getai.

13

Saul BADA i rau-agai gaii

¹³ Samuel Saul i riwei, “Tam u bua! Tam Ega BADA ana tarawatu uta voteletelei. Uta votelatela lamna am epaepaia maiteni ita teremi da ota vigulau nonoa au Israel.

¹⁴ *Wate marina tam am vibada ega ina mae; BADA rava notanotana me tauna nanare i vinei ma i terei da ana rava ina vibadei, aubaina tam BADA ega uta voteletelei.”

15

BADA Saul i geduaiei

¹ *Muriai Samuel Saul i riwei, “BADA tau i paritawaneu da a buloim da u vigulau Israel aubaii. Lamna aubaina BADA ana riwa ma nonora-kauai.

² *BADA Vivirewapana Kaukauana i riwa i pa, “Tau mai Amalek ana kovoği aubaina amamai mai Israel i vigaviei maranai Egypte i opu da i nenei.

³ Marina ona nae mai Amalek ona vigaviei ma ona pupuni, ega tagogi ona voterei, nelara, wavine, roaroa melamelai, bulumakau, sipu, kamel ma donkey.”

⁴ Ma Saul ana sorodia ai riwa i paritawaneu da ita nei. Ma anatapui au Telaim taon i vinenebelana. Sorodia 10,000 Judah ana damei i nei ma 200,000 mai Israel gelaui i nei.

⁷ Ma Saul ana sorodia maiteni i opu ma Amalek i vunu-naiei ma i vovaiubai, i vigavia au Havilah ma au Shur i vikwai Egypt au geregerena.

⁸ Agag mai Amalek ai gulau lawalawaina i vojijini wate rava anatapui i virağeni.

⁹ Wate Saul ana sorodia maiteni Agag ega ita virağeni ma ai sipu ma bulumakau vinevinei ma bulumakau ma sipu natunatu ai ai ega ita virağeni. Tau i gamoğamo kirakiramai ava i virağeni.

¹⁰ Ma BADA Samuel i riwei,

¹¹ “Tau orau i viara kaua da Saul a terei Gulau aubaina tauna i mae-puputeu ma riwau i rau-agai gaii.” Samuel nuanuana i bola-kauai maranai wei riwana i nonori ma BADA awarina i tou-maratom.

¹² Ubaubana boiboği Samuel i nae da Saul ita inanai wate i riwei da Saul i nae au Carmel taon. Kampa gana i vidamni da rava ita nei weka da tauna ita voepaepai, ma i gaira me au Gilgal.

¹³ Ma Samuel i geta Saul awarina, Saul, tauna i viegualau i ma i pa, “Samuel, BADA ina viaianim. Tau BADA riwana a voteletelei.”

¹⁴ Samuel i paribelei, “Aiwai aubaina sipu ma bulumakau e vivitouana a nononori?”

¹⁵ Saul i pa, “Sorodia mai Amalek awarii i vaia, bulumakau ma sipu vinevinei i vojijini da ina puloei BADA am God awarina wate gelau anatapui a virağena-naiei.”

¹⁶ Anina ma Samuel Saul i riwei, “Ma genuana! Waguvarai BADA awariu i babani ana riwem.” Saul i paridadanei, “Ma riweul!”

¹⁷ Samuel i paribelei, “Avena da u nota-melem da tam rava labalababa, tam marina mai Israel ai rauetaravena. BADA i tererem da mai Israel ai gulau.

¹⁸ Riwa bagibagina i riwem ma i paritawanem da taniğa potapotai mai Amalek uta vigaviei da anatapui uta pupuna-pai.

¹⁹ Aiwai aubaina BADA eġa uta voteletelei? I riwem da eġa purapura i 'rairaġe-tawanei ona tami, wate tam vipurapura u ġoei ma u vai-labalababai da u nuanei, wei lamna kaua apoapoe BADA au matana."

²⁰ Saul i paribelei, "Tau, BADA a voteletelei! I egariu da ana nae, da mai Amalek ana pupuni ma ai gulau Agag a neiai.

²¹ Wate au sorodia sipu ma bulumakau aiiai eġa ita viraġeni wate i neiai weka au Gilgal da ita apui pulo BADA am God awarina."

²² Anina ma Samuel i riwa,
"BADA metauna e vinuiaiiei?"

Votelatela bo pulo ma ġamoġamo apuapunana.

Votelatela i ai-telara, eġa me pulo apuapunana;

Ma rautaniġana i ai-telara, eġa me sipu monamonana.

²³ Pariviravira BADA awarina lamna me parauma
ma mae-ġaeġae lamna me god ġelau i viviborumei

Ma tam BADA riwana u geduaiei;

lamna aubaina BADA am vigulau i geduaiei,

Tam am vigulau i vai-tawanei."

²⁷ *Ma Samuel i mae-tavirei da ita nae ma Saul i ġoei da ita viġaei ma ana kwama adana i vojijini ma i sikai.

²⁸ Samuel i riwa, "Me au ġara u sikasikai nanare amadodo BADA am vibada mai Israel awarii i vai-tawanei ma rava ġelauna aiaina eġa me tam i verei.

²⁹ Israel ai God vinualaulaunana eġa morumoruna bo nuanuana ita viravirai. Tauna eġa rava da nuanuana ita viravirai."

³⁴ Ma Samuel i nae au Ramah ma Saul i nae me ana au numa au Gibeah.

³⁵ Samuel eġa Saul ita inana-melei da i 'raġe wate Saul i vinuabolana-maelei. Ma BADA nuanuana i bola-kauei da Saul i terei mai Israel ai gulau.

16

BADA David i terei gulau

¹ BADA Samuel i riwei, "Amapo da Saul ma mogumoguei bo? Tau Saul a vaitawanei mai Israel ai gulau. Wate olive monamonana ma vaia ma ma nae au Bethlehem ma Jesse ma inanai. Natunatuna awariei gulau a vinei."

² Wate Samuel i paribelei, "Menanare ana naenei? Saul riwana ina nonori ma ina viraġeniui."

BADA i riwa, "Cow ġaubona ma vinimavoei ma ma nae da ma riwa, 'Tau a nei viturana pulona ana apui BADA awarina.'

³ Jesse ma rauġorei viturana pulona aubaina ma ana viatataiem aiwai ma kauei, rava ana viatataiem ma buloi Tau aubaiui."

⁴ BADA Samuel i ririwei nanare i kauei. Samuel au Bethlehem i ġeta ma taun babadai ana sisisi i nebelei. Ma i paridadanei, "Ana nuaubam u nei bo?"

⁵ Samuel i paribelei, "Ee! A nei da pulo ana apui BADA awarina. Anatapumi ona vokaukauana-melemi ma tana nae pulo aubaina. Ma Jesse natunatuna maiteni i viaiaini ma i paritawanei da i nae pulo apuna aubaina."

⁶ Maranai tau i ġeta ma Samuel Jesse ana natuevou Eliab i 'nanai ma ana au nota i riwa i pa, "Wei teverana e maimairi BADA au naona lamna anina ana vinevine."

⁷ Wate BADA Samuel i riwei, "Tau ravana a geduaiei, eġa inanana bo ana manawa ma notanotai. BADA aiwai e inainanai, rava eġa ita inananai. Rava tupua e inainanai wate Tau nuapoa a inainanai."

¹⁰ Nanare da natunatuna anatapui 7 i nei, ma Samuel i riwa, "BADA eġa aiiai ita vinei."

¹¹ Ma Jesse i paridadanei, "Natunatum anatapui weka bo?"

Jesse i riwa, "Natu umau e mamae wate tauna sipu e paipaini." Samuel Jesse i riwei, "Riwa ma paritawanei da ina ġetai da tana am."

¹² Ma Jesse riwa i paritawanei da i nei. Tauna i tupua karawata, tevera inanana aiaina ma matana namanamarana. BADA Samuel i riwei, "Wei tauna! Ma nae ma au kolana olive monamonana ma iwaġi."

¹³ Anina ma Samuel olive monamonana i vaia ma David au kolana i waḡi, kampa tau i au matai, ma nai au marana da i nae BADA ana Arua Vivivireina David maiteni i mae. Ma Samuel i nae au Ramah.

¹⁴ Ma BADA Aruana Saul i opu-tawanei ma BADA arua apoapoei i paritawanei i rui au orana da i virovorovoi.

David marina Gulau Saul ana sorodia.

18

Saul David i unurei

⁵ Saul, David ḡavia au anatapuna i paripari-tawanei ma i kaukauana-kauei ma ḡavia i vovovaiubai ma lamna aubaina i terei da ai sorodia ai bada ḡaeḡaena. Ma wei kauana patara ma sorodia babadai i vinuuaiaei.

⁶ David oroto Philistiei ḡaeḡaena ma inanana vi'nirovorovona i viraḡeni ma i nenememei ma waivine taon anatapuiei i nei ma ketaketara ma gita i vikalokaloie ma i arara ma gulau Saul i nebele.

⁷ Waivine i vikalokalo ma i welawela i pa;

“Saul ḡavia tausani i vunui

ma David tausani dam viriviri i vunui.”

⁸ Wei welana Saul i vimeji-kauei ma ana au nota i pa, “Tui David e vovoeapaepai ma e ririwa da tauna rava tausani dam viriviri i vunui ma tau tausani ava.” Ma marina ina terei ai gulau.

⁹ Ma lamna aubaina tauna David i unurana-kauei ma i 'nana-vaitetei.

Wei au marana Saul David i viḡaviei ma i ḡoei da ita viraḡeni. Saul natuna Jonathan, David i vibenabenei. Lamna aubaina i rovorovo-nae ma i rauraugovaḡa-nae.

21

Wei marana au murina Saul David i viḡaviei ma i ḡoei da ita viraḡeni. Saul natuna - Jonathan David i vibenabenei ma David i ruba au dobu ḡela da Saul ita raugovaḡei.

Ahimelek David i voagui

¹ *David i nae au Nob da Pirisi pulo tauapuna Ahimelek ita inanai. Tauna ana rovona i opu da David i viegualaei, ma i riwa, “Aiwai aubaina u nei, ma am rava mepa?”

² David pirisi Ahimelek i paribei i pa, “Gulau Saul nola tagoḡi aubaina i paritawaneu wate wananare i riweu, ‘Eḡa aia i ina aramanei aiwai a kaukauei.’ Au sorodia a riwei da e paipainiu.

³ Awarim lam da uta vereu? Palawa apuapunana 5 ma vereu bo aiwai ḡelauna kampa.”

⁴ Wate pirisi i riwa, “Awari ai eḡa palawa ota ita mamae, wate vovivirana BADA awarina. Wei palawana ma vaia mepa da am sorodia aupom biaḡa eḡa waivine maiteni ita viawawana.”

⁵ David i paribelei, Riwa kaua tauai eḡa waivine maiteni ata matamatave, maranai a opuopu ḡavia aubaina au nelara e ujuju. Amadodo lamna gulau ana nola a kaukauei ma wei nolana aubaina a vokaukaua kaua.

⁶ Nai marana palawa waduboi i votawanaei ma palawa voui i terei BADA au naona au tempol. Kampa eḡa lam ḡelauna ita mamae ma pirisi palawa vovivirana David i verei.

Anina ma David rava i tama-naiei ma nai au dobu na i raugovaḡa nae ma i terei ai bada. Maranai Saul i nonori da pirisi ḡeḡetelarana Ahimelech David i voagui, Tauna pulo tauapui pirisi i vunui-pai ma Abiathar lawalawaina i voterei, ma tauna i ruba govaḡa da David awarina i ḡeta. Maranai dobuḡela ai sorodia Israel i viḡaviei, lamna David ana sorodia maiteni tui i viḡaviei ma Israel i gagaloie. Saul ana sorodia maiteni dobu na i naeni ma David i baiei da ita viraḡeni, wate eḡa ita nelaḡai. Mara tagoḡi David Saul ita viraḡeni wate lamna eḡa ita kauei aubaina tauna God ana vinevine. Wate Saul amapo i ḡoei da David ina viraḡeni.

31

Saul ana iraḡe

¹ Mai Philistia mai Israel i viḡaviei au ola Gilboa ma tau i mai Israel i virubai ma maḡamaḡau i viraḡeni.

² Mai Philistia Saul ma natunatuna i viaḡaḡei da natunatuna Jonathan, Abinadab ma Malki-Shua i viraḡeni.

³ ḡavia i potopoto kaua Saul au ririvana ma ḡavia ana piduei Saul i tonai ma i vikero-kauei.

⁴ Ma Saul ana apia tauavaraina i riwei, “Am sodei ma viraḡeniu. Eḡa ata ḡoei da Philistia-eteni ina vijibogiu ma ina viraḡeniu.”

Wate tauna i rovo da viraḡenana i kauana-avei. Ma Saul ana sod i lavui da au manawana i tonei ma au tepana i peu da i 'raḡe.

⁵ Maranai ana apia tauavaraina wei i 'nanai ma tauna nanare ana sod au tepana i peu ma gulau au ririvana i 'raḡe.

2 Samuel ana buka viruaina Pariverena

Wei bukana lamna David ana vibadana marana e ririweta. Kapita 1 da au 4 e ririweta da David menanarena Judah au rauanagei lamna ava i vibadei. Ma kapita 5-24 Israel au lavaratei maiteni i vibadei. Wei girumana e ririweta da menanare David ana gavia Israel au orana ma dobu gelauei i viġaviana-nei ma e viviatataieta menanare David God nuanuana i vaia ma i vitumaġane, wate maiteni ana ġo'apoapoe ma ana ġokokokara ġelau i viatataieta. Tauta ta inana menanare God David i kovogi maranai ana ġoa i apoapoei, wate maiteni ta inana menanare David i rupena-nei ma God tauna ana ġo'apoapoe i nota-tawane. David pipiriri maġamaġai i nelaġai maranai Israel i vibadei wate God tauna i gagaloei ma parivainuagana awarina ma ana epaepaia awarii i vojijini.

Vinevinei

David mai Israel ai gulau (5:1-4)

God ana parivainuagana bagibagina David awarina (7:1-5, 8-17)

David Bathsheba maiteni i matave (11:1-17, 26-27)

Peroveta Nathan ana pariverena (12:1-25)

5

David mai Israel ma Judah ai gulau

¹ Israel dam damai i nei David awarina au Hebron ma i pa, "Tauta tara tagogi

² Au naona maranai Saul ata gulau, tam sorodia u raueraraveni ma o viġavia.

—Ma BADA i riwem, "Tam au dam Israel ma paini me sipu taupaini ai sipu e paipaini ma aubaii ma vibada."

³ Maranai dam babadai i ġeta gulau David awarina au Hebron, David parivainuagana bagibagina tau maiteni i kauei BADA au matana. Ma olive monamonane David i buloi da Israel ai gulau.

⁴ *David ana madeġa 30 ma i vigulau ma i vibada da madeġa 40 i kwa.

Ma David ana sorodia i egari ma Jerusalem mai Jebu awariei i vaia. Kampa David ana gulau numana i voai. Anina ma rava i tami ma i nae ma God ana parivainuagana bokisina i vaia ma i naei au Jerusalem ma kampa au numagara i terei.

7

BADA parivainuagana i kauei David maiteni

¹ Ma BADA David i gagaloei ma nanare ana gavia anatapai i vovaiubai. Ma ana nuaubana i mae.

² Ma David peroveta Nathan i riwei i pa, "Tau numa vigulauna, ai cedei voavoana da maemaeni wate God ana parivainuagana bokisina au numa gara e mae."

³ Nathan i paribelei, "Aiwai e notanotaia ma kauei aubaina BADA i mae-ratuim."

⁴ Wate lamna waguvaraina BADA Nathan i riwei i pa,

⁵ "Ma nae ma au taunola David ma riwei ma pa, BADA wei e ririwei 'Eġa tam numa ma voai da Tau au animae."

⁸ BADA i riwa me, i pa, "Au taunola David ma riwei, 'BADA VIVIREWAPANA KAUKAUANA wei i riwei:

Tam au naona ravarava ota sipu u paipaini au wapu, wate Tau a terepaim da mai Israel ai bada.

⁹ Mepa u nenelana, Tau tam a mae-ratuim ma au matam am gavia anatapai a pupuna-pai. Ma marina wavam ana voepai, me rava wavai naenaeni au dobu.

¹⁰⁻¹¹ Ma au rava Israel dobu ana verei da ina raunuma ma ana nuubai ina mae. Au naona i vivikareiana da marina babada a terei da mai Israel ita vibadei, wate rava apoapoei tau i viġavie ma marina amapo ega ina kauana-melei. TAU BADA a ririwem da am epaepaia ana vimaġai ma tam ma am epaepaia ona vivigulau.

¹² *Ma am epaia tagogi ana vinei, tam natuoim tagogi da ina vigulau maranai tam am mara damona ina ġetai da amamam ma votagoi. Ma tauna ana kauei da ina vibada ġaeġaena,

¹³ ma ega aiai ana vigulau ina vaitawane. Ma tauna tempol ina voai Tau aubai,

¹⁴ Tau ina viamaneu ma tauna ana vinatunei. Ma maranai i kauana-boai, ana kovoği me ama natuna e kovokovoği nanare.

¹⁵ Wate eğa melanai au nuavaina awarina ana vaitawanei me Saul awarina a vaitawanei, tauna ana vigulau a vaitawanei ma epaiana tam a terem.

¹⁶ Am numa ravai rereğana eğa melanai ina kwa ma am epaepaia ina vigulau ma ina vibada nonoa.”

¹⁷ Ma BADA aiwai Nathan ana au rauboni i riwei anapapuna David i parivere.

11

David turana awana i kwalei

¹ Omra e tomtom maranaina gulagulau e opupu gavia aubaina. David sorodia ai bada Joab ma Israel ana sorodia i paritawanei da mai Ammon ai sorodia ita vipupui. Ma ai taon Rabbah etanaina i matave-potai da ravai eğa ita rui bo ita opu, David eğa ita nae ma au Jerusalem i mae.

David ma Bathsheba

²⁻⁴ Mara tagoği aubigai David i matave-vomairi ma ana au poewa vatavatarana i bababara-nae. Ma i nana damana da wavine i nanai i toatoa, i oğaoğa-melei aubaina marina ana nawaravi doriani i kwa, wavine inanana ai ai kaukauana anina ma David, rava i paritawanei da ita aramanei tauna ai ai. Ravana i ġeta memei ma i parivere i pa, “Wavine wavana Bathsheba, Eliam natuna ma Uriah Hitti ei awana.” Ma David ana taunola i paritawanei da wavinena i nei ai awarina ma tauna maiteni i matave ma i nae me au numa.

⁵ Wavinena i duama ma riwa i paritawanei David awarina i pa, “Tau a duama.”

⁶ David riwa i paritawanei Joab awarina i pa, “Uriah Hitti ei ma paritawanei awariu.”

Ma Uriah i paritawanei David awarina.

⁷ Maranai i ġeta David awarina ma David tauna i paridadanei, “Joab ana sorodia maiteni menanare, anina bo eğa? Ma gavia menanare?”

⁸ Ma David Uriah i riwei, “Ma nae au numa ma ma vilauvitau.”

Ma Uriah gulau ana numa i opu-tawanei da i nae ma au murina David ana pulo i paritawanei Uriah ana au numa.

⁹ Wate Uriah eğa ita nae ana au numa, ma kampa ana au metaeta ana bada ana taunola maiteni i vimatave lana.

¹⁰ Ma tau David i riwei, “Uriah eğa ita nae au numa.” David Uriah i riwei, “Tam u vağavağai da u nei. Aiwai aubaina eğa uta nae am au numa?”

¹¹ Uriah David i riwei i pa, “Parivainuagana bokisina, mai Israel ma Judah ai sorodia au numa gara e matamatave. Au bada Joab ana sorodia maiteni au wapu i raugaravu, wei lamna aubaina eğa ata nae au numa da ata am ma ata uma ma awau maiteni ata matave. Lamna eğa ana kau ei, eğateni!”

¹² Anina ma David Uriah i riwei, “Weka ma mae amadodo ma au maratoma ana paritawana-melem.”

Uriah au Jerusalem i mae da au pom ġela.

¹³ Ma David Uriah i raugorei da maiteni i am ma i viuma-buai. Wate waguvarai Uriah i opu David ana taunola awari i da ana au aravi i matave; eğa ita nae ana au numa.

¹⁴ Ma ubaubanaina David pepa i girumi ma i paritawanei Joab awarina.

¹⁵ Pepa au orana i giruma i pa, “Mepa gavia potopotona kampa Uriah ma terei ma am sorodia ma tere-opunei da tauna ava ina mae ma ina kero ma ina irage.”

¹⁶ Joab Rabbah taona i vivineneğanei da i aramanei mepa gavia i virewapana kava ma kampa Uriah i terei.

¹⁷ Gavia taonei i opui ma Joab ana sorodia maiteni i viğavia ma David ana sorodia ġelau i virağeni. Tau Uriah oroto Hitti ei maiteni i virağeni.

²⁶ Ma Uriah awana riwana i vaia da awana Uriah i rağe ma i touei ma i moguei.

²⁷ Maranai i mogu-vorovei David rava i paritawanei da i nei ai ana au numa da awana ġelauna, ma tauna David natuna orotona i ġuni. Wate David aiwai i kau ei, BADA eğa ita vinuaiaiei.

12

Peroveta Nathan David i eni

¹ *Anina ma BADA peroveta Nathan i paritawanei David awarina ma i riwei i pa, “Nelara ruaḡa au taon tagogina i mae, oroto tagogi manemanena ma maumaurana ma gelauna molamolakana.

² Ravana manemanena awarina sipu ma bulumakau maḡamaḡau.

³ Wate ravana molamolakana sipu natuna wavinena i ḡimarai, ma natunatuna maiteni i ḡamoi da i rata, molamolakana ana sipu tagotago. Ana lam momoḡina sipu i aniani ma waira ana au kelaka i umaumai ma au arona i matamatave, wei lamna me tauna natuna guguinina.

⁴ —Marina taomana i nei oroto manemanena ana au numa, ma oroto manemanena eḡa ita ḡoei da ana sipu bo bulumakau ita vunui da ana taomana ana lam ita vokaukauei. Eḡa, tauna oroto molamolakana ana sipu natuna wavinena i vunui ma i vitavi ma ana taomana i verei.”

⁵ Nai maranaina David i meji guratana ma Nathan awarina i ḡaiawa, “BADA lawalawaina wawanei a ririwa da aiai wei kauana i kauai anina ina iraḡe!

⁶ Kaua apoapoe kaukauana i kauai lamna aubaina sipu ḡaubona 4, orotona molamolakana ina verei.”

⁷ Anina ma Nathan David i riwei, “Tam nai ravana! Wei lamna aiwai BADA Israel ana God i riwei, ‘A vinem da Israel ana gulau ma Saul au urana a vaitawanem.

⁸ Ma am bada Saul ana vibadana ma ana buderi a vere-tawanem ma awawana au uram a terei. Ma nanare a terem da Israel ma Judah u vibadei. Mepa da wei anatapui i muomuo ḡuratana awarim, tagotagogina au tepana ata viaitepatepani.

⁹ Aiwai aubaina riwau bagibagina u rau-aḡaiḡai? Aiwai aubaina wei kauana apoapoena u kauai? Uriah Hitti ei sodei u piḡi; awana mai Ammon ai sodei u virāḡeni. Ma awana u vaia da awam.

¹⁰ U rau-aḡaiḡai u ma Uriah awana u vaia da awam lamna aubaina am au numa viḡaiḡaiawa ina mae-noonā.”

¹¹ —BADA wei e ririwei, “Tau aburuna ava da apoapoena ana nei ai am u numa. Au matam awawam ana vaia ma oroto au ririvam ana verei. Ma tauna awawam maiteni ina matave, patara au matai.

¹² Tam u kauana-ḡovaḡei wate tau madeḡai ana kauai, mai Israel au matai.”

¹³ David Nathan i riwei, “Tau, BADA awarina a kauana-boai!”

Nathan, David i riwei, “Ee wate God am apoapoe e vaivai-tawanei. Tam eḡa ma iraḡe.

¹⁴ Wate kaua apoapoena u kauai ma lamnei BADA u vijiboḡa-kauai lamna aubaina natum ina iraḡe.”

¹⁵ Nathan i nae ana au numa. Ma BADA doria i paritawanei David ma Uriah awana, natui awarina ma i doria kaua.

¹⁶ David i raupari guratana God awarina natuna aubaina. Am i voterei ma i rui ana au numa ma au debidebi i matamatave.

¹⁷ Ana numa babadai i nei awarina, da au debidebi ita voepai ma maiteni ita am, wate i geduai.

¹⁸ Aupom 7 au murina tevera i raḡe ma ana numa babadai i rovo da David eḡa ita pariverei. Tau i ava i babani vivira i pa, “Maranai tevera lawalawaina David eḡa ita rautaniḡaneta ma marina menanare tana riwanei da natuna i raḡe? Mepa da ina viapoapoena-melei!”

¹⁹ David i ‘nanai ana taunola i pari-ararava ma i aramanei da natuna i raḡe.

Ma i paradadana, “Tevera i raḡe bo?” Ma tau i paribelei, “Ee tauna i raḡe.”

²⁰ Anina ma David debidebiei i vomairi ma i toa ma i vigara ma monamona gabugabui i toai ma i nae au numa gara da i voepaepa. Ma i nae me au numa ma lam i vibaḡei da i nei ai ma i am.

²¹ Ana numa babadai i baiei ma i riwa, “Maranai tevera lawalawaina, tam u uji ma u mogu, ma tevera i raḡe, tam u vomairi da e amam!”

²² David i paribelana, “Ee tau a uji ma a mogu maranai natu lawalawaina. A notai da BADA ina rau-nuapoapoeleu ma natu ina lawana.

²³ Wate marina i raḡe aiwai aubaina ana u uji? Ana nei ana-melei bo? Amapo ana nae awarina wate tauna eḡa ina nei awariu.”

²⁴ Anina ma David awana Bathsheba i vinuabai ma maiteni i matave. Ma tevera orotona i ḡuni ma David i ḡorei Solomon. BADA tevera nuanuana i vaia,

²⁵ ma lamna aubaina BADA peroveta Nathan i paritawanei da tevera wavana i ḡorei Jedidiah*.

1 Kings Gulagulau Naona

Pariverena

Wei bukana ana ġuta tonuġa, ġuta tagogi (Kapita 1-2) lamna gulau David ana iraġe i bababaniei ma natuna Solomon tauna ana gabu i viaia da i vigulau. Guta viruaina (Kapita 3-11) Solomon ana vibada mai Israel awari lamna e vivieġeta ma menanare ana vibada nai au dobuna i tua-nae ma i rata. Ma maiteni e ririweta da tauna menanarena God ana tempol i voanei au Jerusalem. Ma ġuta damona (Kapita 12-22) e ririweta da menanare mai Israel i kai da navanava ruaġa, Israel ana dam ma Judah ana dam. Ma dam tagotagogi ava ai gulau i mae. Wei bukana lamna nai gulau ai virarautua e bababaniei ma e viviatataieta da metaui gulau Bada riwana i votaġotaġoi me David i kauai nanare, ma metaui gulau Bada i mae-puputei ma god ġelau i raudunelei.

Wei bukana au orana.

Gulau David i'raġe ma natuna Solomon i vigulau (2:10-12)

Solomon God i vibaġai da nualaula ma nota aiaina ita verei (9:3-5, 7-4, 16-18)

Solomon ana vibada i tua nae (4:20-21, 25)

Solomon God ana tempol i voai ma i raupariei (5:1-6, 6:1-7, 11-14, 8:1, 3-6, 10-11, 22-23, 27-30, 41-43)

Mai Sheba ai gulau wavinena Solomon i raugenari (10:1-9)

Solomon God i mae-puputei (11:1-5, 7-13, 26-33, 35, 40)

Solomon i'raġe ma natuna Rehoboam gabu i vaini (11:42-43)

Rava i kai da dam ruaġa, Israel ma Judah (12:1-20)

Israel ai Gulau Ahab God i mae-puputei ma god ġelau i raudunelei (16:30-33)

Peroveta Elijah kaiaababa ma natuna orotona i voagui (17:1, 8-16, 17-24)

Bada Baal ana peroveta i vovaiubai au ola Kamel (18:1-2, 17-46, 19:1-21)

2

David i 'raġe

¹⁰⁻¹¹ *David Israel i vibadei madeġa 40; au Hebron madeġa 7 ma au Jerusalem madeġa 33.

David ana mara i kwa ma au Jerusalem au kokoaga noinoina au ririvai i vimataveni.

¹² Ma Solomon amana ana gabu i vaia da Israel ai gulau ma God i kauai da ana vibada i wirewapana.

3

Solomon nuaulaula i vibaġei

³ Solomon, BADA nuanuana i vaia ma lamna aubaina amana David ana tarawatu i vojijina-kauai. Wate kaua tagogi i kaukauana-boai lamna pulo i apuapu labalababai nai dobuna ravai ai pulo ai au aniamapuna.*

⁴ Wei lamna pulo aniapuna gabuna, wavana naenaena i mae au Gibeon. Solomon i nae weka da ġamoġamo 1,000 i apu-tapui BADA awarina.

⁵ Waguvara tagogi BADA, Solomon ana au rauboni i riwei i pa, "Aiwai e ġoġoġoi, ma vibaġei ma ana verem?"

⁷ Solomon i paribelei, "BADA au God, tam u tereu da amau a raviepaiai da gulau, wate tau tevera ota ma eġa ata aramanei menanare ana vibadanei.

⁸ Ma tau weka am rava u vinevineia au poui, tau i maġa dewadewa da eġa aniavana.

⁹ Eġa ai ai ainelana tagotagogina am rava, u vinevineia ina vibadei. Lamna aubaina nuaulula ma vereu da ana aramanei metauna aiaina ma metauna apoapoena."

¹⁰ BADA i vinuai ai da Solomon nuaulaula i vibaġei.

¹¹ Ma Solomon i riwei, "Tam eġa lawana manamanaina bo mane, uta vibaġei bo uta vibaġaiu da am ġavia ata viraġeni. Eġa! Tam u vibaġaiu nuaulaula aubaina da au rava ma vibadana-kauai.

¹² Aiwai u vibaġei ana verem! Nota aiaina ma nuaulaula ana verem, eġa me ai ai ġelauna au naona nanare bo ai ai ġelauna muriai ina vaia nanare.

* 2:10-11: 2Sa 5:4-5 * 3:3: Eng. High places Weka ola muomuou au tepai pulo aniapuna i voa-naiei Canaan

¹³ Avena da mane ma vipurapura ma wavam vimae-ġaeġaenana aubaina, eġa uta vibaġei, wate ana verem, da am au lawana eġa ai ai gulauna am vigulau ina votani.

¹⁴ Ma mepa da ma rautaniġaneu ma au tarawatu ma voteletelei me amam David i kaukauei nanare, tam am lawana ina manawa.”

Solomon ana nuaulaula i vieġai

¹⁶ Muriai etanai waivinei ruāġa i ġeta gulau awarina da tauna ai ġaiawa ita okei.

¹⁷ Wavine tagogi i riwa, “Au bada tauai airuāġa ai numa tagogi. Ma tau tevera orotona a vinatunei au numa, maranai noi wavinena kampa.

¹⁸ Ma aupom tonuġa au murina wavine viruaina nanare tevera orotona i vinatunei. Eġa ai ai ġelauna au numa anina airuāġa ava.

¹⁹ —Ma waguvara tagogi wavine natuna i matave-jjini da i 'raġe.

²⁰ Ma waguvarai au pouna i vomairi, ma natu au ririvau i matamatave i vaia. Tauna natuna irairaġena au ririvau i vimataveni ma tau natu lawalawaina i vaia da au ririvana.

²¹ Ubaubanai a vomairi da natu ata viġuġui, lamna a baei da natu i 'rairaġena. Ma mara i tom kaua ma ata inana-kauai lamna eġa tau natu.”

²² Wate wavinena ġelauna i riwa, “Eġa! Tau natu lawalawaina; tam natum irairaġena.”

Ma wavine au naona i vinatuna i riwa bagibagi i pa, “Tevera irairaġena lamna tam natum ma lawalawaina lamna tau natu! Ma nanare airuāġa i viġeġae.”

²³ Anina ma gulau Solomon i riwa, “Wei tauna e ririwa, ‘Tau natu lawalawaina ma tam natum irairaġena. Ma noi tauna e ririwa, ‘Eġa! Tam natum irairaġena ma tau lawalawaina.”

²⁴ Ma gulau i riwa, “Sod ona neiai.” Ma i neiai gulau awarina.

²⁵ Ma i eġara, “Tevera lawalawaina au pouna ona viailaraġi da navanava tagogi wavine tagogi ma navanava ġelauna wavine ġelauna.”

²⁶ Tevera lawalawaina alo oina, nuanuana i bola-kauai ma gulau i riwei, “Au gulau a vivibaġaim da tevera lawalawaina noi wavinena ma verei! Eġa ma viraġeni!”

Wate wavinena ġelauna i riwa, “Eġa tam bo tau teverana tana vaia. Tevera au pouna ma viailaraġi!”

²⁷ Anina ma gulau ana paribelana i tere-ġairei i pa, “Eġa tevera ona viraġeni ma wavine au naona i vivinatuna ona verei, tauna tevera alo oina.”

²⁸ Maranai mai Israel Solomon ana etara riwana i nonori, marina taui Solomon ina vivirei, ma i aramanei da God, Solomon nuaulaula i verei da lawana ina tere-vaijjimani.

4

Solomon i vibada kaua

²⁰ Mai Judah ma mai Israel ai patara i maġa dewadewa me bubu au gera. Taii ai lam ma ai uma tagotagogina ma i vinuaii kaua.

²¹ Ma Solomon dobuna anatapuna i vibadei. Ana parata au waira Euphrates i vikarei da i ġaira au Philistia ma kampa da i ġaira Egypt ana au parata. Wei ravai tax i vivimaiei gulau Solomon awarina ma i voteletelei maranai lawalawaina.

²⁵ Maranai Solomon i vibada mai Judah ma Israel ana nuaubai i mae, ai nuabola eġa aiwai. Au lavaratei Dan ana dam ai au dobu i vikarei da i ġaira au Beersheba au rauanagei, numa nununai ravai anatapai ai numa ma ai wapu i mae.

5

Solomon Tempol voana aubaina i vokaukaua

¹ Maranai David maemaeninai, tura-kauana lamna Gulau Hiram, Tyre ai gulau. Maranai gulau Hiram riwana i vaia da Solomon i vigulau au Israel, amana David epaiana, Tauna ana taunola i paritawanei da gulau vouna i viegualaei.

² Ma gulau Solomon wei riwana i paritawanei gulau Hiram awarina i pa:

³ Tam u aramanei da amau dam maġamaġau i ririvaiai i mae-kwawiviroi ma maiteni i viġaiġaiawa nonoa. Ma lamna aubaina eġa tagotagogina da tempol ita voai Bada ana God, viborumana aubaina. Wate i vivipaipi da au naona Bada ana ageui ana ġavia ita vipupui.

⁴ Wate marina Bada nuauaba i vereu. Au ġavia ma au nuabola eġa.

⁵ *A vinua-notanota da tempol ana voai, Bada God viborumana ma vimae-gāe-gāenana aubaina. Me Bada amau i ririwei nanare maranai i riwa i pa, “Natum orotona ana terei gulau, am au gabu, ma tauna numa ina voai tau viborumau aubaina.”

⁶ Lamna aubaina am taunola ma paritawaneī au ola Lebanon, da aubaiu ai bagibagi cedar ina tarai. Tam am nelara ai tarana i aramana-kauei. Tau au nelara ana paritawaneīai da ina tara agui. Am nelara ana vimaiei, biāga e vivibaḡei nanare ana vimaia.

Anina ma gulau Solomon ai cedar i vimaiei. Ma mai Israel nelara 30,000 i vaia ma i voagui da ai ma purapura ḡelau numavoa aubaina i vivaneīai au Jerusalem.

Solomon wate nanare nelara 150,000 i terei da i nola, wei ravai ai nola da ḡaima ina wamawamai ma ina boribori numa voa aubaina.

6

Solomon tempol i voai

¹ Solomon mai Israel i vibadei da madeḡa tonuḡa ma au vi-4-na, nawaravi au viruaina e ḡoreḡorei Ziv, tauna BADA ana tempol voana i vikarei. Wei lamna madeḡa 480 i kwa maranai mai Israel, Egypt i opu-tawaneī.

⁷ ḡaima gāeḡaei numa voana aubaina anatapuī au weia i ḡarai ma kampa i bori-naiei, da eḡa irama bo aniambori gugurai numavoa gabuna ita vitaniḡa-potai.

¹¹ Ma BADA Solomon i riwei,

¹² “Wei Tempolna voana aubaina ana riwem, mepa da riwau ma rautaniḡaneī, ma au tarawatu anatapuī ma votaḡotaḡoi, ma aiwai a ririwem ma kaukauei, Tau aiwai amam David a parivainuāḡani ana kauei aubaim.

¹³ Ma tau au rava mai Israel maiteni ana mae, ma eḡa melanai ana netawaneī.”

¹⁴ Anina ma Solomon tempol i voa-pai.

8

BADA ana Parivainuāḡana bokisina i ruiei au tempol

¹ BADA ana parivainuāḡana bokisina au Zion, David ana taon* ita vaia da ita neiai au Tempol. Gulau Solomon, Israel babadai ma dam nununai babadai anatapuī i ḡoreiai awarina au Jerusalem.

³ Maranai Israel babadai i ḡetai, pirisi parivainuāḡana bokisina i voepai.

⁴ Pirisi ma Levi ana dam ravai parivainuāḡana bokisina ma numa gara ma ana purapura vivivirei i avara-naiei au Tempol.

⁵ Gulau Solomon ma mai Israel anatapuī parivainuāḡana bokisina au naona; sipu da bulumakau i vunuvunu-naiei, ḡamoḡamo i maḡa guratana da iavana i kauana-avei.

⁶ Ma pirisi parivainuāḡana bokisina i ruiei tempol au orana da ana au gabu vivivira dewadewana cherub† ruaḡa papei au gabaurina i vikialai.

¹⁰ *Maranai pirisi gabu vivivireina i opu-tawaneī, bau potopotona i ḡairai, ma ana boruma numana i purui.

¹¹ Pirisi eḡa tagotagogina da ai nola ita kauei aubaina bau potopotona; BADA ana boruma, tempol i vioai.

Solomon Israel aubaina i raupari

²² Ma Solomon pulo aniapuna au naona i mairi, ma au murina Israel patarana. Urana i voepai au mara,

²³ ma i raupari i pa, “Oo BADA, Israel ana God, eḡa mepa God ḡelauna me tam nanare, au tepana au mara bo au gabaura au dobu! Tam am parivainuāḡana anatapuina e kaukauei, ma mara nonoa am rava nuanuai e vaivaia maranai orai taputapuneī e votaḡotaḡoim.

²⁷ —Wate amapo God au dobu ina mae bo eḡa? Eḡateni! Mara, ma nanare mara ḡedewadewa eḡa tagotagogina da tauna ina vojijini. Wei tempolna a voavoai lamna anina bo eḡa?

²⁸ —Wate au pari ma nonori. BADA au God, tau am taunola ma aiwai amadodo a vivibaḡei ma veru.

* 5:5: 2Sa 7:12-13 * 8:1: Zion lamna melagai aburuna, Jerusalem taon garina au orana. † 8:6: Cherubwei purapurai lawalawai wate ruaḡa ai Olivei i tai ma i vimairini (4 mtr) ma papei i terei da numa au giana da ḡia ḡelauna i tonei. * 8:10: Exo 40:34-35

²⁹ Am tempol ma inana-vaitetei, marai ma waguvarai, wei gabuna aubaina u riwa u pa, 'Tau wavau kampa.' Lamna aubaina au pari weka ana pariparitawaneiai ma i rautaniġanei.

³⁰ Au pari ma nanare am rava mai Israel ai pari ma nonori, maranai naoi i tereiai weka ma i raupari. Au mara ai pari ma nonori ma ai apoapoe ma nota-tawanei.

⁴¹⁻⁴² —Ma maranai jentail aueia maemaiei, riwam ma am rewapana ma kaua ġaeġaei u kaukaueia riwai ina nonori; ma ina nei da ina vimae-ġaeġaenim. Ma am numa au naona ina mairi ma ina raupari

⁴³ am au animae au mara, ai pari ma nonori ma ai ġoana ma kauiei. Ma jentail wavam ina aramanei ma ina vimae-ġaeġaenim me am rava oina mai Israel. Ma jentail ina aramanei da wei tempolna a voai. Tam vimae-ġaeġaenam aubaina.”

10

Sheba ai Gulau wavinena Solomon i raugenari

¹ Solomon ana vigulau wavana naenaena ma lamnei Bada i vimae-ġaeġaeni. Ma Sheba ai gulau wavinena, wei riwana i nonori ma i ġei au Jerusalem da paridadana pipiripirinei Solomon ana nuaulaula ita raudadani.

² Wavine ana taunola ma kamel maġamaġau ai pulo i vigerui ma ana borui i derirui. Taui ai pulo lam tauvidagiai, ġaima maiiai ġaeġaei ma gold ġaeġaena. Wavine i nei Solomon awarina ma kaua maġamaġau i vinua-notenotei Solomon i paridadanei.

³ Solomon ana paridadana anatapuna i paribelei, kampa eġa aiwai tagogi ita pipiripi guratana awarina.

⁴ Sheba ai gulau i aramanei da Solomon nuanuana i ulaula kaua ma; i 'nanai ana gulau-numana, vigulauna i voai,

⁵ lam au kepakepa, ana gabemani babadai ai gara, ana wine taupainii, ma pulo i apuapui Bada ana au tempol. Ma wavine ana nota i kwa.

⁶ Ma Solomon i riwei, “Am kaua anatapuna ma am nuaulaula au au dobu a nononorია lamna anatapuna riwa kaua!

⁷ Au naona eġa ata vitumaġanei wate marina a nei da matauei a inana da a vitumaġana. Ma a inana da aiwai a nononorია lamna eġa. Tam am vigulau i rata dewadewa.

⁸ Am taunola* i vinuaiiai kaua! Am gabemani babadai au naom e maimairi marana patapatai ma am nuaulaula e rarautaniġanei.

⁹ Bada am God ana voepaepai, i vinuaiaiem ma i terem Israel ai gulau. Bada ana nuavaina maemaena mai Israel aubai i terem gulau, da riwa kauiei ma kaua jijimaninei ma vibada.”

¹³ Solomon, Sheba ai gulau aiwai anatapuna i rarau-oġarei ma i vivibaġei, i verei, wate ġelau i vereoi. Anina ma gulau wavinena i wanavira-meiei ana au dobu ana taubagibagi maiteni.

11

Solomon Awawana

¹ *Gulau Solomon, Egypt ai gulau* natuna i ravaġi ma nanare jentail waivinei i ravaġa-naiei, ġelau mai Moab, mai Ammon, mai Edom, mai Sidon ma, mai Hitti.

² *Au naona BADA mai Israel i riwana-guratei i pa, “Jentail waivinei eġa ona ravaġi aubaina tui nuanuami ina vovirai da ai god ona voepaepai.” Wate Solomon nai eġa ita rautaniġanei, ma awawana nuanuai i vai-kauiei.

³ Tauna awawana 700, anatapui gulagulau natunatu, wate awawana ġelau 300 lamna me ana taunola. Taui Solomon ana vitumaġana BADA awarina i vikwako.

⁴ Maranai Solomon i magura, awawana ana nota i virai da god ġelau i votaġotaġoi, ma eġa BADA awarina ita vipatutu me amana David.

⁵ Tauna mai Sidon ai god wavinena Ashtoreth, ma mai Ammon ai god apoapoe kaukauana Milkom[†] i vivivorumei.

⁷ Au Ola Olive au Jerusalem kampa Solomon voepaepa gabuna i voai mai Moab ai god apoapoe kaukauana, Chemosh aubaina ma ġelauna mai Ammon ai god apoapoe kaukauana, Molek aubaina.

* 10:8: Giruma ġelau i ririwa awawana * 11:1: Deu 17:17 * 11:1: Pharaoh * 11:2: Deu 7:3-4 † 11:5: Hebrew Milkomwate giruma ravai maġamaġau i notanotai da wei lamna mai Ammon ai god wavana ġelauna Molek

⁸ Voepaepa gabui wenanare i voanaiei awawana anatapui aubaii da tau i weka incense ma ai pulo ita apuapui ai god awarii.

⁹⁻¹⁰ Maraotai BADA, Solomon awarina mara ruaḡa i eḡa ma i riwana-guratei da god ḡelau viborumai ina voterei. Wate tauna eḡa ita voteletelei, ma Israel ai God viborumana i voterei. Lamna aubaina BADA amlona i ḡaiḡai kaua Solomon awarina.

¹¹ Ma i riwei i pa, “Wei kauai i visina-viraviraim ma au parivainuagana bagibagina ma au tarawatu eḡa uta votaḡotaḡoi, lamna aubaina vibada au uram ana vaitawanei ma am taunola tagogi ana verei.

¹² Wate amam David notanei wei eḡa ana kauai maranai tam lawalawaim. Wate natum au urana ana vaitawanei.”

Jeroboam ma Solomon ai virarautua

²⁶ Solomon ana gabemani taunoleina wavana Jeroboam maiteni gulau Solomon i vigaviei. Tauna Nebath natuna, ana taon Zeredah au Ephraim, ma alona kaiababa wavana Zeruah.

²⁷ Jeroboam ana virarautua wenanare: Solomon ana taunola doa i taratarai da gwagwa i purupurui ma Jerusalem taon garina ḡaimi gavogavoi i vopotapota-naiei.

²⁸ Jeroboam oroto araramanina ma maranai Solomon i 'nanai da tauna i nola kaua, ma i terei da Joseph noinonii dam Ephraim ma Manasseh, ai taunola i vibadei.

²⁹ Mara tagogi, Jeroboam Jerusalem i voterei da i nenaie ma au mutulua peroveta Shilohe wavana Ahijah maiteni airuaḡa ava i vinenebelana, Jeroboam kwama vouna i oteoteni.

³⁰ Ahijah, Jeroboam ana kwama vouna i vojijini ma i sikanaii da 12.

³¹ Ma i riwei, “Wei garai sikasikai 10 ma vaia aubaim, BADA Israel ana God e ririwa, ‘Tau Israel ana vibadana Solomon au urana ana sikatawanei ma ana dam 10 au uram ana terei.’

³²⁻³³ Solomon Tau i geduaieiu ma mai Sidon ai god wavinena, Ashtoreth, Moab ai god, Chemosh ma mai Ammon ai god, Milkom i vovoepapai ma eḡa au iviu ita babara bo ita kauana-kauai au matau bo riwau bo au tarawatu ita votaḡotaḡoi me amana David i kaukauei nanare. Wate au taunola David ma Jerusalem notaiei, Jerusalem a vinei da Tau ḡariuei, lamna aubaina Solomon dam tagogi ana verei da ina vibadei.

³⁵ —“Wate Solomon natuna au urana Israel ana dam 10[‡] ana verem.”

⁴⁰ Solomon i ḡoei da Jeroboam ita viraḡeni, wate tauna i ruba au Egypt, ai gulau Shishak awarina ma kampa i mae da Solomon i 'raḡe.

⁴² Solomon au Israel i vigulau da madeḡa 40 i kwa.

12

Rehoboam

¹ Mai Israel anatapui i nae au Shekem ma i vipaipai da Rehoboam ita nei ma ita terei ai gulau.

² Maranai au Egypt, Nebath natuna Jeroboam, wei riwana i nonori ma Egypt i voterei ma i naeme. (Tauna au naona Solomon i rovoei da kampa i ruba nae.)

³ Ma Israel babadai riwa i paritawanei da Jeroboam i nei ma anatapui i nae Rehoboam awarina ma i riwei, i pa,

⁴ “Amam nola vitaikaukauai au tepaii i terei, wate ai vita marina uta votelatelai, ma ana vitaunolem.”

⁵ Rehoboam i paribelei i pa, “Ona nae ma aupom vitonuina ona nememei ma ana paribelei.” Ma rava i vilamonei.

⁶ Ma gulau Rehoboam, dogadogara awari vinuaterena i vaia, tau i amana Solomon ana taunola maranai lawalawainai. I paridadanei i pa, “Wei ravai menanarena ana paribelana-nei?”

⁷ Tau i paribelei i pa, “Mepa da u ḡoei da rava ma voagui, ai vibaḡa ma vianinei, ma tau i aubaim ina vitaunola nonoa.”

⁸ Wate Rehoboam dogodogara ai vinuaterena i geduaieiu ma i nae ana kimta awarii, maiteni i rata tagogi, ma marina tauna e vivitaunolei

[‡] 11:35: Dam ruaḡa Judah ma Benjamin i voterei

⁹ Tauna i paridadana, “Ami nota aiwai? Menanare tana kauanei, wei ravai e ririwa da ai vita tana viaburui?”

¹⁰ Ma ana kimta i paribelei i pa, “Nai ravai awarim i ririwa, ‘Amam vita gaegeaena i vereverelai marina ai vita ma viaburui.’ Wenanare ma riwei, ‘Tau vita gaegeaena ana veremi ega me amau!

¹¹ Amau vita gaegeaena i veremi wate tau gaegeaetana ana terei au tepana! Tauna kwapuei i ravimi wate tau gorogorova donadonanei ana kwapuumi.”

¹² Aupom tonuga au murina i riwa nanare Jeroboam ana babada maiteni i nememei Rehoboam awarina.

¹³ Gulau Rehoboam dogadogara ai vinuaterena ega ita vaia ma pona bagibaginei rava awari i babani.

¹⁴ Tauna ana kimta ai vinuaterena i rautanigane i ma nanare i riwa, “Amau vita gaegeaena i veremi; wate tau ana viaitepatepani. Amau i ravimi wate tau gorogorova donadonanei opimi ana sikai!”

¹⁵ Au naona God ana peroveta Ahijah, Shilohei aiwai Nebath natuna Jeroboam i parivere i marina anona i tupua. Gulau rava ai vinuaterena ega nonorana ita goei, wate lamna BADA i kaukauei da aiwai peroveta i ririwei nanare ina tupua*.

¹⁶ Maranai Israel patarana i 'nanai da gulau tau ai babani i parivirevire, ma gulau i riwei i pa:

“Tauta ega Jesse natuna David ana damei!

Ega ana dam ravai!

Oo Israel ona naeme me ami au numa

Oo David am dam oina ma inanai!”

Anina ma mai Israel i nae ai au numa.

¹⁷ Wate Rehoboam mai Israel au Judah maema i vibadei.

¹⁸ Adoniram, mai Israel anapui ai taunola i vibadei. Gulau Rehoboam, Adoniram i paritawanei au Israel da ai taunola ita neiai au Jerusalem wate tau gaimi i virauraei da i virageni. Gulau Rehoboam lagilagina ana chariot i gerui ma i nae me au Jerusalem.

¹⁹ Ma wei marana da i nae mai Israel David ana dam ma ai vigulau i geduaiei ma i parivirevirei.

²⁰ Maranai mai Israel anapui i aramane i da Jeroboam Egyptei i nememei, tau riwa i paritawanei da i nei awarii ma i terei Israel dam anapuna ai gulau. Dam tagogiava, Judah ava, i mae David maiteni.

Jeroboam bulumakau goldei i kauai

²⁵ Ma gavia rovona aubaina Jeroboam Shekem taon gaimi i gari kwaviviroi ma kampa i mae. Wei lamna dobu violaolana, dam Ephraim ai dobu. Muriai i nae ma nanare Penuel taon i gari-kwaviviroi.

²⁶⁻²⁷ Mara tagogi gulau Jeroboam wenanare i vinua-notanota, “Mai Israel anapui e gegae au Jerusalem da au tempol pulo e apuapui BADA awarina. Ma mepa da nuanui ina virai ma ina audamana Judah gulauna Rehoboam awarina amapo tau ina virageniu.” Ma wei vigulauna ina nae me David ana epaepaia awarii.

²⁸ *Ma ana dogadogara maiteni i babani da i vinua-terenei ma bulumakau ruaega goldei i kauai ma ana rava i riwei, “Jerusalem gaena i vinigarigari, Oo Israel wei ami god, tauna Egyptei i tere-opunemi.”

²⁹ Ma bulumakau goldei tagogi au Bethel ma gelauna au Dan i terei.†

³⁰ Wei lamnei i go'apoape; aubaina rava gelau uama gaegeaena i naeni da au Dan da burumakauna i voepapai.

³¹ Jeroboam maiteni voepaepa gabui ma pulo aniapuni i voanaiei ola au tepai ma rava labalababa ega mai Levi i vinei da pirisi, pulo tauapuna.

Rehoboam au Judah i vigulau, ma i vigulau da madega 17 i kwa. Maranai tauna gulau i maemae, mai Judah god morumorui i raraduneei. Ma mai Egypt i nei da Judah i vigaiviei ma ai tempol

* **12:15:** ...da vigulau Solomon natunatuna awariei ina vaitawanei ✨ **12:28:** Exo 32:4 † **12:29:** Mai Israel ai nota da Dan ma Bethel lamna dobu vivivirei. Bethel lamna au Israel (dam 10) au laubadei ma lamna 16 kilometer ota Jerusalem au kolanana. Wei ega uama, ma wei lamna Jerusalem e teretere-gairei ma rava e ririwei da au Bethel ina voepaepa. Dan lamna Israel au kolana au lavaratei.

purapurai mai ai gāegāei ma gulau ana numa purapurai mai ai gāegāei anapui i pupuni da i vivanei.

Rehoboam ma Jeroboam i viḡaiḡaiawa nonoa. Maranai Rehoboam i 'raḡe, natuna Abijah au Judah i vigulau madeḡa tonuḡa i kwa. Tauna maiteni Jeroboam i viḡavie. Maranai Abijah i 'raḡe, natuna Asa au Judah i vigulau da madeḡa 41 i kwa. Tauna gulau aiaina, ma God i raudunelei ma mai Judah ai god morumorui i viparipariei. Tauna mara nonoa mai Israel ai gulau Baasha maiteni i viḡaiḡaiawa. Maranai Asa i 'raḡe natuna Jehoshaphat i vigulau mai Judah awari.

Au Israel Jeroboam natuna Nadad lamna gulau apoapoena, ma nanare aiavo i tauna au murina i vivigulau anapui gulau apoapoei. Nadab mai Israel i vibadei da madeḡa ruaḡa i kwa ma Baasha tauna i virāḡeni, ma Jeroboam ana dam mamae-terenanai maiteni. Wate rava wavana Baasha i vigulau da madeḡa 24 i kwa ma i 'raḡe. Ma natuna Elah i vigulau da Israel i vibadei da madeḡa ruaḡa i kwa ma ana sorodia badana tagogi, wavana Zimri, tauna i virāḡeni ma i terapa-melei da i vigulau. Wate wiki tagogi au murina mai Israel ai sorodia Omri i terei da gulau, anina ma Zimri i virāḡena-melei. Omri i vigulau da madeḡa 12 i kwa, anina ma natuna Ahab tauna Israel ana gulau ma i mae da madeḡa 22 i kwa.

16

Israel ana Gulau Ahab

³⁰ Omri natuna Ahab, ana ḡo'apoapoe i rata guratana BADA awarina eḡa me gulau anapui au naona i vivibada nanare.

³¹ Tauna i notai da lamna kaua labalababa da i ḡo'apoapoe me Nebath natuna Jeroboam i kaukauei nanare. Wate tauna i kauana-guratei maranai mai Sidon ai Gulau Ethbaal natuna Jezebel i ravaḡi ma i vikarei da ai god Baal i raudunelei.

³² Ma Baal ana voepaepa gabuna pulo tauapuna au Samaria i voai ma au orana pulo aniapuna i voai.

³³ Ahab god wavinena Asherah kokoitauna i vituramairini*. Ma kaua maḡamaḡau i kauai da BADA, mai Israel ai God ita viamlogaigaini, me mai Israel ai gulau au naona i kaukauei nanare.

17

Elijah ma Ahab

¹ Peroveta Tishbelei wavana Elijah* ana dobu Tishbe au Gilead, Ahab i riwei, "Riwa kaua! BADA Israel ana God lawalawaina, ma tauna a vivilaragei. Wavanei a riwa da turuvani eḡa ina peu ma garewa eḡa ina atuna madeḡa biāḡa da tau ana riwa da nanare.†"

Ma nanare i mae. Madeḡa biāḡa garewa eḡa ita atuna, marapoi i ḡetai ma eḡa lam.

⁸ Ma BADA Elijah i riwei

⁹ "Laḡilaḡina ma nae au taon Zarephath, Sidon au ḡereḡerena‡ ma kampa ma mae. Kampa kaiababa e mamae, a riwei da ina viambagibagim."

¹⁰ Ma Elijah i nae au Zarephath. Maranai i ḡetai taon ana au anirui, ma kaiababa i 'nanai ai i ḡunaḡuna, ma i riwei, "A vivibagaim da waira aburuna uta nei ai da ata uma!"

¹¹ Ma i nenaie vainana aubaina ma orotona i garara me i pa, "Ma palawa apuapunana aburuna maiteni uta nei ai."

¹² Kaiababa i paribelana i pa, "Riwa kaua! Am BADA God lawalawaina ma wavanei a ririwa, tau awariu eḡa palawa apuapunana. Awariu palawa aburu kaimojina ma monamona aburuna. Ai a ḡunaḡuna da ana nae au numa ma lam damona ana vitavi da natu maiteni ana am ma au murina ana raumolaḡau da ana irāḡe."

¹³⁻¹⁴ Wate Elijah kaiababa i riwei, "Eḡa ma vinuabola! BADA Israel ana God e ririwa, 'Am palawa abomana eḡa ma monamona wagina eḡa ina kwakwava ma BADA garewa

* **16:33:** Asherah lamna god wavinena, Baal awana; mai Canaan, mai Egypt ma Phonisia anapui wei godna e viviborumei. † **17:1:** Elijah anona BADA lamna God. ‡ **17:1:** Mai Canaan e vivitumaḡana da ai god Baal garewa e vivibadei, wate maraḡela god ḡelauna wavana Mot anona irāḡetauna Baal i virāḡeni. Mepa da Baal i lawana me, lamna tauna dobu ina vituvanei. Lamna aubaina, Elijah Baal i vimarumarui ma i ririwa da tauna God lawalawaina awarina i vitaunola, ma God garewa ma irāḡe i vibadei, muriai tana inana maranai ina vomairi da kaiababa natuna ina vilawana-melei

‡ **17:9:** BADA Elijah i paritawanei au Sidon - kampa rava Baal i raudunelana-guratei. Wei lamna Ahab poiana orotona Ethbaal ana gabu, ma wei au marana, Elijah Ahab i rarauḡovaḡei.

ina paritawaneiai da wapu ina gogo me! Anina ma nae au numa ma u ririwa nanare ma kauēi, wate au naona palawa aburuna ma apui aubaiu. Ma mae-terenana ma apui aubaimi.”

¹⁵ I nae ma menanare Elijah i ririwei, nanare i kauēi. Ma awari lam i mae da aupom biāga i kwa.

¹⁶ Ma me BADA Elijah i parivainuāgani nanare palawa au aboma ega ita kwa ma monamona au wagi ega ita kwa.

¹⁷ Muriai kaiababa natuna i doria ma ana doria i vovoguratei anina ma i raḡe.

¹⁸ Ma wavine Elijah awarina i riwa, i pa, “God ana taunola, Aiwai aubaina wei i kauēi awariu? U nei weka da au ḡo’apoapoe uta vieḡai ma natu uta vi’raḡeni bo?” §

¹⁹ Elijah i paribelei i pa, “Natum ma vereu.” Elijah taubeu, alona au urana i vaia ma i avara-ḡaiei au vatavatara mepa i mamae lana ma ana au animatave i vimataveni.

²⁰ Anina ma ponana i rata ma i raupari BADA awarina, “Oo BADA au God, aiwai aubaina kaua apoapoe kaukauana u kauēi kaiababa awarina? Tauna i taravainiu da ana au numa a mamae, ma u kauēi da natuna i raḡe?”

²¹ Anina ma Elijah i taduru ma mara tonuḡa taubeu au tepana i matave ma ponana i rata ma i raupari BADA awarina i pa, “Oo BADA au God, A vibaḡaim da tevera ana lawana ma veremelei!”

²² BADA Elijah ana pari i nonori ma tevera lavutu i vikarei ma i lawana.

²³ Elijah tevera i voepai ma i avara ḡairei alona awarina ma i riwei, “Ma inana natum lawalawaina.”

²⁴ Wavine i riwa, “Marina aramana-kauēi da tam God ana taunola, ma BADA ana riwa gamomei e opuopu lamna riwa kauai!”

18

Elijah ma Baal ana peroveta

¹⁻² Madēga tonuḡa garewa ega ma gomara ḡaēgaena i mae. Madēga au vitonuina BADA Elijah i riwei, I pa, “Ma nae gulau Ahab ma inana. Ma tau garewa ana paritawaneiai.” Ma Elijah i nae da gulau Ahab ita inana.

¹⁷ Marana tauna Elijah i ’nanai ma i riwa, “Wei tam bo, mai Israel rauaḡaiḡai amai?”

¹⁸ Elijah i paribelei, “Tau ega ata rauaḡaiḡai au Jerusalem, wate tam, ma amam ana numa ravi maiteni o rauaḡaiḡai. Taumi BADA ana tarawatu o geduaiei, ma Baal kokoitau i viviborumei.”

¹⁹ Marina mai Israel anapui ma ḡorei da ina nae au ola Carmel ina nebeu. Baal ana peroveta 450 ma Asherah god wavinena ana peroveta 400 Jezebel ana au aboma e amam, anaputapui ma neiai.

²⁰ Ma Ahab mai Israel anapui ma Baal ana peroveta i ḡorei da au ola Carmel ina vinenebelana.

²¹ Elijah patara au naoi i mairi ma i riwei, “Wei vinua-raḡaraḡai mara aiwai ina kwa, ona vinuanaina nae ma ona vianuanaina nei, metauna notana ona vaia? Mepa da BADA God, tauna ona raudunelei. Mepa da Baal god, tauna ona raudunelei.” Wate rava ega aiwai ita riwei.

²² Ma Elijah tau awarii i riwa, “BADA ana peroveta anina tau a mamae. Wate Baal ana peroveta 450.*

²³ Aubaita bull ruaḡa ona neiai, ma tau ai sia ina rautani ma ina bori muomuoi ma ai au tepana ina terei, wate ega ina ravivoai. Ma tau nanare ana kauēi.

²⁴ Ma taumi ona raupari ami god awarina, ma tau ana raupari BADA awarina. Metauna godna ai araratanei i paribelana tauna God ririwa kauana!” Ma rava anapui i vianina.

²⁵ Elijah Baal ana peroveta i riwei, “Taumi o maḡa aubaina ona vinoa, Bull tagogi ona vinei ma ona vokaukaei. Ami god awarina ona raupari ma ega ai ona ravivoai!”

²⁶ Ma tau ai bull i vaia ma i vokaukaei. Anina ma Baal awarina i raupari, ubaubanai i vikarei da i raviubenai. Tau i garagarara, “Oo Baal, ma paribelelai!” Ma pulo aniapuna i arara kwaviviroi, Wate ega paribelana; ega aiwai ita paribelei.

§ **17:18:** Nai marana rava i vitumaḡana da doria ma irage lamna God ana kovoga ḡo’apoapoe aubaina. Kaiababa i vitumaḡana da Elijah tauna ana au numa i mamae ma lamna BADA matana i taini awarina ma lamna i kauēi da natuna orotona i raḡe. * **18:22:** Elijah ana babani lamna gulau wavinena Jezebel e ririwei, tauna i ḡoei da God ana peroveta anapuna ina viraḡeni. Ahab ana taunola Obadiah i voagu da God ana peroveta ḡelau au guba i tere-govaḡi ma waira ma lam i vererevei wate ega tata aramanei biāga lawalawaii e mamae.

²⁷ Aubenai Elijah i vikarei da i vimarumarui i pa, “Ona raupari guratana! Tauna god! Mepa da e rараboni bo i nae au ririva bo e vaḡavaḡai bo e matamatave! Ona ravidagudagui!”

²⁸ Ma tau i garara i voguraguratei ma me ai au kaua nanare, naipiei ma aierei tupuai i boribori-melei ma tara i toitoi.

²⁹ Tau i garagarara da i garagarara da aubigai pulo apuna ana mara. Wate amapo da eḡa paribelana, eḡa aiai ita paribelei, eḡa aiwai ita nonori.

³⁰ Ma Elijah rava i riwei, “Ona nei awariu.” Ma anatapui i nei ma Elijah i mae-kwaviui, tauna BADA ana pulo aniapuna i voavoa-melei.

³¹ *Elijah ḡaima 12 i vaia, ḡaima tagogi da Israel ana dam tagogi aubaina. Wava Israel BADA tau i noii Jacob i verei.

³² Ma ḡaimanei pulo aniapuna i voa-melei BADA viborumana aubaina. Ma au adana doba i ḡarai da waira ana ruva 14 Ltr nanare ina vojijini.

³³ Pulo aniapuna au tepana ai i vatari, bull i bori-naiei ma siana ai au tepana i terei. Ma i riwa, “Nau 4 ḡaeḡaei waira ona vioai, ma sia ma ai au tepana ona iwaḡi.”

³⁴ Ma nanare i kauai, ma i riwei, “Ona kauana-melei.” Ma nanare i kauai. Ma i riwei, “Mara vitonuina ona kauana-melei.” Ma nanare mara vitonuina i kauai.

³⁵ Waira i toi ḡaira da dogo maiteni i vioai.

³⁶ Ma aubigai pulo apuna ana mara i ḡetai, Elijah i babara-ḡae pulo aniapuna au ririvana ma i raupari i pa, “Oo BADA, Abraham, Isaac ma Jacob ai God, amadodo rava ma viatataiei da tam God au Israel ma tau am taunola, ma anatapuna u ririwei a kauai.

³⁷ BADA ma paribeleu, Oo BADA ma paribeleu da rava ina aramei da tam, au BADA, tam anina God, ma marina rava orai e taitaina-melei awarim.”

³⁸ Maratagogi BADA ana ai marei i ḡairai ma pulo bull, ai, ḡaima ma doa i aragibui. Ma waira i waiwaḡia i ḡuḡuva-pai.

³⁹ Maranai rava wei i 'nanai tau i mae-ḡaira au doa da i matave-taitaina ma i garara BADA awarina, “BADA anina God! BADA ainelana anina God!”

⁴⁰ Ma Elijah rava i egari, “Baal ana peroveta ona vojijini; Eḡa tagogi ona voterei da ina ruba!” Peroveta anatapui i vojijini ma Elijah tau i riwei da i ḡairei au Kishon gaugaubana ma anatapui i viraḡeni.

⁴¹ Ma Elijah gulau Ahab i riwei, “Ma nae da ma am ma garewa ḡaeḡaena gugurana a nononori.”

⁴² Ma Ahab i nae da ita am ma Elijah i ḡae ola Carmel au tepana, ma i mae-ḡaira au doa ma kolana au ae-tutuna ma i raupari.

⁴³ Ma ana taunola i riwei, “Ma nae ma au bogei ma inana.” Ana taunola i nae da i nememei Elijah awarina ma i riwei, “Eḡa aiwai ata inana.” Anatapuna mara 7 i paritawanei da inana.

⁴⁴ Ma mara vi-7-na i nememei ma i riwa, “Apau aburuna ana rata me oroto urana a inana i bogei i ḡeḡae.”

Ma Elijah i riwa, “Ma nae ma Ahab ma riwei, ‘Am chariot ma gerui ma ma ḡaira muriai da garewa ina rautomenim.”

⁴⁵ Ma aburuna ava ma lada i ḡei ma dobu i waguverei ma ivena i ruba ma garewa ḡaeḡae otana i toi. Ahab ana chariot i gerui ma i ruba au Jesreel.

⁴⁶ Ma BADA ana rewapana i rui Elijah awarina; ma ana gara giana i taini da ana au jigoraḡita i raḡita-jijini ma i lavui da Ahab i votani da i aiḡeta au Jesreel.

19

Elijah i ruba govaḡa au Sinai

¹ Ma Ahab awana Jezebel i vibenabenamei, aiwai anatapuna Elijah i kaukauei ma menanarena Baal ana peroveta anatapui i vununaiei.

² Ma Jezebel taupariverena i paritawanei Elijah awarina ma i pa, “Wenanarena marana au maratom, tau ana viraḡenim me au peroveta u viraḡenanei nanare. Mepa da wenanare eḡa ana kauai, a raraupari da god ina kovoḡa-kauuei bo ina viraḡeniu.”

³ Elijah i rovo ma ana lawana aubaina i ruba. I nae au Beersheba au Judah, ma kampa ana taunola i voterei.

⁴ *Ma tauna ainelana i nae aupom au mutulua, ma i ḡeta ai *brum* au ḡouna ma i kiala ma i raupari da ita irage. I riwa i pa, “BADA, tau malau a vai-avei. Au lawana ma vaitawanei marina, tau irairaḡeu, me noinoiu.”

⁵ Ma i mae-ġaera ai *brum* au karena ma i matave. Ma maratagogi BADA ana anela Elijah i vodadani ma i riwa, “Ma vomairi, ma am.”

⁶ I nana viravira ma i matamatave lana au kolanei palawa apuapunana ma waira aniuma. I am ma i uma ma i matave me.

⁷ BADA ana anela i nememei, i vodadani ma i riwei, “Ma vomairi ma ma am aubaina am vaġai ina manawa guratana.”

⁸ Elijah i vomairi da i am ma lamnei rewapana i vaia da ina babara aupom 40 ma maratom 40 da au Sinai^{*}, BADA ana au ola i ġeta.

⁹ Ma kampa i ġeta au guba ma i matave. Wate BADA i riwa, “Elijah weka aiwai e kaukauei?”

BADA Elijah awarina i eġa

¹⁰ Elijah i paribelei, “Oo BADA vivirewapana kaukauam, Tau mara nonoa tam a viborumem - tam ainelam. Mai Israel am parivainuaġana bagibagina i viaigai, am pulo aniapuna i viairikarikai, ma am peroveta i viragena-pai, tau ainelau i votereu, ma marina i ġoei da tau maiteni ina viragēniu!”

¹¹ BADA i riwa, “Ma opu au ola ma au naoi ma mairi.”

Ma Elijah kampa i maimairi ma labu ġaġaena olana i ravi, da i gunevi, wate bada eġa nai kojikojirana au orana. Ive au murina lolo, wate BADA eġa nai lolona au orana.

¹² Lolo au murina ai araratana, wate BADA eġa nai aina au orana. Ma ai au murina pariararava jinajinana i nonori.

¹³ Maranai Elijah wei i nonori ana kwama i vaia da naona i purui[†] ma i opu guba au naona i mairi. Ma pona i riwa, “Elijah weka aiwai e kaukauei?”

¹⁴ I paribelei, “Oo BADA God, vivirewapana kaukauam, mara nonoa tam ainelam aubaim a vivilaraġa. Wate Israel ravai am parivainuaġana bagibagina i geduaiei, am pulo aniapuna i rikanai, ma am peroveta anatapui i viragēni. Tau ainelau a mamae. Ma marina i ġoei da tau maiteni ina viragēniu.”

¹⁵ BADA i riwa, “Meiei e nenei nanare ma nae me, ma ma-rui au mutulua Damaskas, maranai u ġeta au taon, Hasael ma buloi, mai Syria ai gulau;

¹⁶ Nimshi natuna Jehu ma buloi Israel ai gulau, ma Shaphat natuna Elisha, ana taon Abel-Mehola ma buloi peroveta da am gabu ina vaia.

¹⁷ Aiavoi da Hasael i rovoei da e rubaruba, Elisha tau i ina viragēni![‡]

¹⁸ Wate mai Israel ai maġa 7,000 eġa melanai Baal ita raudunelei bo kokoitau i ita vigia-lagolagonei, ina lawanal!”

BADA Elisha i kwatuei

¹⁹ Ma Elijah i nae da Shaphat natuna Elisha i viaroni doa i uauatai, bulumakau 12 ru-aruagei ava raġiragēni aniuata i taitaini ma i uauata. § Elisha ana bulumakau, au murioina i nolanola. Elijah i ġaira awarina ma ana kwama i votawanei ma Elisha i vioteni.*

²⁰ Elisha bulumakau i votere-tawanei ma Elijah i rubei, ma i riwa, “Au naona ma votereu da ana nae amau ma alou ana inana ma ana vigia-lagolagonei ma tana nae.”

Elijah i paribelei, “Anina ma nae wate aiwai a kauei awarim ma vinuanotenotei!”

²¹ Ma Elisha i nae da ana bulumakau ruaġai i viragēni, pawe bulumakau au uai i viaigagai da ai i viviri da sia i apui ma rava i verei da i am. Anina ma i opu da Elijah i votagotagoi.

* **19:8:** Sinai wavana ġelauna lamna *Horeb* Weka BADA i viatataiana-meiei mai Israel awarii ma ana tarawatu i verei. (Exo 19:20) † **19:13:** Mai Israel i vitumaġana da eġa ai ai BADA ita inana ma lawalawaina ita mae. (Exo 3:6) ‡ **19:17:** BADA ana rava ina kovoġi ana parivainuaġana bagibagina i gai aubaina. § **19:19:** Mai Israel burumakau i ipa iramei e taitaini da e uauata.

* **19:19:** Wei lamna mataira da Elisha Elijah ana gabu i vaia da peroveta.

2 King Gulagulau Viruaina

Pariverena

Gulagulau ai buka viruaina lamna mai Israel e bababaniei. Gulau David ana vibadana au murina, aiwai i tupua lamna wei bukai ruağa gulagulau naona ma viruaina e ririweta. Gulagulau bukana naona e ririweta David au murina Solomon menanarena da i vigulau.

Solomon i'rağe ma au murina Israel i kai da baba ruağa. Dobuna au rauanağei i ġorei Judah ma au lavaratei i ġorei Israel. Maranai mai Judah ma mai Israel gulagulau, God i voteletelei lamna nuaua i mae. Wate marağela gulagulau God i rawağaiğaiie ma god ġelau i raudunelei. Anina ma nuabola i tupua.

Maranai mai Israel God votelatelana i voterei, Tauna peroveta i paritawanei awari. Ma Gulagulau bukana viruaina au orana lamna peroveta wavana naenaena Elisha. Tauna God ana rewapanei kua ġaeğaei i kaukauei, ma rava awari i jimajima da ita mae-tavirei God awarina.

Elisha i'rağe ma au murina, gulagulau mağamağau i apoapoe kua. Anina ma God ana rava i kovoği ma lamnei ai ġavia tau i vovaiubai ma i pani ma i naiei. Au naona mai Israel awari i tupua ma muriai mai Judah awari i tupua. God ana rava mai Judah eğa ita vianinei da ita nae me ai au dobu da madeğa 70 i kwa.

Virarautua rereğana

Israel i kai da Vibadana ruağa, Israel ma Judah 1:1–17:41

Peroveta Elijah ana virarautua 1:1–13:20

Judah gulagulau i mai Israel gulagulau ai virarautua 8:16–17:4

Assyria gulauna Samaria i vovaiubai ma Israeli i pupuna-naiei ma ana vibadana i kwa 17:5-40

Judah gulagulau ai virarautua 18:1–21:26

Gulau Hezekiah ana au vibada i raukarei ma i nae da gulau Josiah ana au vibada 18:1–21:26

Judah gulagulau damona ai virarautua 23:31–24:20

Babilon gulauna Jerusalem i vovaiubai da Judah ana vibadana i vikwai 25:1-30.

2

Elijah i ġaiei au mara

¹ Ma mara i ġetai da BADA Elijah labuei ita ġaiei au mara. Elijah ma Elisha Gilgal i voterei ma i nena.

² Ma Elijah, Elisha i riwei i pa, “Weka ma mae ma BADA i riweu da ana nae au Bethel.”

Wate Elisha i paribelei, “Riwa kua da BADA lawalawaina ma nanare tam lawalawaim, tau nanare eğa melanai ana voterem.” Anina ma airuağa i ġaira au Bethel.

³ God ana peroveta borui au Bethel maemaiei i opui Elisha awarina ma i riwei i pa, “Tam u aramanei da BADA am bada amadodo awarim ina vaitawanei?”

Elisha i paribelei, “Ee a 'ramanei, wate lamna eğa ona babaniei.”

⁴ Ma Elijah, Elisha i riwei, “Weka ma mae, BADA i riweu da ana nae au Jeriko.”

Wate Elisha i riwa, “Riwa kua da BADA lawalawaina ma nanare tam lawalawaim, tau nanare eğa melanai ana voterem.” Anina ma tau i nae au Jeriko.

⁵ Ma God ana peroveta borui kampa au Jeriko maemaiei i opui ma Elisha i nebele i ma i riwei, “Tam u aramanei bo da BADA am bada amadodo awarim ina vaitawanei?”

Elisha i paribelei, “Ee a 'ramanei, wate lamna eğa ona babaniei.”

⁶ Ma Elijah i riwei, “Weka ma mae, BADA e paripari-tawaneu au Waira Jordan.”

Wate Elisha i paribelei i pa, “Riwa kua da BADA lawalawaina ma nanare tam lawalawaim, tau nanare eğa melanai ana voterem.” Ma airuağa i babara nae.

⁷ God ana peroveta 50 tau i votağotağoi, ma au muri i tumairi maranai Elijah ma Elisha Waira Jordan au adana i tumairi.

⁸ Elijah ana kwama i votawanei ma i piri ma lamnei waira tepana i ravi. Da i vilamonei au oiena ma au kelakelauna ma tau au pouna au alalana i babara damana.

⁹ Maranai au baba ġelauna i ġeta Elijah, Elisha i riwei, “Ma riweu aiwai ana kauie aubaim muriai da ina ġaieu.”

Ma Elisha i paribelei, “Tau am gabu ana vaia da peroveta ai bada lamna aubaina a ġoei da am rewapana ġaeġaena, ma viaitepatepani ma ma veredamaneu.”

¹⁰ Elijah i riwa, “Lamna kua piriŋpirina e vivibaġei, wate mepa da u inanai ina ġaiġaieu, lamna u vivibaġei u vaia ma eġa, lamna eġa.”

¹¹ Ma airuāġa i bababara ma i vibababani ma hosi araratana, chariot araratana i taina ġetei ma tui i raviġori. Ma Elijah ma Elisha au poui i ruba ma BADA Elijah labuei i ġaiei au mara.

¹² Elisha wei i ‘nanai ma i garara, “Amau! Amau! Mai Israel taugagaloeina vivirewapana! Tam u nael!” Ma Elijah eġa ita inana-melei. Nuanuana i bola-kauei ma ana kwama au pouna i sikai.

¹³ Ma Elisha i nae ma Elijah ana kwama au doa i vivipeunia, maranai i ġaiġaiei au mara, i voepai ma i nae me waira au adana.

¹⁴ Ma kwamana i peupeu i vaia ma waira tepana i ravi ma i riwa, “BADA Elijah ana God mepa?” Maranai waira i ravi, waira i vilamonei ma au pouna au alalana i babara damana.

¹⁵ Jeriko ai peroveta boruna 50 au weia ma i ‘nanai aiwai i tupua ma i riwa, “Elijah ana rewapana i damana Elisha awarina.” Ma i nae da ita nebelei ma i mae-ġaira au doa ma i raudune.

¹⁶ Ma i riwa i pa, “Tauai rewapana 50, ma paritawanelai da am bada ana baiei. Mepa da BADA Aruana, Elijah i voepai da mepa au ola bo au gaugaua i teretawanei.”

Elisha i paribelei, “Eġa! Eġa ona nae.”

¹⁷ Wate tui i voigiriġiri da tauna i vinimala da i paritawanei i pa, “Anina ona nae.” Wate tui 50 aupom tonuġa i baia ma eġa ita nelaġai.

¹⁸ Maranai tui i nememei au Jeriko, Elisha tui i riwei, “A riwemi da avena ota nael!”

4

Elisha wavine Shunemei i voaġui

⁸ Mara tagoġi Elisha i nae au Shunem taon. * Weka wavine manemanena i mae, ma Elisha i vibaġa-guratei da ita mae da ita am. Ma maranai Elisha wei au dobuna e vaġavaġai, tauna weka i amam.

⁹ Wavine awana i riwei, “Aramanei da orotona weka e nenei lamna BADA ana peroveta vivivireina.

¹⁰ Ana numa aburuna au poewa[†] tana voai ma ani matave, kepaġepa, ani kiala ma rampa tana terei au orana tauna aubaina. Ma kampa ina mae maranai e nenei.”

¹¹ Mara tagoġi Elisha i nei ma i ġae ana au numa da i rauvirai.

¹⁴ Muriai Elisha ana taunola wavana Gehasi i paridadanei, “Aiwai ana kauei wavinena aubaina.”

Ma Gehasi i paribelei, “Tauna eġa natuna orotona ma awana i magura.”

¹⁵ Ma Elisha i riwa, “Ma ġoreiai.” Ma Gehasi wavine i ġoreiai ma i nei da au metaeta i raumairiei.

¹⁶ [◊]Ma Elisha wavine i riwei, “Wenanare marana madeġa au ġelauna tam natum orotona ma ġuniġuni.”

Wavine i paribelei, “Eġa au bada. Tam peroveta ma tau am taunola, eġa ma morui!”

¹⁷ Wate wavine i raumanawa. Ma marana wenanare madeġana au ġelauna wavinena natuna orotona i ġuniġuni, Elisha i ririweia nanare.

Elisha rava 100 i viambagibagi

⁴² Mara ġelauna, oroto tagoġi melagaġi Baal-Shalishahei i nei. Tauna nai madeġana witina naona i labai ma palawa i apui da iavana 20. Ma witi majiġai baikena maiteni i neiai da Elisha i verei. Elisha ana taunola i riwei, “Rava lam[‡] ma verei da ina am.”

⁴³ Ma ana taunola i garara, “Aiwai! Wei lam eġa tagotagogina da rava 100 tana viambagibagi?” Wate i paribelei i pa, “BADA i riwa da rava ma verei da ina am ma lam ina mae-terei.”

⁴⁴ Ma lam au naoi i terei ma tui i am ma lam i mae-terei, BADA i ririweia nanare.

5

Elisha Namaan i vilawani

* **4:8:** Shunem taun 50 Km da au Samaria taun. † **4:10:** Mai Israel ai poewa dabadabai. ✨ **4:16:** Gen 18:14 † **4:42:** Peroveta ġelau Elisha maiteni i mamee, kampa gomara i peu ma rava i vinuapoapeo.

¹ Namaan lamna mai Syria ai sorodia badana. BADA, Namaan awarina i mae ma lamnei ai ġavia i vovovai-ubai. Ma lamna aubaina ai gulau, tauna i vivirana-kauei ma i vitumaġane. Namaan sorodia wavana naenaena wate doria lepera i vaia.

² Marana patapatatai mai Syria i nenei au Israel i viviġavia. Mara tagogi tevera guguinina i pani da i naiei da ai bada Namaan awana i verei da ana taunola.

³ Mara tagogi guguinina ana bada wavinena i riwei, “Au bada, am bada uta riwana-dadanei mepa da ita nae perovetana au Samaria maemaena awarina. Tauna ana doria ita inana i ma ita vilawani.”

⁹ Ma Namaan ana hosi ma chariot borui i nae ma Elisha ana au metaeta i raumairiei.

¹⁰ Wate Elisha taupariverena i paritawanei da i riwei i pa, “Ma nae da au waira Jordan ma oġa-melem mara seven ma lepera dorianana ina voterem ma opim ina ai-me.”

¹¹ Wate Namaan amlona i ġaiġai kauga ma i riwa i pa, “Tau au nota ġaeġaena da peroveta ita opui da ita inana i da urana, opiu au tepana mataira ita kauei ma ana BADA God awarina ita raupari da ata lawana.

¹² Wate waira Amanah ma Pharpar au Syria i ai telera eġa me Israel wairai. Tau kampa ata toa ma ata lawana.” Ma Namaan i mae-tavirei ma ana amloġaiġaina i nae.

¹³ Ana laralaraga i nae awarina ma i riwei, “Au bada mepa da ita riwem da aiwai pipirina uta kauei, lamna uta kauei tapa? Wei lamna kauga telatelana i ririwei nanare, ‘Ma toa ma ma lawana.’”

¹⁴ Ma Namaan i ġaira au waira Jordan ma mara seven waira au orana i ġaira, me peroveta i ririwei nanare. Ma opina i ai me da me tevera tupuana nanare ma lepera dorianana i kwa.

¹⁵ Ma Namaan ana laralaraga maiteni i nae me Elisha awarina ma i riwa, “Marina aramane i da au dobu, god eġa ita mamae anina Israel ana God tauna ava; lamna aubaina au bada pulo a reverem ma vaia.”

¹⁶ Wate Elisha i paribelei, “Riwa kauga da BADA a vivitaunolei lamna BADA lawalawaina, ma wavane i ririwa tau eġa pulo ana vaia.” Ma Namaan i babani bagibagi da Elisha pulona ita vaia, wate tauna pulona i geduaiei.

¹⁷ Ma Namaan i riwa, “Mepa da nanare lamna ma vianineu da donki ruġa ai vita ruvana Israel doana ana vigerui da ana naiei au numa. Ma marina da e nena, eġa melana i pulo ana apui bo sia taputapuna ana apui god ġelau awarii, anina BADA ainelana awarina.

¹⁸ Tau am taunola ma a ġoei da BADA au ġoa apoapoei ina nota-tawane, kauga tagogi ava awarinei; marana i au gulau a ruiuriei ana au tempol ma tauna au urau e vovojjina ma maiteni a mamae-ġaira ma Syria ai god Rimmon a viviburumei.”

¹⁹ Elisha i riwa, “Ana nuaubam ma nae.” Ma Namaan i nae.

Mai Israel ai gulau Ahab au 851 BC. i raġe. Au murina gulagulau ġelau i mae ma tau i au Samaria i mae. Marana i Hoshea i vigulau. Au 724 BC. mai Assyria ai sorodia Israel i viġaviei.

17

Samaria i peu

Mai Israel ai gulau damona lamna Hoshea. Tauna i mae gulau au Israel madegħa 9, wate Assyria ai gulau i paripariniġaiei ma lamna aubaina i pani.

⁵⁻⁶ Assyria ai gulau Israel anapuna i naeni, da i ġeta da Samaria taon I mae-kwviviroi, ma i gudu-tomeni da madegħa tonuġa i kwa. Marana i Hosea ana vigulau madegħana 9 i ġetai, Mai Assyria Samaria taon i ruini mai Israel i pupuna-naiei au Assyria. Ma au Halah, taon, waira Habor au ririvana ma mai Mede ai au taon nununai i verei da i raunuma.

⁷⁻⁸ Wei kovogai i nei mai Israel awari aubaina tau i god ġelau i viviburumei. Tau i goa apoapoe i rata kauga BADA ai God awarina, Wariġa Tauna Egypt ai gulau Pharaoh au urana Israel i vai-tawane ma aia i ravena-opune. Mai Israel ai God eteni i pupuna-opune ai kauga i votaġotaġoi da i kaukauei ma kauga waduboi ġelau Israel ai gulagulau i kaukauei.

⁹⁻¹⁰ Mai Israel kauga apoapoei i kaukauei BADA ai God awarina ma BADA wei kauai eġa ita vinuaiaiei. Tau i voepaepa gabui i voanaiei god morumoru i voepaepaei aubaina au taon nununai, melagai aburuoina da au taon ġaeġaei. Ola muomuoi anapui au tepai ma ai anapui au ġoui gana vinualaulau i terenaei ma Asherah ana tuatua ma kokoitau i vituramairini.

BADA mai Israel ai ġoa apoapoe aubaina i viopuni

²⁴ Assyria ai gulau taon nununai ravai mai Babilon, Cuthah, Awa, Hamath ma Sepharvaim i vivaneiai da Samaria, ana au taon nununai kampa i terei da i mae. Tau i mai Israel numa i ruba-tawanei i raunumei.

²⁵ Vouvounai wei ravai ega BADA ita viborumei, lamna aubaina lion gelaui i paritawaneiai da rava i viviraḡeni.

²⁶ Ma rava Assyria ai gulau ana riwa i paritawanei i pa, "Rava au Samaria u terenaiei, dobuna Godna ana tarawatu ega ita aramanei. Lamna aubaina ma dobuna ana God, lion i paritawanei ma ravai e viviraḡeni."

²⁷ Ma mai Assyria ai gulau rava i egari, i pa, "Pirisi tagogi au Samaria o panipania, ona paritawana-melei ma, dobuna ana God, ana kava ravai voui ina viararamani."

²⁸ Anina ma pirisi tagogi au naona i naenaie au Assyria i neiana-melei da au Bethel i mae. Kampa rava i viararamani da BADA viborumei.

²⁹ Wate jentail ravai nununai ai god morumorui kokoitau i kaukauei ma metauna au taona i mamae, kampa ola au tepai au naona mai Israel au Samaria ai voepaepa gabui i voavoailana, kampa i terenaiei.

18

Hezekiah i mae mai Judah ai gulau

¹ Elah natuna Hosea i vigulau au Israel madeḡa tonuḡa i kwa. Wei maranaina au Judah Hezekiah, Ahaz natuna i vigulau.

² Tauna ana madeḡa 25 ma i vibada au Jerusalem da madeḡa 29 i kwa. Alona Abi, Zekariah natuna.

³ Tauna kava aiiai avai i kaukauei BADA awarina me noina David nanare.

⁴ *Ma god morumorui ai ani voepaepa gabui anapui i votawatawanei. Ma kokoitau i viarikarikai ma Asherah tuatuaana i taratuituina-naiei. Ma wariaga Moses mota bronzei, kokoitau i kaukauei, i viviborumei. Hezekiah motana kokoitauna maiteni i viaigimagimai. (Mai Israel motana i ḡorei Nehushtan.)

⁵ Hezekiah BADA, Israel ana God i vitumaḡanana-kaukauei. Ega gulau gelauna au Judah nanare me tauna, ma ega aiiai gelauna nanare au naona i mae bo muriai i mae.

⁶ I vipatutu BADA awarina au anapuna ma i vovoguratei da God ana tarawatu Moses i vereverei anapuna i vovotaḡotaḡoi.

⁷ BADA tauna awarina i mae ma ana nola anapuna i davudavu. Tauna Assyria ai gulau i parivirevirei ma ega aubaina ita vilaraga.

⁸ Ma mai Philistia anapui i vovaiubai, melaḡai da taon gaimeie garigarina anapuna i pupuni da au Gaza i ḡeta.

Maranai Hezekiah i raḡe, Manasseh amana i raviepaiai da i vigulau.

21

Manasseh i vigulau au Judah

¹ Manasseh ana madeḡa 12 ma i vigulau au Jerusalem, ma i vibada madeḡa 55. Tauna alona Hephzibah.

² Wariaga BADA eteni ravai i virubai ai kava vinuamedamedai aubaina maranai mai Israel i ruirui au Canaan. Manasseh wei ravai ai kava i vataḡotaḡoi da i kaukauei ma ana goa apoapoe i rata BADA au matana,

³ Manasseh ola muomuoi au tepai god morumorui awari voepaepa gabui amana i viarikarikai, i voa-melei. Ma nanare pulo aniapuna i voanaiei Baal awarina, ma Asherah tuatuaana i tonanaiei me Israel ana gulau Ahab. Manasseh wate nanare ubona i viviborumei.

⁴ *Tauna god morumorui ai pulo aniapuna i voanaiei BADA ana tempol au orana, wei gabuna aubaina BADA i riwa i pa, "Wavau au tempol ina mae."

⁵ Tempol au metaetana, gabu garigarina au orana Pulo aniapui ruaga i voai ubona god aubaii.

⁶ Manasseh natuna orotona ai au araratana i apui ana pulo, * ma parauma ma baravu ma gweri da ginauri ravai i rautaniḡaneie. Kava maḡamaḡau apoapoe kaukauei i kaukauei ma BADA amlona i gaigai kava.

✧ 18:4 Num 21:9

✧ 21:4 2Sa 7:13

* 21:6: I apui mai Canaan ai god Molek awarina.

¹⁰ Ma lamna aubaina BADA ana peroveta awariei i babani i pa,

¹¹ “Gulau Manasseh kaua maḡamaḡai vinuamedamedai i kaukauei, ma tauna i apoapoe kaua eḡa me mai Amori, tau i wei dobuna i maeni muriai da mai Israel. Ai kokoitau miramirai awariei mai Judah i raveni da i ḡo'apoapoe.

¹² Lamna aubaina BADA Israel ana God wenanare e ririwa, ‘Kovoḡa ḡaeḡaetana ana neiai Judah ma Jerusalem awarii da maranai rava anatapui riwana taniḡaiei ina nonori ma orai ina auepai.

¹³ Ruvana tagoginei Samaria a kovoḡi ma ruvana tagoginei Jerusalem ma Israel ai gulau Ahab ana epaepaia maiteni a kovoḡi. Jerusalem ravai ana amaḡa-tawanei, me aboma ita amamaḡi, ma i vitaragabubui.

¹⁴⁻¹⁵ Au rava i ḡo'apoapoe awariu, maranai noinoii Egypt i opu-tawanei da marina. Wei e viviamloḡaiḡainiu. Ma rava mamae-terenai ana inana-tawanei, ma ana veredamanei ḡavia awarii ma tau i noyaiubai ma ai purapura ina kwalei.”

¹⁶ Manasseh mai Judah i raveni da god morumorui i viborumei ma BADA i vijiboḡi; wate eḡa lamna ava ma rava aiiai i virāḡena labalababai da tara i kororo da Jerusalem etanaina i vioai au giana da au giana:

¹⁸ Manasseh i'raḡe ma ana numa au ririvana dobu wavana Uzza ana au wapu i doboi, Ma natuna Amon ana gabu i vaia da i vigulau.

Amon i vigulau au Judah

¹⁹ Amon ana madeḡa 22 ma i vigulau. Ma i vibada madeḡa ruaḡa au Jerusalem. Tauna alona Meshulemeth, oroto Jotbahei wavana Harus natuna

²⁰ Tauna ana ḡo'apoapoe, i rata kaua BADA awarina me amana nanare.

²¹ Amana i ḡovaivaiteni ma god morumorui i viborumei.

²² Tauna noinoii ai God, BADA i rawaḡaiḡaiei ma ana tarawatu eḡa ita votaḡotaḡoi.

²³ Ana gabemani babadai Gulau Amon i vioge i da ana au gulau numana i virāḡeni.

²⁴ Wate mai Judah, rava gulau Amon virāḡenana i viogaterei anatapui i vivirāḡena-naiei ma natuna Josiah i terei da i vigulau.

22

Josiah i vigulau au Judah

¹ Josiah ana madeḡa 8 maranai i vigulau au Judah ma i vibada au Jerusalem madeḡa 31. Tauna alona Jedidah, oroto Boskathei Adaiah natuna.

² Tauna BADA au matana aiwai ana tapuna i kauana-kauei ma noina David au ivina i tua ma BADA ana tarawatu ana tapuna i votaḡotaḡo-kauei.

Josiah nelara ḡelau i terei da BADA ana tempol i voavoa-virai lamna maranaina Moses ana tarawatu au buka i girugirumi i nelaḡai da i neiai Josiah awarina.

¹¹ Maranai gulau i nonori aiwai Tarawatu au bukana i girumi, ma ana gara i viaisikasikai.

¹² Ma gulau Josiah ana taunola pirihi Hilkiah, Saphan natuna Ahikam, Micaiah natuna Akbor, Shaphan gulau ana taugiruma ma Asaiah gulau ana tauvinuaterena i riwei i pa,

¹³ “Noinoita wei bukana riwana eḡa ita votaḡotaḡoi, ma aiwai i ririwei eḡa ita votaḡotaḡoi, lamna aubaina BADA amlona i ḡaiḡai awarita. Lamna aubaina ona nae au tempol ma BADA awarina ona raupari tau ma wei dobuna ravai aubaii ma Judah ravai ḡelau aubai. Ma ona paridadana wei au bukana aiwai i girumi.”

Josiah ana taunola babadai i nae BADA ana peroveta tagogi awarina. Wei perovetana lamna wavine ma riwa i paritawanei i nae me gulau awarina.

¹⁶⁻¹⁷ BADA wenanare i riwa, “Tau wei dobuna ma dobuna taumaenina ana kovaḡa kauei.” I girugirumia nanare, ma lamna gulau awarimi i 'avi, BADA wenanare i riwa, “Tau i geduaieiu ma god ḡelau i viviborumei ma lamna i viamloḡaiḡainiu. Jerusalem awarina orau amapo da e ararai ma amapo eḡa ina dauva.”

¹⁸ Wate ona naeme Judah gulauna, i paritawanemi awarina da ona riwei, “BADA Israel ana God e ririwa da

¹⁹ Maranai u nonori menanare Jerusalem ma taumaenina ana kovoḡanei. Tam u rupena ma u vilamolamona tau BADA awariu, am gara u viaisikasikai ma u tou, Tau ana kauei da ina apoapoe kaua, rava ma dobu ana kovoḡi da eḡa aiwai wei doana ina maeni.

²⁰ Ma kovoḡana a neneiai au Jerusalem eḡa ina nei da am iraḡe au murina. Ana voterem da ana nuaubam ma iraḡe.”

Ma wei pariverena i naiei ma gulau i riwei. Josiah god morumorui viborumai i viḡaei.

23

Josiah i parivainuaḡana da ina votelatela

¹ Gulau Josiah babada anapui au Judah ma Jerusalem i ḡoreiai.

² Ma pirisi ma peroveta ma rava molamolakana da manemanena, anapui i ḡae BADA ana au tempol. Kampa gulau parivainuaḡana bagibagina bukana tempol au orana i nenelaḡaia i iava-tapui awarii.

³ Gulau ana au gabu i mairi tempol tuatuaana au naona ma BADA maiteni parivainuaḡana bagibagina i ravivouni da tauna BADA ana tarawatu ma ana riwa bagibagina orana ma aruana taputapunei ina vojjiini, i ririwei nanare au bukana. Ma rava anapui nanare i parivainuaḡana.

⁴ *Ma gulau, pirisi ḡetelarana Hilkiah, ana pirisi babadai ma tempol taupainii i egari da BADA ana tempol au orana aiwaiei Baal ma god wavinena Asherah ma ubona godna morumorui i viviburumei anapui ita opuneiai. Gulau wei purapurai anapui i naiei da gaugauba Kidron au ririvana i apu-naiei, ma lapukarei i vivanei au Bethel.

Anina ma Josiah mai Judah ma mai Israel ai dobu i naeni ma mepa rava kokoitau i raraudunelei ola muomuoi au tepai anapui i pupuni ma pirisi kokoitau taurauduneleina anapui i viraḡeni.

Ma gulagulau aiavoi Josiah i votaḡotaḡoi tauī BADA eḡa ita vivirei ma ai ḡoa i apoapoei BADA awarina.

2 Chronicles Vinolanola Viruaina

Pariverena

Wei bukai Chronicles 1 ma 2 virarautuana tagogina Samuel 1 & 2 ma gulagulau ai au buka 1 & 2 e mamae. Chronicles 1, gulau David e virarautuei ma ana oga tempol au Jerusalem aubaina. David nola ogana pirisi i verei. Tauna i goei da rava anataupui BADA ina viborumana-kauai. Chronicles Viruaina mai Israel ai gulagulau ai nola i babaniei, menanare Solomon ana taunola BADA ana tempol i voai au Jerusalem. Solomon irage ma au murina menanare ana dobu i kai da ruağa. Chronicles 2, gulagulau ruağa ai kava e bababaniei. Gulau gelaui aiaii tau BADA i viborumei wate gulau mağamağau i apoapoe kava. Tau eğa BADA ana tarawatu ita vogağotağoi. Tau god morumoru i vogağotağoi. Wei gulau nuabola ai rava i verei. Ma BADA ai gavia i vianinei da i nei ma dobu ruağai i viğaviei da i pupuni. Ma muriai BADA Judah mamae terenai i neiana-meleiai.

36

Judah e vovoapoapoe

¹⁴ Ma pirisi ai babada ma rava anataputaupui, BADA ana parivainuağana bagibagina eğa ita vojijini ma jentail au ririvai maemaiei ai kava apoapoei kaukauai ma ai bua i govavaitei. Ma lamnei BADA ana Tempol vivivireina au Jerusalem i vimiramirai.

¹⁵ Mai Judah goğogai ai God BADA, ana rava ma ana tempol nuanuana i bolai ma lamna aubaina ana peroveta nununai i paripari-tawanei da rava ai goa apoapoe ita rupeni.

¹⁶ Wate tau God ana peroveta i vijiboği ma eğa ita vivirei ma au damona BADA ana amloğaiğai i rata guratana da menanare ita viubanei.

Mai Babilon Jerusalem i vipupui

¹⁷ Anina ma BADA mai Babilon ai gulau i paritawanei da Jerusalem i vipupui. Ai sorodia nelara voui tempol au orana i virageña-naiei. Tau mai Judea eğa ita rau-nuapoapoelei ma waivine ma laraga ma rava magumaguri ma doridoriai. BADA mai Judea anataupui i verenei Babilon ai gulau Nebuchadnezzar au urana.

¹⁸ Tauna Tempol ana purapura gaegaei da muomuoi ma mane anataupui i pupuna-naiei. Gulau ana gabemani babadai ai numa i viairikarikai ma mane ma purapura i pupuna-naiei au Babilon.

¹⁹ Ma God ana Tempol i apui ma Jerusalem garina i viairikarikai; ma gulau ana numa ma numa gelaui anataupui ma purapura mae-terenana anataupui i viairikarikai ma i apu-naiei, eğa aiwai ita mae.

²⁰ Ma aiavoi lawalawaii i mamae, anataupui i paninaiei au Babilon da i vitaunola. Ma muriai mai Persia nai dobuna Babilon i pupuni ma i vibadei.

²¹ Mai Israel ai doa ipipieie tau madeğa au vi-7-na ai doana eğa lauvitau ita verei, lamna aubaina i kovoği, da i pupuna-naiei au Babylon da madeğa 70 i kwa. BADA ana peroveta Jeremiah i ririweia nanare i tupua.

²² Au Persia gulau Sairas ana vibada madeğana tagogi, ma BADA ana peroveta Jeremiah aiwai i ririweia marina i tupua, Persia ai gulau orana i ravi-dagudagui da i giruma ma i vibabarai ana au vigulau au anataupuna.

²³ Mai Persia ai gulau Sairas, wei i riwei,

“BADA, Aidamo ana God, dobu anataupuna vibadana au urau i terei. Ma i vineu da ana Tempol au Jerusalem, Judah au paratana ana voa-melei. Ma taumi aiavoi BADA ana rava, o goeğoei da ona nae me kampa, lamna anina da ona nae. Ma BADA ami God ina gagaloemi.”

Ezra

Pariverena

Wei bukana Ezra e ririweta da menanare mai Judea au Babilon i mae ma ġelau i naeme ai au dobu au Jerusalem da BADA ana Tempol ina voa-melei.

3

Pulo aniapuna i voa-melei

¹ Mai Israel ai au dobu i mae nawaravi ^vi⁷ⁿa ma marina tau i anatapui i netagogiai au Jerusalem.

² Nai maranai Josadak natuna Jeshua ana rava pirisi ġelau maiteni, ma Shealtiel natuna Zerubabel ana dam ravai maiteni; pulo aniapuna i voai Israel ana God awarina. Me God ana peroveta Moses, ana Tarawatu i ririweia nanare.

³ Avena da tau i dobu taumaeni i rovorovoei; wate pulo aniapuna ana au gabu wadubona i voai. Ma i vikarei da ubaubanai ma aubigai patapatana pulo i apuapui BADA awarina.

Tempol i voa-melei

⁷ Gulau Sairas i riwa da wenanare ita kauei. Tau i mane ġaima taubori ma kamda ravai ita verei. Ma lam, wain ma oil mai Sidon ma mai Tyre ita verei da ai cedar au Lebanon bogei ita towana-neiai au Joppa.

⁸ Ma Madeġa viruaina nawaravina au viruaina Zerubabel ma Jeshua ma varevarei (pirisi ma mai Levi ma rava ġelau maiteni i vivipanipani i nememei au Jerusalem) ma BADA ana Tempol voana i vikarei. Ma Levi ana damei nelara ai madeġa 20 da nore i ġeġae i terei da nola i vibadei.

Rava i nola da God ana Tempol i voa-melei madeġa 21 au orana.

6

Tempol i viaiaini

¹⁶ Anina ma Mai Israel piripirisi ma dam Levi ravai ma rava anatapui panipaniei i nememei ana nuaiaii God ana Tempol i vovivirei God voepaepana aubaina.

Nehemiah

Pariverena

Nehemiah Wei au bukana e ririweta, menanare mai Judea ġelau i Babilon i mamae, i naeme ai au dobu Jerusalem da garina ina voai-melei.

8

Ezra tarawatu bukana-rava awari i 'avi

¹ Rava anapui Jerusalem ana au anirui e ġoreġorei Samaim,* i vitagogiei. Ma tau tarawatu badana Ezra i riwei da Moses ana tarawatu bukana ita neiai, wei tarawatuna BADA mai Israel i verevereia.

² Ma aupom naona au nawaravi au vi-7-na, pulo tauapuna pirisi Ezra tarawatu bukana i neiai patarana i vitagogieina awari, nelarai ma waivinei ma roaroa awari metau da iava i aramanei.

³ Ma Ezra au deba i mairi ma ponana ġaeġaenei bukana i 'avi rava awarii, maratmtomai i vikarei da aubenai ma anapui i rautaniġana kaua.

⁵ Ezra vatara au tepana i mairi rava au matai ma maranai buka i votawanei, rava anapui i vomaimairi.

⁶ Anina ma Ezra BADA God ġaeġaena i voepaepai; ma rava urai i voepai ma i paribelei i pa, "Amen, Amen!" Ma i raudune au doa ma BADA i voepaepai.

⁸ Ma Levi ana dam ravai, bukana rava awari i 'avi ma i viararamani† da tau riwana anona i aramanei.

⁹ Anina ma Gavena Nehemiah, ma pirisi, taugiruma Ezra ma dam Levi ravai, rava awari i viararamana. Marina rava awarii i riwa i pa, "Wei marana tana vovavivirei BADA ata God awarina. Lamna aubaina eġa ona vinuabola ma ona tou."

¹⁰ Ma Nehemiah i riwa, "Ona nae ami au numa ma ona am kaua ma ona uma-kaua ma rava eġa ita lauvoa, ona taraiġuei. Wei marana lamna mara vivivireina BADA awarina. Lamna aubaina BADA ina vinuainimi, eġa ona vinuabola, aubaina BADA ana nuaiai awarimi lamna ami rewapana!"

* **8:1:** Wei metaetana lamna Jerusalem garina ana anirui tagogi e ġoreġorei Samaim wate ata ponei *Waira*. Wei aniruina lamna waira dogona au ġereġerena au maramatanei. † **8:8:** Bible pona Hebrewi i girumi ma wei ravai pona arama i aramanei lamna aubaina viararamana maiteni i kaukauei.

Job

Pariverena

Rava jijimanina tagogi vinuabola apoapoei maḡamaḡau i nenelaḡai lamna au bukana e vivirarautuei. Job ana nota ma ana rava ai nota wei nuabolai awari lamna e viviatataieta. Ana rava e notanotai da Job kaua apoapoei i kauai aubaina God, tauna e kovokovogi. Job i aramanei da wei eḡa riwa kaua. Tauna, God i vivitumaḡanei, wate i ḡoeḡoei da ita aramanei aiwai aubaina wei nuabolana e tuputupua. God, Job ana vinuapoapoei anona eḡa ita vieḡei, wate God ana rewapana ma ana nuaulaula i rata guratana au baina rava eḡa tagotagogina da ina aramanei aiwai e viviatataieta. Maranai i aramanei da God ana rewapana ma ana nuaulaula i rata guratana, tauna God vitaraviravirana i voterei ma i voepaepai. Wei virarautuana au damona God Job i vilawani ma natunatuna i vimaḡai ma i vimaura-melei. God Job ana rava tonuḡa i ena-guratei aubaina tau i eḡa ita aramana-kauai aiwai i latolaton i Job i vinuapoapoei.

Job ana virarautua

¹ Oroto wavana Job au Uz i mae. Tauna rava jijimana kaukauana ma ḡo'apoapoei i geduaiei. Tauna God i vivirei ma ḡoa aiiai ava i kaukauei.

² Tauna natunatuna nelarai 7 ma waivinei tonuḡa,

³ ma ana sipu 7,000; kamel 3,000; uata bullna 1,000 ma donkey waivinei 500 ma ana taunola maḡamaḡau. Ma i vipurapura ma i maura kaua eḡa aiiai ḡelauna nanare nai au dobuna, au maramatanei.

⁴ Ai mara i tereterei nanare Job natunatuna nelarai nununai ai au numa i toretorela, ma vavarevi ma novunovui i rauḡoreiai ma anatapui i amam ma i umauma gogona.

⁵ Aupom biaḡa nanare torela au murina, Job ubaubanai boiboḡi ina vovomairi ma natunatuna nununai ina rauḡoreiai ma epaiiai ḡamoḡamo taputupuna ina apuapui BADA awarina da natunatuna ina viaiaini. Tauna i notanota da, "Mepa da roaroa i kauana-boai ma au orai God i parivaiapoapoei."

Satan Job ana tumaḡana i raudadani

⁶ Marina mara i ḡetai da anela au mara i ḡeta BADA awarina ma tauviwavu - Satan tau i votaḡoi da i ḡeta.

⁷ BADA Satan i paridadanei, "Tam meiei e nenei?"

Satan i paribelei i pa, "Tau were ma nare a nenei, dobu a tetetei."

⁸ Ma BADA i paridadana, "Au taunola Job u inanai bo eḡa? Tauna rava aiiai kaukauana, eḡa aiiai ḡelauna au dobu nanare. Tauna rava jijimanina ma patupatutuna. E vivivireiu ma e paipaina-melei da eḡa kaua apoapoei ita kaukauei."

⁹ Satan i paribelei, "Tam Job e paipaina-kauai lamna aubaina e voepaepaim!"

¹⁰ Marana patapatatai tauna ana numa ravai ma ana purapura e gagalaoei, ma anatapuna uranei e vodadani e viaiaini, ma bulumakau u verei da wapuna i oai.

¹¹ Wate uram ma viloloi ma anatapuna ḡarinei ma vaitawanei, ma au matam ina parivai apoapoenim."

¹² BADA i riwa i pa, "Anina, ana purapura anatapuna au uram a tereterei, wate eḡa tupuana aiwaina ma vodadani." Ma Satan BADA i netawanei.

¹³ Mara tagogi, Job natunatuna nelarai ma waivinei i toretorela, tuai ana au numa,

¹⁴ ma taupariverena i ḡeta Job awarina ma i riwei i pa, "Am taunola burumakauei doa i uauatai ma au ḡereḡerei donkey modu i amam,

¹⁵ ma mai Sabea i ruba-ḡairai ma ḡamoḡamo anatapui i kwalei, am taunola anatapui i viragena-naiei, ma tau ainelau a ruba da ata pariverem."

¹⁶ I bababani ma taupariverena ḡelauna i ḡetai ma i riwa, "Namanamara marei i ḡairai da sipu ma taupainii i viragena-pai, ma tau ainelau a rubai da ata paripariverem!"

¹⁷ Ravana i bababani ma taupariverena ḡelauna i ruba ḡetai ma i riwa, "Mai Caldia boru tonuḡa ana melaḡina i ḡairai ma am kamel i viaḡaḡana-naiei ma taupainii i viragena-pai, tau ainelau a ruba da ata paripariverem!"

¹⁸ Amapo i bababani ma wate taupariverena ḡelauna i ruba ḡetai ma i riwa, "Natunatum nelarai ma waivinei, natuevou ana au numa i toretorela,

¹⁹ ma maratagogi kojikojira mutuluei i opui ma numa i vipeuni au tepai ma anatapui i viaijijini, tau ainelau a ruba da ata pariverem!"

²⁰ Anina ma Job i vomairi ma ana kwama i sikai. Kolana i gari ma i peu gaira au doa ma BADA i voepaepai.

²¹ Ma i riwa,
“Ana kovakovau a nei;
ana kovakovau ana nae.

BADA i verena ma i vai-melei;
BADA wavana ana voepaepai ma ana viborumei.”

²² Wei anatapuna au orana, Job ega go'apoapoe aiwaina ita kaui bo God ita viwavui.

2

Satan Job i raudadana-melei

¹ Mara gelauna, anela au mara i geta me, BADA awarina ma tauviwavuna - Satan tau i votaḡoi.

² Ma BADA Satan i paridadanei, “Tam meiei e nenei?”

Satan i paribelei i pa, “Tau were ma nare a nena ma a nenei, dobu a tetetei.”

³ Ma BADA i paridadana, “Au taunola Job u inamai bo ega? Tauna rava aiaii kaukauana ega aiaii gelauna au dobu nanare. Tauna rava jijimanina ma patupatutuna. Ma e vivivireiu ma go'apoapoe e gedugedaiei. Ana lawana anina jijimanina e maemaeni avena da orau u taini da a kovoḡa labalababai.”

⁴ Tauviwavu BADA i paribelei, “Tauna ana lawana ava e vinuabolei, me rava ana purapura anatapuna ina verenei da ega ina kero.

⁵ Wate uram ma viloloi ma tupuana ma gelamina ma ravi, ma au matam ina parivai-apoapoenim!”

⁶ BADA i riwei, “Anina, tauna au uram a tereterei wate ega ma viraḡeni.”

⁷ Ma Satan BADA i netawanei ma i nae da Job kero apoapoei i verei, au loulouna da i gaira au ae lapalapana.

⁸ Ma Job nau gebona i vaia da keronā i kakakaroi ma au lapukare i kiakiala.

⁹ Awana Job i riwei i pa, “Amapo da am lawana jijimanina ma vovojijini bo? God ma parivai-apoapoeni ma ma iraḡe!”

¹⁰ Wate Job i paribelei i pa, “Tam opaopam! Ega nanare ma babani. Tauta God kaua maḡamaḡau ma aiaii e verevereta, ma apoapoei e paripari-tawaneiai, maiteni tana vaia.”

Wei kauai maḡamaḡau apoapoe Job awarina i tupua, wate tauna ana babani awarinei ega go'apoapoe ita kaui.

Job ana rava i nei da i raugenari

¹¹ Maranai ana rava tonuḡa riwana i vaia da Job wenanare ma menanare i vinu'apoapoeni, tau i vitagogiei ma i nae Job ita raugenari ma ita vinuabai. Tau i wavai Eliphas tauna Temanei, Bildad tauna Shuahei ma Zophar tauna Naamah ei.

¹² Tau i tapunei Job i 'nanai ma i vinuanainei da lamna Job. Maranai i 'nana-kauē. Tau i vitouana, ma ai kwama i viaisikasikai ma pokau au tepai i tawatawanei.

¹³ Ma aupom ma waguvarai 7 tau i au doa i vikiakialei, Job i mae-vereverei. Ma i 'nanai da ana nuabola i rata guratana ma gamoi i pota ma i kiala genuatau.

3

Job ana tupua marana i parivaiapoapoeni.

¹ Wiki tagogi au murina Job gamona i laḡi ma ana tupua marana i parivaiapoapoeni.

² I pa,

³ Au tupua marana ma boai,
ma waguvaraina i vinolanola da tevera orotona i tupua.

⁴ Nai marana ina waguwarei!
Ma God au aidamo wei marana ina nota-tawanei,
ma au tepana ega ina rarana.

⁵ Waguvara ma gimtona potopotona wei marana ina vibadei;
ma lada marana ina purui
ma gimtona lalalaina ina purui.

⁶ Gimtona nai waguvaraina ina viamoai
wei marana ega ma iava-melei;
madeḡana bo nawaravina.

- 7 Nai waguvaraina eġa aiai ina tupua,
ma eġa nuaiai gararana ina nonori.
- 8 Vijiboġa amamai,
mepa da ai vijiboġa boga bariawana ina vidagui;
taui wei marana ina vijiboġi.
- 9 Maratmtom ubonana ina ġuvai
ma mara karena ina paina-avei
ma madeġa vuduna eġa ina inanai.
- 10 Aubaina taui manawa metaetana eġa ita gudui
ma vita maġamaġau i vereu.
- 11 Airake, boiboġi ita gomuii!
Bo ata i 'raġe maranai a tuputupua.
- 12 Aiwai aubaina au arona i vimataveniu
ma ġuġunei i viġuġuii?
- 13 Maranaina a tupua, matau ita pota;
ma ata matave ma ata vilauvitau.

4

Eliphas i babani

- 1 Ma Eliphas rava Temanei Job i paribelei i pa,
2 Job eġa amlom ina ġaiġai ma ana babani,
tau ata genuana ava, ana babani!
- 3 Rava maġamaġau i viararamani
ma ġokokokarai i vovavirewapani.
- 4 Riwam, rava peupeui u duġui,
ma ae tutui viviarai u duġui.
- 5 Wate marina nuabola i nei awarim, ma am nota i peu
i vodadanim ma u rovo-kaua.
- 6 Am vitumaġana God awarina,
ma am lawana jijimanina.
Lamna, am rewapana, tapa?
- 7 Ma tumairi ma ma vinua notanota!
Rava jijimani e irairaġe bo?
Mara aiwai rava jijimani i kero ma i'raġe?
- 8 A inanai rava ġoa apoapoe i paewi
ma nuabola i tuarui.

Job ana rava amapo da i ririwa-ġiriġiri da tauna kaua apoapoei i kauai aubaina wei nuabolana e nenelaġai. Wate Job e ririwa da tauna eġa aiwai apoapoena ita kauai.

38

BADA Job i paribelei

- 1 Ma BADA labu au orana ma Job i paribelei, i pa,
2 "Tam aiai e bababani labalababa,
ma au nuaulaula e paripari-virevirei?"
- 3 Ma mairi jijimana me oroto,
ana vitaravirevirem
ma ma paribeleu!
- 4 Tam mepa maranai dobu tuatuana i tonei?
Ma riweu, mepa da u aramanei?
- 5 Aiai dobu ana manawa ma ana dabora i terei?
U aramanei tapa? Ma aiai i ruvai?
- 6 Aiwai dobu tuatuana e vovojjini?
Ma aiai dobu tuatuana i tonei,
- 7 maranai maratmtom ubonai i wela tagogi,
ma BADA ana anela ana morelanai i voepaepa ma i vigaragaraei?
- 8 Aiai boga ana au parata i terei

maranai boga manawana ana goba i wanaiwaḡi?"

40

- ¹ Ma BADA Job i riwei i pa,
² "Tam, God Vivirewapana Kaukauana e viviwavui;
 Aiai God e viviwavui, ina paribelei."
³ Anina ma Job BADA i paribelei,
⁴ "Tau rava labalababa, menanare ana paribelananem?
 Gamou ina pota.
⁵ Boiboḡi a babani guratana.
 Eḡa aiwai ḡelauna ana latoni."

42

Job i babani me

- ¹ Ma Job i babani me, i pa
² "Tau a aramanei da tam aiwai anatapuna e kaukauei;
 Eḡa aiai am oga ina viḡaei.
³ *U paridadaneu, "Tam aiai e bababani labalababa,
 ma au nuaulaula e pari-virevirei?"
 Riwa kaua am boruma vivinualaulaunana eḡa ata aramanei,
 da a voḡana guratana."
⁴ *U riweu, 'Ma rautaniḡana, ma ana babani,
 Ana paridadanem ma tam ma paribeleu.'
⁵ Taniḡau ava riwam i nonori
 Wate marina matau i 'nanaim.
⁶ A vinimala, ma au lapukare ma au debidebi ana kiala.
 A ruperupena ma a mae-tavireu awarim ma au ḡo'apoapoe ma nota-tawanei."

Damona

⁷ BADA i babani vorovei Job awarina ma marina Eliphaz rava Temanei awarina ina pa,
 "Amlou i ḡaiḡai awarim am rava ruaḡa maiteni, taumi eḡa riwa kaua ota babaniei me
Job nanare.

⁸ Lamna aubaina, bull 7 ma sipu ororotoi 7 ona vaia ma ona nae au taunola Job awarina
 ma siai taputapuna ona apui awariu. Tauna aubaimi ina raupari ma ana pari ana nonori da
 eḡa ana vinimalaimi ami kaua apoapoei aubaina. Taumi eḡa riwa kaua ota babaniei me au
 taunola Job nanare."

⁹ Anina ma Eliphaz, Bildad ma Zophar BADA aiwai i ririweia nanare i kauei, ma BADA
Job ana pari i nonori.

¹⁰ *Ma maranai Job i raupari-vorovei, BADA ana maura i veremelele ma raviai-tepatepani.

¹¹ Varevareina ma novunovuna ma ana rava waduwaduboi i nei ana au numa ma
 maiteni i am ma i uma gogona. Ma Job i vinuaubai aubaina BADA vita ḡaeḡaena Job i verei. Ma
 tau i anatapui kampa i ḡeḡeta mane ma loji goldei Job i verei.

¹² BADA, Job i viaiaina-kauei eḡa me au naonei. Awarina sipu 14,000; kamel 6,000; uata
 bullna 2,000 ma donki waivine 1,000.

¹³ Ma nanare, natunatuna nelarai seven ma waivine tonuḡa.

¹⁴ Natuna wavinena magurina wavana Jemimah*, ma keikeina wavana Keziah† ma
 vitonuina Keren-Hapuk. ‡

¹⁵ Job natunatuna gugunii inanai i ai dewadewa eḡa me guguiḡi ḡelau nai au dobuna. Ma
Job natunatuna nelarai ma waivine ai buderi i terei da anatapui ruvana tagogina ina vaia.

¹⁶ Job i mae madeḡa 140 ḡelauna; da ḡoḡoḡana ma nonoina da i nae kimta au
 vi-4 nainanai.

¹⁷ Anina ma i magura kaua ma i raḡe.

* 42:3: Job 38:2 ✧ 42:4: Job 38:3 ✧ 42:10: Job 1:1-3 * 42:14: Heb. wei wavana anona *Gabubu* † 42:14:
 Heb. wei wavana anona *Cassia*. bo *kaidara talana*. ‡ 42:14: Heb. wei wavana anona *mata pitnana*.

Psalm Wela ma Pari

Pariverena

Mara manamanaina i netawanana rava maḡamaḡaui taputapunei ava wela ma pari i girumi wei au bukana. Mai Israel wei welai ma pari i tami ma i teretagogiei da lamnei God i viviborumei.

Wei au bukana wela ma pari tapuna ma tapuna. Ḡelau God e viviborumei ma e vovoeapapai ma ana iviaiai aubaina e viviegualaei. Ḡelau e vivibaḡa agu ma gagalo aubaina, bo notatawanana aubaina. Wela au ḡelau, rava e raraupari ai gulau aubaina ma god e vivibaḡai da ai ḡavia ita kovoḡi. Ma wela au ḡelau tauamgiruma ana apoapoe ma ana nuabola aubaii God awarina i beubeura.

Ma maraḡela Iesu riwa wei au parii i vaia da i viararamana. Kerisiana wei welai ma parii i welewelei ai au viboruma ma i jimajima.

Wela vinevinei

Psalm 1, 10, 23, 27, 34, 51, 67, 90, 95, 1-11, 100, 103, 110, 103, 110, 119, 9-16 ma 139.

Buka Tagogi

1

Nuaiiai ririwa-kauana

¹ Rava viaiainana, lamna eḡa ḡo'apoapoe ravai ita votaḡotaḡoi,
ma ponai eḡa ita rarautaniḡanei;
ma vivijiboḡai eḡa awarii ita kiakiala.

² Wate BADA ana tarawatu i vinuiaiiei,
aupom ma marai e notanota-vaitetei.

³ Tauna me ai, waira au adana gogogona,
ana au mara e rarauano;
ma rugurugui eḡa ita poipoi.

Wei ravanana, aiwai anatapuna e kaukauana-kauei.

⁴ Wate ḡo'apoapoe ravai eḡa nanare!

Taui me rugurugu, ive i kapupuana-naiei;

⁵ Lamna aubaina ḡo'apoapoe taukauei BADA ana au etera ita mairi ava,
ma nanare ḡoa apoapoei ta kauei rava jijimani ai au dam ita mae ava.

⁶ BADA ḡoa aiiai ravai e rarauetaraveni ma e paipaini;
wate ḡo'apoapoe ai etanai au damona, pupui.

23

*Bada taupainiu**

David ana wela

¹ BADA taupainiu
ma eḡa aiwai ana voladaḡei.

² Gidagida majimajiḡai au tepana i vimataveniu,
ma i raveniu waira au raraunairina au adana.

³ Au rewapana e raviravivouni
ma wavana aiaina aubaina etanai jijimaninei i raveniu.

⁴ Avena da gwagwa waguwaguvareina ana naeni,
wate eḡa aiwai apoapoena ana rovoei.
Aubaina tam au ririvau da am kwapuei ma jiḡonei e gagaloeu ma e vivinuubaiu.

⁵ Aubaiu torela e vokaukauei au ḡavia au naoi.
Oilei kolau u volaḡolaḡoi da tam u vinuavaineu,
ma au kelaka i oa-karagelai.

⁶ Ee! Riwa kaula da am iviaiai ma am raunuapoapoe maemae nonoana awariu ina mae, da
au mara au damona.

Ma BADA ana au numa ana mae-nonoa.

⊛ 1:3: Jer 17:8 * 23:: Taupainiu me sipu taupainina.

27

*Voepaepa parina*David ana wela

¹ BADA au lalalaina ma au tauvilawana,
aiwai ana rovoei!

BADA au taugagagalo
aiwai ana rovoei!

² Maranai go'apoapoei ravaii i ġetai
da ita vunuii,
au ġavia

aei ina pakana-melei da ina peu.

³ Avena da sorodia borui ina mae-gariġuruvui,
tau eġa ana rovo dadana.

Maranai au ġavia i vomairi,
tau anina da God ana vivitumaġanei.

⁴ Kaua tagogi ava aubaina a vivibaġa.

Au ġoana ġaeġaena da,
BADA ana au numa, boruborumana ana mae,
ma ana voepaepai. Au lawana au anatapuna.

⁵ Nuabola au marana
ina tereġaġariu.

Ana ġabu au vivivireina, ina tereġovaġiu.

Ma ola au tepana ina tereu
da ġavia eġa ina vodadianu.

⁶ Ma au ġavia i garigari kwaipipiniu, ana tuvaideoedoi.
Da au tempol ana morelanau pulo ana apui BADA awarina.

Ana vinuaii ma welei ma arei ma ana voepaepai.
⁷ BADA ma rautaniġaneu maranai awarim a kwatukwatu,
ma raunu'apoapoleu ma ma paribeleu.

⁸ Au orau u riwa, u pa, "Ma nei da ma rauduneleu."
Tau a paribelem a pa, "BADA a nenei."

⁹ Eġa ma raugovaġeu,
eġa awariu ma ġaiawa.
Am taunola eġa ma inana geduaiei,
au anatapuna tam, au tauagu.

Eġa ma netawaneu,
au God, tam au tauvilawana.

¹⁰ Avena da amau ma alou ita teretawaneu,
wate BADA ina paina-kaueu.

¹¹ BADA, ma viararamaniu da am ġoana ana kauei.
Ma etanai au ġadaġadarana ma taravainiu aubaina au ġavia i maġa

¹² Tau moruei ma parivairovorovoei e vunuvunuii.
Lamna aubaina, eġa ma teretawaneu awarii

¹³ A ramanei da BADA ana viaiaina ana inanai,
weka lawalawai ai au dobu.

¹⁴ BADA ma vitumaġanei,
da ma virewapana ma tepam ina tora.
Anina BADA ma vitumaġanei!

34

BADA ma viberumei

¹ BADA ana vimaegaeġaeni marana patapatai,
ma ana viberumana-nonoei.

² Orau taputapunei BADA ana voepaepai;
Vilamolamonai riwau ina nonori ma ina vinuaii.

³ Ona nei ata BADA tana vimaegaeġaeni
wavana tana voepae-gogonei.

⁴ A raupari BADA awarina ma i paribeleu,
awariu rovo anatapui i vaitawanei.

⁵ Aiavoi awarina e inainana,

- taui naoi ina ravilalai
 ma eġa melanai ina vitepa-ubaubai.
- 6 Au nota i kwa da a ġorei, ma i nonori
 ma nuabola au orau i vaitawanei.
- 7 Aiai da BADA e vivivirana-kauei,
 ana anela taui e inana-vaitetei, ma e vivilawani.
- 8 Taumi ona raudadani ma ona aramanei da BADA i aii.
 Taui BADA au ġouna maemae nuaii ġaeġaena awari.
- 9 Taumi vivitumaġanami eġa aiwai ona voladaġei.
 Lamna aubaina, BADA ona vivirei.
- 10 Lion ġauboi mara ġela am e irairiġe,
 wate aiavoi da BADA awarina e vitumaġana eġa ina voladaġa.
- 11 Natunatu, ona nei, ona rautaniġana,
 ma ana viararamanimi da BADA ona vivirei.
- 12 Taumi o ġoei da ami lawana ina aii
 ma ina manawa bo?
- 13 Nanare, lamna menami ona paina-melei da eġa babani apoapoe bo moru ona babaniei.
- 14 Ġoa apoapoe ona geduaiei ma kaua aiiai ona kaukauei,
 ma ona voguratei da nuauba lawanana ona maeni.
- 15 BADA, matana ġoa aiiai ravai awari e tereterei,
 ma taniġana e tonetonei mepa da agu e toutouei.
- 16 Wate tauna ġo'apoapoei ravai e mamae-puputei
 taui ina iriġe ma rava nuanuai ina vuru.
- 17 Rava jijimani agi aubaina e vivigiore BADA awarina
 tauna e rarautaniġana ma ai vita e vaivaitawanei.
- 18 Tauna rava peupeui, rovorovoi, ma vinuabolai e vivilawani,
 tauna rava orana i peu kaua e vovoepai.
- 19 Rava jijimani ai nuabola i maġa
 wate BADA taui e vovoagui ai au nuabola.
- 20 E inainana-vaitetei da eġa gelamina tagogi ina wanagai.
- 21 Ġoa apoapoe ravai ai apoapoe ina vunumelei,
 ma aiavoi da ġoa aiiai ravai e gedugeduaiei, ina kovoġi.
- 22 BADA ana taunola e gagaloei,
 aiiai da e nenei BADA au ġouna, kovoġa ina vorei.

51

David ana rupena

Mara tagogi, Gulau David ana taunola Uriah awana Bathsheba i tavimatane i matave.

1 Oo God, ma raunu'apoapoeleu. Tam nuavaina maemae-nonoana amai.

Tam raraanuapoapoei amai
 au ġo'apoapoe ma notatawanei.

2 Au rauaġaiġai ma oġai
 ma au ġo'apoapoe ma oġa-tawanei.

3 Au rauaġaiġai a aramanei
 marana patapatai a notanotai.

4 Kaua apoapoei a kauei.
 Tam ainelam awarim Ġoa apoapoei a kauei,
 ma am viwavu lamna riwa kaua.
 Amapo anina da ma kovoġiu.

5 Tau rauaġaiġai, melamelauei da marina
 Au manawa da marina tau ġo'apoapoei taukaueina.

6 Wate tam u ġoei da riwa kaua au ora-dewadewau ina mae.
 E viviararamaniu da nuaulaula orau ina oai.

7 Au ġo'apoapoei ma oġa-tawanei,
 ma oġai da ana arapoira da gonu rovena arapoirana ana ġetawanei.

8 Ma riweu da au ġo'apoapoe u nota-tawanei
 da ana vinuaiiai ma ana morelana

- avena *da gelamiu u viaigaigai, marina ana vinuaiiai.
 9 Au go'apoapoe ma inana-tawanei
 ma au apoapoe mirai ma boai.
 10 Oo God nuanua ma ravivouni
 da ana vipatutu kua awarim.
 11 Ega au naom ma tawana-opuneu
 ma awariu ega Aruam Vivivireina ma vaitawanei.
 12 Vilawana nuaiaina ma ravivouni me au naona nanare
 aruau ma viaiaini da ana voteletelem.
 13 Lamnei, go'apoapoei taukauei am kua ana viararamani,
 da ina mae-tavirei awarim.
 14 Oo God, vi'raġena vitana awariu ma vaitawanei,
 da am kua jijimani ana welei.
 15 Oo Bada ipiriu ma votawanei da gamou ina vimaegaeġaenim.
 16 Au pulo, gāmoġamo ata apui awarim,
 wate tam pulo apuapunana ega uta vinuaiiaiei.
 17 Bada, pulo e ġoeġoei lamna vilamolamona.
 BADA, ega au vilamolamona ma au rupena ma geduaiei!
- 18 Am nuavaina Jerusalem ma viaiaini,
 ma ana gari ma voa-melei.
 19 Anina ma ai pulo nota aiaini ina vikarena-melei da ina kaukauei ma ma vinuaiiaiei.
 Tau pulo tapuna ma tapuna ina apui awarim.
 Bull maġamaġau am au aniamapu ina apuapui.

67

Vieġualau welana

- 1 Oo God ma raunu'apoapoelelai ma ma viaiainiai,
 ma naom weka ma tereiai da ma voaġuia!
- 2 Da au dobu am kua ina aramanei,
 da rava anatapui au dobu ina aramanei da tam ai tauvilawana.
- 3 Rava ina voepaepaim Oo God,
 rava anatapui ina vimaegaeġaenim.
- 4 Rava anatapui au dobu ina vinuaiiai ma ana morelanai ina wela,
 aubaina tam rava anatapui au dobu, kua jijimaninei e vivibadei
 ma e paipaini.
- 5 Rava ina voepaepaim Oo God.
 Rava anatapui ina voepaepaim.
- 6 Anina ma doa maura gaeġaena ina vereta
 ma God ina viaiaina-kaueta
- 7 Riwa kua, God ina viaiainita
 ma rava anatapui au dobu tauna ina vivirei.

90

God ana taunola Moses ana pari

- 1 Bada ai animae
 kimta wariaga da marina.
- 2 Tam God maemae nonoana
 muriai da ola
 ma dobu uta kauei.
- 3 Tam rava e ririwei da e vipokau, ma e ririwei,
 "Rava ona wanaviraimi"
- 4 Tam awarim madega 1,000 lamna me aupom tagogi, i tupo kua
 me raviravi, ega ita manawa dadana.
- 5 Rava ai lawana e vaivaitawanana laġilaġinei me rauboni damona.
 Tau me modu, ubaubanai e raraupairei,
- 6 da e rarata ma e talatalai,
 wate aubigai e ġiviġivi.

* 51:8: Au vinuabola lamna me gelamiu wanagaina

- 7 Nanare am meji tauai e lagulaguriai ma
maranai e ġaiġaiawa tauai a rovorovo kaua.
- 8 Ai ġo'apoapoe anatapui au naom u lavaei,
ai ġo'apoapoe govagovaġana, wate anatapuna e inainanai.
- 9 Am meji ai lawana i vitupoi,
ma ai madeġa laġilaġina e kwakwa, a lavutu-tawanana.
- 10 Madeġa 70 i vereta da tana mae,
mepa da tana virewapana lamna 80;
Wate wei lamna nuabola ava ina vereta,
eġa tana mae-pora ma tana nae.
- 11 Eġa ai ai am ġaiawa malana ita vai-kauei.
Mepa da am ġaiawa ata aramana-kauei, lamna tauai ata vivirana-kauem.
- 12 Ma nanare, ma viararamaniai da ai lawana i tupo kaua,
ma lamna aubaina awarim nuaulaula ana vaia.
- 13 Oo BADA! Ma nememei awariai.
Ma mae-tavirem, ma vinuabilelai, tauai am taunola.
- 14 Ubaubana marana patapatai am nuavaina maemaena ma verelai,
da ana morelanai ana logoi ai ma ai au mara anatapuna ana vinuai ai.
- 15 Madeġa biaġa u kovoġiai, nuaiai ma verelai
da madeġana biaġa a vinuapoapoe ina kovoġi.
- 16 Tauai am taunola, am nola vivirewapanana ma viatataieli.
Ma natunatuiai am boruma ma viatataiei.
- 17 Ma Bada ata God ana vianina ina viatataieta
ma ina kauei da aiwai anatapuna ta kaukauei anona ina tupua.
Nanare ai nola ma viuai.

91

God ata rawena

- 1 Ai ai ravana e nenaie Aidamo Telarana awarina agu aubaina,
lamna Vivirewapanana Kaukauana au ririvana ina mae.
- 2 BADA au God awarina ana riwa ana pa, "Tam au anigagalo ma au tauviġavia.
Tam au God, a vivitumaġanem."
- 3 Aubaina tauna, ġavia ana waro govagovaġai
ma numa rarauabubu awarinei ina gagaloemi.
- 4 Tauna papenenei ina tereġovaġimi ma papena au gabaurina ina gagaloemi;
ana vipatutu, am rawena ma am anigagalo.
5 Waguvara kauai vi'ni-rovorovoi eġa ona rovoei,
bo ġavia madeġai e vivivġavia,
- 6 bo numa rarauabubu waguvara e vivivġavia,
bo doria madeġai e viviraġena.
- 7 Avena da rava tausan au ririvam i peu,
bo ten tausan au oiem i peu;
wate tam ita vodadana-avem.
- 8 Matamiei ona inana ma ona inanai
ġo'apoapoe ravai ai kovoġa.
- 9 Aubaina BADA o vaia ami rawena; Ġetelarana ami taugagalo.
10 Eġa aiwai apoapoena awarimi ina tupua bo au numa ina ġeta.
- 11 God ana anela ina terei da ina painimi
ma ina gagaloemi ami au babara.
- 12 Taii uraiei ina voepaim
da aem eġa ġaima au tepana ma rauei.
- 13 Taumi lion ma mota ona vovaiubai,
lion ġaiġaiawai ma mota viviwaiawai ona tugwadagwadai.
- 14 God i riwa i pa, "Alai nuanuau e vaivainonoei, ana vilawani;
ma ana gagalo ei, aubaina i aramana-kauei.
- 15 Maranai i kwatu awariu, ana paribelei.
Tau kampa ai au nuabola,
ana taravaini ma ana voepaepai.
- 16 Ai lawana ana vimanaini,
ma au vilawana mamae-nonoana ana viatataiei."

95

BADA tana welei

- 1 Ona nei! Tana wela BADA awarina.
Ana nuaiaita tana wela God ata tauvilawana vivirewapana awarina.
- 2 Tana nei au naona ma tana viegualaei
ma welei tana voepaepai.
- 3 Aubaina BADA lamna God virowapana kaukauna,
ma god anapui e inainana-gairei.
- 4 Dobu anapuna au urana,
guba gaegeaei doa au orana da ola gaegeaei au tepai.
- 5 Boga tauna garinei, tauna i kauei
ma nanare tauna uranei dobu alalana i tere-kauei.
- 6 Ona nei ma tana raudune ma tana vimaegaegeaeni,
ae tututa tana tapegaroei taukaueta BADA awarina.
- 7 Aubaina tauna ata God.
Tauta natunatuna. Ana sipu ma e gamogamoita ana au wapu.

Mepa da ponana o nonori amadodo,

- 8 ^oE riwei i pa "Ega orami ona gudui me amamami au Meribah;
me au mutulua au Massah.
- 9 Kampa amamami i 'nanai, kauababai a kauei
wate ega ita vitumageaneu, ma i raudadaniu.
- 10 Madega 40 wei kimtana awari amlou i gaigai ma a riwa,
'Wei ravai orai i bagibagi gaga!
Ega ita rarautaniganeu.'
- 11 Ana mejiu a parivainuagani,
'Gabu a vokaukauei ami lauwaitau aubaina wate kampa ega melanai ona rui.'

100

Voepaepa welana

- 1 Rava anapumi au dobu ona logoimi BADA awarina!
- 2 Ana nuaiami BADA ona voepaepai,
ona nei au naona ma ona welei.
- 3 Ona aramanei da BADA anina God.
Tauna i kaueta.
Ma tauta tauna garinei. Tauta tauna natunatuna. God ana sipu ma e galaloeta me sipu
taupainina.
- 4 Ana welami ana au gari ona rui ma voepaepami
ana au anivoboru ona rui,
ma ona vimaegaegeaeni.
- 5 Aubaina BADA i aii;
natunatuna e vivinuavaina-nonoai,
ana vipatutu e mamae-nonoa, kimta au anapui.

103

BADA ana nuavaina

David i girumi

- 1 Orau taputapunei BADA ana voepaepai.
Wavana vivivireina ana voepaepai.
- 2 Orau taputapunei BADA ana voepaepai,
kaua aiaii i kauei aubaiu ega nuanuau ina vuru.
- 3 Au go'apoapoe anapui e notanota-tawanei,
ma doria awarinei e vivilawaniu.
- 4 Ata irage ma i sinaepaiu
ma nuavainei ma raunuapoapoelei e vivigulaueu.
- 5 Au lawana au anapuna
purapura aiaii avai i verevereu, au vilaraga marana i raviravivouni me *manubada.
- 6 BADA ana kaua anapuna jijimanina.

^o 95:8: Exo 17:1-7; Num 20:2-13 * 103:5: Manubada tawarana waduboi e peupeu ma vouii e gogogo. Me manubada tawarana voui e gogogo nanare tam au lawana e raviravivouni.

- 7 Ana oga Moses i viataaiei,
ma mai Israel BADA ana kaua vivirewapanai i 'nanai.
- 8 BADA raraunuapoopena ma ivina aiaina,
Ega laḡilāḡina amlona ita voḡaiḡai. Ana nuavaina maemae-nonoana.
- 9 Eḡa mara nonoa ina enita,
ma ana amloḡaiḡai eḡa ita mamae-nonoa.
- 10 Anina da ita kovaḡa-kaueta,
wate i raunu'apoapoeleta da kovoga eḡa ḡaeḡaena ita verevereta.
- 11 Dobu weka ma mara nore au tepadewadewana.
Nanare, BADA ana nuavaina i rata guratana tau i da BADA e vivivirei awarii.
- 12 Mepa madeḡa e gogogolana da mepa e ḡaiḡairalana, lamna uama,
ma nanare ata ḡo'apoapoe vinimalana e vaivaitawana-naiei aueia.
- 13 Me ama natunatuna e rarau-nuapoapoelei,
nanare BADA natunatuna e rarau-nuapoapoelei.
- 14 Aubaina i aramanei da tauta pokauei i kaueta.
- 15 Ata mara au dobu lamna me modu.
Ta gogogo ma ta rarata me berana moduei;
- 16 Anina ma ive i uvena-kapupuei,
eḡa ita mamae, ana gabu i kwakwava.
- 17 Tau i da BADA e voepaepai ana nuavaina maemae-nonoana
awarii ma nanare noinonii ma ai epaepaia awarii
- 18 tau i aiavoi da ana parivainuagana bagibagina e vovojijini
ma ana patupatutui tarawatu e vovojijini.
- 19 BADA ana vigulau anikialana au mara i terei,
ma kampa ana vigulau e vivibadei.
- 20 BADA ana anela, vivirewapanami,
BADA riwana o rarautaniḡanei ma o kaukauei,
BADA ona voepaepai.
- 21 Anina BADA ana anela marei,
BADA ona voepaepai taumi ana taunola ma ana ḡoana anatapuna o kaukauei.
- 22 Taumi anatapumi BADA uranei i kauei, ana au vigulau maemaei, BADA ona voepaepai.
Tau nanare orau taputapune i BADA ana voepaepai.

110

Gulauna vinevinena

David ana wela

- 1 *BADA au bada wenanare i riwei,
“Au oieu ma kiala
da am ḡavia
au ae karem ana terei da ma tuvaideoedoei.”
- 2 BADA, am gabemani vivirewapanana Zion * ana parata ina viratai,
da am ḡavia ma vibadei.
- 3 Am laraga ana nuaii ina verena-melei da ina visorodia,
ma ona ḡae BADA ana ola au tepana viḡavia aubaina,
ma ami rewapana ina ravivouni ubaubanai patapatana me ubaubanai turuvanina.
- 4 BADA i parivainuaganim ma ega nuanuana ina virai;
“Tam piri si maemae nonoana me Melkisedek.”
- 5 BADA au oiem e maimairi da e paipainim;
tauna gulagulau ina piaḡi maranai amlona ina ḡaiḡai.
- 6 Dobu nununai ai ḡoa apoapoe ina kovogi,
ma taubeu dobuna ina vioai
ma dobu gulagulau i anatapui kolai ina viaigwadagwadai.
- 7 Wate au etanai au vuvura ina uma
ma rewapana ina verei ma ina vovaiuba.

119

BADA ana tarawatu boruborimana

- 9 Rava vouna menanare lawana aiaina ina maeni?
Tauna riwamei ina paina-melei.

✧ 110:1: Mrk 12:36; Act 2:34-35 * 110:2: Jerusalem wavana ḡelauna.

- 10 Lamna aubaina a baibaieim orau taputapunei;
eġa ma votereu da riwam ana geduaiei.
- 11 Riwam a iaiavi ma au nuanuau a tereterei,
da eġa ġo'apoapoei awarim ana kauiei.
- 12 BADA, a voepaepaim!
Am tarawatu ma viararamaniu.
- 13 Ipiriuei ana bababani ma
am tarawatu anatapui u verevereiu ana jimei.
- 14 Am tarawatu votelatelana a vinuaiainana-kauiei,
eġa me vipurapura bo vimane.
- 15 Riwam ana iavi
ma ana vinuanotenotei.
- 16 Am tarawatu a vinuaiaina-kauiei,
eġa riwam ana voteretawanei.

139

Bada anatapuna i aramanei.

David ana wela

- 1 BADA orau u inana ma au kua anatapui u aramanei.
- 2 U aramanei mara aiwai a kiala ma a vomairi.
Avena au uama wate au nota e aramanei.
- 3 E inananai maranai a babara bo au numa a vivilaubitau.
Anatapuna a kaukauei e araramanei.
- 4 Muriai da ata babani tam e araramanei aiwai ana latoni.
- 5 Tam e garigari-kwaipipiniu,
ma uram virewapananei e paipainiu.
- 6 Lamna riwa kauana, awariu i aii kaua
ma i ġe-dewadewa da kolau i kwauna-kauiei.
- 7 Mepa ana nae da Aruam ana raugovaġei?
Mepa ana ruba da ana raugovaġem?
- 8 Ata ġae au mara da tam kampa;
mepa da i 'rairaġei ai au dobu ata rauvirai, tam kampa.
- 9 Mepa da ana lave nae au maramatanei,
bo mepa madeġa e neneulai,
- 10 avena kampa ma uram ina raveniu,
ma am rewapana ina painiu.
- 11 Mepa da ana riwa, "Gimtona ina tereġovaġiu
ma lalalaina ina gimtona."
- 12 Wate avena da gimtonana amapo eġa ana raugovaġem.
Tam awarim gimtona ina rarana me marai, aubaina tam awarim gimtona ma lalalaina
lamna tagogina.
- 13 Tam tupuau anatapuna u voai da alou au manawana u teretagogieu.
- 14 A vivieġalauem aubaina tam am nuavaini ma am borumei u voa-kauieu! Am raugaroġaro
i aii,
A voepaepaim aubaina a aramana-kauiei.
- 15 Tam u vivineneġaneu maranai a tuputupua u govagovaġana, alou au manawana,
tam ainelam anatapuna u aramanei.
- 16 Tam u inana ma muriai da a tupua.
Aupom biġa u vereu da ana mae
lamna au buka u girumi,
muriu da aupom naona i ġotai.
- 17 God! I pipiri guratana da am nota ana aramanei.
Am nota kolau i kwauni, eġa aiwai ġelaunei am kua ana aramanei.
- 18 I maġa guratana eġa me bubu, iavana ana kauana-avei,
avena da ata iava-pai, tau amapo da tam ana vivinuanainem.
- 19 Oo God! A ġoei da ġo'apoapoei ravai uta viraġeni.
Tauviraġena uta viaġaġei da eġa ina nei awariu.
- 20 Aubaina e vivijiboġim,
ma wavam eġa ita vivivirei.
- 21 BADA, rava e gedugeduaiem, tau ravai a gedugeduaiei.
Tau i eġa ita voteletelem lamna aubaina tau i au ġavia.

22 **Tau**i a geduaiana-kauei,
anina tau*i* au ġavia.

23 **Ma** tuvirevireu, ma orau ma inana-pai.

Ma raudadaniu da nuanuau ma aramanei.

24 **Mepa** da ġoa apoapoe au orau, ma viatataieu,

ma ma raveniu etanai e nena*e* au lawana maemae-nonoana awarina.

Proverbs Nuaulaula Riwai

Pariverena

Wei au bukana awanaina maḡamaḡau, ma God ana rava e viviararamani da ina mae-kaua. Gulau Solomon maḡamaḡau i girumi ma rava ḡelau ruāḡa ota i girumi. Orotō e ḡoreḡorei Agur ḡelau i girumi ma gulau Lemuel ḡelau i girumi.

Viararamana ḡaeḡaena tagogi wei au girumana lamna nuaulaula anatapui pulo Godei. Rava nuanuaulaulana au naona God ina vivirei.

Mara au anatapuna ata au animae wei nuaulaulauna e vovoaguia, au melagai, au gabemani ma au nola.

Ma maiteni wei girumana e viviararamanita da lawana aiaina tata maeni, ma kaua aiiai tata kaukauei. Ma avena tata gogulagulai ma tata nola guratana ma ivita ita ai molamolakai awari.

Vinuaterena etana

⁷ BADA vivirana, lamna aramana karena,
Wate opaopai, nuaulaula ma aramana e gedugeduaiei.

⁸ Natu, amam ma alom ai vinuaterena anatapui ma voteletelei.

⁹ Ai vinuaterena lamna me kunuteia au kolam,
bo gadogado au uam
da inanam ina ai.

5

Wavine matana maḡamaḡauna ma vorei

⁸ Wavine matana maḡamaḡauna ma ruba-tawanei!
Eḡa ma nae dadana ana au metaeta!

⁹ Mepa da nanare lamna rava eḡa ina vivivirem.
Tam am vilaraga ma am lawana aiaina ma vitupoi.

²¹ BADA rava ai kaua anatapui e inainanai,
Metauna etanaina e vaivaia, tauna kampa da e inana-vaitetem.

²² Taniḡapota ravana ana ḡo'apoapoelei ina waro-melei.
Ana ḡo'apoapoe tauna ina tupajijini.

²³ Tauna opaopana ma eḡa ita paina-melei,
Ana kaua opaopai aubai i raḡe.

6

Amam ma alom ai vinuaterenana

²⁰ Natu, amam ma alom ai vinuaterena anatapui ma voteletelei.

²¹ Ma vojijina-kauai au nuanuam; marana patapatai au uam ma gadoi.

²² Maranai e bababara, ai vinuaterena am etanai ina rauḡadaḡadari.
Maranai e matamatave, ai vinuaterena ina matave-painim.

²³ Maranai u vomairi, ai vinuaterena awarim ina babani.
²³ Aubaina wei tarawatui lamna rampa.

Wei viararamana lamna ravilala, etanaina e lalalai.

Nuaterena bagibagina lamna lawana aiaina etanaina.

²⁴ Tau i ina aguim da wavine matai maḡamaḡau ma vorei,
ma wavine tavitavinena ana gwalameru.

²⁵ Eḡa wavinena inana aiaina ma erawei.
Eḡa! Ma voterei da matanei oram ina taini da ina waroim.

8

BADA nuaulaula i terei

Nuaulaula e ririwa,

²² "Au karena, BADA tau i tereu.

Muriai da aiwai gēlai i kauēi.

²³ Tau kampa au kare oina,
muriāi da dobu.

²⁴ Tau a tupua muriāi da BADA gabinou i kauēi,
muriāi da waira vuvura i kwakwa-gētai.

²⁵ Tau a tupua muriāi da ola,
muriāi da ola muomuoi ai au gabu i terei, tau kampa.

²⁶ Muriāi da dobu bo wapu
bo doa pokauna.

²⁷ Tau kampa maranai mara ana au gabu i terei,
maranai parata i taini da mara au tepana ma boga au gabaura.

²⁸ Maranai apau i terei au mara
ma vuvura doa au orana i votawanei.

²⁹ Tau kampa, ma boga ana parata i terei
ma i egari da nai paratana ega ina raḡoni.

Tau kampa, maranai dobu oḡona i tonana-naiei.

³⁰ Nai marana tau BADA au ririvana a mamae me tauvioga,

marana patapatai a vinuaiaini ma tau a vinuaiāi.

³¹ A vinuaiāi kaua maranai dobu i kaukaueia a inanai,
a vinuaiāi kaua maranai rava a inanai.”

9

Nuaulaula ma opa

¹ Nuaulaula ana numa i voai
tuatua gaegaē 7 i tai ana numa aubaina.

² Torela gaegaena i apui,
sia i api ma wain aiāi i wāḡi ma kepaḡepa i vokaukauei,

³ ma ana taunola gēlai i paritawanei,
au deba da i viḡoreḡore,

⁴ i riwa i pa, “Taumi ega notanota kauami ona nei!”
Ma opaopai i riwei,

⁵ “Ona nei au lam ona ani
ma wine a viravirai ona umai.

⁶ Ami lawana opaopai ona voterei
ma ona lawana,
ma aramana lawanana ona maeni.”

13

¹ Tevera nuaulaulana Amana ana vinuaterena e nonori,
wate tevera maegaegaena vinuaterena e gedugeduaiei.

⁴ Mata-galagalawana purapura e raurauoḡarei ega ina vaia,
wate egoḡolana ana ḡoana aiwai anatapui ina vaia.

²⁴ Aiāi natuna ora-potapotana ega ita kwapukwapui, lamna natuna nuanuana ega ita vaivaia.
Wate aiāi da natuna nuanuana e vaivaia lamna ina viararamani.

17

²¹ Ama tevera opaopana i vinatunei lamna nuabola ava e vivitupui,
laragana amana awarina ega nuaiai.

20

⁴ Rava mata galagalawana e paepaewa labalababa, ega iri ita votaḡotaḡoi;
tuaruta ana mara e baibaia ma ega aiwai.

22

⁶ Natunatumi lawana aiaina ona viararamani, da maranai i vorata,

nai lawanana eġa ina voterei.

23

- 13 Natum e viviorapota eġa ma inana-tawanei,
boreborelei u kwapui Amapo eġa ma viraġeni.
14 U raukwapui
lamna irage awarinei u galaloei.

24

- 30 Rava mata-galagalawana ana wapu adanei a nae,
ravana opaopana ana grape wapuna au ririvana.
31 A inana da modu i gogo-nae,
ma donadona wapuna i vioai.
Ma ana gari, i wanarikarikai.
32 Lamna a inana ma a vinua-notanotei.
A tuvirevirei ma wei i viararamaniu.
33 Matam ma potai, ma rauviraim.
Wapu nolana avena, uram au nuanuam ma terei ma ma matave.
34 Ma gomara ina ravim me taudanene;
anatapuna ina pupuni.

26

- 13 Rava mata-galagalawana e ririwa, “Ġamoġamo ġaiġaiawana au doa! Ġamoġamo ġaiġaiawana
au etana!”
15 Mata-galagalawana lam au urana e vaivaiaia
wate eġa ina voepai au gamona.

29

- 3 Aiai ravana nuaulaula i ġoana-guratei, nuaiai ġaeġaena amana e vereverei.
Wate aiai da etana waivinei maiteni e nena lamna ana mane ma ana purapura
anatapuna e vikalokaloei.
15 Kwapu ma nuaterena riwai, natum nuaulaula e vereverei.
Wate tevera eġa viararamanana, alona e vivitepaubaubai.
17 Natunatumi ona vinuaterenei, da mara nonoa awarim nuauba;
ma oram ina vinuaiaini.

31

Wavine aiaii kaukauana

- 10 Mepa nanare wavine aiaina ma egoegolana uta nelaġai?
Wavinena i vinualaulauna kaua eġa me ġaima lebalebarina maiana ġaeġaena.
11 Orotu awana i vitumaġanei,
ma eġa aiwai ina voladaġei.
12 Wavine, kaua aiaii ma eġa kau apoapoe ita neneiai awana awarina
ana lawana au anatapuna.
13 Wavine sipu aparana ma waiape i vaia
ma i vinuaiai da ina rauġarogaro.
19 Wavine sipu aparana ma waiape ina metani
ma gara ina ġauġauri.
20 Ana numma ma orana i votawanei
molamolakai ma vovoladaġai awarii.
30 Erawa lamna kaua morumoruna

ma inanana aiaina ina amoa;
wate wavine BADA e vivivirei, rava tauna ina voepaepai.
³¹ Wavinena ina voepaepai aubaina i kauana-kauei.
Rava anapui, wei wavinena ona voepaepai.

Ecclesiastes Tauviararamana

Pariverena

Aiai da wei bukana i giruma lamna eġa wavana tata aramanei. Wate rava ġelau e ririwa da gulau Solomon i girumi. Ma aiai i girumi lamna anina da rava araramanina. E ririwa da wavana lamna *tauviararamana*. Aubaina purapura vopiripirii e bababaniei. Rava maġamaġai God eġa ita aramanei aubaina da i ġoei da ina baiei da aiwai e tuputupua. Wate anona eġa ita nenelaġai. Tauviararamana wei ravai ai nota e ririweta. Mara ġelauna rava aiwai i kaukauei lamna eġa anoi Ma e ririweta da wei kauai lamna me ive tata viaġaġei. Rava i nelaġai da lawana wei au dobuna lamna anona eġa aiwai.

Tauviararamana ana ġiu

¹ Wei lamna tauviararamana, David natuna, mai Israel ai gulau ana viararamana;

² Tauviararamana i riwa, "Anona eġa!
Anatapuna kwakwavina!"

³ Ma nolanola da ma magura ma anona aiwai?

⁴ Kimta e nenei ma e nena,
wate dobu maemaena e mamae.

⁵ Madeġa e gogogo ma e arearere,
ma e wanawanavirai da ina vikarena-melei.

⁶ Kariwabu e ġotaġota,
raunaġa e opuopu,
e kwavikwaviviro
ma e wanawanavirai da ina vikarena-melei.

⁷ Waira anatapui au boga e opuopu,
wate boga eġa ita oaoai.

Waira matanei,
e ġaiġairai ma e nena me au matana.

⁸ Kaua anatapuna i vi'nigarigari,
menanare tana riwa nei?

Matata eġa melanai ina inana iaua;
Taniġata eġa melanai ina nonora iaua.

⁹ Aiwai wariġa i tupua ina tupua me,
aiwai wariġa i kauei ina kauana-melei.
Eġa aiwai, kaua vouna wei au dobuna!

¹⁰ E ririwa, "Ona inana! Wei kaua vouna."
Wate eġa! Wei kaua maemaena;
wariġana, muriai da ta tupua.

¹¹ Kaua wariġa i tuputupua, eġa aiai ita notanotai.
Ma kaua marina da muriai e tuputupua, eġa aiai ina notai.

Nuaulaula anona eġa

¹² Tau lamna tauviararamana ma Israel ai gulau au Jerusalem.

¹³ Orau a terei da aiwai anatapuna au dobu e tuputupua, nuaulaulei ana girumi. Ma a aramanei da God vita ġaeġaena rava i verei.

¹⁴ Aiwai e tuputupua au dobu a vinua-notenotei ma a inana da;
anatapui anona eġa, kwakwavina. Ive ava ta viviaġaġei.

¹⁵ Aiwai barabarai amapo eġa ma vojijimana-melei,
aiwai awarim eġa, lamna menanare ma iavanei.

¹⁶ Au orau a riwa, "Tau a nuaulaula guratana,
eġa me aiai ġelauna au Jerusalem i vivigulau nanare.

A 'ramanei nuaulaula aiwai ma aramana aiwai.

¹⁷ A ġoei da ata aramana-kauei nuaulaula aiwai ma bua ma opa aiwai.
Wate a aramanei da wei lamna me ive a viviaġaġei.

¹⁸ Aubaina au nualaula e rarata, mae-boaboa e rarata
au aramana e rarata, au nuabola e rarata."

2

Vinuaiaiana-melana lamna anona eġa.

¹ A vinotanota a pa, “Abeka nuai ai ana baiei, ana raudadani, da i aii bo eġa.” Wate a nelaġai da wei lamna kwakwawina.

² Lamna aubaina a riwa da kaka labalababa ma erawa lamna bua. Ma erawana aiwai aiaina e vereverem?

³ Nuaulaula a ġoana-guratei, ma a ġoei da wine ata umai da orau ita telatela ma kaua opaopai ata kauai, da ata aramanei metauna i aii rava au dobu awari, maranai mara tupona ava au dobu e mamae.

⁴ Kaua ġaeġaei a vikarei, au numa ġaeġaei a voa-naiei ma grape wapui a paewi.

⁵ Wapu da pepei a kauai ma ai uauai tapuna ma tapuna a paewi.

⁶ Dogo a ġarai da garewa ma wapaketa i vojijini, lamnei wei wapui a vivituvanei.

⁷ Awariu taunola au numa tuputupuai, ma taunola maġamaġau nelarai ma waivinei a gimarai. Au bulumakau ma sipu i maġa guratana eġa me ai ai ġelauna au naona au Jerusalem nanare.

⁸ Awariu gold ma silver gaegaena ma nanare dobuġela gulau ai via. Tauwela nelarai ma waivinei a vimaiei ma guguini inanai ai ai i vivaneiai au numa, au ani vieraerawa. Aiwai a ġoeġoei ana tapuna awariu.

⁹ Tau a maura ma a vipurapura kaua eġa me ai ai ġelauna au Jerusalem nanare. Ma wei anatapuna au orana au nuaulaula i mae-kaua.

¹⁰ Aiwai a inanai ma a rauoġarei a vaia, anatapuna a notai da ita vinuaiainiu.

Au nola anatapui a kauana-kauai, ma nuaiaina lamna au nola maiana.

¹¹ Anina ma aiwai anatapuna a voavoai ma a polepolei, a vinua-notenotei ma a aramanei da wei anatapui lamna anona eġa,

lamna me ive ata viviaġaġei wei au dobuna amapo eġa aiwai tana vaia.

Nualaula i aii eġa me bua

¹² Nuaulaula, bua ma opa anoi a vinua-notenotei.

Gulau ana raviepaia, aiwai ġelauna ina kauai?

¹³ Ma aramanei da nuaulaula i aii kaua eġa me opa, ma lalalaina i aii kaua eġa me gimtona.

¹⁴ Rava nuaulaulana matana au kolana e mamae wate opaopana waguwaguvareina e bababara.

Ma aramanei da ravai ruagai ai damona tagogi.

¹⁵ A vinua-notanota a pa, “Tau ma opaopana ai damona tagogina.

Au nuaulaula aiwai ġelauna ina vereu?”

Au nota a pa, “Wei maiteni anona eġa.”

¹⁶ Rava nuanuaulaulai lamna me rava opaopai amapo nai ravai nuanuata ina vuru.

Kapore! Rava nuaulaulauna ma rava opaopana e irairaġe.

¹⁷ Tau lawana a geduaiei, au dobu aiwai anatapuna ta kaukaui iniviara ava e verevereta. Anatapuna kwakwawina, me ive taviviaġaġei.

Bagibagi ġaeġaena eġa anona

¹⁸ Anatapuna au dobu a polepolei a geduaiei, aubaina nai ana voterei, da rava au muriu e nenei aubaii.

¹⁹ Ma ai ai i aramanei da tauna rava nuaulaulauna bo rava opaopana? Wate tauna aiwai a polepolei ma au aramanei a vitupui ina vaia. Wei anona eġa.

²⁰ Au bagibagi anatapuna wei au dobuna a notai ma orau i peu.

²¹ Aubaina rava ana nuaulaulei ma ana aramanei i nola kaua, da i maura ma anatapunana ina voterei da rava ġelauna, eġa taunoleina ina vaia.

²² Marana patapatai nola ma nuabola inina e viviarei au dobu ma aiwai ina vitupui?

²³ Tauna ana nola da iniviara ma nuabola; waguvarai maiteni eġa ita matamatave. Wei maiteni eġa anona.

²⁴ I aii da rava ita am ma ita uma ma ana nola ita vinuaiaiei, ma a inanai da vinuai ai lamna God uranei.

²⁵ Aubaina God eġa. Lamna eġa am ma eġa nuai ai.

²⁶ Ai ai God e vivinuaiaini, God tauna nuaulaula, aramana ma nuai ai, e vereverei. Wate ġoa apoapoe ravana ana nola i verei da mane ma maura ġaeġaena ina vitupui, Wate God nai maurana ina vaivaitawanei ma ai ai e vivinuaiaini ina verei. Goa apoapoe taukaui ai nola lamna kwakwawina, me ive i taviviaġaġei!

3

Aiwai anatapui ai au mara e tuputupua

¹ Mara ma iri i terei da aiwai anatapui au dobu ai au mara e tuputupua.

² Vinatuna ana mara ma irāge ana mara
paewa ana mara ma tuaruta ana mara.

³ Virāgena ana mara ma vilawana ana mara,
amrika ana mara ma voa ana mara.

⁴ Tou ana mara ma kaka ana mara,
mogu ana mara ma ara ana mara.

⁵ Gaima viorerena ana mara ma tama melanana ana mara,
taragwaba ana mara ma ega taragwaba ana mara.

⁶ Baia ana mara, ma baia voterena ana mara,
ma purapura vojjinana ana mara ma purapura vineboana ana mara.

⁷ Sika ana mara ma popo ana mara,
genuana ana mara ma babani ana mara.

⁸ Nuavaina ana mara ma goagāi ana mara
vigāigāiawa ana mara ma nuauba ana mara.

4

⁹ Rava ruağa i aii ega me rava tagogi,
aubaina tau i ina viagu vivira ma maura ina nelaği.

¹⁰ Mepa da tagogi ina peu, turana e mamae da ina voepai.
Wate tam ainelam ma u peu lamna i apoapoe kaua,
aubaina kampa ega ai i da ina voaguim.

¹¹ Ma nanare mepa da rava ruağa i matave tagogi, tau i ega inii ina ubauba.
Rava tagogi menanare ainela ina vibolabola-melei?

¹² Am gavia, ainelam ina vigaviem ma ina vovaiubaim, wate maranai taumi ruağami
e vivigaviem amapo ona vobelei.

Ma rava tonuğa i virewapana kaua me gurava barawa tonuği metametanana.
Wei guravana viaituinana ma kauana-avei.

5

¹⁰ Aiavoi mane nuanuai e vaivaia ega melanai nuanuai ina rauei;
aiavoi e goeğoei da ina vipurapura;
tau i ega melanai ai rauoğara anatapuna ina vaia.
A inanai da wei anona ega.

¹¹ Maranai am maura e rarata,
lamna maranai patara e geğetai da e amam vereverem.

Wate wei maurana aiwai aiaina e vereverem?

Ega aiwai, anina e viatataim da tam maumauram, wate rava gelauna am maura
ina tawanei aubaim.

¹² Taunola e amam kaua bo ega,
wate e matamatave kaua.

Mane ravana ega nanare, tauna ana maura e notanota-maratomei.

¹³ Au dobu kaua apoapoe kaukauana a inanai;

Mane ma purapura ravana ana maura au anara e tereterei muriai aubaina. Wate wei
lamnei, ana nuabola gaegaena i tuarui.

¹⁴ Ana mane ma ana maura i kauana
labalababai ma anatapuna i vine-boai.

Natuna ega ana buderi ita terei.

¹⁵ *Menanarena dobuna ta ruinei
nanarena tana nae me, kovakovata ma ana ura kwakwavita.

Amapo ega ata purapura, ta vopolepolei tana vinimavoiei.

7

- 15 Au lawana kwakwavina au orana kauhaua ruaāa a inanai;
 Rava aiaina BADA ana nola e kaukauei i'rage laāilaāina
 ma āo'apoapoe taukaueina God ana tarawatu e viviaigai wate ana lawana i manawa.
- 16 Lamna aubaina eāa ma viāoa aiaina guratana bo ma vinuaulaula guratana,
 mepa da ma virāgena-melem.
- 17 Wate nanare, eāa ma vitaniāapota guratana
 ma eāa ma opa;
 eāa ita ai da ma irāge muriai da am mara.
- 18 I aii mepa da wei riwai bagibagina ma nonori
 Aiai God e vivivirei lamna ina paina-melei
 da wei kauai ruaāai eāa ina kauai.
- 19 Rava nualaulaunana tagogi rewapana āeāeāena ina verei
 eāa me gulagulau 10 au taon.
- 20 Riwa kauhau! Weka au dohu eāa aiāi tagogi kauhau aiāi ava taukaueina.
 Ma eāa āo'apoapoe ita kaukauei.

8

- 16 A āoei da nuanuau ita ulaula lamna aubaina rava ai mae au dohu a inanai, ma lamnei
 a aramanei da marai ma waguvarai eāa matave kauhau.
- 17 God aiwai i kaukauei eāa ata aramana dadanei. Ma voguratei da ma nelaāai, wate amapo
 eāa ma aramanei. Nuauaulai e ririwa da i aramanei, wate eāateni dadana.

11

Ami au vilaraga ona vinuāiai

- 9 Laralaraga, ami vilaraga ona vinuāiaiei.
 Nuanuami ina morelana ami au vilaraga.
 Orami ma matami ana rauogāra ona kauai.
 Wate ona aramanei da aiwai o kaukauei
 God ina etaremi, anātapuna aubaina.
- 10 Lamna aubaina nuabola au murimi ona terei ma tupuami ona paina-melei,
 aubaina amapo eāa ona vilaraga nonoa.

12

- 1 Ami au vilaraga, taukauemi eāa nuanuami ina vuru,
 muriai da nuabola ona nelaāai;
 maranai magura i tuāereāerei,
 ma ona riwa, "Lawana marina eāa ita ai!"
- 2 Lamna maranai madeāa, nawaravi ma ubona ina āuvai,
 ma apau ina nememei da mara ina āuva-nonoei.
- 3 Anina ma nimami, taugagaloemi ina sisi
 aemi marina vivirewapanana ina vokokokara.
 Ivomi ina viruāa da ami lam eāa ona uta gwadagwadai,
 matami ina vinawanawa da eāa ona inana kauhau.
- 4 Taniāami ina pota da gugura au etanai eāa ona nonori,
 kiu ina logologoi ina ravidagudaguimi wate ai wela anātapui ina amoa.
- 5 Taukauemi ona vinuanotenotei:
 Maranai aidamo ona gagatei ma babara ona rovoei,
 maranai kora ina tonaimi me rei talana,
 ma tam ma gwaāa-nae me kapau e gwaāagwaāa-nae irāge aubaina.
 Erawa ma morelana anātapui ina kwa. Tauta kokoāa ta tuāereāerei ma tou ina vikarei
 au doa.
- 6 Taukauemi ona vinuanotei,
 muriai da lavutu āuravana ina wanautuini,
 bo nau goldei ina wanawamai
 ma reduāoru ina wanakabakabari.
- 7 Ma tupuami ina naeme au doa
 ma aruami ina naeme God, tauverena awarina.

⁸ Tauviararamana i riwa, “Anona eġa! Anona eġa!
Anatapuna anona eġa.”

Damona, God ma vivirei ma riwana ma voteletelei

⁹ Tauviararamana nuanuana i ulaula kua, ma aiwai i aramanei rava i viararamani. Riwa nuaulaulai maġamaġai i 'avi ma i girumei ma i rereġa-kauei.

¹⁰ Tauna riwa vinuaubana i baiei ma aiwai i girumi lamna jijimanina ma ririwa-kauana.

¹¹ Tauviararamana riwai lamna me kwapu ma riwa nuaulaulai i gam me tutu, nuanuam ita tonatonai. Wei anatapuna BADA i vereta.

¹² Anina natu, ma aramanei da kua ġelau ma inana-kauei. Buka girumai eġa ina kwa ma giruma ġiriġiri i vinigarigari.

¹³ Wei anatapui au murina.

Riwa tagogiava ma aramanei:

God ma vivirei ma ponana ma voteletelei.

Wei lamna aubaina rava i vitupui.

¹⁴ God ata kua anatapui govagovaġai,
aiiai bo apoapoe, ina kovogġi.

Peroveta Isaiah ana buka

Pariverena

Wei bukana lamna peroveta gaegeaena au Jerusalem i mae tana riwa 750 BC. nanarena, wavana Isaiah. Bukana iavana tonuga:

Kapita 1-39 e ririweta da mai Assyria ai gulau ma ai sorodia vivirewapanai dam gelau Israel ma Judah au ririvai i vipupuni. Gulagulau Israel ma Judah i vibadei.

Kapita 40-55 lamna mai Babylon ai gulau mai Judah i vipupui ma i pupuna-naiei da au Babylon. Perovetana i vinuabai ma i riwei da God ina naiana-melei ma lawana vouna ina verei.

Kapita 56-66 lamna mai Judah i nememei au Jerusalem. Ma perovetana God ana ogatara Jerusalem ravai aubaii e bababani.

2

BADA ana ola

¹ God ana pariverena, Judah ma Jerusalem aubaii wenanare, Isaiah - Amoz natuna i verei.

² Mara au murina,

ola mepa tempol marina e maimairi, ina mae-nonoa.

Ina getelara kaua ega, me ola gelau.

Dam nununai patarai ina taini kampa da ina voepaepa.

³ Dam patarai ina nei ma ina riwa,

“Ona nei, tana gae BADA ana au ola,

Jacob ana God ana au numa.

Weka ana kaua ina viararamanita

da au ivina tana babara.

Aubaina BADA Riwana au Zion da ina opu,

BADA ana tarawatu Jerusalemei ina opu.

⁴ Tauna dam gaegeae ai vigaiyaiawa ina rautarei,

ma ina kovoğa.

Ai sod ina guda-virai da ipa uata,

ma ai pawasi ina guda-virai da naipi ai ragaragai kosii aubaii.

Dam damai ega ina vigaiyaiawa vivira me,

bo ina vokaukaua, gavia aubaina.

⁵ Ona nei Israel natunatu, BADA ana au ravilala au ivina tana babara.”

5

BADA ana grape wapuna welana.

¹ Ona rautanigana ma au nuavainana ana wela ana ravi.

Au nuavainana ana grape wapuna i paewi,

doa au maumaurana, ola au barana.

² I auni ma gaima i viopuni ma i gari

ma grape gorogorovai aiiai, avavai, i paewi.

Violağa numana i voai

ma nanare wine anigudana i bori au kira.

Anina ma i vipaipai da grape uena aiiai ita verei,

Wate grape anatapui i vigora.

³ Marina taumi Mai Jerusalem ma Mai Judah,

Tau ma au grape wapuna ona babiniei!

⁴ Aiwai gelauna ega ata kauei au wapu?

Anatapuna a kauana-paiei!

A notai da grape uena aiiai ita vereu wate viviğorai i vereu.

⁵ Marina ana riwem,

✧ 5:1: Mrk 12:1

wenanare ana kauēi au wapu awarina.
 Garina ana viairikarikai da ġamoġamo ina rui
 Ma wapuna ina ġara-viravirai.
 6 Ana voterei da modu ura gogoi ina vinelana
 ma eġa aiāi grape ina taraġadaġadari
 bo modu ina tuparaguragui.
 Modu ma donadona, wapuna ina puru-pai.
 Apau ana egari da eġa kampa garewa ina atuna.
 7 BADA Vivirewapana Kaukauana
 ana grape wapuna lamna, Israel
 ma grape ġorogorovana ae tuġuna e rerereġi
 lamna ana dam mai Judah,
 I notanotai da lawana aiaina ita maeni
 wate i 'nanai da tara i vitoini;
 kaua jijimanina ita nelaġai
 wate viġaiġaiawa gararai i nonori.

6

BADA Isaiah i ġorei da ina viperoveta.

1 Madeġana gulau Uziah i 'raġe, tau Bada a inanai. Tauna ana au anikiala, au aidamo telarana i kiakiala ma ana gara adana tempol i vioai.
 2 Au ririvana lamna Seraph ruaġa. Tagotagogi ava papei six; papena ruaġei naoi i purui, ruaġei aei i purui ma ruaġei, i lavelave.
 3 Ma tauiava i viġoreġore vivira;
 "Virivirem, vivivirem, vivivirem tam BADA, Vivirewapanana;
 Dobu anatapuna am boruma i oai."
 4 Ponai gugurana tempol tuatuaana i gui ma bau tempol i vioai.
 5 Ma a riwa, "Aio! A kauana-boai! Babani apoapoei gamou i vimiramirai, ma rava gamoi miramirai au poui a mamae, wate matauei gulau, Bada vivirewapana kaukauana a inanai."
 6 Ma seraph tagogi incense aniapuna au tepana ai moniana i kavini ma i lavenei awariu.
 7 Ma ai monianeġi gamou i vodadani ma i riwa, "Ma inanai, wei ipirim i vodadani; am apoapoe viminalana i vaitawaneġi ma am ġo'apoapoe i notatawaneġi."
 8 Anina ma BADA ponana a nonori i riwa i pa, "Aiāi ana paritawaneġi? Aiāi aubaita ina nae?"
 Ma a riwa a pa, "Tau weka. Ma paritawaneu!"

7

Immanuel ana mataira.

10 Muriāi, BADA, gulau Ahaz i riwana-melei i pa,
 11 "BADA am God ma vibaġai da mataira piripirina, doa au ipu dewadewana, irairraġei ai au animae bo mara au tepa dewadewana, ina viatataiem."
 12 Wate Ahaz i paribelei, "Tau eġa Bada ana vibaġai mataira aubaina. Eġa ata ġoei da Bada ana raudadani."
 13 Ma Isaiah i riwa i pa, "Gulau David ana epaepaia, ona rautaniġana kaua! Taumi ami orapoteġi rava orai o vivibadoi ma marina o ġoei da kauana tagogina ona kauēi Bada awarina bo?
 14 Lamna aubaina Bada ainelana mataira ina viatataiemġi: Matatapu ina duama ma tevera orotona ina ġuni ma ina viwawai Immanuel." Wei anona God tauta maiteni.

9

Awarita tevera i tupua

1 Tai i vivinu'apoapoe, ai vinuapoapoe ina kwa. Rorova dobu Zebulun ma dobu Naphtali i kwalai* ma i viminalamalai, wate muriāi dobuna ina viboruma-kauēi. Galili, jentail ai dobu, au boga Mediteranean ina vikareġi da maramataneġi ina nae da waira Jordan au baba ġelauna.

* 9:1: I pupuna-naieġi au Assyria i vipanipani

2 Taui waguwaguvareina taubabarai
 lalaina gaēgaena i 'nanai;
 Taui gimtona taumaenina†
 awarii lalalaina i lalai.
 3 Tam ai dam u vimaḡai
 ma ai nuaiai u viratai;
 am viturana i vinuaiaiei;
 me tuaruta au marana e vivinuaiai,
 me sorodia e vivinuaiai,
 maranai, ḡavia purapurai i tuarui, e ḡutaḡutai.

6 Aubaina, awarita tevera i tupua!
 Tevera orotona i vereta!
 Tauna ina vibada.
 Tauna ina ḡorei:
Tauvinuaterena Aiaii telarana, God Vivirewapanana;
Amata Maemae Nonoana; Nuauba Badana.
 7 Ana vigulau ma ana nuauba ina tua,
 eḡa damona ita mamae.
 Noina Gulau David ana au vigulau gabuna ina kiala,
 ma nuavainei ma jijimaninei ina vibada kauga;
 Ina mae-nonoa, marina da mara au damona.
 BADA VIVIVIREWAPANA KAUKAUANA
 ana nuavainei wei anatapuna ina kauiei!

11

David ana epaia

1 Me ai tuḡutuḡu ita nabinabi
 Mara e nenei maranai Jesse ana damei gulau ina nei.
 2 Ma BADA Aruana tauna au tepana ina rauei da:
 Nuaulaula ma aramana gaēgaena ina verei,
 ana oḡa tara aiaina ma tepa tora ina verei, da ana rava ina paina-kauiei.
 BADA ina aramane ma ina vivirei.
 3 Bada votelatelana, lamna ana nuaiai gaēgaena,
 ma eḡa kauga tepana inanana bo viarautu awarinei, ina kovoḡimi;
 4 Tauna molamolakai ina rauetarana-kauiei,
 ma vivinuapoapoe au dobu aubaii ina mairi.
 Ma gamona bolabolana dobu ina kovoḡi,
 ma ponanei ḡo'apoapoe ravai ina viraḡeni.
 5 Tauna kauga jijimanina ina vijiḡoratei
 ma patutu ina vitairoroiei.
 6 Nanare auou moduei sipu natuna maiteni ina mae,
 ma leopard gote ḡaubona au ririvana ina matave,
 nanare cow ma lion natunatui ina laba-tagogi;
 ma tevera ina viḡamoḡamo.
 7 Bulumakau ma bear ina am tagogi,
 natunatui ina matave tagogi,
 ma lion gidagida ina ani me bulumakau.
 8 Tevera daradarana mota ana au nibo ina vikalokalo
 Ee! Ma tevera edaedana mota aiara ana au nibo, urana ina tereḡairei.
 9 Au Zion, au ola vivivireina eḡa aiwai ina vikeroi bo ina viapoapoeni.
 Aubaina BADA aramanana
 dobu ina vioai, me waira boga e vivioai.
 10 Nai maranaina gulau vouna, Jesse ana damei,
 ina vomairi da ina vimataira dobu au ana tapuna.
 Dam gaēgaei anatapui ina deri ḡeta awarina, ana au animae boruborumana.

† 9:2: Iraḡe paratana

35

Etanai Vivivireina

- ¹ Mutulua ma dobu poipoina ina vinuiai,
doby dariḡaḡa ina vinuiai ma ina talai!
- ² Berana ina numoi,
ma ina vinuiai ma ina logologoi!
Inanana i vinualaulauna me Lebanon olai
ma ana maura me Carmel olana ma Sharon wapuna.
Kampa BADA ana boruma rava ina viatataiemi,
BADA ana vigulau ina inanai.
- ³ Ura vogarigarii ona vovaibagi,
ae tutu gwaḡagwaḡana ona vovaibagi;
- ⁴ Rava rovorovo! ona riwei,
“Eḡa ona rovo! Ona virewapana!
Ona inana! God ana mejina e nenei;
da ami ḡavia ina vipupui.”
- ⁵ Ma mata potapotai ina inana
ma taniḡa potapotai ina nonora
- ⁶ Gwaḡagwaḡai ina viauauepa me deer, ma gungum ana morelanai ina vigaragararei.
Waira au dobu dariḡaḡa ina wanaiwagi,
ma vuvura ina raupaipairei.
- ⁷ Doa paipairana ina vitopa
vuvura ina raupaipairei
au dobu dariḡaḡa,
modu ma gonu ina gogo labalababa auou moduei ana au animae.
- ⁸ Ma kampa etanai ḡaeḡaena e ḡoreḡorei *Etanai vivivireina*, ina mae.
Etanaina lamna tau! God ana babara e nenaeni, tau! ava aubai,
Rava orai miramirai eḡa ina babarani.
Bubu! weka eḡa ina babara dadana.*
- ⁹ Eḡa lion bo raviuru kampa ina babara.
Eḡa ḡamoḡamo ḡaiḡaiawai kampa ina mae
BADA rava i vivilawania,
tau! ava kampa ina babara.
- ¹⁰ BADA aiavoi i gimara-me!ei wenanare ina nememei
ana welawelai ina rui au Zion
Nuaiai maemaena ina vikunuteiei,
nuai! ma morelana ḡaeḡaena ina peu au tepai,
nuabola ma iniviara ina amoa.

40

God ana rava ina vinuauubai.

- ¹ Ami God e ririwa, “Au rava, ona vinuauubai!
Nuauba riwai ona riwei.”
- ² Riwa egolanei mai Jerusalem ona riwei
ona riwei da ai vinuapoapoe marana i kwa,
ai ḡo’apoapoe i nota-tawanei.
BADA ai ḡo’apoapoe i vimaiei mara ruaḡa.
- ³ ✧ Rava e viḡoreḡore;
“BADA ana aninae au mutulua ona vokaukauei!
Etanai jijimanina ata God aubaina au mutulua ona kauei.
- ⁴ Gwagwa ona dobo-naiei,
ma ola anatapai ona ḡara tawatawanei
doana anatapuna ona vimataveni,
ona ḡara-laboḡi.
- ⁵ BADA ana boruma ina vieḡai,
ma rava anatapai ina inanai.
Lamna BADA gamonei i riwai!”

* 35:8: Bo avena da ai nota i aburu, tau! eḡa ina kwako. ✧ 40:3: Mrk 1:3

⁹ Zion, tam pariverena aiaina e garagararei.

Ma gāe ola gāe gāena au tepana
ma ponam gāe gāenei,
pariverena aiaina ma raugugulei
ma e gā ma rovo!

Taon gāe gāei Judah au paratana ma parivere,
“Ami God e nenei!”

¹⁰ Ona inana BADA God ana rewapanana
e nenei da ina vibadeta.

Ona inanai! Maiana, lamna rava i vivilawania, maiteni e nenei.

¹¹ *Ana rava ina gāmoi me sipu taugāmoina,
ana sipu natunatui au nuanuana ina raparapai.
ma tatauvao ina ravena-kauei.

42

BADA ana taunola.

¹ *BADA i riwa,
“Wei au taunola, a vinei,
a vovaiwewapani ma a vinuāiaiei.

Aruau au orana a terei
ma tauna lawana aiaina, ma kaua jijimānii ina neiāi dobu au anātapuna.

² Tauna e gā ina garara
bo ponana ina rata au deba.

³ Rava me gonu barabarana e gā ina gai,
bo rava me wiki tupona e gā ina boi.
Wate lawana aiaina ma kaua jijimānii ina neiāi dobu anātapui awarii da ai lawana.

⁴ E gā orana ina peu bo ina vokokokara,
lawana jijimānina ina terei au dobu;
bonabona ravai aueia nanare, e vivipaipai.”

⁶ *Tau BADA jijimāniu, a vinem ma ana vovaiwewapanim da lawana aiaina ma neiāi;
ma ana raunimavoaim ma ana gagaloem.

Tamei, parivainuā gāna bagibagina rava anātapui au dobu maiteni ana kauei,
ma vilalalaina jentail awari.

⁷ Ma mata-potapotai matai ma vikalai;
ma ravai au panipani numana;
nai taui gimtona maemaēi ma tereopunei.”

49

BADA ana taunola

³ BADA i riweu i pa,
“Israel tam au taunola ma tamei au boruma ana vie gāi.”

⁵ Au manawa ma BADA i vineu da ana taunola;
da ana rava mai Israel kwakokwakoi ana neiāna-meleiai awarina.

BADA i vimaē gāe gāeni;
Tauna au rewapanana.

⁶ *I riweu “Au Taunola,
Jacob ana dam ma voepana-melei ma
mai Israel kwakokwakoi ma neiāna-meleiai; lamna nola aburuna.

Wate nola gāe gāena a revererem;
lalalaina ma naiei jentail awarii
ma lawana mamae-nonoana ma naiei da dobu au gia dewadewana ina gēta.”

¹⁴ Wate mai Jerusalem i riwa,
“BADA i netawaneta! Tauta nuanuana i vuru”

¹⁵ Ma Bada i paribelei,
“Moina! Tatauvao natuna melamelana au gū gūna, nuanuana ina vuru bo;

bo natuna i ġuniġunia nuanuana ina vuru
 Mepa da alo nuanuana ina vuru,
 wate tau, eġa nuanuau ina vuru!”
 16 Jerusalem eġa melanai nuanuau ina vuru
 Ona inanai! Wavami, au ura lalalappu a rurui.

50

BADA ana taunola patupatutuna.

4 BADA God i viararamaniu aiwai ana latoni,
 da ġokokokarai ma peupeui ana vovairewapani.
 Ubaubani patapatai e ravidagudaguii,
 ma taniġau a tonetonei da
 ana rautaniġanana ma ana viararamana kaua.
 5 BADA God aramana i vereu
 ma eġa ata pariġaiei bo ata mae-puputei.
 6 *Uporau a verei da i kwapu-kauei,
 ma a voterei da mutuorou i amui.
 Eġa naou ata govaġi maranai i vinimalamalaiu
 ma naou i ovai.
 7 Wate BADA God au muriu e maimairi,
 lamna aubaina eġa ita vitepaubaubaiu.
 A vokaukaua da ana nebelei,
 aramanei da eġa ina vinimalamalaiu.
 8 God au ririvau, ma ina vitaubabani aubaiu.
 Tauna ina riwemi da tau eġa aiwai ata kauana-boai.
 Ai ai ina viwavuii?
 Tana nae tana etara
 Au ġavia mepa, taumi ona nei?
 9 Anina BADA tauoina e gagaloei,
 Ai ai ina riwei da tau a kauana-boai?
 Tau anatapui ina gumaġa me gara wadubona.
 Komagana ina ambaubauni.

52

BADA ana vilawana e nenei

7 I ai ġaġa, taupariverena a inanai olei e taġotaġonai.
 Riwa Aiaina e jimejimej:
 nuauba ma nuaiaii riwai
 ma BADA ana vilawana.
Ma Zion i riwei, “Ami God e vivibada.”
 8 Ona rautaniġana! Ami tauvineneġana e vigaragararei;
 ana morelanai e logologoi;
 Tau mataiei BADA i 'nanai
 e nenememei au Zion.
 9 Jerusalem wanarrikarika,
 ana morelanami ona wela-gogona BADA awarina.
 Tauna ana rava i vinuaubai,
 ma ana melagaj Jerusalem, i vai-melei.
 10 Dobu anatapui au matai
 ana rewapana vivivireina e vivieġai.
 Rava anatapui au dobu
 BADA ana vilawana, ina inanai.

Taunola ana vinuapoapoe ma ana boruma.

13 BADA i riwa, “Au taunola ana nola ina kauana-kauei!
 Rava tauna ina voepai au tepa dewadewana.
 14 Au naona rava maġamaġai tauna i 'nanai

ma i virovorovoanei.

I vunu-kauei ma i vitaratarai;
da inanana eġa me rava.

¹⁵ Wate marina dobu patarai ina raviġori
ma gulagulau gamoi i pota tauna voepaepa aubaina.

Eġa ita pariverei,
marina mataiei ina inanai,
ma aiwai eġa ita nonori, ina aramanei.”

53

¹ “Aiai wei pariverenana ita vitumaġanei?
BADA aiai awarii ana rewapana i viatataiei?”

² God au matana, i rata me ai-nabina,
me aiwarama au kemara e gogogolana.
Eġa ita tupua karawata bo vigulauna,
eġa aiwaina vinualaulaunana da tata rauoġarei.

³ Ta inana geduaiei ma ta inana-tawanei,
iniviarra ma vinuapoapoe malana i vaia,
ta raugovaġei,
ta mae-puputei ma ta riwa da tauna rava labalababa.

⁴ Tauna, ata nuabola kovoġana i vaia
ma ata iniviarra i avarai.
Wate ta notai da
ana ġo'apoapoe aubaina, God i kovoġi.

⁵ Ata kua apoapoe aubaina i vitonei,
ata ġo'apoapoe aubaina i vikeroi.
Kovoġanei, nuauba i vereta;
kwapu keronei i vilawanita.
⁶ Anataputa me sipu kwakokwakona,
ana nuaita ma ata ġoanei ta mamae;
wate ata ġo'apoapoe kovoġana, BADA tauna i viavarai.

⁷ *Au taunola i rauiviapoapoelana-kauei,
wate i volaġota;
eġa aiwai ita latoni.
I taravaina-naiei virarġenana aubaina me sipu ġaubona.
Me sipu ana genugenuanana e nena aparabori aubaina eġa aiwai ita latoni.

⁸ I pani ma i naiei
ma eġa aiai tauna ita vinuabolei,
eġa ana epaepaia ma ina iraġe.
Ana lawana au pouna i kwa labalababa.
Ana rava oina ai ġo'apoapoe aubaina i'raġe.

⁹ Tauna eġa morumoruna bo ġaiġaiawana.
Wate tau i ġoei da danedanei maiteni ita doboi,
ma purapura ravana ana au kokoaġa i vimataveni.

¹⁰ Maranai ana lawana i puloei ata ġo'apoapoe aubaina.
Lamna, BADA ana ġoana da tauna ita vunu-boai ma iniviarra ġaeġaena ita vaia.
Ma ana epaepaia ina maġa guratana
ma ana lawana ina manawa.
Ma taunei, BADA ana ġoana ina kauana-paiei.

¹¹ Ana nola anona ina inanai ma ina vinuiaiei
da ana nuabola eġa kwakwavina.
Bada i riwa, “Au taunola patupatutuna a vinuiaiei,
rava maġamaġagau ai kovoga i avarai
ma lamnei tau ana ġorei Rava-Jjimanii.

¹² *Ma lamna aubaina ana vimaġaeġaeni, tauna rava ġaeġaena.
Ma ana au gabu ana terei
rava ġaeġaei ma virewapanai maiteni
ma ana maia ina ġutai.

Aubaina ana nuaina ana lawana i verenei.
 Tauna ora-potapotai maiteni i'rage,
 ma ġo'apoapoe ravai maġamaġaui aubai i mairi."

54

BADA ana nuavaina Zion aubaina.

⁴ Eġa ona rovo aubaina eġa ina vitepa-ubaubaimi.
 Tepami ina tora, eġa ina vinimalamalaimi.

Ami laraga kauai nunuami ina vuru.
 Ami vikaibababa nuabolana ina amoa.

⁵ Aubaina, taukauem lamna awam,
 wavana BADA Vivirewapana Kaukauana.
Israel ana God Vivivireina am taugimaramelana,
 Tauna dobu anata-puna ai God.

⁶ Israel, tam me wavine tavine vouvou
 ma awam i geduaiem ma u vinuabola kaua.

Wate BADA ina ġore-melem awarina ma ina pa,

⁷ "A voterem mara aburuna,
 wate raunuapoapoe ġaegaeinei ana vaimelem.

⁸ Au meji i rata kaua da a mae-puputem mara aburuna.
 Wate au nuavaina mamae-nonoanei,
 ana raunuapoapoelem."

BADA taugimaramelana i riwa me,

⁹ ✠ "Awariu, wei me Noah ana au mara,
 maranai parivainuaġana bagibagina a kauei
 da eġa melanai wairei dobu ana purui-melei.
 Marina, nanare parivainuaġana bagibaginei a ririwem
 da eġa melana amlou ina ġaiġai da ana kovoġimi.

¹⁰ Ola ina vidagu
 ma ina amoa.

Wate, au nuavaina mamae-nonoana,
 ma au nuauba mamae-nonoana tam awarimi ina mae-nonoa."
 BADA tauraunu'apoapoelemi i riwa.

55

Nuarelanami ona nei

BADA i riwa i pa,

¹ "Ona nei, nuanuarelanami! Waira wei!
 Awarimi mane eġa ona nei ona gimara ma ona am!

Ona nei, wine ma mereki ona gimarai
 maiana eġa, ona vaioi.

² Aiwai aubaina lam apoapoei awari mane e tawatawanei.
 Aiwai aubaina e nolanola labalababa.

Ona rautaniġana kaua ma ona am-iaua,
 ma lam aiaii dagidagiaii ona vinuaiaiei.

³ ✠ Taniġami ona toneiai ma ona nei awariu
 ona rautaniġana da ona lawana.

Au parivainuaġana mamae-nonoana ana kauei tam maiteni.
 Ma viaiaina David a parivainuaġani ana verem."

⁶ "BADA ona baiei da ona nelaġai,
 marina au ġereġeremi, ona vibaġai.

⁷ Goa apoapoe ravai, ami lawana apoapoei ona geduaiem
 ma nuanuami ona virai.

Ee! Ma ona wanavirai BADA awarina da ina raunu'apoapoelemi
 ma ami ġo'apoapoe ina notatawanei."

- ⁸ BADA i riwa, “Au nota eġa me ami nota nanare,
ma au kauga tapuna, eġa ami kauga nanare.”
- ⁹ Mara i ġetelara eġa me dobu
ma nanare au kauga i ġetera eġa me ami kauga.
Ma nanare au nota i ġetelara eġa me ami nota nanare.
- ¹⁰ Garewa ma turuvani marei e peupeu
eġa kwakwawina ina naeme au mara,
wate dobu ina viutuvanei
da lam ina gogo,
da pei ina vereta, paewa aubaina
ma lam, aniam.
- ¹¹ Ma wenanare riwau gamouei e opuopu;
eġa kwakwawina ina nememei awariu
da aiwai a pariparitawanei ina kauei;
au ġoana anatawina ina vikwai.

56

Lawana rava anatawini aubai

¹ BADA wei e ririwei:

“Aburuna awa, ana nei da ana wilawanimi
ma au viaiawina ana wieġai.

Lamna aubaina, kauga aiwini
ma jiwimawini ona kaukauei.”

⁶ “Mai jentail, aiwini da tau i witalawani
ma i witalawani, ma wawau
i witalawani ma i wimalawani.
Au Sabate i witalawani,
ma au witalawani bagibagina e witalawani-kauei.

⁷ *Tau awa nei awa i witalawani - Zion
ma awa awa awa witalawani.
Ma awa pulo e awa awa awa awa witalawani.
Awawina ma rava, awa witalawani ina witalawani witalawani,
witalawani anatawini awa awa awa.”

58

Uji witalawani awawina.

BADA uji witalawani awawina e witalawani:

⁷ “Am-witalawani lam awa witalawani,
ma awa awa awa witalawani,
witalawani ma witalawani awawini.

Kowakowawini gara awa witalawani,
ma witalawani eġa awa witalawani.”

⁸ “Marawawini, awa witalawani ina witalawani me witalawani witalawani,
ma awa witalawani witalawani awa witalawani.

Awa witalawani awa awa awa witalawani awa witalawani,
ma witalawani, awa witalawani ina witalawani.

⁹ Nai marawawini awa witalawani ma TAU BADA, awa witalawani.
Awa awa witalawani ma awa witalawani, “Tau witalawani.”

“Eġa rava, witalawani awa witalawani, eġa awa witalawani
ma eġa witalawani witalawani awa witalawani.

¹⁰ Marawawini am-witalawani o witalawani,
witalawani o witalawani.

Lamwini, awa witalawani witalawani ina witalawani,

ina ravilalai me aubenai madeḡana.”

61

Riwana Aiaina molamolakai aubai

BADA ana taunola e ririwa:

¹“BADA God, aruana i vereu.

I vineu ma i paritawaneu da:

Riwana Aiaina ata naiei molamolakai awari
ma vinuanuabolai ana vinuabai.

Ma panipani ana parivereu da deriei ina viopuni.

²I paritawaneu da rava ata parivereu,
da mara i turiai maranai BADA ana rava ina vilawani
ma ana ḡavia ina kovoḡi.

Ma i paritawaneu da vinuabolai ana vinuabai.

³Da tauu e mogumogu au ola Zion,
nuaiiai ina vikunuteiei ma eḡa ina vidolodolo.
Nuaiaia logologona ma eḡa tou.

Tauu ina vinuiaiiai ma eḡa ina vinuabola.

Ai kaua jijimanina aubaina ina ḡorei BADA ana labarava ai jijimanina
da tauna ina vimaēḡaēḡaeni.”

⁶“Ma taumi ina ḡoremi BADA ana pirisi.
Ina ḡoremi, God ana taunola.

Taumi dobu ḡelau ai maura ona ani
ma ona vigulagulauei.”

BADA i riwa

⁸“Aubaina Tau, kaua aiiai a ḡoeḡoei,
danene ma ḡo’apoapoe a gedugeduaiei.

Au rava ai vinuapoapoe aubaina ana vimaiana-kauei;
au parivainuaḡana bagibagina mamae-nonoana maiteni ana kauei.

⁹Dam anatapuu, am epaepaia ina aramanei
ma e inainana ḡaei.”

Ma ina pa,
“BADA i viaiaina-kauei.”

Zion i riwa

¹⁰BADA awarina a vivinuaiiai kaua
ma Aruu God awarina i vinuiaiiai kaua.

Aubaina vilawana garanei i vigaraiu
Ma jijimana vianei ma garanei i vioteniu.

Me tavitavinevou orotona e vivigarai nanare bo
me wavine tavitavinevou ana viana e tavitavine.

¹¹Me doa, pei e vivigogoi ma debagau lam e verevereta,
nanare BADA God, rava e teretere-vaijijimani
au dobu da tauna ina voepaepae.

64

Pari agu aubaina

⁴Oo Bada wariḡa da marina, eḡa aiiai god ḡelau ponana ita nonori, ita inanai, bo ita aramana
dadanei.

Anina Tam ainelam.

Tauu da e vivipaipaiem e vovoagui.

⁵Tam kaua aiiai ravai e vovoagui,
am tarawatu e vovojijini.

Wate maranai ta ḡo’apoapoe ḡiriḡiri
tam amlom e voḡaiḡai.

Aiwai aubaina ma vilawaniai?

⁶Anatapuiiai a ḡo’apoapoe,
Au matam, ai kaua jijimanii anatapuu miramirai me gara wadubona.

Anataputa ta poipoi me ai-rugurugu,

Ata ġo'apoapoe e kapupuana-naieta.

⁷ Ma eġa aiai wavam ita voepaepai

bo ita voguratei da naom ita inanai.

Lamna aubaina tam u netawanelai

da ai ġo'apoapoei e vunuvunuiiai.

⁸ Wate BADA, tam amaiai.

Tauai dogodogo ma tam nau tauvoaina.

Tam anatapuiai uramei u raugarogaroelai.

⁹ Lamna aubaina, eġa ma meji guratana awariai.

Ma eġa ai ġo'apoapoe ma nota-nonoei.

Ma i 'nanaiai, anatapuiai tam natunatum.

Peroveta Jeremiah ana buka

Pariverena

Jeremiah lamna peroveta wavana naenaena au Jerusalem, ma BADA riwana i raugugulei ana rava awari. Tauna riwa bagibaginei ana rava i ririwei menanare God tui ina kovoḡanei, aubaina Tauna i mae-puputei ma god ḡelau i votaḡotaḡoi.

Bada Jeremiah i ḡorei

⁴ BADA i riweu i pa:

⁵ “A vinem, muriai da alom au manawana a teretagogiem.

Muriai da uta tupua, A tereriem,
rava anatapui ai peroveta.”

⁶ A paribelei, “Oo BADA God, tau tevera ota, ma babani eḡa ata aramanei.”

⁷ BADA i riweu, “Eḡa ma riwa, ‘Tau tevera ota.’ Ma nae mepa a pariparitanem, ma aiwai a ririwem tau i ma pariveri.

⁸ Eḡa ma rovoei aubaina Tau a paritawanem. Tau tam maiteni ana mae da ana gagaloem. Tau BADA a babani.”

⁹ Anina ma BADA urana i viloloi da ipiriu i tapedadani ma i riweu,

“Marina riwau au gamom a terei.

¹⁰ Ma aramana-kauei da marina rewapana a vereverem,
da dobu anatapui ai gulagulai ai kovoḡa ma vinolenolei wenanare,
Ḡelau ma orumi, ma viairikarikai,

ma vovaiubai ma vipupui.

Ḡelau ma voepai ma ma paewi.”

¹⁷ “Ma vokaukua Jeremiah! Ma vomairi ma aiwai anatapuna a riwem ravai ma pariveri.

Eḡa ravai ma rovoei, bo au matai, ana virovoim.

¹⁸ Amadodo a vovaiwewapanim me

melagai vivirewapanana, tuatuaana ma garina iramei voavoana. Tam ma mairi
ma eḡa maiJudah ma ai gulagulai, ai gabemani ravai, ai pirisi ma dobuna ravai
ina tereḡairem.

¹⁹ Tau i ina viḡaviem wate ina kauana-avei.

Aubaina tau tam maiteni, ma ana gagaloem. Tau BADA a babani!”

6

Bada i riwa,

¹³ “Rava anatapui, ḡaeḡaei da muomuoi,
e ḡoeḡoei da moruei mane ina kauei;
peroveta da pirisi anatapui nanare
rava e morumorui.

¹⁴ Tau i, au rava keroi ḡaeḡaei
e bunabunamai apamina me kero aburuna.

E ririwa da aiwai anatapuna anina,

Wate eḡa anina!”

17

BADA ona-vitumaḡanei

⁵ BADA e ririwa,

“Aiavoi da ai vitumaḡana rava ota awarii e tereterei,
ma ai rewapana e vitumatumaḡaneiei;

ma e gedugeduaieu,
ana parivaipoapoeni.

⁶ Tau i me, ai podapodai au dobu dariḡaḡa
eḡa aiwai aiaina ita inainanai.

Taui dobu au paipairana ina mae, ai ma modu eġa,
me au dobu au vivibogana ita mamae kampa eġa rava ita mamae.”

7 “Wate aiavoi awariu e vivipatutu ma e vivitumaġana da

BADA ai tepamairi, tau i ana viaiaini.

8 ✠ Tau i me ai, vuvura au adana i paewi,
ma warami i ġaira waira au orana.

Eġa marapoi ina rovoei,
ma rugurugui majimajigai ina maimairi.

Ma marapoi ana au mara,
eġa ua ita vovoterei.”

9 “Rava nuapoui lamna morumoru kauana, i apoapoe kaua,
ai ai i aramana-kauei, da ina vilawani.

10 Tau BADA rava nuapouii
a tuvirevirei ma kaua govagovaġai au orai a inana-pai.

Rava anatapui ai kaua ana inana,
ma ai kaua awarinei ana puloi.”

20

Jeremiah ana beura

BADA i riwa,

5 Tau, Jerusalem ma ai mane ma ai maura ma aiwai anatapui polapolai i toitoiei
ana veredamanei ai ġavia awarii. Ina nei ma Judah, ai gulagulau ai purapura mai ai ġaegaei
maiteni ina pupuna-naiei au Babilon.

Jeremiah i riwa,

7 Oo BADA! u gwala-kaueu da a viperoveta
ma a voterem da u kauei.

Tam u virewapana guratana da
u tereġairei.

Marina tau rava ai anivinama.
Rava anatapui e vivinameu, marai ma waguvarai.

8 Maranai a paripariverena,
Riwa ana nuaii e rubaruba-opu.

“Viġaiġaiawa! Pupu e nenei!”

BADA ana pariverena aubaina, vinama ava a nenelaġai.

9 Mepa da ana geduai ma wavana eġa ana latoni bo wavanei ana jima
Lamna maranaina riwam lamna me ai araratana,

orau e ararai.
Amapo eġa ana vojijina-guratei. Amapo eġa!

10 A nonori patara e viviarautueu.

Au ġavia i maġa kaua,
ma e vineneġaneu da ana neboa,

ma ina viwavuii ina pa,
“mepa da i jima boa, ina waro-melei ma tauta ata biwa tana vaia.”

11 Wate BADA tau maiteni
me tauviġavia vivirewapana kaukauana.

Lamna aubaina au ġavia eġa ina tereġaireu.

Tau i ina vunu-aveu ma ina vinimala kaua.

Ina vinimalana-nonoei ma eġa nuanuai ina vuru.

12 “Oo BADA Vivirewapanam! Tam rava jijimani i e raraudadani,
ma ai nota ma orai e araramanei.

Au vita au uram a terei
ma ana inanaim, au ġavia ma kovogġi.

13 Ona wela BADA awarina.

Ona voepaepai.

Maranai Rava vivirewapanai, gwaġgawaġai e rarau-iviapoapoelei,
lamna BADA ana rewapanai tau i ina gagaloiei.”

23

BADA Gulau vouna ina vinei mamae-terenai aubaii

¹ BADA e ririwa, “Au rava ai babada nuabola gægaena ina nelaḡai! Tau i sipu taupaini apoapoei. I vipaipai-boa da sipu i vidabararai.”

² Lamna aubaina BADA, Israel ana God, wenanare Israel babadai awari e ririwa, “Taumi ami kauelai au sipu o vidabararai ma o vilamolamonei. Eḡa ota vipaipai kaua. Lamna kauai apoapoei aubaina ana kovogimi.

³ Anina ma Tau au sipu ḡelau i virubai au dobuḡela, ana neiana-meleiai ai au gari. Wei mamae-terenai ina vinatuna ma ina maḡa guratana.

⁴ Taupainii rava kaua ana tere-naiei da ina viḡamoḡamo kaua ma eḡa ina rovo me bo orai ina sisi. Eḡa tagogi ina kwako. Tau BADA a riwa.”

⁵ ♠BADA e ririwa

“Mara vouna e nenei maranai gulau ana terei David ana damei.

Wei gulauna ina vibada kaua ma kaua aiainei ma jijimaninei dobu anapapuna ina vibadei.

Nota aiainei Judah ravai ina rauetaraveni ma

Israel ravai au nuaua ina mae.

⁶ Wei maranaina mai Judah, ina vilawani

ma Israel ana nuauabai ina mae.

Ma wavana ina ḡorei, BADA Tauterevaujijimanita.”

31

BADA Israel ina vaimelai.

⁷ BADA i riwa:

“Ana nuaiami ona wela Jacob ana dam aubaina

ponami ona voepai dam viḡulauna aubaii.

Ona voepaepa, ona jima ma ona riwa,

‘God, am rava mai Israel mamae-terenai ma vilawani!’

⁸ Au kariwabuei au rava ana neiana-meleiai,

dobu au giana da au giana anapapui.

Maiteni mata-potapota ma sigesigei,

duaduamai ma tautauvaoui.

Dam patara gægaena ina nememei.

⁹ Ana rupenai ma ana toutoui agu aubaina,

ana neiana-meleiai

Waira adanei ana taravainiai,

etanai abuabunei da eḡa ina peu.

Tau Israel amana,

Ephraim au natuevou.”

Parivainuaḡana bagibagina vouna.

³¹ ♠BADA e ririwa i pa, “Mara e nenei maranai parivainuaḡana bagibagina vouna ana kauai mai Israel ma Judah maiteni.

³² Wei lamna eḡa me noinoi maiteni a kauai nanare; maranai a raunimavoai ma Egyptei a taravaina-opunei. Aubaina au parivainuaḡana i viaigai avena da nuauai a vaia me oroto awana nuauana e vaivaia.

³³ Wei parivainuaḡanana mai Israel maiteni ana kauai nai marana au murina.” BADA e ririwa, “Au tarawatu ai au nota ana terei ma au nuauai ana girumi. Wei ina terekauei da Tau ai God ma tau i rava.

³⁴ Ma eḡa ai rava ina viararamana-melei bo riwa vivira, ‘BADA ona aramanei!’ Aubaina au aburuna da au magurina anapapui ina aramaneu. Tau ai ḡo’apoapoe ana nota-tawanei ma eḡa ana nota-melei.” BADA e ririwa.

33

Nuaua parivai-nuaḡanana

¹⁴ ✧ BADA i riwa, “Mara e nenei maranai au parivainuaḡana bagibagina mai Israel ma mai Judah maiteni a kaukaueia anona ina tupua.

¹⁵ Nai maranaina,
 rava kava David ana damei ina nei;
 Ma Tauna kava aiiai ma jijimanii ina kauei au dobu.

¹⁶ Nai au marana
 Judah ina vilawani ma
Jerusalem ana nuubana ina mae.

Wei melagaina ina ḡorei, *BADA Tauterevaujijimanita.*”

38

Jeremiah waira dogona au orana.

⁴ Babadai, gulau Zedekiah i riwei, “Wei ravanana Jeremiah tana viraḡeni. Ana babaniei, sorodia ruaḡauta lawalawai ma rava ḡelau e viviorabadoi. Tauna eḡa rava ita vovoagui wate e viviorabadoi.”

⁵ Gulau i paribelei, “Tauna au urami, ami ḡoana nanare ona kauei. Tau eḡa ana viḡaemi.”

⁶ Ma Jeremiah i vaia ma i tere-ḡairei gulau natuna Malkijah, ana au dogo, wei lamna gulau ana sorodia ai au potuma au ririvana. Ma ḡuravei Jeremiah i tere-ḡairei au * dogo. Au orana dogodogo ava, ma Jeremiah i monu ḡaira da i mairi dogodogo orana.

✧ 33:14: Jer 23:5-6

* 38:6: Wei lamna wapaketa dogona, viutuvana aubaina.

Lamentation Mogu Jerusalem aubaina

Pariverena

Wei bukana e ririweta da au 586 B. C mai Israel i vinuapoapoe kaua maranai ai ġavia i nei da Jerusalem i pupuni ma rava ma purapura aiaii i vaia da i naiei. Tauta eġa tata aramana-kauai aiaii wei bukana i girumi wate rava ġelau i notanotai da augunai Jeremiah wei bukana i girumi.

Jerusalem ana nuabola

¹ Kapore! Zion wariġa am patara i rata ġaġa, marina u kwakwava.

Dam patarai ai voepaepa, marina i vikaibaba.

Wariġa dobuġela gulagulau i voepaepa. Tauna i 'nana ġaei.

Marina i vitaunola.

² E toutou maratou,

jirigwegwena au navanavana e toitoi.

Ana nuavainana maġamaġau i ruba-tomana, eġa aiaii da ina vinuabai.

Ana rava* anatapui i mae-puputei ma i viġavieii.

³ Judah i pani ma i pupuna-naiei.

Au dobu ġela i vivipanipani,

e rarau-iviapoapoelei,

i vitaomana au dobuġela.

Ġavia i mae-kwaviviroi,

menanare ina onaganeii?

⁴ Zion etanaina e mogumogu

eġa aiaii kampa ita nenaie torela aubaina.

Ana anirui i kwakwava,

Pirisi e gunugunura,

ana guguini e vivitouana;

Nuapouna i wanagwadgwadai.

⁵ Ana ġavia i vibada,

au urai e mamae.

BADA nuabola gaġaena i neiaii Zion awarina

aubaina ai ġo'apoapoe i rata.

Natunatui i paninaieii aueia, ai ġavia au mataii.

⁶ Kapore wariġa Zion na!

Wavana naenaena, vidualaulaunana marina mepa?

Marina, Zion ana babada lamna me

deer, nuanuai i arelei ma i raumolaġau ma lam i baiana-avei.

Inina i garigari

ma eġa tagotagogina da ai ġavia ina rubatawanei.

⁷ Zion i kwakwava, ravana eġa.

Ana maura, wadubona e vinuanotenotei.

Maranai ana rava i peu ai ġavia au urai, eġa aiaii ita nei da ita rauagui.

Ana ġavia Zion ana peu i 'nanai ma i vinamei.

3

¹⁹ BADA, A tenam nae, eġa matave kaua, iniviara maiteni,

a vinuapoapoe kaua, notana i viġora kaua.

²⁰ A notanota-maelei

ma au orau a toutou.

* **1:2:** Ana eririam lamna wapu god Baal ma Aserah ma mai Judah maġamaġau wei god i voepaepai. Ana rava lamna tauviġavia mai Egypt ma nanare maiteni i viturana ma maranai ġavia i ġetai taui i viruberubei.

21 Wate BADA a vinua-notenotei ma orau e vovovairewapani. Lamnei a vitumaḡana:

22 da BADA ana nuavaina mamae-nonoana.

Ma ana raunuapopoe eḡa ina kwa.

23 Ubaubanoi, e raviravivouni;

am vipatutu i rata kaua.

24 A ririwana-meleu, BADA au buderi lamna a vivitumaḡanem.

25 Tau daBADA e vivitumaḡanei ma e baibaiei, ina viaiaini.

26 I ai da tana volaḡota ma BADA tana paini da ina vilawanita.

27 I aii da vilamolamona ma nola ma aramanei. Am au vilaraga,

28 maranai BADA e viviaramanita,

ma mae genuatau.

29 Tana mae-ḡaira au debidebi,

mepa da agu ina nei.

30 Navanavami ona verei da ina ravi, ma ina vijiboḡimi.

Wate eḡa ona vobelei aubaina.

31 Bada eḡa ina geduaiana-nonoeta.

32 Avena da maraḡela nuabola e neineiiai, wate ana raunua apopoe i rata kaua.

Aubaina ana nuavaina i rata kaua, eḡa damona.

33 Wate wei kauai eḡa ita vinuaiaiei.

Peroveta Ezekiel ana buka

Pariverena

Ezekiel mai Jew au Babilon i vipanipani awari i babani. Tauna mara nonoa vivirarautua vinualaulaunai ma awanainei ana babani i tereterei.

Tauna rava ai riwa vouna i verei da ina vipaipai ma ai bada ina terepa-melei.

God mai Israel dobu au gia dewadewana anatapui ina neiana-meleiana da ai au dobu oina ina terei.

2

God Ezekiel i vinei ana peroveta

¹ Bada ana boruma a inanai ma au doa a peu. Ma a nonori pona i riweu, i pa, “Rava ota natuna, ma vomairi ma awarim ana babani.”

² I bababani ma God aruana au orau i rui ma i voepaiu ma a nonori awariu i bababani.

³ I riwa, “Rava ota natuna, a pariparitawanem dam paripariviravirai mai Israel awarii. Amamai maiteni eġa ita voteleteleu ma awariu i pariviravira da marina.

⁴ Rava paripariviravirai ma orai badobadoi ma eġa ita vivivireu. A pariparitawanem da ma riwei, ‘Wei Bada riwana.’

⁵ Taiu paripariviravirai ma ina rautaniġanem bo eġa lamna avena, wate ina aramanei da peroveta i ġetai awarii.”

17

God Israel ina ravivouni

²² Bada God wenanare i riwa, “Tau ai cedar manamanaina nuanuana ana vogai da ana paewi. Raġana au tepadewadewana nabina ana gai da ola manamanaina au tepana ana paewi.

²³ Israel ola au tepai ana paewi, ina raġai ma ina raunumo, ai gulauna. Kiu tapuna ma tapuna au raġai ina raunoġi ma au ġoui ina viġou.

²⁴ Ai anatapui nai au dobuna ina aramanei da tau BADA, ai manamanaii ana taragai ma ai tupotupoi ana voepai. Ma ai majimajigana ana vipoini ma ai poina ina raurugu ma ina rata, Tau BADA a babani, ma aiwai a riwei nanare ana kauai.”

33

God Ezekiel i vinei da tauvineneġana.

BADA i riwa:

⁷ “Rava ota natuna, Tau a vinem tauvineneġana dam Israel aubai; riwa a vereverem ma nonori ma babani bagibaginei ma riwei.

⁸ Maranai ġo’apoapoe ravana a ririwei, ‘Tam, ġo’apoapoe ravana, amapo ma i ‘raġe.’ Ma ravana eġa uta parivere da ana ġo’apoapoe ita voterei, ma ina iraġe. Marina ana iraġe au uram a tereterei.

⁹ Wate mepa da ġo’apoapoe ravana u riwei da ana lawana ita virai ma eġa ana lawana ita virai, ana ġoa apoe ina iraġelei, ma tam am lawana ina mae.”

34

BADA tauvipaipai aiaina

¹¹ Bada God wenanare e ririwa, “Tau ainelau au sipu ana baiei ma ana ġamoi.

¹² Sipu taupainina, ana sipu kwakokwakoi e baibaiei da e nenemeleiai. Nanare tau, au sipu e kwakokwako-nae. Ana nelaġai ma ana neiana-meleiai, maranaina dobu i waguwarei ma i gimtonei.*

¹⁵ —Tau ainelau au sipu ana ġamoi ma ana terei da ina matave kaua, Tau BADA God a babani.

* **34:12:** Wei lamna awanaina maranai mai Babilon Israel ina pupuna-naiei au 587 B.C.

¹⁶ Tau kwakokwakoi ma nelabalabapai ana baiei, ma ana neiana-meleiai. Ma keroi ana bunamai ma gōkokokarai ana vovaiwewapani. Wate dododoi ma viwewapanai ana pupuni. Jijimaninei au sipu ana gāmoi.

¹⁷ — Taumi au sipu Tau BADA God a ririwana-kauemi da taumi tagotagōgi ava ana rauetaremi. Aiaii ma apoapoei ana vilamonei, sipu ma gote ana vilamonei.”

36

BADA ana rava ina ravivouni

¹⁶ BADA i riweu, i pa,

¹⁷ “Rava ota natuna, maranai Israel ai au dobu i mamae, tau i ai kaua apoapoei ai dobu i vimirai. Tau au matau lamna i vimira-melei me wavine ana nawaravi e vaivaia.

¹⁸ Marina, au meji ana iwāga-tawanei awarii aubaina tau i tara i vitoini au dobu, ma nanare kokoitauēi dobu i viapoapoeni.

¹⁹ A vidabararai ma a vilamolamonei au dobu gela, ai gō’apoapoei ma ai kaua awariei a kovoḡi.

²⁰ Wate metauna au dobuna i rui tau i wavau vivivireina i vijiboḡi, aubaina nai dobuna ravai e ririwa, ‘Wei lamna BADA ana rava wate ana dobu i opu-tawanei.’

²¹ A gōei da au rava au wava vivivireina ita vimaegaeḡaeni, wate noi rava mai Israel dobu anatapui i naeni ma i vitepaubaubai.

²² — Lamna aubaina, marina dam Israel ma parivere, Bada God wei i riwei, ‘Tau a neineiana-meleiaimi, eḡa tam am kaua aiaina aubaina. Tau a kaukaiēi wavau vivivireina aubaina, taumi wavau o viapoapoeni-naiei jentail ai au dobu.

²³ Ana viatataemi da wavau, ḡetelarana ma vivivireina. Wavau taumi dobu au anatapuna o vitepaubaubai. Taumie i dobu ana viatataei da tau vivivireu

²⁴ aubaina dobudobuai ana taravainimi ma ana neiana-meleiaimi ami au dobu.’

²⁵ — Wairei ana vitoaimi da ona aii, ami mira ma kokoitau viborumai mirana ina oḡa-tawanei.

²⁶ Ma nuanuami vouna, ma aruami vouna ana veremi. Nuanuami badobadoi ana votawanei ma aiaina ana terei.

²⁷ Ma Aruau au oram ana terei da au tarawatu ma au viaramana ona vogaḡoḡoi.”

37

BADA gelama ina ravivouni

¹ BADA i raunimavoaiu ma aruanei i naie u da gwagwa ḡaeḡaena au pouna i tere u, rava gelamii gwagwanana i oai.

² Gwagwanana a naeni ma a inana i gelama i maḡa guratana ma i poi.

³ I paridadaneu, “Rava ota natuna, amapo wei gelamii ina virava me bo eḡa?” A paribelei, “Oo! Bada God, tam ainelam u aramanei.”

⁴ Ma i riweu, “Riwauei gelama ma riwei, ‘Gelama poi, BADA riwana ona nonori.’

⁵ Bada God wenanare gelama i riwei, “Lavutu au orami ana terei ma ona lawana me!

⁶ Vioa ma warowaro ana veremi, ma opi da gelama ina purui. Ma lavutu ana veremi da ma lawana. Kampa ma aramanei da Tau BADA.”

⁷ I ririweu nanare a babani, a vikarei da a babani ma dobuna ura ketarana i nae da dobuna i oai, gelama anatapui i vitagōgiei.

⁸ A inainana ma warowaro ma vioa gelama au tepana i ampasi ma au tepai opi i tupua da i purui, wate awari eḡa lavutu.

⁹ Ma i riweu i pa, “Rava ota natuna, Bada God riwanei ive ma riwei, ‘Bada God e ririwa, ive meiei da meiei e uveuvena, au orami lavutu ina opui ma taubeu patarai e matamatave ona uveni da ina lawana me.’”

¹⁰ Ma i ririweu nanare a babani, ma lavutu ravai tupuai i ruini. Anatapui i lawana ma i mairi sorodia boruna ḡaeḡaena.

¹¹ I riwa me, “Rava ota natuna, mai Israel lamna me wei gelamii. Tau i ririwa i pa, ‘Tauta gelama poi ava ma ata tumaḡana i kwa, ata dam i kwa.’

¹² Lamna aubaina ma riwana-melei, Bada God wenanare e ririwa, ‘Ona inana! Ami kokoaga ana votawanei ma ana voepaemi ma ana neiana-meleiaimi au Israel.’

¹³ Au rava! Maranai wei i tupua, ona aramanei da Tau BADA.

¹⁴ Ma Aruau au orami ana terei ma ona lawana ma ana neiana-meleiaimi ami au dobu oina. Maranaina, ona aramanei da Tau BADA. Ee! A ririweia; ana kauēi.”

Peroveta Daniel ana buka

Pariverena

Daniel tauna laraga maranaina i naiei au Babilon da i vipanipani. Ma maranai i vomagura tauna i terei da gabemani ai bada gae gaena. Tauna ana au lawana i vipatutu ma God i votetelele.

Ana vipatutu awarinei God nuaulaula i verei, ma tauna tagotagogina da rava ai rauboni anona ina viegai ma kaua aiwai amapo ina tupua e viegai.

7

Daniel ana rauboni

¹³ *Waguvarai inana a inanai, ma kaua aiwai a inanai me Rava Natuna apau oraninei i nenei, ma i taravaina-naiei MAEMAE NONOANA awarina.

¹⁴ MAEMAE NONOANA vibadana ma rewapana ma vimaegae gaena, tauna i verei da ina vibada, da dam anapui ma dobu anapui ai ponei ina voepapai ma ina voteletele. Ma ana rewapana ina mae-nonoa, ma ana vigulau vibadana ega ina kwa.

12

Mara au damona

¹ *Ma nai maranaina anela vivirewapanana Michael, Israel ana taugagalo, ina ega. Amapo nuabola gae gaen otana ina nei, ega melana nanare tata inainanai, au karena da marina. Wate wei au marana rava aiavo da wavai au buka i girugirumia ina lawana.

² Magama gaudi irairagei ina vomairi me, ma ina nae, gelau au lawana maemae nonana ma gelau vinimala maemae-nonoana.

³ Rava nuaulaulau ina lalai me mara made gana. Ma tau magama gaudi e raveraveni da lawana jijimanii e maemaeni, ina lalai me ubona.

Peroveta Hosea ana buka

Pariverena

Hosea God ana peroveta, tauna mai Israel awari God riwana i jimei. God i riwa da tau ina kovoḡi ma ai dam ina pupuni aubaina tau tauna i geduaiei ma god morumorui i voepaepai ma ai kaua apoapoe i vogaḡotaḡoi.

Hosea awana tauna i voterei ma nelara ḡelau maiteni i nena. Wate tauna awana nuanuana i vaini ma i baiei ma i taravaina-meleiai ana au numa. Wei bukana e viviatataieta da nanare tagogina avena da mai Israel ai God i geduaiei tauna anina da tau nuanuai i vaia ma i parivainuaḡana da tau ina neiana-meleiai awarina.

11

God, Israel nuanuana i vaia

¹Bada Hosea i riwei, i pa, “Maranai Israel ana au vitevera, a vinuavainei ma Egyptei a ḡore-opunei.

²Wate a viḡoreḡore

ma tauna amapo da i nenetawaneu.

Tauna ana pulo i apuapui Baal awarina,

ma daji ḡabuḡabui, i apuapui kokoitau ḡelau awarii.”

Peroveta Amos ana buka

Pariverena

Amos taon au aburuna i mae Bethlehem au ririvana, au Judah maranai God tauna i kwatuei ana peroveta. Tauna God riwana mai Israel i riwei da God, ai kua apoapoei aubaii ina kovogi. Wei ravai God ega ita vimaegaegeaeni ma ega ita ririwa kua, i morumoru ma molamolakai awarii kua apoapoei i kaukauei.

Ma maiteni Amos God ana parivainuašana tau i verei da amapo tauna Israel ana gabemani ina ravivouni, Jerusalem ina voa-melei ma gulau David ana tupua rerega ravai dobuna ina vibadana-melei ma ana nuubai ina mae.

8

Tou gaegeaena e nenei

⁴ Ona rautanišana! Taumi voladašai o kwalekwalei
ma molamolakai o tugwadagwada.

⁵ O ririwa, nawaravi vouna torelana ina kwa lašilašina
ma Sabate ina kwa.

Ma witi tana gimarei,
witi ruva aburuna tana terei ma maiana tana gaegeaei
ma sikere morumorunei tana gimagimarei.

⁶ Witi lošilošii o tami da witi o tavipotoi ma o gimarei
ma lamnei, molamolakai o gimarai ami taunola.
Tau maiai me busi, maiana aburuna.

⁷ BADA parivainuašana-bagibagina, ana wava i kauai,
nai wavana mai Israel e vimaegaegeae,
I pa, "Ami go'apoapoei ega melanai nuuanuau ina vuru."

Peroveta Jonah ana buka

Pariverena

God ana peroveta Jonah i kwatuei da au Niniveh ita raugugula. Wate tauna ega ita goei da ana dobu ravai ai gavia wariagana awarii ita raugugula.

God i rauagaigaiei ma iana tauna i lawani. Au murina, i nae au Niniveh ma i nelagai da mai Israel ai gavia, God riwana i votetelei.

Jonah BADA i rauagaigaiei

¹ Mara tagogi BADA, Amitai natuna Jonah i riwei,

² “Ma vomairi ma nae au taon gaegeaena Niniveh. Ma riwei, da ai go'apoapoei a inandai da i rata kua ma lamna aubaina ana kovoigi.”

³ Wate Jonah, BADA i voterei ma etanai gelauna i vaia ma ina ruba gaira au Joppa. Ma kampa waga i nene au Tarshish i nelagai. I vimaia ma i geru da ita nae. I notai daBADA ita ruba govagei.

⁴ Wate BADA kojikojira gaegeaena i paritawanei da waga ita viairikarikai.

⁵ Waga ravai ai lawana aubaina i rovo-kaukua ma ai god awarii i tou agu aubaina, ma purapura au boga i viorereni da waga ita telatela. Wate Jonah waga au orana i raunuavuru.

⁶ Kapena i gaira awarina ma i eni i pa, “Mara i apoapoe gaga ma e matamatave! Ma vomairi, ma tou am god awarina da ina voaguita. Mepa da ina raunu'apoapoeleta da ega tana irage.”

⁷ Waga ravai i babani vivira i pa, “Gaima tana vikalokaloei da tana aramane ai ai ana wavu.” Kalona i kau ei ma wavuna Jonah awarina i peu

⁸ Ma tau i Jonah i paridadanei, “Aiwai aubaina kojikojira awarita i peu? Tam aiai? Tam am nola aiwai, tam meiei?”

⁹ Jonah tau i paribelei i pa, “Tau Hebrewi ma tau BADA, Mara ana God a voepaepai, Tauna boga ma doa i kau ei.”

¹⁰ Waga ravai i rovo kaukua ma i vigaragararei, “Aiwai aubaina lamna u kau ei!” Jonah boiboigi i viega da tauna BADA i rovei da i rubaruba.

¹¹ Mara i apoapoe kua ma tau i Jonah i vitaravivirei, “Aiwai tana kau ei da kojikojira ina kwa?”

¹² Jonah i riwa, “Ona tawaneu au boga ma ive ina raumairiei. Aramane da tau au kau e lei wei ivena i vomairi.”

¹³ Wate waga ravai i lare-guratana da waga ita gairei au gera, wate ega tagotagogina, kojikojira i voguratei.

¹⁴ Anina ma tau anatapui i tou Jonah ana God awarina i pa, “Oo BADA! ega ma voterelai da wei ravana ana go'apoe aubaina, ana i'rage, ma ega tarana wavuna ana avarai!”

¹⁵ Ma Jonah i vojijini ma i tawana-opunei au boga ma maratagogi kojikojira i wanatuini ma daumora i matave.

¹⁶ Ma ravai i rovoana-kau ei da pulo i apui BADA awarina ma i parivainuaгани da tauna ina vivirei.

¹⁷ Wate BADA iana gaegeaena i paritawanei da Jonah i lawani. Ma Jonah iana au manawana i mae aupom ma waguvara tonuga.

2

Jonah ana pari

¹ Jonah iana au manawana ma i raupari BADA, ana God awarina.

² I pa,

“Au nuabola au orana a tou BADA awarina,
ma i paribeleu.

Iriraagei, ai au dobu

ma agu a gararei

ma au tou u nonori.

³ Au gabinou u tawana gaireu,
boga au gabaura dewadewana.
Boga i kwaviviroiu.

Rabamam g̃aeḡaei i viaimonumouui.

⁴ Oo BADA! A notai da tau u tereopuneu,
ma a notai da eḡa melanai am tempol vivireina ana inana-melei.”

⁵ “Boga i puruii
lavutui i tupo
ma aragoma kolau i pani.

⁶ A monu gaira ola au kare dewadewana,
a vipani naiti au dobuna,
dobuna metaetana guduguduna maemaena.

Wate tam BADA au God, u vilawaniu.
Lawalawaiu gabinouei u sinaepaiu,

⁷ Malana a vaia au lawana i opuopu,
ma BADA a raupari awarim,
am au tempol, ma u nonoriu.

⁸ Tau i kokoitau labalababa e viviborumei,
am nuavaina mamae-nonoana i geduaiei.

⁹ Wate tau ana welem, ana voepaepaim
ma au pulo ana apui awarim.
Au parivainuaga awarim ana kauē
lawana maemae nonoana BADEI e nenei.”

¹⁰ Ma BADA iana i egari da Jonah i medana-tawanei au gera.

3

Jonah i nae au Niniveh

¹ Ma BADA i babani me Jonah awarina,

² I pa, “Ma nae taon g̃aeḡaena vinualaulaunana Niniveh ma au riwa a vereverem ma parivere.”

³ Jonah, BADA riwana i voteletelei ma i nae au Niniveh. Niniveh lamna taon g̃aeḡae otana
ma aupom tonuḡa i vaia da i verautuini.

⁴ Jonah i vikarei nai au taona ma aupom tagogi i babara ma i jima i pa, “Aupom 40 ina kwa
ma Niniveh ina pupu.”

⁵ Mai Niniveh BADA riwana i vitumaḡanei ma i vioga da anatapui magurina da aburuoina
i vianina tagogi da ina uji ma uji garana i oteni da ina vimataira.

⁶ Maranai Niniveh ana gulau wei riwana i nonori, tauna ana anikiala i opu-tawanei ma ana
gulau garana i ḡiḡi. Uji garana i oteni ma au lapukare i kiala.

⁷ Ma mai Niniveh awarii wei vinolanolana bagibagina i paritawanei tauna au wavanei.
Wenanare i riwa:

Eḡa rava bo bulumakau bo sipu, aiwai ina ani bo ina umai.

⁸ Ma ḡamoḡamo ma rava uji garana ina oteni ma ina raupari guratana BADA awarina. Ma
kaua apoapoe ma ḡoḡai ina geduaiei.

⁹ Aiai i aramanei? Mepa da God nuanuana ina amviravira ma nuavainei ana meji
ina vojijini da eḡa ina pupuni.

¹⁰ Maranai God inanai aiwai i kaukauei ma menanare ai kaua apoapoe i geduaiei, Tauna
nuanuana i virai ma eḡa ita pupuni.

4

Jonah ana ḡaiawa ma BADA ana nuavaina

¹ Wate Jonah wei ogana eḡa ita ḡoei ma amlona i ḡaiḡai kaua.

² ♣ Ma i raupari BADA awarina, i pa, “BADA a notai da amapo nanare ita tupua muriai da au
melagai ata opu-tawanei. A ramanei da tam God raunuapoapoe ma iviaiaim, eḡa laḡilaḡina
amlom ita voḡaiḡai ma am nuavaina maemae-nonoana. Tam eḡa am ḡoana da ḡo’apoapoe
ravai ma pupuni wate ma tere-kauē. Lamna aubaina a ruba nae au Tarshish.

³ ♣ Ma marina BADA, au lawana ma vaitawanei, i ai da ata iraḡe ma avena ata mae!”

⁴ Wate BADA i paribelei, i pa, “Tam aiwai e ḡaiḡaiwei?”

⁵ Jonah i opu melagai au metaetana, au maramatanei. Kampa ḡou i voepai ma au
gabaurina i kiala ma i vipaipai da BADA aiwai ita kauē nai taona awarina.

⁶ Ma BADA ġoroġorova i vigogoi da i tuaġeta Jonah au tepana da ana ġou. Ma Jonah wei i vinuaiaina-kauei.

⁷ Wate ubaubana boiboġi aupom ġela, BADA motamota i paritawanei da ġoroġorovana i ani da i'raġe.

⁸ Maranai madeġa i gogo, God ive maramatanei i paritawaneiai. Ma madeġa Jonah kolana i rarani da i ġokokokara. I ġoei da ita irage ma i riwa, "Irage i aii, eġa me lawana."

⁹ Wate God Jonah i paridadanei, "Am nola aiwai da amlom i ġaiġai kaua wei ġoroġorovana awarina?"

Jonah i paribelei, "Amloi i ġaiġai kaua da a ġoei ana i'raġe."

¹⁰ BADA i riwa, "Wei ġoroġorovana u vivinuabolei lamna eġa tam uta kauei bo uta paini. Tauna waguvarai i gogo ma waguvarai i'raġe.

¹¹ Wate nai taon ġaeġaena Niniveh ma ana patara 120,000, taui gimtona taumaenina ma ai ġamoġamo maġamaġaui. Wei taona a vinuabolei tapa?"

Peroveta Micah ana buka

Pariverena

Wei bukana, Micah mai Israel e ririwei da God tau awari amlona i ġaiġai. Tauna amlona i ġaiġai aubaina ega ita votelatelei. Lamna aubaina ai ġavia ina voterei da ina viġaviei.

Wate nanare BADA ana parivainuaġana i jimei. BADA i parivainuana da au damona ana rava ina vilawani.

5

Gulau meiei ina nei

¹ Sorodia ona vomairi! Ona vokaukua!

Ġavia Jerusalem i matave kwaipipini.

Israel ana gulau ina kwapui, jiġonei navanavana ina kwapui.

² Tam, Bethlehem Ephrathah,

melaġai aburu oina dam Judah au orai.

Wate awarimiei, Israel ai gulau ina opu.

Tauna wariġana,

au karena da marina.

³ BADA mai Israel i voterei ai ġavia au urai,

da wavine marina au manawa, tevera orotona ina ġuni.

Ma ai rava ġelau i tuvai-opunei,

ina nememei ai au ġana au Israel.

⁴ Tauna BADA ana rewapanei, ina mairi ma ana sipu ina raveni,

ana vidualaune i ma BADA wavana ġaeġaenei.

Rava anatapui au dobu, Tauna ina vivirana-kauei

ma lamna aubaina tau kampa ina mae-kauei.

Peroveta Zechariah ana buka

Pariverena

Mai Jew ai ġavia i nei ma tauri i pupuna-naiei au Babilon. Ma madeġa 70 au murina Babilon ai gulau mai Jew i voterei da i naeme au Israel tempol voamelana aubaina. Zechariah maiteni i nae. BADA Zechariah i riwei da mai Israel wenanare ina pariveri, “Ona mae-taviremi awariu ma ana maetavireu awarimi.”

Zechariah turana peroveta Haggai maiteni i nola tagogi nai au marana.

9

Zion ana gulau e nenei

⁹ BADA i riwa, “Ona morelana Zion

Ona logoimi Jerusalem,

ona inana! Ami gulau e nenei awarim.

Orana Jijimanina ma ana ġavia i vovaiubai.

Ana volaġotana donkey e gerugerui,

donkey ġaubona i gerui.

¹⁰ Dam Ephraim awarii Chariot ina vaitawanei,

ma Jerusalem awari ġavia horse ina vaitawanei.

Ma viġavia ana pidu ina gai.

Tauna rom ina neiai.

Ma ana vibada boga i taġoni da au boga ġela,

au waira Euphrates da dobu au ġia dewadewana.”

12

Tauna i tonatonai ana mogu.

¹⁰ Tau-Bada, David ana epaepaia ma mai Jerusalem awarii, raunuapoapoe ma rupena aruana ana iwagi. Tauri ina taepai ma i tonatonaiu ina inana, ma ina touei ma ina moguei me rava natuna tagotago i’raġe; me natuevouna ina irairaġe.

¹¹ Nai marana, tou ma tarakwatu au Jerusalem ina rata kua me au Hadad-Rimmon au wapuna, au Meggido maranai gulau Josiah i viragēni.

13

¹ BADA Virewapana Kaukauana i riwa i pa, “Mara ina ġetai maranai vuvura ina votawanei au Jerusalem. David ana epaepaia ma mai Jerusalem anatapui ina nei ma ai ġo’apoapoe ma ai mira ina oġa-tawanei.”

Mark Riwana Aiaina, Mark i girugirumia

Pariverena

Wei lamna God Natuna Iesu Keriso Messiah Riwana Aiaina karena. Rava wei bukana i girumi, wavana ega ita riweta. Wate tauviararamana e ririwa da Mark i girumi. Mark, lamna ega Apasol, wate tauviararamana magamaḡai i notai da tauna, Peter maiteni au Rome i mae. Ma Peter, Iesu ana kaula ma ana viararamana maḡamaḡai Mark i riwei. Anina ma Mark wei riwana i girumi da tauvitumagana au Rome ita aramanei, Iesu aiwai i kauai.

Riwa karena i girugirumia e viviegeta da wei lamna Iesu Keriso Messiah God Natuna Riwana Aiaina. Aubaina, wei au bukana ta inainai Iesu awarina rewapana da kaula maḡamaḡai ita kauai. Wei kauai tana inainai maranai: e viviararamana; ma arua-apoapoei e viviaḡagana-opunei; ma rava doridoriai e vivilawani; ma ḡo'apoapoe e notanota tawanei. Mark, Iesu ana nola ma ana kaula i girumi ma ega ana viararamana ita giruma-guratei. Mark i viegeta menanare Iesu au korosi i rage da rava anatapai ita vilawanai ma God menanare, Iesu iraḡalei i vovaimairini.

*John Taubabataito, Iesu ana aninae i vovokaukauei
(Matthew 3:1-12; Luke 3:1-18; John 1:19-28)*

1 Wei lamna Iesu Keriso Messiah God natuna Riwana Aiaina karena.

2 Wariaga peroveta Isaiah i girugirumia nanare:

*“Ona rautaniḡana! Au peroveta au naom ana paritawanei
da am aninae ina vokaaukauei.”* (Malakai 3:1)

3 ✨ *“Peroveta au mutulua e vivigoreḡore:*

*‘Taumi BADA ana aninae ona vokaaukauei,
ana eta ona vovai-jjiman!’*

(Isaiah 40:3)

4 Ma taupariverena John i nei au mutulua da rava i bababataitoi ma God riwana i jimejime i pa, “Ami ḡo'apoapoe ona voterei, ma ona mae-taviremi God awarina ma ami ḡo'apoapoe ina nota-tawanei ma ana babataitoimi.”

5 Ma rava anatapai Judea au paratana ma au Jerusalem i nae da John ita rautaniḡanei. Maranai ai ḡo'apoapoe i rupeni, John, tau i babataitoi au waira Jordan.

6 Ma John, kamel aparana metametanana i oteoteni ma ana tairoro ḡamoḡamo opina. Ana lam kapau ma manigewa.

7 Ma tauna, rava i ririwei i pa, “Rava au muriu e nenei i ḡetelara, ega me tau. Ega tagotagogiu da ana ae uma ḡuravana ana rupeni.

8 Tau wairei a babataitoimi, wate tauna, Arua Vivivireinei ina babataitoimi.”

*John, Iesu i babataitoi
(Matthew 3:13-17; Luke 3:21-22)*

9 Lamna maranaina Iesu, Nasaret, Galili i netawanei ma i nei ma John au waira Jordan, tauna i babataitoi.

10 Ma maranai Iesu wairei i ḡeḡetai, i nana da mara i wanatawanei ma Arua Vivivireina me gabubu i ḡairai.

11 ✨ Ma God ponana marei i opu ma iriwa ipa, “Tam, tau natu au nuavaina ma u vinuaininiu.”

*Satan, Iesu i raelari
(Matthew 4:1-11; Luke 4:1-13)*

12 Ma lamna au murina God Aruana Vivivireina Iesu i paritawanana-opunei au mutulua.

13 Ma au pom 40 au mutulua i mae. Ma Satan, tauna i raelari. ḡamoḡamo ḡaiḡaiawai nai au dobona i mamae ma God ana anela marei tauna i paini.

*Iesu, lebalebagaḡai ruaḡa ma ruaḡa i raukwatuei
(Matthew 4:12-22)*

14 Ma gulau Herod, John i pani. Ma muriai Iesu i nae au Galili da rava awarii God Riwana Aiaina i jimejime.

15 Ma Iesu i ririwa i pa, “God ana mara vinevinena i ḡetai. God ana vibadana vouna rava aubai, lamna i turiai. Ami ḡo'apoapoeina ona rupeni ma ona mae-tavirem ma Riwana Aiaina ona vitumaḡanei!”

¹⁶ Mara tagogi Iesu Galili topana au gerana i bababara nae. Ma lebalebağai ruağa i 'nanai, Simon* ma ana tevera Andrew au topa i rarauagida.

¹⁷ Iesu i riwei i pa, "Ona nei ma ona votağotağoiu. Ma me marina iana o tutuarui; nanare, ana viararamanimi da rava ona tuarui da ina vitumağaneul!"

¹⁸ Ma maratogogi ai agida i voterei ma Iesu i votağotağoi.

¹⁹ Ma tau i au gera i verau-nae. Iesu, Zebedi natunatuna i 'nanai, James ma John ai au waga ai agida wanawanarorona i vokaukauei.

²⁰ Ma maratogogi tau i ġorei, "Tau mi ona nei ma ona votağotağoiul!" Ma tau i amai Zebedi† ana taunola maiteni i voterei ma Iesu i votağotağoi.

*Iesu, arua-apoapoena rava awarina i viağağana-opunei
(Luke 4:31-37)*

²¹ Iesu ana Tauvotağotağoi maiteni i nae au Capeniam‡ Ma au Sabat, Iesu i rui au pari numana ma God Riwana Aiaina, viararamanana i vikarei.

²² Tauna ana rewapanana i viararamana eğa me mai Jew ai tarawatu babadai § nanare. Ma taurautaniğana ana viararamana i baiei.

²³ Maranai Iesu pari au numana i viararamana ma oroto arua-apoapoena orana i rui ruinia i garara

²⁴ i pa, "Iesu Nasaretei, aiwai e ġoeğoei awariai. Tam weka u nei da ma viapoapoenai bo? Tau a aramanei tam ai ai. Tam Vivivirem Godei!"

²⁵ Ma Iesu riwa bagibaginei i riwei i pa, "Ma genuana! Nai orotona ma opu-tawanei!"

²⁶ Ma arua-apoapoena orotona i viaikwajiei ma ponana i rata, i garara ma i opu-tawanei.

²⁷ Ma rava anatapai i bana-kauei ma tau i ava i vitarapiri, "Wei aiwai? Wei viararamana vouna ma ana rewapanana maiteni! Wei ravana awarina rewapanana e mamae da arua-apoapoena i riwei ma tauna i vovoteletelei!"

²⁸ Iesu nolana, maratogogi i tua Galili au anatapuna.

*Iesu, rava mağamağai i vilawani
(Matthew 8:14-17; Luke 4:38-41)*

²⁹ Nai marana pari numana i opu-tawanei ma ana tauvotağotağoi maiteni i nae Simon ma Andrew ai au numa. James ma John maiteni i nae.

³⁰ Simon poiana wavinena ini ġuğurana ana au animatave i matamatave ma maranai Iesu i ġeta ma numa ravai, tauna i pariverei.

³¹ Tauna i nae wavine awarina, nimana i vojijini ma i voagui da i vomairi. Lamna maranaina, ini ġuğurana i voterei ma wavinena, tau i paini.

³² Ma au bigai madeğa i neulai au murina, rava, ai rava doridoriai ma aiavo i arua-apoapoei au orai maema, i neiai Iesu awarina.*

³³ Ma rava anatapai nai au melagaina i vitagogiei numa au metaetana.

³⁴ Ma Iesu, mağamağai ai doria nununai i vilawani ma arua-apoapoe mağamağai rava awari i viağağana-opunei. Ma arua-apoapoena i aramanei da tauna anina God natuna ma lamna aubaina tau i viğaei da i genuana.†

*Iesu au Galili i raugugula nae
(Luke 4:42-44)*

³⁵ Ubaubanai boibogi, Iesu i vomairi ma numa i opu-tawanei ma i nae gabu au genugenuana. Ma kampa, God awarina i raupari.

³⁶ Muriai, Simon ana rava maiteni i nae da i baiei.

³⁷ Ma maranai Iesu i nelağai, ma i riwei i pa, "Rava anatapai e baibaieim."

³⁸ Iesu i paribelei i pa, "Tana nae taon ġelau i au ġeregere, ma kampa maiteni God Riwana Aiaina ana raugugulei. Tau wei lamna aubaina a nei."

³⁹ Ma Galili au anatapuna i naeni ma pari au numai i raruugugula ma arua-apoapoei i viopuni.

*Iesu, oroto opi dorianana i vilawani
(Matthew 8:1-4; Luke 5:12-16)*

* **1:16:** Wavana ġelauna Peter † **1:20:** Eng. *Zebedi*. ‡ **1:21:** Eng. *Capernaum*. § **1:22:** Wariağa BADA, ana Tarawatu Moses i verei mai Israel aubai. * **1:32:** *Madeğa ina neulai au murina* anona lauvitau ana mara damona. Mai Jew ai lauvitau ana mara au Friday madeğa e neneulai au murina e vivikarei da Saturday madeğa e neneulai au murina e vorovorovei. † **1:34:** Iesu i aramanei, mepa da ita kauei da arua-apoapoei ita riwa da tauna Keriso; lamna rava tauna ita egari da sorodia ita vibadei ma ta viğavia, me tau i vivinua-notenotei nanare. Jhn 6:15 ma inana.

⁴⁰ Anina ma rava awarina opi doriaana, i nei Iesu awarina ma au naona i peu ma i raudune ma agu i vibagei i pa, “Mepa da ma goei, anina da ma viaiainiu.”[‡]

⁴¹ Ma Iesu nuabola orana i oai ma urana i viloloi da i vodadani ma i riwa i pa, “Anina a goe goei, ma aiii!”

⁴² Ma maratogogi opi-doriana, oroto i voterei ma tauna i aii me.

⁴³ Anina ma Iesu i riwana-guratei i pa,

⁴⁴ “Tam ma nae! Aiwai i tuputupua awarim, ega rava ma viegei! Ma jijimanina ma nae pirisi pulo tau apuna awarina ma vietataiana-melem ma viaiaina pulona Moses i ririweia ma kauai da ina vimataira tau awari! Pirisi pulo tauapuina ana vianina ina verei da tam u lawana.”

⁴⁵ Wate orotona i nae ma aiwai awarina i tuputupua lamna melagai au anatapuna i babaniana-naiei. Ma lamna aubaina Iesu melagai anatapui i vorei ma mepa ega rava ita mamaelana kampa i nae. Wate rava mepa maemaiei i nei Iesu awarina.

2

*Iesu, oroto gwaḡagwaḡana i vilawani
(Matthew 9:1-8; Luke 5:17-26)*

¹ Iesu ana tauvotaḡotaḡo maiteni i wanavira-melei au Capeniam. Ma au pom ruaḡa au murina, rava nolana i nonori da tauna i nememei au melagai.

² Ma rava maḡamaḡau i vitagogiei au numa. Patara i rata guratana da numa i oai ma metaeta maiteni i mae-potai. Iesu, God riwana i raraugugulei.

³ Nelara ruaḡa ma ruaḡa, oroto gwaḡagwaḡana rasirasiei i avarai da i neiai Iesu awarina.

⁴ Rava i maḡa guratana ma ega tagotagogina da ita neiai Iesu awarina, lamna aubaina da tetelei i amgaena da au poewa ma gavogavo i bauni ma kampa gwaḡagwaḡana ana rasirasina i tere-gairei Iesu au naona.

⁵ Ma Iesu, nai ravai i 'nanai da ai vitumaḡana i rata, lamna aubaina gwaḡagwaḡana i riwei i pa, “Natu, am go'apoapoei, a nota-tawanei.”

⁶ Anina mai Jew ai tarawatu babadai ḡelau kampa i kiakiala, au orai i vinua-notanota i pa,

⁷ “God ainelana go'apoapoei e notanota tawanei. Aiwai aubaina wei ravana nanare e bababani? Tauna, God e vivijiboḡi ma e ririwa da tauna, God nanare.”

⁸ Maratogogi, Iesu Aruanei ai nota i vaia ma i riwei i pa, “Aiwai aubaina wei kauai o vivinua-nototei?”

⁹ Metauna i telatela: ḡwaḡagwaḡana ata riwei, ‘Am go'apoapoe a nota-tawanei.’ Bo ata riwei, ‘Ma vomairi, am animatave ma vaia ma ma babara?’

¹⁰ A goei da taumi ona aramanei da Rava Natuna au dobu ana rewapana e mamae da rava ai go'apoapoe ina nota-tawanei ma ina vilawani.” Ma gwaḡagwaḡana i riwei i pa

¹¹ “A riwem, ma vomairi, am animatave ma vaia ma ma nae au numa!”

¹² Orotona i vomairi ma maratogogi aravi i vaia ma i babara nae. Ma patara i raraubiga, i bana-kauai ma God i voepaepai ma i ririwa, “Tauai ega melanai kua wenanare ata inanai!”

*Iesu, Levi i kwatuei
(Matthew 9:9-13; Luke 5:27-32)*

¹³ Iesu, Capeniam i voterei ma Galili topana au gerana i bababara ana tauvotaḡotaḡo maiteni. Ma patara i nei awarina ma tauna God riwana viararamanana i vikarei.

¹⁴ Ma i verau-nae aburuna ma Apius* natuna Levi i 'nanai, ana bagibagi au gabuna i kiakiala ma *tax* i tamitami Rome gabemanina aubaina. Iesu i riwei i pa, “Ma votaḡotaḡoiu!” Levi i vomairi ma i votaḡotaḡoi.

¹⁵ *Tax* tautami ma go'apoapoei ravai maḡamaḡau, Iesu ma ana tauvotaḡotaḡo i votaḡotaḡoi. Ma anatapui, Levi ana au numa i kiala gogona ma i amam.[†]

¹⁶ Tarawatu Babadai ḡelau lamna Pharisi, ma tau i 'nanai da Iesu *tax* tautami ma go'apoapoe ravai maiteni i amam. Anina ma Iesu ana tauvotaḡotaḡo i riwei i pa, “Aiwai aubaina Iesu *tax* tautami ma go'apoapoei ravai maiteni e amam?”

¹⁷ Ma maranai Iesu wei riwana i nononori ma tau i riwei i pa, “Rava lawalawai, doketa ega ita goe goei ma rava doridoriai, doketa e goe goei. Tau a nei go'apoapoei ravai aubai ma ega rava jijimani aubai.”

[‡] **1:40:** Mai Jew ai Tarawatu e ririwa da rava lepelepera, tau mirimirai me dobu gela ravai - *Jentail*. Mai Jew amapo nai ravai ega ina vodadani. Rava mirimirai ega maiteni ina vitaparoro bo au melagai ina mae. Lamna aubaina mepa da rava mirimirana i lawana, tauna ina ai-me, God tauna ina vaimelai ma rava maiteni ina mae ma ina taparoro. * **2:14:** Eng. *Alphaeus*. [†] **2:15:** Moses, BADA ana Tarawatu i girumi ma mai Pharisi wei Tarawatuna i votaḡotaḡo-kauai. Ma tau kua waduboi amamai ḡariei maiteni i vovoteletelei ma i riwa da aiavoi Tarawatu ega ita vovoteletelei lamna tau rava apoapoei, go'apoapoe tau kauai.

*Uji vitaraviravirana**(Matthew 9:14-17; Luke 5:33-39)*

¹⁸ Mara tagogi, John Taubabaito ma Pharisi ai tauvotaġotaġo i ujiuji. Ma rava ġelau i nei Iesu awarina ma i vitara-virevirei, “Aiwai aubaina John Taubabaito ma Pharisi ai tauvotaġotaġo e ujiuji, wate tam am tauvotaġotaġo eġa ita ujiuji?”

¹⁹ Iesu i paribelei i pa, “Taumi o notanotai da tau i aiavoi i raukwatuei tavine ana au torela, ina mae lota bo? Eġateni kaua! Maranai tavitavine vou orotona, tau maiteni e mamae, tau eġa ina uji.

²⁰ Wate mara ina ġeta maranai tavitavine vou orotona ina vaitawane i ma lamna maranaina ana rava ina uji.”

²¹ Ma riwa e mamae, “*Tau kaua vouna a neiai eġa me taumi ami kaua wadubona nanare.* Eġa aiai ravana, gara vounei gara au wadubona ina popo-ratui da gavogavo ina vopotai. Mepa da nanare lamna, gara vouna gara wadubona ina roro i ma gavogavo ina rata.

²² Ma nanare, eġa aiai *wine* vouna ina vaini da *wine* aniterenana wadubona ġamoġamo opinei au orana ina iwaġi. Mepa da ina kauai, lamna *wine* vouna ina dodo ma *wine* aniterenana wadubona ina viairoro i ma *wine* ma aniterenana ina wanabauni[‡]. Wate *wine* vouna, anina da *wine* aniterenana vouna au orana ina iwaġi.”

*Iesu ana riwa Sabat aubaina**(Matthew 12:1-8; Luke 6:1-5)*

²³ Mara tagogi au Sabat, Iesu ana tauvotaġotaġo maiteni, *witi* wapuna au orana i nena. Ma ana tauvotaġotaġo *witi rovei* i vaini ma i amam.

²⁴ Pharisi ġelau i 'nanai wei kauana i kaukauei ma tau i Iesu i riwei, “Ma inana, ata Tarawatu e mamae da Sabat, lamna lauvitau ana mara. Aiwai aubaina tau i vovobagibagi?”

²⁵ Iesu i paribelei i pa, “Me peroveta i girugirimia nanare. David ana tauvotaġotaġo maiteni am-irage ma aiwai i kauai? Taumi o iavi ma aiwai aubaina anona, eġa ota vinua-notenotei?”

²⁶ *Pirisi Geġetelarana Abiathar ana au mara, David, God ana au numa i rui ma palawa vovivirana i vaia ma ġelau ana tauvotaġotaġo maiteni i verei da i ani. Moses ana Tarawatu e mamae da pirisi ava palawana e aniani.”

²⁷ Ma Iesu ana riwa au damona i riwa i pa, “God, Sabat i kauai da rava voaguna aubaina ma eġa rava ita kauai Sabat voaguna aubaina.

²⁸ Ona vinuanotenotei, tau Rava Natuna, lamna aubaina tau anina Sabat badana.”

3*Iesu, Oroto urana irairage na i vilawani**(Matthew 12:9-14; Luke 6:6-11)*

¹ Mara ġelauna au Sabat, Iesu i naeme au pari numana ma oroto urana irairage na i 'nanai kampa i kiakiala.

² Ma Pharisi ġelau i ġoei da aiwaiei Iesu ita viwavui. Lamna aubaina i 'nana-taġotaġo i da oroto ita vilawani bo eġa au Sabat.

³ Ma Iesu, orotona i riwei, “Ma nei, au naoi ma mairi!”

⁴ Ma Iesu, ravai i vitara-virevirei i pa, “Sabat au marana, metauna i aii: Aiaina tana kauai bo apoapoena? Tana vilawana bo tana virage na? Tarawatu aiwai i riwei?” Ma anatapu i genuana.

⁵ Iesu ana amloġaigaina i 'nana viravira ma i 'nanai da tau orai i bado ma nuanuana i bola-kauai. Ma orotona i riwei i pa, “Uram ma viloloi!” Ma i viloloi ma i lawana.

⁶ Ma Pharisi maratagogi i opu ma i nae Herod ana rava awarii* ma ai oga i tarai da Iesu mena ita viragenanei.

Iesu, Patara awari i babani

⁷⁻⁸ Iesu ana tauvotaġotaġo maiteni, tau i netawane i ma i nae au gera da ita vilavuitau; ma mai Galili patara gaegeaena i votaġotaġo. Rava maġamaġau, Iesu aiwai i kaukaueia nolana i nonori ma mai Galili ma Judea, Jerusalem taon, Idumea ma taon ġelau waira Jordan taon au babagelauna, Taia taon ma Sidon taon,[†] tau i anatapu i nei Iesu awarina.

⁹⁻¹⁰ *Iesu, rava maġamaġau i vilawani. Ma lamna aubaina doridoriai maġamaġau i viviamdudu ma i ġoei da tauna ita vodadani. Lamna aubaina ana tauvotaġotaġo i riwei da waga i vokaukauei.

[‡] **2:22:** Wine e tuputupua ma pūropurona wine ana aniterenana ina viaisikasikai ✨ **2:26:** 1Sa 21:1-6 * **3:6:** *Herod ana rava* anona lamna mai Jew ai boru, tau i aiavoi Rome gabemanina i vovoagui. Tau i bada wavalatona Herod Antipas. Mai Jew maġamaġau ma mai Pharisi maiteni, i notai da Herod ana rava tau i tauvibenabenam ai rava au oiena awarii.

[†] **3:7-8:** Eng. *Tyre & Sidon*. Wei ravana eġa mai Jew. ✨ **3:9-10:** Mrk 4:1

¹¹ Maranai, arua-apoapoei rava au orai maemaei, Iesu i 'nanai ma au naona i peu ma i garara, "Tam God Natuna!"

¹² Ma Iesu tauri i viġaei da avena ita vieġa da tauna aiai.

*Iesu ana Apasol 12 i vinei
(Matthew 10:1-4; Luke 6:12-16)*

¹³ Anina ma Iesu i ġae au ola ma ana ġoanei nanare, rava i kwatuei da awarina i ġei.

¹⁴ Tauna, nelara 12 i vinei da maiteni ita mae ma muriai ita paritawanei da ita raugugula. Ma i ġorei Apasol.

¹⁵ Ma i vovai-virewapani da arua-apoapoei rava au orai ina viopuni.

¹⁶ Tauri i vinevinei 12 ai wava wenanare,

Simon i ġoreġoreia Peter†

¹⁷ ma Zebedi§ natuna James ma ana tevera John i ġorei Boaneges, anona waiparara natunatuna,

¹⁸ Andrew,

Philip,

Batolomeo,*

Matthew,

Thomas,

James, tauna Apius† natuna,

Thadeus,‡

Simon, tauna Ununurana,§

¹⁹ ma Judas Iskariotei; * tauna, Iesu tauvibenabenameina.

*Rava i riwa da arua-apoapoei Iesu e vivibadei.
(Matthew 12:22-32; Luke 11:14-23; 12:10)*

²⁰ Ma Iesu ana tauvotaġotaġo maiteni i rui au numa. Ma patara i rieiai da tauri eġa tagotagogina da ita am.

²¹ Ma Iesu ana numa ravai nolana i nonori ma i riwa i pa, "Tauna i bua." Lamna aubaina i nei da ina taravaini.

²² Tarawatu babadai ġelau i Jerusalemei i nei ma i riwa i pa, "Arua-apoapoei, ai bada Bielsibul,† Iesu au orana i rui ma lamnei arua-apoapoei e viviopuni."

²³ Lamna aubaina Iesu, wei Babadai i ġorei ma awanainei i pa, "Satan amapo Satan eġa ina viopuni.

²⁴ Mepa da dobu ravai ina viġavia vivira, lamna dobuna ita mae ava.

²⁵ Ma nanare dam ina viġavia vivira, nai damna ita mae ava.

²⁶ Ma Satan ita vomairi ma ita viġaviana-melei, amapo ita mae ava.

²⁷ Taudanene amapo eġa rava virewapanana ana au numa ina danene, eġa da au naona ravana ġuravei ina raġini ma muriai ina danene.

²⁸ Riwa kaua a ririwemi da God ami ġo'apoapoei ma ami vijiboġa anatapui ina nota-tawanei.

²⁹ Wate aiai da Arua Vivivireina e vivijiboġi, God, nai ravana ana ġo'apoapoei eġa melanai ina nota-tawanei ma ana go'apoapoei ina mae-nonoa."

³⁰ Iesu wenanare i babani, aubaina rava ġelau i ririwa, "Iesu au orana arua-apoapoei e mamea."‡

*Iesu ana dam oina
(Matthew 12:46-50; Luke 8:19-21)*

³¹ Iesu alona ma varevareina i nei ma au doa i maimairi ma riwa i paritawanei Iesu awarina da ita nei.

³² Ma patara Iesu i kiala kwaviviroi, ma taupariverena i riwei i pa, "Alom ma novunovum ma varevareim au doa ma e ġoġoem."

³³ Iesu i paribelei i pa, "Aiai alou ma aiavoi varevareiu?"

³⁴ Anina ma tauri i kiakiala i 'nanai ma i riwa i pa, "Ona inana! Wei tauri alou ma varevareiu.

³⁵ Aiai God ana ġoana e kaukauei, tauna alou ma novu ma vareiu."

‡ **3:16:** Anona *Gaima*. § **3:17:** Eng. *Zebedi*. * **3:18:** Eng. *Batolomeo*. † **3:18:** Eng. *Alphaeus*. ‡ **3:18:** Wavana ġelaua Judas - Luk 6:16 § **3:18:** Anona lamna tauri mai Jew ma tauri Rome e vivijaviei. * **3:19:** Iskariot, lamna Judas ana melagai wavana da auna lamna Iskariotei. † **3:22:** Eng. *Beelzebub*. Anona lamna, *nabugara ai bada*. ‡ **3:30:** Tarawatu tau girumi i parivajijigei aubaina tauri e ririwa da Arua Vivivireina ana nola lamna baravu da parauma. BADA eġa melanai ai ġo'apoapoei ina nota-tawanei.

4

*Doa tapuna ma tapuna ai awanaina**(Matthew 13:1-9; Luke 8:4-8)*

¹ Iesu, giu i raukarena-melei Galili topana au adana. Ma patara i riei da ita rautaniġanei. Ma patara i rata, da tauna au waga i geru ma i kiala ma waga i dudui da i virauoupu au topei ma patara au gera i mae.

² Ma kaula maġamaġau awanainei i giu ma i viararamana i pa,

³ “Ona rautaniġana! Taupaewa, ana wapu i vokaukauei ma pei i ravi awawari.

⁴ Pei ġelau i eta i peu. Ma kiu i ġeta ma i ani.

⁵ Ma pei ġelau doa au ġaiġaimana i peu, doa au avavana. Ma lamna aubaina maratagogi i gogo.

⁶ Wate maranai madeġa i rarani, maratagogi i poi, anona warami eġa ita ġaira guratana doa au orana.

⁷ Pei ġelau, modu donadonai au poui i peu. Ma modu donadonai i gogo ma pei i gogogo i lavani, ma eġa ita ua.

⁸ Ma pei ġelau doa au aiaina i peu ma i gogo kaula ma i ua, ġelau 30, ġelau 60 ma ġelau 100.”

⁹ Ma Iesu i riwa i pa, “Mepa da taniġami e mamae, riwa ona nonori!”

*Aiwai aubaina Iesu awanainei i babani**(Matthew 13:10-17; Luke 8:9-10)*

¹⁰ Maranai Iesu ainelana i mamae ma ana tauvotaġotaġo 12 ma taurautaniġana ġelau i ġeta ma Iesu i vibaġai da awanaina anona ita riwei.

¹¹ Ma Iesu i paribelei i pa, “God ana vigulau ana kaula mamae govaġana; taumi i vieġemi ma rava au tano maemaie, tau i aiwai anatapu i awanainei e paripari-verei.

¹² Lamna ana kauie da wariaġa peroveta aiwai i girugirumia ina tupua:

“Tau i ina inana ma eġa ita inainanai.

Tau i rarautaniġana ma eġa ita araramanei;

ma lamna aubaina tau eġa ita nenei God awarina

da ai ġo’apoapoe ita notatawanei.”

*(Isaiah 6:9-10)**Doa tapuna ma tapuna anoi.**(Matthew 13:18-23; Luke 8:11-15)*

¹³ Anina ma Iesu i riwei i pa, “Wei awanainei a babani ma anona eġa ota aramanei bo? Ma awanaina ġelau menanare ona aramananei?”

¹⁴ Taupaewa, God riwana, rava anatapu i e paripari-verei.

¹⁵ Rava ġelau orai i bagibagi me etanai. Riwa au tepana e raurauie, wate maratagogi Satan e nenei da riwa rava au orai e vaivai-tawanei.

¹⁶ Ma rava ġelau orai me doa viġaiġaimana. Tau i, riwa i nonori ma maratagogi ana nuai i riwa e vaivaia.

¹⁷ Wate warami eġa da eġa ita mamae guratana. Ma maranai nuabola bo rau-iviapoapoe e nenei tau i awari, aubaina tau i tumagana God awarina e teretere. Tau i maratagogi e peupeu.

¹⁸ Rava ġelau orai me pei, modu donadonai au orai e gogogolana. Tau i anina riwa e nononori.

¹⁹ Wate lawana ai nuabola ma mane ai nuavainana ma kaula ġelau ai au nuai i e rui i ma God riwana e lavalavani da eġa ita uaua.

²⁰ Ma ġelau, tau i me pei doa au aiaina i peu. Tau i, lamna anina riwa e nononori ma e vaivai-kauei ma e uaua: ġelau 30 ma ġelau 60 ma ġelau 100.”

²¹ Iesu i riwei i pa, “Rava, eġa rampa ita neineiai da iriga au gabaurina ita teretere bo vatara au gabaurina ta pa? Rampa ana au anikiala e teretere ta pa?”

²² Kaula mamae govaġai, anataputapu i vieġai ma kaula govago vaġai nanarena ana vieġai.

²³ Mepa da taniġami e mamae, riwa ona nonori!”

²⁴ Iesu i riwa i pa, “Aiwei o nononorja ona rautaniġanana-kauei, ruva o ruveruveia, God nanare awarimi ina ruvai ma ġelauna ina tavipotoi.

²⁵ Lamna aubaina, mepa da riwau ona aramanei, tau ġelauna ma ġelauna ana veremi. Ma tau i eġa ita aramanei, lamna aiwai aburuna i nononorja, ina vine-boai.”

Pei gogogona ana awanaina.

²⁶ Iesu e ririwa i pa, “God ana vigulau me rava, witi peina au doa ita ravi-awawari.

²⁷ Ma waguvara e matamatave ma maratome e vovomairi ma pei e gogogo ma e rarata. Wate aiwai e gogogo, tauna e vivinuanainei.

²⁸ Doa ana nuaina, pei me witi e vivigogoi ma e uaua. Au naona e raraupairei ma muriai e roverove ma muriai anona e magumagura au tapina.

²⁹ Maranai i magura, rava petona e raraukarei. Tuaruta marana i ġetai.”

Pei aburuoina ana awanaina

(Matthew 13:31-32, 34; Luke 13:18-19)

³⁰ Iesu i riwa i pa, “God ana vigulau aiwaiei ana parivai-patepatei bo aiwai awanaini ana pariveremi?”

³¹ Wenanare, wei aina peina, lamna me gaga peina, pei aburuoina au dobu ma au doa i paewi.

³² Ma peina i gogo ma i rata da ai muomuoi i ġetawanei ma raġaraġai ġaegae i terei ma au ġoui, kiu ai noġi ita voai.”

³³ Ma Iesu, awanaina maġamaġgai, rava au matai i raugugulei da taui ai rau-taniġana ana au ruva nanare.

³⁴ Awanaini, rava awari i giugiu, wate ana ta uvvotaġotaġo ava awari kava anatapu i vivieġai.

Iesu, kojikojira i ravi-daumora

(Matthew 8:23-27; Luke 8:22-25)

³⁵ Nai aubigaina Iesu, ana ta uvvotaġotaġo i riwei i pa, “Tana damana topa au baba ġelauna.”

³⁶ Anina ma taui patara i voterei. Ma anatapu Iesu, maiteni au waga i geru ma i damana, waga ġelau maiteni.

³⁷⁻³⁸ Iesu, waga au murina unutama i terei ma i raunuvuru. Ma kojikojira ġaegae i tupua ma rabama, waga au tepana i rauraei ma waira, waga i oaoai. Ma ana ta uvvotaġotaġo, tauna i ravi-dagudagui ma i riwei i pa, “Taugiu, nuuanam e bolabolai bo ega da tana irage?”

³⁹ Ma tauna i vomairi ma ive i viġaei ma i riwei i pa, “Ma genuana!” Ma rabama i riwei i pa, “Ma mae-genuataul!” Ma ive i wanatuini ma daumora ġaegae i matave.

⁴⁰ Iesu ana ta uvvotaġotaġo i riwei i pa, “Aiwai aubaina o rovorovo? Taumi amapo da eġa ota vitumaġanal!”

⁴¹ Ma taui i rovo kava ma i riwa vivira i pa, “Wei aiai ravana da ive ma rabama tauna e vvovoteletelei?”

5

Iesu, arua-apoapoena oroto awarina i viaġaġana-opunee.

(Matthew 8:28-34; Luke 8:26-39)

¹ Iesu ana ta uvvotaġotaġo maiteni Galili topana au baba ġelauna i ġeta, mai Gerasa ai au dobu.

² Wei au dobu, arua-apoapoena oroto au orana maemaena.

³⁻⁵ Ega aiai tagotagogina da ita vvaiubai. Mara maġamaġgauna, aena ma urana seinei i pani. Wate wei i vvaituini, ma eġa tagotagogina da seinei ita pani. Marai ma waguvarai i nene-labalababa ma i garagarara ma ġamei tupuana i boribori-melei ma au kokoaga ma au ola i raunuma.

⁶ Maranai Iesu wagei i opuopu, arua-apoapoei orotona i rui ruinia, aueia Iesu i `nanai ma kokoagei i ruba ma Iesu au naona i mae-peu ma i raudune.

⁷⁻⁸ Iesu, ravana i riwei i pa, “Arua-apoapoena, wei orotona ma opu-tawaneii!” Ma orotona, ponana au aidamo ma i garara, “Iesu, God Aidamo Telarana Natuna! Aiwai awari e ġoġoġi? God wavana i vivibaġaim da eġa ma kovogiu!”

⁹ Iesu, orotona i vitara-virevirei i pa, “Tam wavam aiai?”

I paribelei i pa, “Tauai a maġa, aubaina tau wavau lamna Ġavia Patarana.”

¹⁰ Ma arua-apoapoei, Iesu i vibaġa-guratei da avena nai dobu i ita vvopuna-tawane.

¹¹ Ma poro boruna ġaegae au ġeregere ola au adana i labalaba.

¹² Ma arua-apoapoei, Iesu i vibaġai, “Ma paritawanelai poro au orai ana rui.”

¹³ Iesu i vianina. Ma arua-apoapoei, orotona i opu-tawane ma poro au orai i rui. Poro boruna 2,000 nanare olei i ruba ġaira da au topa i monu.

¹⁴ Ma poro taupainii i ruba nae au melagai ma au wapu; ma riwa i vibabarai. Ma rava i nei da ita inana aiwai i tupua.

¹⁵ Ma maranai i nae Iesu awarina, orotona au naona arua-apoapoei patarai au orana i mamae; tauna i kiakiala, gara i otene ma ana nota jijmanina. Ma taui i rovo kava.

¹⁶ Ma aiwai i tupua orotona ma poro awari, taui i `nainanaia, rava i riwana-naiei.

¹⁷ Ma dobu nae, Iesu i vibaġai da dobu ita opu-tawaneii.

¹⁸ Iesu au waga i gerugeru ma orotona, Iesu i vibaġai i pa, “Tau maiteni tana nae.”

¹⁹ Iesu i viġaei ma i riwei i pa, “Ma naeme am au dam. Ma BADA kava aiwai ġaegae i kaukaeia ma ana vvaiiai tam awarin, taui ma pariveri.”

²⁰ Ma anina orotona, Iesu i netawane ma i nae au Dekapolis (*melagai 10*) da Iesu aiwai awarina i kaukaeia, rava i riwana-naiei. Ma taui anatapu i nononoria i baiei.

Iesu, Jairus natuna wavinena ma wavine doridorianana i vilawani.

(Matthew 9:18-26; Luke 8:40-56)

²¹ Iesu wagei i damana me topa au baba ġelauna. Maranai kampa i ġeta ma topa au adana, ma patara i rieiai.

²² Pari numana badana wavana Jairus i nei weka ma maranai Iesu i 'nanai, tauna Iesu au aena i mae-peu

²³ ma i vibaga-guratei i pa, "Natu guguinina e irairage. Ma nei ma uram au inina ma terei ma ina lawana."

²⁴ Anina ma Jairus, Iesu maiteni i nae ma patarana i mae gariġuruvi ma i votagotaġoi.

²⁵ Wavine tagogi kampa patarana au orana awarina tara-doriana i mae da madeġa 12 i kwa.

²⁶ Ana mane anataputapuna, dokedoketa maġamaġau awarii i tawanei ma eġa tagotagogina ita vilawani ma amapo da ana doria i rarata.

²⁷⁻²⁸ Tauna, Iesu nolana ma ana babani i nonori ma au orana i vinua-notanota i pa, "Mepa da ana gara ava ana vodadani ma ana lawana." Ma tauna, Iesu murinei i nei ma ana gara i vodadani.

²⁹ Maratagogi, tara-doriana i wanatuini ma malana i vaia da i lawana.

³⁰ Nai maranaina, Iesu malana i vaia da ana rewapana i opu-tawanei ma i mae-tavirei patara au poui ma i riwa i pa, "Aiai au gara i vodadani?"

³¹ Ana tauvotagotaġo, tauna i riwei, "Ma inanai, patara i mae gariġuruvim! Ma menanare da u riwa 'Aiai i vodadaniu?"

³² Wate Iesu i 'nana viravira da ita inanai aiai i vodadani.

³³ Wavine i rovo kua ma i sisisi, wate i aramanei aiwai awarina i tupua ma i nei ma Iesu au naona i raupari ma aiwai anatapui i vieġei.

³⁴ Anina ma Iesu, wavine i riwei i pa, "Natu, am tumaġana i vilawanim. Am doria i kwa, ana nuaubam ma nae!"

³⁵ Maranai i bababani ma rava ġelau i Jairus ana numei i nei ma i riwei i pa, "Natum ana mara i kwa. Eġa Taugiu ma visina-viravirai."

³⁶ Iesu ai babani i nonora-tawanei ma Jairus i riwei i pa, "Eġa ma rovo, ma vitumaġana!"

³⁷ Iesu, rava ġelau i viġaei ma Peter ma James ma ana tevera John maiteni i nae.

³⁸ Ma Jairus ana au numa i ġeta ma Iesu, patara i 'nanai; i toutou ma i taratarakwatu

³⁹ ma i rui ma tau i riwei i pa, "Aiwai aubaina o taratara-kwatu ma o toutou? Tevera eġa ita irage, tauna e matamatave ota."

⁴⁰ Ma tau i, Iesu i kakei, ma lamna aubaina rava i viopuni au doa ma tevera alona ma amana ma tauna ana tauvotagotaġo tonuġa maiteni i rui mepa tevera i matamatave lana.

⁴¹ Iesu, tevera nimana i vaia ma i riwei i pa, "Talitha koum!" wei anona, "Kukuma, ma vomairi!"

⁴² Maratagogi i vomairi ma babara i vikarei (Tauna ana madeġa 12). Ma tau i ba kua.

⁴³ Iesu, tau i riwana-guratei da eġa aiai ita vieġei ma i riwa da ita viambagibagi.

6

Mai Nasaret, Iesu i parivirevirei

¹ Iesu ana tauvotagotaġo maiteni nai dobuna i netawanei ma i naeme ana au melagai.

² Ma Sabat marana i ġeta ma tauna giu i vikarei au pari numana. Ma rava maġamaġau i riei da i rautaniġane. Tau i anatapui i baiei ma i vitara-viravira vivira i pa, "Wei tauna nauaula ma aramanana mepa i vaia?" Ma, "Kua aiwaiei e kaukauei?"

³ Anina ma tau i ava i babani vivira i pa, "Tauna tauvoa. Mary ana natuevou ma varevarena James, Joses, Judas ma Simon ma novunovui weka e mamae tauna bo?" Ma lamna aubaina mai Nasaret, Iesu i parivirevirei.

⁴ Iesu, tau i riwei i pa, "Peroveta dobu au ġelau e vivivirei, wate ana au melagai, ana rava ma ana dam oina, eġa ita vivivirei."

⁵⁻⁶ Tauna i baiei da rava eġa tauna ita vitumaġane. Ma eġa tagotagogina da kua vivirewapani kampa ita kau. Tauna urana, rava ruġa ota doridoriai au tepai i terei ma i vilawani. Ma muriai, melagai nununai au ġereġerei i viararamana nae.

Iesu ana Apasol i paritawanei da ita viararamana

⁷ Ma Iesu, tau i 12 i ġoreiai ma ruaruagei ava i paritawanana-opunei ma rewapana i verei da arua-apoapoei ina viaġaġana-opunei.

⁸ Ma riwa bagibaginei i riwei i pa, "Ami au vaġai, eġa aiwai ona vaia anina jiġona ava; eġa lam, eġa autu bo mane au urami.

⁹ Ae uma ona oteni ma eġa kwama ġelauna ona vaia."

¹⁰ Ma i riwei i pa, “Metauna melagaina o ruiruiana ma i vianinemi. Numa tagoginina au orana ona mae da melagaina ona oputawanei.

¹¹ *Mepa da au melagai o ġeta ma rava eġa ita vianinemi bo eġa ita rautaniġanemi. Nai melagaina ona oputawanei ma aemi pokauna ona rauabuabui da ina aramanei da tau i ai wavu!”*

¹² Ma tau i opu ma rava awari i raugugula ma i riwei i pa, “Taumi ami ġo’apoapoei ona voterei ma ona mae-taviremi God awarina!”

¹³ Tau, arua-apoapoei i viaġaġana-opunei. Ma rava doridoriai maġamaġau, olive oirana au kolai i buloi ma i vilawani.

John Taubabataito ana irage

¹⁴⁻¹⁶ *Iesu nolana i nae da rava anatapui i aramanei ma tauna i babaniei. Ma rava ġelau i ririwa i pa, “Tauna, kau vivirewapanai e kaukauei, aubaina tauna John Taubabataito iragelei i vomairi me.” Ġelau i ririwa i pa, “Tauna Elijah i nememei.” Ma ġelau i ririwa i pa, “Tauna peroveta wariġai nanare.” Ma gulau Herod,† nolana i nonori ma i riwa i pa, “Tau, John Taubabataito uana a borituini; marina i vomairi me.”

¹⁷⁻²⁰ John ana virarautua, lamna wenanare. Muriai da Iesu ana viararamana nolana ita vikarei. Herod, tuana Philip awana i kwalei ma i ravaġi. Wavinena wavana Herodias. Au murina John, Herod i riwana ġirigiriei i pa, “Tarawatu e mamae da eġa vareim awana ma kwalei.” Ma Herod, riwa i paritawanei da John i pani da panipani au numana i terei. Herod ana nuaiaina, John i rarautaniġanei. Wate nuanuana i raġaraġa.

Ma Herodias, John awarina amlona i ġaiġai ma viraġenana i ġoei. Herod i aramanei da John, lamna rava jijimanina ma vivivireina ma i gagaloei. Herod, John i rovoei ma lamna aubaina wavinena eġa tagotagogina da aiwai ita kauiei.

²¹ Ma wavine, gavogavo i ’nanai, maranai Herod ana tupua marana i ġeta ma torela i vokaukauei. Ma gabemani babadai ġaeġaei ma sorodia ai babada ġaeġaei ma Galili babadai i raukwatuei.

²² Ma Herodias natuna wavinena i nei ma i ara. Herod ma tau i maiteni i amam i vinuaiaini. Ma gulau, guguini i riwei i pa, “Aiwai u ġoeġoeia ma vibaġai ma ana verem!”

²³ Ma i parivainuġani i pa, “God au matana a ririwem da aiwai i vivibaġeiu ana verem da au vigulau navanavana au paratana.”

²⁴ Ma tevera wavinena i opu ma alona i paridadanei i pa, “Aiwai ana vibaġei?”

Ma i paribelei i pa, “John Taubabataito kolana.”

²⁵ Ma maratagogi i vipaparana ma gulau awarina i rui ma i vibaġai i pa, “A ġoeġoei da marina John Taubabataito kolana ma vereu au aboma!”

²⁶ Ma gulau nuanuana i bola-kauiei. Wate parivainuġana boiboġi i kauiei tau i amam au matai. Ma lamna aubaina guguini, aiwai i vivibaġei anina i vianinei.

²⁷ Ma tauviragena i paritawanei ma i riwei da John kolana ita neiai. Ma i nae panipani au numana ma John uana i borituini.

²⁸ Ma kolana au aboma i terei ma guguini i verei ma guguini, alona i verei.

²⁹ Ma John ana tauvotaġotaġo, nolana i nonori ma i nei ma taubeuna i vaia ma au kokoaga i vimataveni.

Iesu, nelara 5,000 i viambagibagi

(Matthew 14:13-21; Luke 9:10-17; John 6:1-14)

³⁰ Apasol i ġeta memei ma aiwai anataputapuna i kaukauei ma i rarauugulei, Iesu i vieġei.

³¹ Lamna maranai, rava maġamaġau i nenei ma i neneae da Iesu ana tauvotaġotaġo maiteni eġa gavogavo ita maemae da ita am. Lamna aubaina Iesu, tau i riwei i pa, “Taumi ava ona nei ma tana nae au mutulua da laumi ina tau mara aburuna.”

³² Ma anatapui wagei i nae au mutulua.

³³ Wate rava maġamaġau i ’nanai i neneae ma i aramanei tau i aiavoi. Ma melagai nununai anatapui geraei i ruba gogona da au dobuna i aiġeta.

³⁴ Maranai Iesu wagei i tuopu au gera ma patara ġaeġaena i ’nanai ma nuanuana i bola-kauiei. Tau i me sipu ma eġa ai tauvipaipai. Ma Riwana Aiaina viararamanai i raukarei.

* **6:11:** Act 13:51 * **6:11:** Wariġa mai Jew, tauvaġai e nenememei au Israel. Tau i aei pokau e rarauabuabui maranai Israel ana au parata e ġeġeta, lamna tau i orai e viaiaini. Ma Iesu ana tauvotaġotaġo wei i kauiei da melagai ravai ina notai, “Taufotaġotaġo e ririwa da tauta orata apoapoena me tauta eġa mai Jew.” * **6:14-16:** Mrk 8:28 † **6:14-16:** Herod Antipas, Galili ana Wavalatona.

³⁵ Ma au biga e tuturiai ma ana tauvotaḡotaḡo i nei awarina ma i riwei i pa, “Wei mutulua ma madeḡa e arearere.

³⁶ Rava ma paritawanei da ina nae au melagai ma au wapu au ḡereḡere da ai lam ina gimarai.”

³⁷ Wate Iesu i paribelei i pa, “Taumi ona viambagibagi!” Ma tau i paribelei i pa, “Mepa 200 denarii[‡] tana vaia da wei patarana tana viambagibagi?”

³⁸ Ma Iesu i paridadanei i pa, “Palawa biaḡa awarimi? Ona nae ma ona baiei!”

Maranai i nelaḡai ma i riwa i pa, “Awariai, palawa five ma iana ruaḡa.”

³⁹ Anina ma Iesu, patara i riwei i pa, “Boru nununai, gidagida au majimajigai ona kiala nae.”

⁴⁰ Ma tau i ai au boru 50 da 100 nanare i kiala nae.

⁴¹ Ma Iesu, palawa five ma iana ruaḡa i vaia ma i ḡoutata au mara ma God i viegualaei. Ma palawa i vogimagimai ma iana i ḡutai da ana tauvotaḡotaḡo i verei ma tau i, rava i verei.

⁴² Ma patara i am ma i am-iaua.

⁴³ Ma ana tauvotaḡotaḡo, lam am tereterenai i tuarui da poa muomuoi 12 i vioai.

⁴⁴ Nelara 5,000 i viambagibagi.

Iesu, waira au tepana i babara

(Matthew 14:22-33; John 6:15-21)

⁴⁵ Anina ma Iesu, ana tauvotaḡotaḡo i egari da ita aidamana au Bethsaida.[§] Tau i waga i geru da i nena ma tauna, patara i paritawanei.

⁴⁶ Patara i paritawanei ma tauna ava i ḡae au ola da ita raupari.

⁴⁷ Ma waguvara ana tauvotaḡotaḡo au waga au topa ma Iesu au alala.

⁴⁸ Ma ana tauvotaḡotaḡo, lare i vovoguratei da ita ḡota wate ive i viraumatamatani. Ma maratotom nanare, Iesu i nae awari. Tauna waira au tepana i bababara ma i ḡoei da tau i ita tutelare.

⁴⁹⁻⁵⁰ Ma maranai tau i, Iesu i 'nanai topa au tepana i bababara ma i notai da tauna konaḡa ma i rovo kauka ma i vigaragararei. Ma maratagogi Iesu i riwa i pa, “Tepami ina tora! Tau, eḡa ona rovo!”

⁵¹ Ma au waga i geru ma ive i wanatuini ma tau i bana-kauei.

⁵² Avena da kaua palawa awarina i kauei i 'nanai, wate ana rewapana eḡa ita aramana-kauei. Tau i orai i bado ma i vinuanaina.

Iesu, rava doridoriai maḡamaḡai au Genesaret i vilawani

(Matthew 14:34-36)

⁵³ Tau i, topa i damani ma au Genesaret i ḡota ma ai waga i raḡini.

⁵⁴ Tau i, waga i oputawanei ma rava, Iesu i 'nanai ma maratagogi i aramanei da tauna.

⁵⁵ Iesu nolana, Galili provins anatapui i naeni ma i nonori da tauna mepa i mamae. Ma kampa, doridoriai rasirasiei i vivineiai.

⁵⁶ Iesu mepa i nenelana, melagai ḡaeḡae ma muomuoi ma wapu mepa rava e mamae lana. Ma rava, ai rava doridoriai nai au melagaina i neiai au deba. Ma i vibaḡa, da doridoriai, Iesu ana gara adana ava ita vodadani. Ma aiavo i Iesu ana gara i vodadani i lawana.

7

Amamami ai giu

(Matthew 15:1-9)

¹⁻⁴ Pharisi ma Jew anatapui, magumagura ai giu maḡamaḡai e notanota-jijini. Tau i, ai aniuma ma ai aniam anatapui e oḡaoḡai lamnei tau i e viaiaina-melei God au matana. Ma maranai au maket da e nenei, urai ina oḡai ma ina am. Tau i eḡa ina am da au naona urai ina oḡa kauei me ai magumagura ai giu nanare.

Maratagogi Pharisi ḡelau i Tarawatu Babadai, Jerusalem ei i nei Iesu awarina da ita rautaniḡanei. Ma tau i i 'nanai da Iesu ana tauvotaḡotaḡo ḡelau i, urai eḡa ita oḡai ma i amam.

⁵ Ma tau i, Iesu i vitara-virevirei i pa, “Aiwai aubaina am Tauvotaḡotaḡo magumagura ai giu, eḡa ita votaḡotaḡoi ma ana ura miramirai e amam?”

⁶ Ma Iesu i paribelei i pa, “Taumi morumorumi ma o vikaua-aiaina-melemi. God ana peroveta Isaiah i riwa kaua maranai i riwa, i pa:

‘Wei ravai ipiriei e vovoeapaepaiu,
wate nuanuai aueia.

⁷ Tau i rava ai giu e viviararamani.

Lamna aubaina ai voeapaepa anona eḡa.’

(Isaiah 29:13)

[‡] 6:37: 200 denarii. Denarius tagogi lamna taubagibagi ai maia au pom tagogo nolana aubaina. [§] 6:45: Eng. Bethsaida.

⁸ Taumi, God ana Tarawatu o teretere-tawanei ma ami giu o votaḡotaḡoi.”

⁹ Ma i riwana-melei i pa, “Taumi o aramana kaua da God ana Tarawatu o gedugeduaiei ma amamami ai giu o vovotaḡotaḡoi.

¹⁰ *God ana Tarawatu, Moses i girugirumia nanare: *Amam ma alom ma vivirei ma Aiai amana ma alona e enaena-boai, tauna ona viraḡenti.*

¹¹ Wate taumi o viararamana da aiai awarina mane bo purapura, amana bo alona ita voagui ma ita riwei, ‘Awarium e mamae da ata voaguim; wate lamna *Corban* - a tereriei pulo, God aubaina.’

¹² Wei viararamanana, tauri e vivigaei da amana ma alona ina voagui.

¹³ Ma wei taunei viararamana, rava awari o vividamani; ma God riwana o vivikwakwavi. Ma kaua maḡamaḡau gelai maiteni o kaukauei.”

*Metauna kauai, rava orai e vivimirai.
(Matthew 15:10-20)*

¹⁴ Iesu, patara i kwatuana-melei ma i riwei i pa, “Anatapumi ona rautaniḡaneu ma aiwai a ririwemi ona aramanei.

¹⁵⁻¹⁶ Aiwai au tanoei au orami e ruirui, lamna eḡa ita vivimiraimi ma aiwai da oramiei e opuopu, lamna e vivimiraimi God au matana.”*

¹⁷ Anina Iesu, patara i voterei ma i rui au numa. Ma ana tauvotaḡotaḡo, i vitara-virevirei da wei awanainana anona aiwai.

¹⁸⁻¹⁹ Iesu i paribelei i pa, “Taumi maiteni eḡa ota aramanei bo? Kaua aiwai au tano, rava au orai e ruirui amapo eḡa ina vimirai. Anona lamna wei kauai, eḡa ita ruirui rava au nuapouna, wate au manawana da e opuopu.” (Wei riwanei Iesu, lam anatapui i viaiaini).

²⁰ Anina ma i riwa i pa, “Aiwai, rava oranei e opuopu; lamna, rava e vivimirai God au matana.

²¹ Anina rava nuanuanei vinuanotanota apoapoei e opuopu me: viawawana labalababa, danene, viraḡena, awadanene,

²² ambo, rau-iviapoapoe, moru, erawa, unura, terevaideḡa, mae-ḡaeḡae ma opa.

²³ Wei kauai apoapoei anatapui oranei e opuopu ma rava e vimiramirai.”

*Jentail wavine,† Iesu i vitumaḡanei
(Matthew 15:21-28)*

²⁴ Ma dobuna i voterei ma i nae Taia ana au parata. Ma i rui govaḡa au numa ma eḡa ita ḡoei da rava ita aramanei da tauna kampa, wate eḡa tagotagogina da ita raugovaḡa.

²⁵⁻²⁶ Wavine tagogi, Iesu nolana i nonori ma i nei awarina. Tauna eḡa Jew ma Jentail au Phonisia i tupua, Siria ana au parata. Arua-apoapoea, tauna natuna wavinena aburuna i ruini; ma alona i nae Iesu au naona i mae-peu ma ma i vibaḡai da arua-apoapoea ita viopuni.

²⁷ Iesu i aramanei da tauna Jentail; lamna aubaina i riwei i pa, “Eḡa ita ai da roaroa ai lam ata vaia da auou ata verei da au naona roaroa ina am-iaua.”‡

²⁸ Ma wavine i paribelei i pa, “Bada, aiwai u riwei; lamna riwa kaua. Wate auou, roaroa ai lam momoḡina, kepakepa au gabaurina e raurau e aniani.”

²⁹ Ma Iesu wei i riwei i pa, “U paribelana kaua, aubaina ma nae au numa. Arua-apoapoea natum i opu-tawanei.”

³⁰ Ma wavine i naeme au numa. Natuna wavinena i 'nanai i matamatave, arua-apoapoea boiboḡi tevera i opu-tawanei.

Iesu, oroto taniḡa-potapotana ma mena birebirena i vilawani

³¹ Iesu ma Taia ma Sidon ana parata i netawanei ma au babaḡela Dekapolis i verautuini ma i nae au Galili topana.

³² Orotu taniḡana potapotana ma menana birebirena i neiai Iesu awarina ma i vibaḡai da urana au inina ita terei da ita vilawani.

³³ Iesu, oroto i taravaina-opunei da tau i ava ma ura-gigina, oroto au taniḡana i terei ma ura-gigina ḡelauna i ovai ma menana i vodadani.

³⁴ Nuanuana i bolai ma i ḡoutata au mara; i lavutu tawanana ma oroto i riwei i pa, “*Ephthal!*” Wei anona, “Ma wanatawanei!”

³⁵ Maratagogi taniḡana i wanatawanei ma menana i vidagudagu ma i babani kaua.

³⁶ Ma Iesu, tau i viḡaei da aiwai i tuputupua, avena rava ita vieḡei. Iesu, rava i viḡaei; wate tau i eḡa ita rautaniḡana ma riwa i vituai.

* **7:10:** Exo 20:12; Exo 21:17 * **7:15-16:** Giruma gelai Mark uranei i girugirumia wei riwai wenanare e mamae, “*Mepa da taniḡami e mamae, ona rautaniḡana.*” † **7:23:** Rava eḡa mai Jew. ‡ **7:27:** Riwa roaroa wei au awanaina lamna mai Jew. Tau i notanotai da tau i ai guratana eḡa me rava gelai. Lamna aubaina tau dobu gelai rava i ḡoreḡorei auou.

³⁷ Ma maranai ravai wei i nonori, tau i bana-kauei ma i riwa i pa, “Aiwai anapui i kauana-kauei. Tauna, rava taniġa potapota i vivilawani da e rarautaniġana ma menabirebirei e bababani.”

8

*Iesu, rava 4,000 i viambagibagi
(Matthew 15:32-39)*

¹ Nai maranai, patara ġaeġaena i riana-melei. Patara eġa ai lam. Ma Iesu, ana tauvotaġotaġo i kwatuei da i nei ma i riwei i pa,

² “Au pom tonuġa patara maiteni a mae ma ai lam eġa ma a rau-nuapoapoelei.

³ Tau i ġelau, uamei i nei. Mepa da ana am-irāġe ana paritawanei ai au numa, ma au etanai ina raumolaġau.”

⁴ Ma ana tauvotaġotaġo i paribelei i pa, “Wei mutulua ma mepa lam tana vaia da wei patarana tana viambagibagi?”

⁵ Ma Iesu, tau i paridadanei i pa, “Awarimi palawa biāġa?”

Tau i riwa i pa, “seven.”

⁶ Ma Iesu, patara i riwei da au doa i kiala. Ma palawa seven i vaia ma God i viegualaei ma i vogimagimai ma ana tauvotaġotaġo i verei da patara i verei.

⁷ Ma tau i awari, iana muomuoi ruāġa ota. Iesu i vaia; God i viegualaei ma ana tauvotaġotaġo i verei da patara i verei.

⁸ Tau i anapui i am da i am-iaua. Ma lam am tereterenai i tuarui da poa ġaeġaei seven i vioai.

⁹ Rava 4,000 i viambagibagi. Ma muriai i paritawanei ai au numa.

*Pharisi, God ana mataira i vibaġei
(Matthew 15:39-16:4)*

¹⁰ Maratagogi, Iesu ana tauvotaġotaġo maiteni au waga i geru ma i nae Damanuta ana au parata.

¹¹ Pharisi ġelau i nei ma vipariparigai i vikarei Iesu maiteni. Tau i ġoei da Iesu ita raudadani da mataira Godei ita viatataiei.

¹² Iesu, Aruane i lavutu tawanana ma i riwa i pa, “Wei kimta voui, aiwai aubaina mataira e ġoeġoei? A ririwana-kauemi, amapo mataira eġa ona inanai.”

Iesu, ana tauvotaġotaġo I parivainotai

¹³ Anina ma Iesu, patara i netawanei ma ana tauvotaġotaġo maiteni au waga i geru me ma i damana Topa Galili au baba ġelauna.

¹⁴ Ma ana tauvotaġotaġo, nuanuai i vuru da ai palawa ita vaia ma palawa tagogi ava au waga i mamae.

¹⁵ Iesu, tau i parivainotai i pa, “Pharisi ma Herod ai giu ma ai viararamana morumoruna ona inana-kauei! Lamna me yist.*”

¹⁶ Ma tau i babani vivira i pa, “Tauta eġa ata palawa aubaina da e ririweta.”

¹⁷ Ma Iesu i aramane ma tau i riwei, “Aiwai aubaina o bababani da taumi awarimi eġa palawa? Taumi amapo da eġa ota aramana ma o vivinuanaina? Orami i bado bo?”

¹⁸ *Matami e mamae ma eġa ota inainana. Ma taniġami e mamae ma eġa ota nonora. Ma o vinuanotanota bo eġa?”

¹⁹ Maranai palawa five a vogimagimai rava 5,000 aubai, lam am tereterenai o tami da poa biāġa o vioai?”

Tau i paribelei, “Twelve.”

²⁰ “Ma maranai palawa seven a vogimagimai rava 4,000 aubai, lam am tereterenai o tami da poa ġaeġaei biāġa o vioai?”

Tau i paribelei, “Seven.”

²¹ Ma tau i riwei i pa, “Ma amapo da o vivinuanaina!”

Iesu, oroto mata apoapoena i vilawani au Bethsaida

²² Tau i nei au Bethsaida ma rava ġelau, oroto matana apoapoena i neiai Iesu awarina ma i vibaġa-guratei da ita vodadani.

²³ Ma Iesu, oroto matana apoapoena i raunimavoai ma melagaiei i taravaina-opunei. Ma kampa matana i ovai ma urana au matana i terei ma i paridadanei, “Aiwai e inainanai bo eġa?”

²⁴ Ma i taepai ma i riwa, “Rava a inainanai ma tau i me ai ita bababara.”

* **8:15:** Yist mai Jew awarii awanainei lamna aiwai da apoapoe, mira bova e vivitua bo e vivimaġai. Weka Iesu mai Pharisee ma mai Herod ai lawana ma ai giu morumorui e babaniei, da eġa ina tua. ✪ **8:18:** Mrk 4:12

²⁵ Iesu, urana i tere-melei oroto au matana. Ma matana i wanatawanei da aiwai anapupuna i nana-kauei.

²⁶ Iesu, tauna i paritawanei ana au numa ma i riwei, “Eġa ma nae au melagai! Wate jġimanina ma nae au numa.”

*Peter i riwa da Iesu, tauna Keriso
(Matthew 16:13-16; Luke 9:18-20)*

²⁷ Iesu, ana tauvotaġotaġo maiteni i nae melagaii Caesarea Philipai au ġereġerei. Maranai i nena ma Iesu, tauri i paridadanei, “Rava e ririwa; tau aiwi?”

²⁸ Ma tauri i paribelei, “Ġelau i ririwa da tam, John Taubabaito. Ma ġelau Elijah. Ma ġelau e ririwa da peroveta wariaġana tagogi.”

²⁹ Ma Iesu, tauri i paridadanei, “Wate taumi, mena o notanota-nei? O ririwa da tau aiwi?”

Peter i paribelei, “Tam God ana *Messiah* - anona Keriso.”

³⁰ Iesu, tauri i viġaei da eġa aiwi ina riwei da tauna aiwi.

*Iesu ana iraqe ma ana vomairi me i babaniei
(Matthew 16:21-23; Luke 9:21)*

³¹ Ma Iesu i raukarei da ana tauvotaġotaġo i giuni i pa, “Rava Natuna ina vinuapoapoe kua. Ma dogadogara, piri si babadai ma tarawatu babadai, tauna ina pari-ġeduaiei ma ina viraġeni. Ma au pom tonuġa au murina ina vomairi me.”

³² Iesu jġimaninei wei kauai i bababaniei ma lamna aubaina Peter, tauna i taravaini au ririva ma enana i vikarei.

³³ Wate Iesu i mae-tavirei ma ana tauvotaġotaġo i nanai. Ma Peter i eni, i pa, “Satan ma nae au muriu! Tam am nota eġa Godei ita nenei, eġa da ravei.”

*Iesu votaġotaġona anona
(Matthew 16:24-28; Luke 9:23-27)*

³⁴ Ma Iesu, patara ma ana tauvotaġotaġo i raukwatuei ma i riwei, “Mepa da aiwi ita votaġotaġoi. Tauna ina boviana-melei ma ana korosi ina avarai ma ina votaġotaġoi.†

³⁵ Aiwi ana lawana e tatajġini, ina vine-boai. Ma aiwi da ana lawana i verenei; Tau ma Riwana Aiwi aubaina. Tauna ana lawana ina vaimelei.

³⁶ Ana aii bo anona aiwi, mepa da wei dobuna lawanana ma vigulauna ma vaipai ma am lawana maema-nonoana ma vine-boai.

³⁷ Wate aiwaiei am lawana ma gimara-melei.

³⁸ Mepa da aiwi: tau ma au viararamana ina vinimalei; ma i mae-puputeu; ma ana ġonei kua apoapoe ina kaukauei. Rava Natuna, tauna ina vinimalei maranaina ina nememei; Amanana ana au boruma anela vivivirei maiteni.”

9

¹ Ma Iesu, wenanare i riwei, “Taumi a ririwana-kauemi; rava ġelau meka o maimiri amapo eġa ona iraqe da God ana vigulau ona inana ana rewapanana ina nei.”

*Iesu inana i virai
(Matthew 17:1-13; Luke 9:28-36)*

² Au pom six murai, Iesu, Peter, James ma John i taravaini. Ma tauri ava i ġae ola ġaeġaena au tepana. Ma kampa tauri au matai, Iesu inana i virai.

³ Ana gara i arapora ma gamrina i vimata-kamokamota; eġa me aiwi ġelauna au dobu nanare.

⁴ Ma kampa au matai, Elijah ma Moses i eġa. Ma Iesu maiteni i bababani.

⁵ Ma Peter Iesu i riwei, “Taviararamana, i aii da tauta weka. Ma vianinei da numakweta tonuġa ana voai: tagogi tam aubaim, ġelauna Moses ma ġelauna Elijah aubaina!”

⁶ Ma tauri i rovo kua ma Peter eġa ita aramane i da aiwi i latoloni.

⁷ *Anina ma apau i eġa ma tauri i purui. Ma pona apauei i opu ma i riwa i pa, “Wei Tau Natu au nuavainana, ona rautaniġane!”

⁸ Maratagogi tauri i nana viravira ma eġa aiwi ġelauna ita inana ma Iesu, tauna ava.

⁹ Ma maranai olei i ġaiġairai ma Iesu, tauri i viġaei da aiwi i nananaia eġa ina vieġai da au naona Rava Natuna iraqelei ina vomairi me.

¹⁰ Ma tauri, wei riwana i voteletei ma i babani vivira i pa, “Iraġelei vomairi me anona aiwi?”

* 8:28: Mrk 6:14-15 † 8:34: Wei lamna awanaina. Anona lamna Iesu ana tauvotaġotaġo anina vinimala ma apoapoei ina nelaġai aubaina tauri, tauna i votaġotaġoi. Tauna eġa ita ririwa da ana tauvotaġotaġo au korosi ina iraqe me tauna.

* 9:7: Mrk 1:11

11 Ma tau, i vitara-virevirei i pa, “Aiwai aubaina, tarawatu babadai e ririwa da Elijah au naona ina nei?”*

12 Iesu i paribelei, “Riwa kaua Elijah au naona ina nei da aiwai anapuna ina vokaukauei. Aubaina wariāga i girumi da Rava Natuna ina vinuapoapoe kaua ma ina inana-geduaiei.

13 Wate a ririwana-kauemi da Elijah anina i nei ma rava, ai goanei tauna i rau-iviapoapoelele me i girugirumia nanare.”†

*Iesu, arua-apoapoena tevera orotona awarina i viopuni
(Matthew 17:14-21; Luke 9:37-43a)*

14 Iesu ana tauvotaḡotaḡo tonuḡa maiteni olei i ḡaira memei ai rava awari ma patara ḡaegaena, tau i gariḡuruvi. Ma Jew ai tarawatu babadai, tau maiteni i vivitarapiri.

15 Maranai patara, Iesu i 'nanai. Tau orai i auepai ma awarina i ruba ma i viegualaei.

16 Iesu, tau i vitara-virevirei, “Aiwai o vitarapiriei?”

17 Orotota tagogi patara au poui i paribelana, “Tauviararamana, arua-apoapoena natu orotona au orana e mamae ma i kauē da eḡa ita bababani, lamna aubaina a neiāi awarim.

18 Maranai ana doria e ururu-melei, lamna arua-apoapoena: tauna au doa e tawatawanei; gamona e vivipuropuro; ivona e utauta ḡiriḡiriei; ma inina e badobado. Am tauvotaḡotaḡo a vibaḡai da arua-apoapoena ita viopuni, wate eḡa tagotagogina da ita kauē.”

19 Ma Iesu i paribelei, “Oo mara aiwai ona vitumaḡana! Ta mae ḡaḡa ma ami vita ana 'vara ḡaḡalei? Tevera awariu ona neiāi!”

20 Ma tevera i neiāi Iesu awarina. Ma maranai arua-apoapoena, Iesu i 'nanai, maratagogi tevera i viaikwajiana-guratei da au doa i tonei ma i vitatauvira ma i vivipuropuro.

21 Iesu, tevera amana i vitara-virevirei, “Wei teverana ana doria mara aiwai i vikarei?”

I paribelei i pa, “Maranai aburunai.

22 Arua-apoapoena mara au anapuna, tauna ai ar araratana ma au waira e tawatawanei ma i ḡoei da ita viraḡeni. Mepa da tam tagotagogina; ma raunu'apoapoelelele ma ma voaguaiāi!”

23 Iesu, tauna i riwei, “Menanare da u riwa, 'Mepa da tam tagotagogina?’ Aiai ravana e vivitumaḡana, God anapuna ina kauē tauna aubaina.”

24 Maratagogi tevera amana i garara, “A vitumaḡana, wate au tumaḡana eḡa ita rata ma ma voaguui da ina rata!”

25 Iesu i 'nana da patara i rierieia i awarii ma lamna aubaina arua-apoapoena i egari i pa, “Tam arua taniga-potapotana ma gumgum. Tau a egaegarim da tevera ma opu-tawanei. Ma eḡa melanai au orana ma rui me!”

26 Ma arua i garara ma tevera i viaikwajiana-guratei ma i opu-tawanei. Ma tevera inanana me taubeu. Ma rava maḡamaḡau kampa i riwa, “Tauna i'raḡe!”

27 Ma Iesu, tauna urana i vojijini ma i sinaepai da i mairi.

28 Muriai Iesu, ana tauvotaḡotaḡo maiteni i rui au numa. Ma maranai tau i ava ma i paridadanei i pa, “Aiwai aubaina tauai eḡa tagotagogina da arua-apoapoena ata viopuni?”

29 Iesu, i riwa, “Arua-apoapoelele me wenanare, pari ainelana ina viopuni.”

*Iesu ana iraḡe i babaniana-melei
(Matthew 17:22-23; Luke 9:43b-45)*

30 Iesu, ana tauvotaḡotaḡo maiteni dobuna i netawanei ma Galili i verautuini. Iesu eḡa ita ḡoei da rava ita aramanei da tau mepa.

31 Aubaina tauna, ana tauvotaḡotaḡo i viararamani i pa, “Tau i Rava Natuna ina amverenei rava ḡelau au urai. Ma tau i ina viraḡeni. Wate au pom tonuḡa au murina ina vomairi me.”

32 Wate tau i eḡa ita aramanei tauna aiwai i bababaniei. Ma pari-dadanana i rovoei.

*Tauvotaḡotaḡo i vitarapiri vivira da aiai i ḡetelara
(Matthew 18:1-5; Luke 9:46-48)*

33 Iesu ana tauvotaḡotaḡo maiteni i ḡeta au Capeniam ma au numa i rui. Ma Iesu, tau i vitara-virevirei, “Au etanai aiwai o vitarapiriei?”

34 Wate tau i genuana, aubaina au etanai tau i vitarapiri vivira da aiai i ḡetelara.

35 *Iesu i kiala ma Apasol 12 i raukwatuei awarina ma i riwei i pa, “Aiai e ḡoeḡoe da ina vibada. Tauna ina tereḡairana-melei ma ina vimuri dewadewa ma ina vitaunola rava aubai.”

36 Ma Iesu, tevera i vaia ma au poui i vimairini. Ma urana au jiḡona i tere-taḡonei. Ma tau i riwei i pa,

* 9:11: Mai Jew i vitumaḡana da Elijah au naona ina nememei ma Keriso muriai ita nei. (Mal 3:1, 4:5-6). Ma tau i eḡa ita notai da Elijah rau-iviapoapoelele ina nelāḡai ana au nememei. † 9:13: Iesu lamna John Taubabaito i bababaniei da tauna Elijah (Mat 11:13-14, 17:10-13) ✱ 9:35: Mrk 10:43-44

³⁷ “Aiai ravana; tau wavauei, tevera wenanare i rauḡorei. Lamna tau maiteni e raraḡoreiu. Ma aiai da tau e raraḡoreiu. Lamna tauparitamaneu maiteni e raraḡorei.”

Aiai eḡa ata ḡavia, lamna turata
(*Luke 9:49-50*)

³⁸ Anina ma John, Iesu i riwei, “Tauviararamana! Tauai, oroto tagogi a inanai; tam wavamei arua-apoapoena i viviopuni ma tauna eḡa turata. Lamna aubaina a viḡaei da eḡa ina kauana-melei.”

³⁹ Iesu i riwa, “Eḡa ona viḡaei! Eḡa aiai au wavau kaua babai ina kauai ma muriai ina parivai-apoapoenui.

⁴⁰ Aiai ravana eḡa ata ḡavia; lamna turata.

⁴¹ Tau a ririwana-kauemi. Mepa da aiai ravana, waira i veremi tau au wavau; aubaina taumi au Tauvotaḡotaḡo. Tau ai maia eḡa ina vine-boai.”

Rauelara babanina
(*Matthew 18:6-9; Luke 17:1-2*)

⁴² Aiai ravana i kauai da wei teverana ana tumaḡana Tau awariu i viapoapoenui da ḡo’apoapoe i kauai. Lamna i ai da ḡaima ḡaeḡaena ravana au uatabana ina duri ma au boga ina tawanei aubaina God, tauna ina kovoga-guratei. ⁴³⁻⁴⁴ Mepa da nimam i kauem da ḡo’apoapoe u kauai. Ma bori-tawanei! I aii da nimam tagogiava ma lawana mamae-nonoana ma vaia. Ma eḡa ma kauai da nimam ruaḡa aiaii ma ma nae ai au menamenana; mepa ai eḡa melanai ita bobo.[‡]

⁴⁵⁻⁴⁶ Mepa da aem i kauem da ḡo’apoapoena u kauai. Ma bori-tawanei! I aii da sigesigem au lawana mamae-nonoana ma rui. Eḡa me aem ruaḡa aiaii ma ai au menamenana ina tawanem.[§]

⁴⁷ Ma mepa da matam ina kauem da ḡo’apoapoena u kauai. Ma vaitawanei! I aii da matam tagogi ma God ana vigulau ma rui. Eḡa me matam ruaḡa ma ai au menamenana ina tawanem;

⁴⁸ dobuna motamotana eḡa ita irairaḡe ma ai eḡa ita bobo.

⁴⁹ Au Tauvotaḡotaḡo anatatapupui, ai araratanei ina bogai.

⁵⁰ “Nia i ai lam viaiainana aubaina. Ma mepa da i tomatoma, mena ma vidagianei. Nia au orami ina mae ma ona viturana vivira!”

10

Iesu, tavine vilamonana i babaniei

¹ Ma Iesu, dobuna i netawanei ma i nae Judea ana paratana. Ma Waira Jordan i damani da au baba ḡelauna. Patara ḡaeḡaena i riana-melei. Ma Iesu i viaramana, me mara patapatana i kaukauei nanare.

² Ma Pharisi ḡelau i ḡoei da tauna ita waroi. Ma lamna aubaina i vitara-virevirei, “Tarawatu e mamae bo eḡa da rava, awana maiteni ita vilamonei?”

³ Ma Iesu i paribelei, “Moses ana Tarawatu aiwai e ririwei?”

⁴ Ma tau i riwa, “Moses ana Tarawatu e ririwa da oroto vilamona pepana ina girumi ma awana ina verei. Ma tau i ina vilamonei.”

⁵ Iesu i paribelei, “Taumi orami i bada. Au baina Moses wei Tarawatuna i terei.

⁶ *Wate ona notai da au karena, maranai God rava i kauai ma tauna oroto ma wavine i kauai.

⁷ *Ma lamna aubaina oroto amana ma alona ina netawanei

⁸ ma awana maiteni ina vitagogi da tau i eḡa ruaḡa me au naona ma tupua tagogi.

⁹ God aiwai i vitagogiei, eḡa aiai ina vilamonei.”

¹⁰ Maranai tau i naeme au numa, ma tauvotaḡotaḡo, Iesu i vitara-virevirei wei kauai aubaii.

¹¹ Iesu i paribelei, “Mepa da oroto, awana i voterei. Ma wavine ḡelauna i ravaḡi. Lamna tauna, awana awarina i rauviapoapoe.

¹² Ma nanarena mepa da wavine, awana i voterei ma oroto ḡelauna i ravaḡi. Lamna awana, awarina i rauviapoapoe.”

Iesu, roaroa i viaiaini

¹³ Rava ḡelau, roaroa i nei i Iesu awarina da urana au tepai ita terei. Ma ana tauvotaḡotaḡo, ravai i viḡaei.

¹⁴ Maranai Iesu wei kauai i nanai. Ma ana tauvotaḡotaḡo i eni ma i riwa, “Roaroa ona voterei da awariu ina nei. Ma eḡa ona viḡaei. Au baina God ana vigulau, lamna rava wenanare aubai me wei roaroai.

[‡] 9:43-44: Wariaḡa nimaiei i giruma damanei tau riwana tagogina me vs 48. [§] 9:45-46: Wariaḡa nimaiei i giruma damanei tau riwana tagogina me vs 48. * 10:6: Gen 1:27 * 10:7: Gen 2:24

¹⁵ A ririwana-kauemi. Aiai, God ana vigulau eġa ina vaia me tevera aburuna nanare. Tauna, eġa God ana au vigulau ina rui.”

¹⁶ Ma roaroa i taravaini ma i rapai, urana au tepai i terei, i raupari ma i viaiaini.

Purapura ravana

(*Matthew 19:16-30; Luke 18:18-30*)

¹⁷ Ma maranai Iesu ivomairi da inenae. Orotu i ruba ġeta ma au naona i raudune ma i riwa i pa, “Taugiu vinualaulaunam. Aiwai ana kauai da lawana maemae-nonoana ana vibuderiei?”

¹⁸ Ma Iesu i paribelei i pa, “Aiwai aubaina, tau u vikaua vinualaulauneu? God, tauna ava vinualaulaunana.

¹⁹ *Tam, God ana Tarawatu u aramanei, *Eġa ma viraġena! Eġa ma awadanene! Eġa ma danene! Eġa ma viwavu-moru! Eġa ma amkwalakwala! Amam ma Alom ma vivirei!*”

²⁰ Ma tauna i riwei, “Taugiu! Maranai tau aburueu da amadodo, wei tarawatui anatapui a voteletelei.”

²¹ Iesu, tauna i ‘nanai ma i vinuavaini ma i riwei, “Kaua tagogi e mamae eġa uta kaukauai. Ma nae ma am purapura anatapuna ma gimarei. Ma manena, rava molamolakai ma verei. Ma au mara God, tam ina vimaiei. Ma ma nei ma ma votaġotaġoiu!”

²² Ma maranai oroto wei riwana i nonori. Naona i peu ma ana nuabolana i nae; aubaina tauna, purapura ravana.

²³ Iesu i ‘nana viravira ma ana tauvotaġotaġo awari i riwa, “I pipiripi kaua da purapura ravana, God ana au vigulau ina rui.”

²⁴ Tauvotaġotaġo riwana i baiei maranai Iesu wenanare i babani. Ma Iesu i riwa me, “Natunatu! I pipiripi kaua da purapura ravana, * God ana au vigulau ina rui.

²⁵ I telatela kaua da ġamoġamo ġaeġaena wavana kamel, iġoma au gavogavona ina rui. Ma i pipiripi guratana da purapura ravana, ana lawana God ina verei. Ma God, tauna ina vibadei.”

²⁶ Taiu i vinuanaina ma ai nota i kwa. Ma taiu ava i babani vivira i pa, “Mepa da nanare; amapo aiai lawana mamae-nonoana ina vaia?”†

²⁷ Iesu awarii i ‘nana ma i riwei, “Rava awarii wei kauai i pipiripi. Wate eġa God awarina. God awarina aiwai anatapuna i telatela kaua.”

²⁸ Ma Peter i riwei, “Ma tauai menanare? Tauai ai purapura a voterei ma tam a votaġoim.”‡

²⁹ Iesu i paribelana, “A ririwana-kauemi. Aiai da ana numa bo varevareina bo novunovuna bo alona bo amana bo natunatuna bo ana wapu ina voterei ma tau ina votaġotaġoiu; tau ma Riwana Aiaina aubaina.

³⁰ Tauna ana maia ina rata kaua wei au dobuna. Tauna ana maia ina viaitepatepani da ana numa, varevareina, novunovuna, alona, natunatuna ma ana wapu, anatapui ina maġa. Rava ina rau-iviapoapoleem; aubaina tam, tau au Tauvotaġotaġo da mara au murina tauna lawana mamae-nonoana ina vaia.

³¹ Wate maġamaġau marina e vivinao; taiu ina vimuri. Ma maġamaġau da e vivimuri; ina vinao.”

Iesu ana irage babanina i vitonui

(*Matthew 20:17-19; Luke 18:31-33*)

³² Iesu, ana tauvotaġotaġo maiteni i ġeġae au Jerusalem. Iesu, taiu au naoi i nenae. Tauvotaġotaġo i baiei. Ma rava ġelau au muri i nenei i rovo kaua. S Ma taiu 12 i raugorei au ririva ma i raukarei da kaua amapo da awarina ina tupua; taiu i vieġei

³³ I pa, “Ona inana, tauta ta ġeġae au Jerusalem. Ma Rava Natuna ina verenei piriisi babadai; ma tarawatu babadai awarii. Ma taiu ana irage ina vianinei. Ma Mai Jentail ina verei.

³⁴ Ma tauna ina vijiboġi ma ina ovai ma ina kwapui ma ina viraġeni. Au pom vitonuina ina vomairi me.”

James ma John ai vibaġa

(*Matthew 20:20-28*)

* **10:19:** Exo 20:13; Exo 20:14; Exo 20:15; Exo 20:16; Exo 20:12 * **10:24:** Wei riwana buka ġelau awarii e mamae ma ġelau eġa *purapura ravana*. † **10:26:** Mai Jew i notai da rava vipurapurai lamna BADA ana verena ana nuavaina matairana, taiu e notai da BADA, rava vipurapurai eġa ina gagaloeli, tauna ravai ġelau maiteni eġa ina gagaloeli. ‡ **10:28:** Peter i ġoei da ita aramanei da tauvotaġotaġo ai au irage maiana aiwai, ina vaia. S **10:32:** Iesu i *ġeġae au Jerusalem* ma rava maġamaġau i viġaviei ma lamna aubaina ana tauvotaġotaġo i baiei da tauna tepana i tora da weka i nenae. Rava ġelau i votaġotaġo, taiu i rovo kaua da aiwai awarina ina tupua maranai i ġeta au *Jerusalem*.

35 - Zebedi natunatuna James ma John i nei Iesu awarina ma i vibaḡai i pa, “Tauviararamana! Tauai ai ḡoana a vivibaḡei uta kauēi.”

36 Iesu i riwa i pa, “Aiwai o ḡoēḡoēi ana kauēi aubaimi?”

37 Tau i paribelana, “Ma verelai da ana kiala, tagogi au oiem ma ḡelauna au kelakelaum am au vigulau.”

38 Iesu i paribelei, “Taumi eḡa ota aramanei aiwai o vivibaḡei! Iniviara kelakana ana umai. Taumi tagotagogina da ona umai bo? Tagotagogina ona babataito me tau ina babataitoi?”

39 I paribelei, “Tauai tagotagogina!”

Iesu i riwei, “Iniviara kelakana anina ona umai ma ona iraḡe me tau ana iraḡe.

40 Wate tau au rewapana eḡa ita mamae da ana veremi da mepa ona kiala au oieu bo au kelakelau. God, rava i vinevinei; tau i gabu i vokaukauei.”

41 Maranai Tauvotagotaḡo 10 ḡelau, wei riwana i nonori. Tau James ma John awarii i ḡaiawa.

42 Ma Iesu, tau anapui i ḡorei da awarina ma i riwei, “O aramanei da jentail ai babada, dobu ḡela ravai jentail awarii e mamae-ḡaeḡae ma e rarau-iviapoapoelei. Wate tau i babada ḡaeḡaei, ai rewapana i ḡetelera da ai rava e vibadebadei da ai ḡoana e kaukauei.

43 *Wate au tauvotagotaḡo eḡa nanare. Eḡa da aiwai i ḡoēi da ina ḡetelera taumi au poumi; tauna anina da ina vitaunola.

44 Aiwai i ḡoēi da ita vinao. Tauna ina vitaunola rava anapui aubai.

45 Ma nanare Rava Natuna eḡa ita nei da tauna, tana nolei. Wate ita vitaunola rava aubaii. Ma ana lawana ita verenei da rava maḡamaḡau i lawana ita gimara-melei.”†

Iesu, rava mata-potapotana Batimeus i vilawani

(Luke 18:35-43)

46 Ma tau i ḡeta au Jeriko. Iesu, ana tauvotagotaḡo, patara ḡaeḡaena maiteni dobuna i opuopu-tawanei. Ma oroto mata-potapotana, wavana Batimeias, Timaeus natuna au etanei i kiakiala ma i viamgigimana.

47 Maranai i nonori da tauna, Iesu Nasaretei; garara i raukarei i pa, “Iesu, tam David natuna! Ma raunu'apoapoeleu!”‡

48 Rava maḡamaḡau, tauna i rai ma i riwei da ita genuana. Wate tauna, garara i voguratei, “David Natuna! Ma raunu'apoapoeleu!”

49 Iesu i tumairi ma i pa, “Ona ḡoreiai!”

Anina tau, mata-potapotana i ḡoreiai i pa, “Tepam ina tora ma ma vomairi! E ḡoreḡoremi!”

50 Tauna, ana puru i tawanei ma i vomairi laḡilaḡina ma i nei Iesu awarina.

51 Iesu i paridadana i pa, “Aiwai u ḡoēi ana kauēi aubaimi?”

Mata-potapotana i paribelei, “Tauviararamana! A ḡoēi da ana inana me.”

52 Iesu i riwa, “Ma nae! Am tumaḡana i vilawanim.” Maratagogi tauna i nana me ma Iesu au eta i votaḡotaḡo.

11

Iesu i rui au Jerusalem

(Matthew 21:1-11; Luke 19:28-40; John 12:12-19)

1 Ma maranai Jerusalem i tuḡereḡerei ma i rui au Betphagi ma Bethani* au ola Olives. Ma ana tauvotagotaḡo ruaḡa i paritawanei,

2 ma i riwei i pa, “Ona nae au melagai au naomi. Maranai o ruiui, kampa donki natuna ḡaubo, raḡiraḡitana ona nelaḡai. Tauna eḡa aiwai ita geru-dadanei. Ona rupeni ma ona nei.”†

3 Mepa da aiwai ina paridadana, ‘Aiwai aubaina wei o kaukauei?’ Ona riwei, ‘BADA e ḡoēḡoēi ma maratagogi ina paritawana-melei.”

4 Ma i nae ma donki ḡaubona au doa au metaeta raḡiraḡitana i rupeni.

5 Rava ḡelau kampa i maimairi i paridadana i pa, “Aiwai o kaukauei donki ḡaubona o rupeupeni?”

6 Ma i paribelei me Iesu i ririweia nanare ma tau i voterei da i nae.

* **10:38:** ...babataito me tau ina babataitoi tau iniviara ma iraḡe e bababaniei, maranai Iesu au Gethsemani i rarapari muriai da ana iraḡe tauna ana nuabolana kelaka i babaniei (Mrk 14:36). Iesu, James ma John i riwei da nuabola ina nelaḡai.

† **10:43:** Mrk 9:35 † **10:45:** Iesu i vinuapoapoe ma iraḡe aubaita me Isaiah i girugirumia nanare au Isa 52:13-53:12.

‡ **10:47:** Maranai oroto mata-potapotana Iesu i kwatuei David natuna ma mai Jew i aramanei Keriso - BADA ana vinevine i babaniei. Mai Jew i aramanei da Keriso ai wavalatona me David wariaga nanare. Ma i nei da rava doridoriai ita vilawani me. (Sal 89:3-37 Isa 29:18-19 & 35:5-6 Jer 23:5-6 Ezk 34:23-24)

* **11:1:** Eng. Bethphage & Bethani. † **11:2:** Mai Jew awari, donki lamna nola aubaina ma eḡa gulau ana anigeru. Donki i gerui lamna e ririweta da tauna gulau ana nuabana ma vilamolamonana i nei.

⁷ Tau i *donki* i nei*ai* Iesu awarina ma ai puru au uporana i tawana-epai ma au tepana Iesu i kiala.

⁸ Ma rava maḡamaḡau*i*, ai puru au eta i ebani ma ḡelau*i*, ai rugurugu i taratarai*a* i ebani.

⁹ Tau i vivinao ma tau i muri i nenei i garara:

“Hosanna!”[‡]

“Viviaiainana tauna BADA au wavana e nenei!”

¹⁰ “Viviaiainana amata David ana vigulau e nenei!”

“Hosanna au aidamo telarana!”

¹¹ Iesu i ḡeta au Jerusalem ma i rui au Tempol ma anapuna i tuvirevirei ma au i biga aubaina, i opu me au Bethani, tau 12 maiteni.

Iesu, damala aina i parivai-irairaḡeni

(Matthew 21:18-19)

¹² Ma marana i tom, tau Bethani i opu-tawane*i* ma Iesu am-iraḡe.

¹³ Au weia ma damala aina i 'nanai ana ruguruguna. Ma i nae da ita inana*i* da i ua bo eḡa. Maranai kampa i ḡeta, eḡa aiwai ita nelaḡai. Anina ai ruguruguna ava, aubaina eḡa damala ana mara.

¹⁴ Iesu, damala aina i riwei i pa, “Eḡa ai*ai* amadodo ma amapo anom ina am-melei!” Ma ana tauvotaḡotaḡo i nonori aiwai i latoni.

Iesu, taugimara tempolei i viaḡaḡana-opunei

(Matthew 21:12-17; Luke 19:45-48; John 2:13-22)

¹⁵ Maranai tau i ḡeta au Jerusalem, Iesu i rui Tempol garina au orana ma taugimara i viaḡaḡana-opunei, mane tauviraina[§] ai kepakepa ma gabubu taugimareina ai anikiala i vitauvirai.

¹⁶ Ma i viḡaei da eḡa ai*ai* ana gimara Tempol au orana ita avarai-naiei.

¹⁷ *Ma rava i viararamani i pa, “I girugirumia nanare,

‘Au numa ina ḡorei pari numana
dam anapui au dobu aubaii.’

Wate taumi o vovirai da kwalakwalai ai guba.”*

¹⁸ Pirisi Babadai ma tarawatu Babadai i nonori ma i ogei da ita viraḡeni. Tau*i*, Iesu i rovoei aubaina patara ana viararamana i bai*i*.

¹⁹ Ma au bigai Iesu ana rava, Jerusalem i opu-tawane*i*.

Damala aina i poi

(Matthew 21:20-22)

²⁰ Ma ubaubanai tau i nena*e* ma damala aina i 'nanai anapuna i poi.

²¹ Peter i notai ma i riwa “Tauviraramana ma inana! Damala aina u parivai-irairaḡenia i poi.”

²² Iesu i paribe*lei*, “God ona vitumaḡane*i*!

²³ A ririwana-kauemi. Rava wei olana ita riwei, ‘Ma vomairi ma au boga ma tawanem!’ Ma nuanuana eḡa ina raḡaraḡa ma ina vitumaḡana da aiwai e ririweia, ina tupua.

²⁴ Lamna aubaina a ririwemi. Aiwai ami au pari o vibaḡei, ona vitumaḡana da taumi boiboḡi o vaia ma ina viḡarimie*i*.

²⁵ Ma maranai e raraupari, au naona rava anapui ai ḡo'apoapoe awarim ma nota-tawane*i*. Ma nanare amam au mara am ḡo'apoapoe ina nota-tawane*i*.”†

Jew babadai, Iesu ana vibadana i vitarapiriei

(Matthew 21:23-27; Luke 20:1-8)

²⁷ Tau i nememei au Jerusalem ma Tempol au orana i bababara. Ma Pirisi Babadai, Tarawatu Babadai ma dogadogara i nei Iesu awarina.

²⁸ Ma i paridadane*i* i pa, “Aiwai vibadane*i* wei kauai e kaukauei? Ai*ai* vibadana i verem da wei kauai uta kau*e*i?”

²⁹ Iesu i paribe*lei* i pa, “Au vitaraviravira tagogi ana terei ma ona paribe*leu*. Ma ana riwemi; aiwai vibadane*i* wei kauai a kaukauei.”

‡ **11:9:** Lamna pona Aram anona ma vilavaniai ma muriai lamna viegualau ma vimae-ḡaeḡaena aubaina. § **11:15:** Mai Jew ai au nota da mai Rome ma mai Greek aruai mane au tepana i terei, wei mai Jew awari lamna god morumoruana. Mane tauviraina au Tempol mane dobu ḡelau*i* i virai da Tempol mane wei lamna Jew tarawatu i vianinei gimara au Tempol aubaina (Exo 30.13). ✧ **11:17:** Isa 56:7 * **11:17:** Iesu dobuḡela manena tauviraina ma gimara ravai i viwavui da tau*i* pari numana i vovirai da amkwalakwalai ai guba, tau*i* rava ai arua nolana e viviaapoepeni Jer 7:11-15. † **11:25:** Riwa wadubo nonoana uraie*i* i girugirumia vs 26 weka eḡa ita mamae, *Mepa da rava ai apoapoei eḡa ma nota-tawane*i*, amam au mara nanare am apoapoei eḡa ina nota-tawane*i*.*

³⁰ Aiai, John taubabataito vibadana i verei da rava ita babataitoi, God bo rava? Ona riweul!”

³¹ Tau i vitarapiri vivira, “Mepa da tana riwa, ‘Godei.’ Tauna ina riwa, ‘Ma aiwai aubaina eġa ota vitumaġanei?’

³² Wate eġa tana riwa da, ‘Ravei.’ Tau rava i rovoei, aubaina rava anatapui, ai nota da John anina peroveta.

³³ Ma i paribelei, “Tauai eġa ata aramanei.” Iesu i riwa, “Tau nanare eġa ana riwemi aiwai vibadanei wei kauai a kaukauei.”

12

Tauipi ai awanaina

(*Matthew 21:33-46; Luke 20:9-19*)

¹ *Iesu i vikarei ma awanainei awari i babani i pa, “Mara tagogi oroto, ana wapu i kauai ma grape i paewi* ma i gari ma grape anigudana ma violaġa numana i voai. Ma tauipi ġelau i verei da ita nolei taui anatapui aubai. Ma i vaġai au dobu ġela.

² Tuaruta ana mara i ġetai ma taniwaga, ana taunola i paritawanei tauipi awarii da ana ġuta ita vaia.

³ Wate tauipi, tauna i vojijini ma i kwapui ma kwakwawina i paritawanei.

⁴ Ma taniwaga, taunola ġelauna i paritawanei. Ma tau, kolana i viaibauni ma i vitepaubaubai.

⁵ Ma taunola ġelauna i paritawanei ma tauna i viraġeni ma i maġa ġelau i paritawanei, ġelau i kwapui ma ġelau i viraġeni.

⁶ Ma tagogi ava e mammae da ina paritawanei. Lamna natuna orotona tagotago ana nu-avainana. Ma tauna au murioina i paritawanei ma i pa, ‘Tau, natu ina vivirei.’

⁷ Wate tau, tauna i ‘nanai ma i riwa vivira i pa, ‘Wei taniwaga natuna. Ona nei, tana viraġeni ma ana buderi ina viġaritaiei!’

⁸ Ma i vunui ma i viraġeni ma tupuana wapuei i tawanana-opunei.

⁹ –Wapu taniwagana marina aiwai ina kauai tau awarii? Tauna ina nei ma tauipi ina viraġeni ma grape wapuna ina veredamanei tauipi ġelau awari.

¹⁰ Wei girumana o iavi bo eġa?

‘Wei ġaimana, tauvoa i ġeduaiei,
wate muriai i nelaġai da tauna ġaima kaua.

¹¹ Wei lamna, BADA ana kaua
ma inanana i vinualaulauna.”

(*Psalm 118:22-23*)

¹² Jew babadai i aramanei da awanaina lamna tau i bababaniei ma i ġoei da ita pani. Wate tau i patara i rovoei, lamna aubaina Iesu i voterei ma i nae.

Caesar awarina tax tana terei bo eġa?

(*Matthew 22:15-22; Luke 20:20-26*)

¹³ Ma Pharisi ġelau ma Herod ana rava ġelau i nae Iesu awarina da riwei ita waroi.

¹⁴ Tau i nei ma i riwa, “Tavviararamana, tauai aramanei da tam rava jijmanim. Ma rava wavai naenaie ma rava labalababa eġa uta vibainaenaie ma anatapui e vaivaia da tagogi. Wate tam God ana babani riwa kauai e viararamani. Ma riwelai tax tana terei Rome gulauna wavana Caesar[†] awarina, i aii bo eġa?”

¹⁵ Wate Iesu, ai moru i ‘nana-bauni ma i riwei, “Aiwai aubaina o raudadaniu? Mani tagogi ona neiai da ana inanai!”

¹⁶ Denarius tagogi i neiai Iesu awarina ma tau i vitara-virevirei, “Wei aiai aruana ma wavana?”

I paribelei, “Caesar.”

¹⁷ Iesu i riwa, “Aiwai Caesar ġarinei, Caesar ona verei. Ma aiwai God ġarinei, God ona verei!” Ma tau i baiei.

Sadusi ġelau, Iesu i vitara-virevirei irairaġelei vomairina aubaina

(*Matthew 22:23-33; Luke 20:27-40*)

¹⁸ *Mai Sadusi ai vitumaġana da rava eġa ita vovomairi-me maranai e irairaġe.[‡] Anina ma ġelau i nei Iesu awarina ma i paridadanei,

* **12:1:** Isa 5:1-2 * **12:1:** Parivainota wadubona, God au anatapuna Israel e bababaniei me tauna ana grape wapuna, me Isa 5:1-2. † **12:14:** Sisa. * **12:18:** Act 23:8 ‡ **12:18:** *Sadusi* tau i gulugulau ma rava ġaġaei mai Jew ai ġiu babadai tau i maiteni eġa ita vitumaġana da *anela* bo arua ġelau e mammae ma buka 5 i vinoa, Moses i girugirumia, tau i lamna ava e vivitumaġanei (Karenia, Exodus, Leviticus, Numbers, Deuteronomy). Ma eġa buka ġelau. Wate Moses ma BADA riwai ei tau i viatataiei da lawana e mammae irage au murina.

¹⁹ “Tauviararamana! God ana tarawatu, Moses wenanare i girumi: Mepa da oroto i'raḡe ma kaiababana i netawanei ma eḡa natunatuī. Orotō vareina kaiababana ina ravaḡi ma roaroa ina ḡuni vareina aubaina.

²⁰ Mara tagogi varevarei seven i mae. Ma natuevou i tavine ma eḡa natunatuna ma oroto i'raḡe.

²¹ Vareina viruaina kaiababa i ravaḡi ma tauna maiteni eḡa natuna ma i'raḡe. Ma nanare vareina vitonuina.

²² Ma nanare anapui seven, wavinena i ravaḡi ma eḡa natunatuī. Au muriai wavine i'raḡe.

²³ Anapui seven, wavinena i ravaḡi. Vomairi me au marana, lamna aiai awana?”

²⁴ Iesu, tau i riwei, “Aiwai Moses i girumi ma God ana rewapana eḡa ota aramanei.

²⁵ Maranai tau i raḡelei ina vomairi, tau i eḡa ina tavine bo ina vitavinei. Wate ina mae me anela au mara.

²⁶ “Ma rava i raḡelei ai vomairi babanina, Moses ana tarawatu eḡa ota iavi bo? Mepa ai i ararata lana, kampa God Moses i riwei: *Tau Abraham ana God ma Isaac ana God ma Jacob ana God.*

²⁷ Tauna eḡa rava irairaḡei ai God, wate rava lawalawai ai God. Taumi o moru kaua!\$”

Tarawatu ḡeḡetelarana

(Matthew 22:34-40; Luke 10:25-28)

²⁸ Ma tarawatu badana tagogi i nae ma ai vitarapiri i nonori. Ma i nonori da Iesu i babani kaua, lamna aubaina tauna i vitara-viravira, “God ana tarawatu metauna i ḡetelara?”

²⁹ *Iesu i paribelei, “Ḡeḡetelarana tagogi lamna wei: *Ona rautaniḡana Israel! BADA ata God, tauna ava BADA.*

³⁰ BADA ami God nuanuami ina vaia orami anapunei ma aruami anapunei ma ami nota anapunei ma ami rewapana anapunei!

³¹ *Ma viruaina lamna wei: *Rava ḡelau nuanuam ina vaia me tam nuanuam e vaivai-melei!* Wei tarawatu ruaga i ḡetelara, eḡa me ḡelau nanare.”

³² Tarawatu badana i riwa, “Tauviararamana u babani kaua! Riwa kaua u babaniei, BADA Tauna ava God ma eḡa mepa ḡelauna.

³³ Ma nuanuami ina vaia orami anapunei ma ami nota anapunei ma ami rewapana anapunei. Ma, *Rava turam nuanuam ina vaia me tam nuanuam e vaivai-melei.* Wei tarawatu ruaga lamna i ḡetelera, eḡa me pulo apuapunana bo pulo ḡelau.”

³⁴ Iesu i 'nanai da tauna i paribelana kaua ma i riwei, “Tam, God ana vigulau au ḡereḡerena e ḡeḡeta.” Ma eḡa aiai tepana ita tora da Iesu ita vitara-viravirana-melei.

Keriso tauna aiai?

(Matthew 22:41-46; Luke 20:41-44)

³⁵ Maranai Iesu au Tempol i viararamana ma i vitara-viravira i pa, “Aiwai aubaina Tarawatu Babadai e ririwa da Keriso tauna David natuna?”

³⁶ * Arua Vivivireina, David nota i verei ma tauna i riwa:

'MAMAE-NONOANA au gulau i riwei,

Au oieu ma kiala

da am ḡavia

au ae karem da ma tuvaidoedoei.'

(Psalm 110:1)

³⁷ —David, tauoina wei gulauna i ḡorei bada. Ma menanare da badana lamna, David natuna?” Patara ḡaeḡaena riwana i nonori ma i vinuai.

Iesu, Tarawatu Babadai ai kaua i babaniei

(Matthew 23:1-36; Luke 20:45-47)

³⁸ Ma Iesu, tau i viararamani i pa, “Tarawatu babadai ona rovoei. Ai gara manamanai ma e bababara nae au deba da rava tau i vivivirei.

³⁹ Tau i anikiala vinevinei pari au numana ma au torela, gabu aiaii e vaivaia.

⁴⁰ Tau i, kaikaiababa e morumorui ma ai numa e kwalekwalei, e morumoru ma e raraupari-vai-manamanawa. Tau i ai kovoḡa ina apoapoe guratana.”

Kaiababa ana pulo

(Luke 21:1-4)

⁴¹ Ma Iesu, pulo aniterenana au baba ḡelauna i kiala ma rava i 'nananai mane i tereterei. Rava maḡamaḡau vivimanei, mane maḡamaḡau i terei.

* 12:26: Exo 3:6 § 12:27: ...wate rava lawalawai ai God. Mepa da BADA i riwa da tauna Abraham ma Isaac ma Jacob ai God, tau lawalawai maranai BADA, Moses awarina i babani. * 12:29: Deu 6:4-5 * 12:31: Lev 19:18 * 12:36: Psa 110:1

⁴² Wate kaiababa molamolakana i nei ma mane muomuoi ruağa i terei, ruvana i aburu kaua.

⁴³ Ana tauvotağotağō i ġorei ma i riwei, “Anina a ririwemi, wei kaiababa molamolakana i tere-guratei, eğa me tauī ġelauī.

⁴⁴ Tauī ġelauī ai maurei i verena, wate wei kaiababa molaka ma ġarinei anatapuna i terei, ana anilawana anatapuna.”

13

Iesu i riwa da rava God ana Tempol ina rikai

(Matthew 24:1-2; Luke 21:5-6)

¹ Iesu, Tempol i nene-tawanei ma ana tauvotağotağō tagogi i riwa, “Tauviararamana! Numa i viğulau ġağa ma numa ġaimai i rata ġağa.”

² Iesu i pariblei, “Wei numai ġaeğaei u inanaī, eğa ġaimai tagogi, turana au tepana ina mae. Ġaima anatapui ina rikai.”

Rava ina vinuapoapoe kaua. Iesu ana tauvotağotağō ina vipatutu

(Matthew 24:3-14; Luke 21:7-19)

³ Iesu i kiakiala au ola Olives, Tempol au navanavağela ma Peter, James, John ma Andrew i nei ma i vitaraviravirana govağei

⁴ i pa, “Ma riwelai mara aiwai wei kauai ina tupua? Ma aiwai ina vimataira da wei kauai anatapui ina tupua?”

⁵ Iesu, tauī i riwei, “Ona inana kaua da eğa aiwai ina terevaideğaimi!

⁶ Rava mağamağai, wavauei ina nei ma ina riwa, ‘Tau Keriso tauvilawana!’ Ma rava mağamağai ina terevaideğai.

⁷ Ma maranai viğavia ona nonori ma viğavia aueia riwana ona nonori; eğa ona rovo! Wei kauai anina da ina tupua, wate wei eğa damona.

⁸ Dam, damai ina viğavia vivira ma dobu, dobuai ina viğavia vivira. Ma lolo ma gomara dobu au anatapuna. Wei kauai, lamna me wavine ana iniviarā e vivikarei maranai e vivinatuna.

⁹ —Ona inana kaua! Taumi ina panimi ma ina etaremi ma pari numana au orana ina kwapuimi. Ma gavena ma gugulau au naoi ona mairi, aubaina taumi o votağotağoiu. Ma tauī awari, Riwa Aiaina ona raugugulei.

¹⁰ Riwana Aiaina ona raugugulei rava anatapui awari ma muriai damona ina nei.

¹¹ Ma maranai i panimi ma i etaremi. Eğa ona vinuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eğa taumi ota babani, wate Arua Vivivireina.

¹² Rava, vareina ina verenei da ina virağeni. Ma ama, natunatuna ina verenei da ina virağeni. Ma roaroa, amamai ma aloloi ina viğavie i da ina irağe.

¹³ Rava anatapui ina geduaiemi tau aubaiu. Wate aiwai da e maimairi-jijina da au damona, tauna ina lawana.”

Iniviarā ġaeğaeina ana mara

(Matthew 24:15-28; Luke 21:20-24)

¹⁴ “Maranai ‘Kaua apoapoe kaukauana’* e maimairi mepa avena ita mairi. (Buka tauia-vana wei ina aramaneī anona aiwai). Tauī aiavoi au Judea ina ruba lağilağina au ola.

¹⁵ Aiwai numa au tepana eğa ina ġaira bo ina rui au numa da aiwai ina vaia.

¹⁶ Aiwai au wapu eğa ina naeme au numa da ana gara ina vaia.

¹⁷ Ma iniviarā ġaeğaeina, waivine duaduamai ma tauī da e viviguğū awari nai au marana!

¹⁸ God awarina ona raupari da wei kauai eğa au bodu ina tupua.

¹⁹ ☉Ma nai au marana amapo iniviarā ġaeğaeina. Ma maranai God dobu i kauēi, iniviarā ġaeğaeina eğa nanare ita tupua ma amapo eğa nanare ina tupua me.

²⁰ Wate BADA nai marana ina vitupoi. Mepa da eğa ina vitupoi, rava anatapui ina irağe. Wate rava, tauna ana vinevine ina vilawani lamna aubaina mara ina vitupoi.

²¹⁻²² —Muriai keriso tauvilawana morumorui ma peroveta morumorui ina nei ma mataira ma kaua babai ina kauēi ma ina kauana dadanei da God ana vinevine maiteni ita terevaideğai. Lamna aubaina mepa da aiwai ina riwemi, ‘Ma inanaī, Tauvilawana noi!’ bo ‘Tauna noi!’ Nai babanina eğa ona vitumağaneī!

²³ Ona inana kaua; anatapuna a riwana-nonoemi!”

Rava Natuna ana nei

(Matthew 24:29-31; Luke 21:25-28)

* **13:14:** Eng. *Abomination of Desolation* Dan 9:27 11:31 & 12:11 ☉ **13:19:** Da 12:1

²⁴ Iesu wenanare i riwa, “Ma iniviarā gāeḡaena au murina.

Madeḡa eḡa ina rarana

ma nawaravi eḡa ina lalai.

(*Isaiah 13:10*)

²⁵ *Ma ubona marei ina peu*

ma rewapana ḡelau i au aidamo ina gui.

(*Isaiah 34:4*)

²⁶ ☩—Nai maranaina, Rava Natuna ana rewapanana ma ana borumana apauei ina nei.

²⁷ Ma Tauna, ana anela ina paritawanei dobu au anatapuna da rava tauna ana vinevine ina tuarui dobu au damona da dobu ḡela au damona.”

Damala ana awanaina

(*Matthew 24:32-35; Luke 21:29-33*)

²⁸ “Damala aina ana awanaina ona aramanei. Maranai ai e numonumoi, lamna ona aramanei da maura e tuturiai.

²⁹ Ma nanare, maranai wei kauai anatapui ina tuputupua, ona aramanei da Rava Natuna i turiai; au metaeta i ḡetai.

³⁰ Anina a ririwemi da wei kauai au naona ina tupua ma muriai da rava marina lawalawaii ina iraḡe.

³¹ Mara ma dobu ina amoa. Wate riwau eḡa ina amoa.”

Bada ainelana ana nei i aramanei

(*Matthew 24:36-44*)

³² “Ma eḡa aiai ita aramanei nai marana bo madeḡa aiwai ina nei. Anela au mara eḡa ita aramanei ma Natuna eḡa ita aramanei. Amana, tauna ava i aramanei.

³³ Ona vineḡeḡana ma matami ina kala!† Eḡa ota aramanei mara aiwai, wei kauai ina tupua.

³⁴ Wei me rava ana numa i netawanei ma i vaḡai. Ma ana taunola nununai i terei da ita vipaipai ma tagotagogi ava ai nola i verei da ita kauai. Ma tauvineḡeḡana i riwei da ita vineḡeḡana.

³⁵ Ona vineḡeḡana! Eḡa ota aramanei mara aiwai, numa taniwagana e nenei; mepa da au bigai bo au nubautuva bo maratomtomi bo ubaubanai.

³⁶ Ma eḡa matamatavemi ina nelaḡaimi.

³⁷ Aiwai riwana a ririwemi, riwana tagogina rava anatapui a riwei, ona vineḡeḡana!”

14

Jew ai babada, Iesu i ogei da ita viraḡeni

(*Matthew 26:1-5; Luke 22:1-2; John 11:45-53*)

¹ ☩Au pom ruaḡa muriai da Raḡona ma Palawa Bagibagina torelai,* Pirisi babadai ma Tarawatu Babadai eta i baibaiei da menanare govagovaḡanei Iesu ita vunui.

² Ma i riwa, “Au torela wei kauai eḡa tana kauai, mepa da viḡaiḡaiawa gāeḡaena ina tupua.”

Wavine, daji ḡabuḡabuna Iesu au kolana i waḡi

(*Matthew 26:6-13; John 12:1-8*)

³ Maranai Iesu au Bethani, Simon i ḡoreḡorei lepeleperana ana au numa i kiala ma i amam. Wavine, wagi wavana alabaster i voai ma i ḡeta ma wagi uana i vogai ma daji ḡabuḡabuna, maiana gāeḡaena e ḡoreḡorei *nard*, Iesu au kolana i waḡi.

⁴ Rava ḡelau kampa i mamae i ḡaiawa ma i riwa, “Aiwai aubaina daji u vikalokaloei?

⁵ Wei dajina ita gimarei 300 *denarii* † ruvana ma manena molamolakai ita verei.” Ma tau, wavine i vienenei.

⁶ Wate Iesu i riwa, “Ona voterei! Aiwai aubaina o vinuabolai? Tauna, kaua aiaina awarui i kauai.

⁷ Molamolakai awarimi e mamae-nonoa ma ona ḡoei ma tau i ona voagui. Wate tau awarimi eḡa ata mamae-nonoa.

⁸ Wavine ana nola i kauai. Tauna, dajiei tupuau i vokaukauana-nonoai vikokoaga aubaina.‡

⁹ A ririwana-kauemi, mepa Riwana Aiaina i raugugulei dobu au anatapui, wei wavinena aiwai i kaukauei ina babaniei, ma eḡa nuanuai ina vuru.”

¹⁰ Judas *Iskariotei* tauna Apasol tagogi, Pirisi Babadai awari i ḡeta da Iesu ita vibenabenamei.

¹¹ Tau i vinuai ai kaua maranai wei i nonori ma Judas i parivainuaḡani da mane ita verei. Ma Judas i 'nana da mepa gavogavo ita inanai da Iesu ita amverenei.

☩ **13:26:** Da 7:13 † **13:33:** Wedau *Evanelia* i girumi, ma i raupari, wate buka wadubo nonoana wei eḡa ita mamae, Luk 21:16 kampa ona inanai da e mamae. ☩ **14:1:** Exo 12:1-27 * **14:1:** *Raḡona (passover)* Exo 12:1 *Palawa eḡa yist maiteni (Unleavened-Bread)* Exo 12:17 & 23:15 † **14:5:** Wei lamna me taubagibagi ana maia madeḡa tagogi aubaina. ‡ **14:8:** Mai Jew ai kaua da taubeu dajiei e bulubuloi muriai au kokoaga e tereterei.

Iesu ma Apasol, Raḡona torelana i ani.

(Matthew 26:17-25; Luke 22:7-14, 21-23; John 13:21-30)

¹² Ma Palawa Bagibagina torela ina vikarei. Maranai sipu orotoi ḡauboi e vunuvunui Raḡona torelana aubaina. Tauvotaḡotaḡo, Iesu i paridadanei, “Mepa u ḡoeḡoei Raḡona torelana ana vokaukauei aubaim?”

¹³ Iesu, tau i ruaḡa i riwei ma i paritawanei, “Ona nae au Jerusalem ma oroto, waira wagina e avavarai ona inana ma ona votaḡotaḡoi.

¹⁴ Au numana e ruiuiiana, numa taniwagana ona riwei, ‘Ai tauviararamana i riwa, “Numa vokaukauana mepa ma au Tauvotaḡotaḡo maiteni Raḡona torelana ana ani?”

¹⁵ “Ma tauna, numa vatavatara ina viatataiem i vokaukauana-nonoie ma kampa aubaita ona vokaukaau.”

¹⁶ Tauvotaḡotaḡo i nae au Jerusalem ma i ririweia nanare i nelaḡai ma Raḡona torelana i vokaukauei.

¹⁷ Au i biga ma Iesu i nei Apasol maiteni.

¹⁸ Tau i kepakepa i amam ma Iesu i riwa, “Anina a ririwemi. Taumi tagogi ina vibenabenameu; tagogi weka maiteni amam.”

¹⁹ Tauvotaḡotaḡo i vinuabola ma tagotagogi ava i pa, “Eḡa tau tapa?”

²⁰ Iesu i paribelei, “Taumi tagogi weka palawa e vivigaloi au aboma tau maiteni.

²¹ Wariḡa i girugirumia nanare, Rava Natuna ina iraḡe. Wate ai ai da Rava Natuna i vibenabenameu; tauna, kovoḡa ḡaḡaena ina vaia! I aii da alona avena ita vinatunei.”

²² Maranai i amam ma Iesu palawa i vaia ma i viegualau, i vogimagimai ma Tauvotaḡotaḡo i verei ma i riwa, “Ona vaia; wei tupuau.”

²³ Anina ma *wine* kelakana i vaia ma i viegualau ma i verei da anapui i umei,

²⁴ *²⁴ “Wei tau tarau i toi rava maḡamaḡau aubai ma au parivainuaḡana bagibagina ina vovai-virewapani.

²⁵ Anina a ririwemi, *wine* eḡa ana uma-melei da maranai God ana rava aubai ana vigulau.”

²⁶ Ma tau voepaepa welana i ravi ma i ḡae au Ola *Olives*.

Peter, Iesu ina boviei

(Matthew 26:31-35; Luke 22:31-34; John 13:36-38)

²⁷ Iesu, tau i riwei “I girumi nanare,

God i riwa, ‘*Tauviḡamoḡamo ana viraḡeni ma sipu ina vilamonei.*’ (Zekariah 13:7)
Ma nanare anapumi ona ruba-tawaneu.

²⁸ Wate au vomairi au murina ana aivinao au Galili.”

²⁹ Peter i riwa, “Mepa da anapui ina rubatawanem, wate eḡa tau!”

³⁰ Iesu, Peter i riwei, “A ririwana-kauem da amadodo waguvarai muriai da kokoreko ina tou mara ruaḡa; tam mara tonuḡa ma boviu.”

³¹ Wate Peter, ponana i bagibagi ma i riwa, “Avena mepa da tau, tam maiteni ana iraḡe. Eḡa melanai ana boviem!” Ma tau i ḡelau riwana tagogina i latoni.

Iesu au Gethsemani i raraupari

(Matthew 26:36-46; Luke 22:39-46)

³² Ma au Gethsemani i ḡeta ma Iesu, ana tauvotaḡotaḡo i riwei, “Weka ona kiala ma ana raupari.”

³³ Ma Peter, James ma John i taravaini ma nuanuana i raḡe ma nuanuana i bola-kauei.

³⁴ Ma tau i riwei, “Au nuabola i rata kua au orau da e vunuvunui. Weka ona mae ma ona vineneḡana.”

³⁵ Ma aburuna i verau-nae ma au doa i peu ma i raupari da mepa da tagotagogina, lamna wei marana apoapoena tauna ita netawanei.

³⁶ I riwa i pa, “*Abba* Amau! Aiwai anapuna tagotagogina tam awarim. Wei kovoḡa kelakana ma vaitawanei. Wate eḡa tau au ḡoana, wate tam am ḡoana.”

³⁷ Ma Iesu i nememei ma tau tonuḡa rarau-nuavurui i nelaḡai. Ma Peter i riwei, “Simon!§ tam aiwai matavena? Mara aburuna uta vineneḡana bo eḡa?”

³⁸ Ma Iesu, tau i riwei, “Ona vineneḡana ma ona raupari da eḡa au raelara ona peul! Arua e ḡoeḡoei, wate tupua i ḡokokokara.”

³⁹ Ma i naeme ma parina tagogina i raupariei.

⁴⁰ Maranai i nememei ma i nelaḡai, i matamatave; tau, matai i vitai. Ma tau eḡa ita aramanei aiwai ita riwei.

* 14:24: Exo 24:8; Jer 31:31-34 § 14:37: Au Mrk 3:16 *Simon* wavana i virai da *Peter*.

41 Mara vitonuina i nene-memei ma tau i riwei, “Taumi amapo ona matamatave ma laumi ina tautau? Anina! Mara i ġetai, ona inana. Rava Natuna ina vibenabenamei ġo’apoapoe ravai au urai.

42 Ona vomairi; tana nae; ona inana! Tauvibenabenamei e nenei!”

Iesu i pani

(Matthew 26:47-56; Luke 22:47-53; John 18:3-12)

43 Iesu i bababani ma Judas, tauna ana Tauvotaġotaġo tagogi i ġetai. Tauna, patara ana apiai maiteni i nei. Pirisi Babadai ma Tarawatu Babadai ma dogadogara, wei ravai i paritawaneiai.

44 Muriai da Iesu awarina ita ġeta; Judas, patara ai mataira i verei, “Orotona ana vigia laġolaġonei; nai tauna. Ona pani ma ona naiei ma ona inana-kauei!”

45 Maranai Judas i ġeta ma i nae Iesu awarina ma i riwei, “Tauviararamana!” Ma i vigia-laġolaġonei.

46 Ma tau, Iesu i vojijini ma i pani.

47 Ma tagogi kampa i maimairi, ana sword i taina-lavui ma Pirisi ġeġetelarana ana taunola tanigana i borituini.

48 Ma Iesu, tau i riwei, “Taumi ana apiami o nei da ota panu bo, apamina tau amkwalak-walau?”

49 Marana patapatai taumi maiteni ta mamae au Tempol ma a viararamana ma eġa ota panu. Ma i girugirumia nanare, ina tupua.”

50 Ma Tauvotaġotaġo anapui, Iesu i voterei ma i ruba-tawanei.

51 Ma laraga tagogi, i vikareko ma Iesu i votaġotaġoi. Tau i ġoei da ita vojijini,

52 wate ana kareko i vojijini ma tauna ana kovakovana i ruba.

Tau, Iesu i etarei.

(Matthew 26:57-68; Luke 22:54-55, 63-71; John 18:13-14, 19-24)

53 Ma tau, Iesu i naiei Pirisi Ġeġetelarana. Pirisi Babadai, dogadogara ma Tarawatu Babadai mepa i vitagogieiana.

54 Ma Peter i votaġotaġo da Pirisi Ġeġetelarana ana numa. Ma ana au debadeba, purusi-mani maiteni i kiala ma i viviairara.

55 Pirisi Babadai ma mai Jew ai boru ġeġetelarana, * Iesu ana apoapoe i baiei da ita viraġeni; ma i baiana-avei.

56 Matamata maġamaġau, Iesu i viwavu-morumoruei, wate ai viwavu taputapune i ava.

57 Ma ġelau i vomairi ma wei wavuna morumoruna i kauei Iesu awarina,

58 “Tauai a nonori tauna i riwa, ‘Wei tempolna i voavoia. Tau ana rikai ma au pom tonuġa au murina, Tempol ġelauna ana voai ma lamna eġa rava ita voui.”

59 Wate nanare ai viwavu taputapune i ava.

60 Pirisi ġeġetelarana i mairi tau i naoi ma Iesu i vitara-viirei, “Wei ravai e viviwavum ma eġa aiwai ma paribelei bo?”

61 Ma Iesu i genuana ma eġa ita paribelei.† Ma Pirisi ġeġetelarana i vitaraviravirana-meiei, “Tam Keriso tauvilawana bo? Viviaianana Natuna bo?”

62 *Iesu i paribelana, “Tau tauna! Ma Rava Natuna ona inana, Vivirewapanana au oiena ina kiala ma mara ladanei ina nei.

63 Pirisi ġeġetelarana, amlona i ġaiġai ma ana gara i sikai ma i riwa, “Aiwai aubaina mata-mata ġelau tana ġoei?”

64 Taumi, vijiboġa o nonori ma ami nota aiwai?”

Tau anapui i riwa, “Tauna ana ġo’apoapoe aubaina anina da ina iraġe!”

65 Ma ġelau i raukarei ma Iesu i ovoi ma naona i purui; i raunanavai ma i riwei, “Ma pariverelai, ai ai i ravim!” Ma tauvipaipai, Iesu i vaia ma i vunui.

Peter, Iesu i boviei

(Matthew 26:69-75; Luke 22:56-62; John 18:15-18, 25-27)

66 Ma Peter au gabaura i mamae ma Pirisi ġeġetelarana ana taunola guġuini i ġetai.

67 Maranai tauna, Peter i ‘nanai i viviairara; ma i ‘nana-tunutuini ma i riwa, “Tam maiteni Iesu Nasaretei, ana tauvotaġotaġo!”

68 Wate tauna i bovi ma i riwa, “Eġa ata aramanei aiwai e bababaniei, a vinuanainei!” Ma i tuopu au metaeta ma [kokorereko i tou‡].

* 14:55: Mai Jew e ġoreġorei Sanhedrin. † 14:61: Isaiah i parivereta da Keriso ana au iraġe eġa ina gagaloana-meiei. (Isa 53:7). ✨ 14:62: Da 7:13 ‡ 14:68: Wei riwana buka au wadubo nonoana eġa ita mamae.

⁶⁹ Taunola guguini, Peter i 'nanai ma i raukarena-melei ma rava au ġereġere i maimairi i riwei, "Wei ravana, tau tagogi!"

⁷⁰ Wate Peter i bovi me.

Mara aburuna muriai, tau i au ġereġere i maimairi, Peter i riwana-melei, "Tam anina, tau tagogi; aubaina tam, Galiliei!"

⁷¹ Ma Peter i riwa, "God au matana, tau a ririwa kua, ravana o ririweia a vivinuanainei!"

⁷² Maratagodi kokorereko i tou mara viruaina ma Peter, Iesu riwana i notai - *Murjai da kokorereko ina tou mara ruaġa, tam mara tonuġa ma bovieu*. Ma Peter i vinuabola kua ma i tou.

15

Iesu i taravaina-naiei Pilate au naona

(*Matthew 27:1-2, 11-19; Luke 23:1-5; John 18:28-38*)

¹ Ubaubani boibogi, pirisi babadai ma dogadogara ma tarawatu babadai anatapui i viboru* ma i vianina da Iesu i pani ma i veredamanei Pilate au urana.

² Pilate, Iesu i vitara-virevirei i pa, "Tam mai Jew ai gulau bo?" Iesu i paribelei i pa, "Anina e ririwa nanare."

³ Pirisi Babadai e viviwavuum kua maġamaġgai aubai.

⁴ Ma nanare Pilate, Iesu i vitaraviravirana-melei i pa, "Tam ma paribelana bo eġa? Ma nonori e viviwavuum kua maġamaġgai aubai!"

⁵ Wate Iesu i genuana ma eġa ita paribelei. Ma Pilate i ba kua.†

Iesu ana iraqe i vianinei

(*Matthew 27:15-38; Luke 23:13-25; John 18:39-19:16*)

⁶ Tau i kua maemaena da Raġona Torelana au marana, Pilate, panipani tagogi, rava ai ġoane i ruperupeni ma e vototere da e nena.

⁷ Orotu tagogi wavana Barabas; tauna Rome gabemani i viġavie i ma i pani da panipani au numana i mamae. Ana rava maiteni tauviraġena.

⁸ Ma patara i ġeta da Pilate ita vibaġai da panipani tagogi ita rupeni Raġona Torelana au marana.

⁹⁻¹⁰ Pilate i paribelei, "Taumi o ġoġoġei da mai Jew ai gulau ana rupeni aubaimi bo?" Pilate i aramanei da Pirisi Babadai, Iesu i unurei ma lamna aubaina Iesu i veredamanei tauna awarina.

¹¹ Wate Pirisi Babadai, patara i egari da Pilate, Barabas ita rupeni ma eġa Iesu.

¹² Pilate, patara i paridadana-melei i pa, "Tauna o ġoreġoreia mai Jew ai gulau mena ana kauanei?"

¹³ Tau i garara, "Ma tuparatui!"

¹⁴ Pilate i riwa, "Aiwai apoapoena i kauiei?" Ma tau i garara guratana, "Ma tuparatui!"

¹⁵ Pilate i ġoei da patara ita vinuubai ma Barabas i rupeni ma *sorodia* i egari da Iesu i kwapui da i vitaratarai ma i naei da ita tuparatui.

Sorodia, Iesu i vinamei

(*Matthew 27:27-31; John 19:2-3*)

¹⁶ *Sorodia*, Iesu i taravaina-ruiei Pilate ana au numa ma ai rava ġelau i ġoreia.

¹⁷ Ma gara lebalebarina‡ [*me gulau ana gara*] Iesu i vioteni ma kunuteia ai donadonanei i viri da au kolana i terei.

¹⁸ Ma vinamana i raukarei ma i garara, "Egualau mai Jew ai gulau!"

¹⁹ Ma kolana gonuei i raviravi ma i ovaovai. Ma ae-tutuie i mae-ġaira au doa ma i raudunelei ma i vivinamei.

²⁰ Ma i vijiboġa vorovei ma gara lebalebarina i voġiġi-tawanei ma ana gara i vioteni. Ma i taravaina-opunei da ita tuparatui.

Iesu i tuparatui

(*Matthew 27:32-44; Luke 23:26-43; John 19:17-37*)

²¹ Tau i nena ma Simon i nelaġai, rava Sairinie§ (tauna Rufus ma Alexander amai). Simon wapuei i nenei. Ma *sorodia*, tauna i egari da Iesu ana *korosi* i avarai.

²² Tau, Iesu i naiei da gabu i ġoreġorei Golgotha, lamna anona unu gabuna.

²³ *Sorodia*, wine bunama *myrrh* maiteni i virai ma Iesu i veredadani, wate tauna i geduaiei.

* **15:1**: Mrk 14:55 *Sanhedrin* † **15:5**: Mai Rome ai tarawatu e mamae da maranai i viwavuum ma tauretara eġa uta paribelei lamna tam anina wavu ma varai. ‡ **15:17**: Eng. *purple*. § **15:21**: Eng. *Cyrenian*.

- 24 Ma Iesu i tuparatui ma ana gara, tau i ava au orai i ġutai.*
 25 Ubaubana i 9 kilok nanare, Iesu i tuparatui.
 26 Anivivawuna i girumi ma i tutui, "Mai Jew ai gulau."
 27-28 *Danedanenei ruaġa, Iesu au ririvana i tuparatui; tagogi au oiena ma ġelauna au kelakelauna.†
 29 *Taubabara, kolai i kwajikwajiei ma Iesu i vivinamei, "Na! Tam Tempol taurikaina ma au pom tonuġa ma voa-melei.
 30 Ma vilawana-melem ma *korosiei* ma ġairai!"
 31 Ma nanare Pirisi Babada i Tarawatu Babada i maiteni, Iesu i vivinamei, "Rava ġelau i vilawani, wate ainelana ita vilawana-melana-avei.
 32 Keriso Tauvilawana, Israel ana gulau; marina *korosiei* ma ġairai ma tana inana i da tana vitumaġane!" Danedanenei i tupatuparatui maitenai, Iesu i vinamei.
Iesu ana iraġe
 (Matthew 27:45-56; Luke 23:44-49; John 19:28-30)
 33 Ma au benai dobu anapuna i waguvarei da 3 kilok au bigai.
 34 Lamna maranaina Iesu ponana i rata ma i kwatu, "Eloi, Eloi, lama sabachthani?" Lamna anona, "Au God, au God aiwai aubaina u netawaneu?"
 35 Ma rava ġelau au ġereġere imaimairi inonori ma i riwa, "Ona rautaniġanei, Elijah e kwatukwatuei!"
 36 Ma rava tagogi i ruba da gara ai au damona i pani ma au *wine* tomatomana i vigoaloi ma i voepai Iesu au ipirina ma i riwa,‡ "Ona vipaipai ma tana inana i mepa da Elijah ina nei da ina tereġairei."
 37 Ma Iesu ponana i rata ma i kwatu ma i lavutu tawanana.
 38 Ma Tempol au orana anitereġaġara au pouna i wanasikai au tepana da i ġaira au doa.
 39 Ma *sorodia* ai bada, Iesu au naona i maimairi; i 'nanai da i lavutu tawanana ma i riwa, "Wei anina God Natuna."
 40 Waivine ġelau aueia i mae ma i raraubiga: Mary Magdalene ma Mary (James keikeina ma Joses§ aloi) ma Salome.

41 Taui, Iesu i votaġotaġoi ma i vovoagui maranai au Galili i mamae ma waivine ġelau maġamaġgai, tauna maiteni i ġeġae au Jerusalem, anapui kampa.

Iesu i vikokoagei

(Matthew 27:57-61; Luke 23:50-56; John 19:38-42)

42-43 Ma au biga i tuturiai Joseph Arimatheae* tauna rava ġaeġaena tagogi boru ġetelarana au orana. Tauna God ana vigulau ana nei i vipaipaiei. Ma vokaukaia marana (Lamna Sabat au naona)† ma Joseph ana tepatorana, Pilate awarina i rui ma Iesu taubeuna i vibaġei.

44 Pilate i baiei da Iesu boiboġi i raġe. Tauna, *sorodia* ai bada i kwatuei ma i vitara-virevirei da Iesu i raġe bo eġa?

45 Maranai *sorodia* ai bada i parivere i da anina riwa kava. Ma Pilate, Joseph i riwei da Iesu tupuana i vaia.

46 Joseph, gara maiana ġaeġaena i gimara i ma Iesu tupuana i tere-ġairei. Gare i umai ma au guba tupuana i vimataveni ma ġaima ġaeġaena i kaipeuri da kokoaga metaetana i viaitomeni.

47 Mary Magdalene ma Mary - Joses alona i 'nanai mepa Iesu taubeuna i vimataveni.

16

Iesu i vomairi

1 Ma Sabat au murina, Mary Magdalene ma Mary - James keikeina alona ma Salome, bunama ġabuġabui i gimara i da i naiei da Iesu tupuana ita buloi.*

2 Ma Sunday ubaubana i boiboġi maranai madeġa i gogogo, tau i nae au kokoaga.

* **15:24:** Tau i ġaima i tawane i me dice da aia i aivai garan ita vaia. ✨ **15:27-28:** Isa 53:12 † **15:27-28:** Giruma ġelau waduboi vs 28 e mamae *Ma aiwai i kaukaueia lamna peroveta i ririweia i tupua, Tau i 'nanai me tau i go'apoapoe taukauei*. Isa 53:12 ✨ **15:29:** Mrk 14:58 ‡ **15:36:** Psa 69:21 peroveta i girumi da *Keriso* ita verei. § **15:40:** Au Mat 27:56, Matthew i girumijoseph ma eġa *Joses*. * **15:42-43:** Eng. *Arimathea*. † **15:42-43:** Mai Jew ai *Sabate*, madeġa e neneulai au Friday e vivikare i da madeġa e neneulai au Saturday e kwakwa. Mai Jew ai Tarawatu e ririwa da rava i raġe lamna marana tagogina ina doboi. *Sabate* amadodo madeġa e neneulai ina vikare i lamna aubaina Joseph i volaġilaġina da Iesu taubeuna ita doboi.

* **16:1:** Mai Jew ai kava maemaena da taubeu monamonei ina buloi ma muriai ina doboi ma waivine i ġoei da wei kauai ita votaġotaġoi.

³ Ma i nenaē ma i bababani, “Aiai aubaita ǵaima kokoaga au metaetana ina kaipeura-tawanei?”

⁴ Maranai tau i taepai, i 'nanai da boiboǵi ǵaima i kaipeura-tawanei - ǵaima ǵaeǵae kaukauana.

⁵ Maranai i rui au guba ma oroto laragana ana gara ararapoirina i 'nanai au oiena.† Ma tau orai i auepai.

⁶ Orotō laragana i riwa, “Eǵa orami ina auepai, taumi, Iesu Nasaretei o baibaiei bo? I tupatuparatuia; tauna i vomairi! Ona inana, tauna eǵa weka! Tau i weka taubeuna i vimataveni.

⁷ *Marina ona nae ma ana tauvotaǵotaǵo ona riwei, ma Peter eǵa nuanuami ina vuru da Iesu e vivinao au Galili. Kampa ona inana i ririwemi nanare.”

⁸ Tau i opu ma kokoagei i viruberubei ana ini sisisi ma ana rovoi. Tau i rovo kaua, lamna aubaina eǵa rava ita riwei.

Mark 16:9-20

Mark Riwana Aiaina damona lamna wariǵa i vine-boai. Ma rava ǵelauna aiwai i notanotai nanare au vs 9 da 20 i girumi. Wei damonana weka i vikarei.

Iesu, Mary Magdalene awarina i eǵa

⁹ Iesu iraǵelei i vomairi me au Sunday ubaubanai boiboǵi ma i ainae da Mary Magdalene awarina i eǵa. Maraotai Iesu, Mary awarina arua-apoapoei seven i viopuni.

¹⁰ Iesu, ana tauvotaǵotaǵo i vivinuabola ma i toutou ma Mary i ǵeta da i pariverei.

¹¹ Ma Mary i pariverei da Iesu i lawana me ma tauna matanei Iesu i 'nanai. Wate tau i eǵa ita vitumaǵanei.

Iesu, tauvotaǵotaǵo ruaǵa awari i eǵa

¹² Wei au murina Iesu inana tapuna ma ana tauvotaǵotaǵo ruaǵa awari i eǵa; maranai tau i nenaē au melagai.

¹³ Tau i naeme ma tauvotaǵotaǵo ǵelau i vieǵei. Wate tau i nanare eǵa ita vitumaǵanei.

Iesu, Tau i 11 awari i eǵa

¹⁴ Muriai tau i 11 i amam ma Iesu awarii i eǵa. Ma i eni aubaina tau orai i bado ma eǵa ita vitumaǵana maranai rava, i riwei da Tauna i vomairi me.

¹⁵ *Iesu ana Apasol i riwei, “Ona nae dobu au anapapuna. Ma God Riwana Aiaina ona jimei rava anapapui awarii.

¹⁶ Aiai da i vitumaǵana ma i babaito; tauna ina lawana. Ma aiai da eǵa ita vitumaǵana ina kovoǵi.

¹⁷ Ma tau aiavo i da i vitumaǵana, rewapana ina verei da kaua babai ina kauē. Ma arua-apoapoei ina viopuni ma pona tapunei ina babani.

¹⁸ Tau i, mota uraiei ina vaia ma waiawa ina umai ma eǵa ina rauputei. Ma urai doridoriai au kolai ina terei ma ina lawana.”

God, Iesu i ǵaiei au Mara

¹⁹ *BADA Iesu, awari i babani vorovei. Ma tauna i ǵaiei au mara ma God au oiena i kiala.

²⁰ Tauvotaǵotaǵo i opu ma dobu au anapapuna i raraugugula. Ma BADA, tau i voagui ma kaua babai i kaukauei da tauvotaǵotaǵo aiwai i bababaniei i vovai-virewapani.

† 16:5: Tupua i vimataveni au oiena i kiakiala, ana gara ararapoirina. * 16:7: Mrk 14:28 * 16:15: Act 1:8 * 16:19: Act 1:9-11

Apasol ai kaua Pariverena

Luke ana buka i giruma vorovei ma muriai Apasol ai kaua bukana i girumi. Tauna ana ano gaeḡaena lamna i ḡoei da rava ita vieḡei da menanare Arua Vivivireina Iesu ana tauvotaḡotaḡo i rau-etaraveni da Riwana Aiaina ita vituai,

Au Jerusalem ma au Judea au anapuna ma au Samaria ma dobu au gia dewadewana. (1:8)

Kerisiana ai babara ma ai nola i babaniei. Mai Jew awarii i vikarei ma i nae da dobu anapui i vitumaḡana. Tauamgiruma ana nota gaeḡaena da wei bukana tauiavana ita pariveri da kerisiana avena Rome gabemanina ita viviḡaviei. Kerisiana vitumaḡanana lamna mai Jew ai vitumaḡana e kaukauana-paiei. Wei bukana i ḡutai da raḡaraḡana tonuḡa, ma e viviatataieta da dobu au anapuna Iesu Riwana Aiaina i jimei ma ekalesia i vitupui:

Iesu ana ḡae au murina Ekalesia au Jerusalem ai nola i vikarei;

Palestine taun ḡelau awari i tua-nae;

Ma i tua-nae au Mediteranean da i nae au Rome paratana. Wei bukana ana kaua gaeḡaena lana Arua Vivivireina i nolanola, ma rewapana tauvitumaḡana au Jerusalem i verei au Pentecost. Ma wei au bukana i vieḡeta da Arua vivivireina mara nonoa agu ma rewapana ekalesia ma ai babada i verei ai au aninola au anapuna. Wariaga kerisiana ai pariverena i tere-tagogiei raugugula au maḡamaḡau, ma kaua ma ai nola i kaukauei anapui. Wei au bukana i girumi da wei parivai-nuaḡanana ana rewapana tauvitumaḡana ai au lawana ma kerisiana ai au voepaepa i viatataieta.

Buka rereḡana 1.

Vokaukaua tauvimatamata aubai (1:1-26)

Iesu ana tarawatu ma ana parivainuaḡana damona (1:1-11)

Judas Epaiana (1:12-26)

Tauvimatamata au Jerusalem (2:1–8:3)

Tauvimatamata au Judea ma Samaria (8:4–12:25)

Paul ana nola (13:1–28:31)

Paul ana vaḡai tagogi (13:1–14:28)

Boru au Jerusalem (15:1-35)

Paul ana vaḡai viruaina (15:36–18:23)

Paul ana vaḡai vitonuina (18:24–21:16)

Paul i vipanipani au Jerusalem, Caesarea, ma Rome (21:17–28:31)

Iesu ana Apasol i parivainuaḡani

¹ Egualau Theophilus, buka au naona a girugirumia* lamna Iesu ana tupua ma ana nola i vikarei da i kaukauei ma i viviararamana a pariverem

² i nae da ana ḡae au marana. Muriai da Iesu i ḡaiei au mara, Tauna Arua Vivivireinei ana apasol vinevinei riwa bagibaginei i pariveri.

³ Iesu ana iraḡe au murina i vieḡana-meiei ana apasol awarii. Ma kaua maḡamaḡau i kauei da apasol i vitumaḡana kua da Tauna anina i lawana me. Tau awarii i eḡa au pom 40 au orana ma God ana vigulau i babaniei.

⁴ Maranai ana apasol maiteni i vitagogiei ma i riwana-guratei i pa, “Eḡa Jerusalem ona oputawanei, wate pulona amau i paripari-vainuaḡanimi ona paini, maraotai a ririwemi nanare.

⁵ *John wairei i babataito, wate mara aburuna ava Amau, Arua Vivivireinei taumi ina babataitomi.”

God Iesu i ḡaiei au Mara

⁶ Muriai maranai Iesu ma Apasol i vitagogiei ma tau Iesu i vitara-vivirei i pa, “Bada! Marina, Israel ana† vigulau ma vere-meiei bo?”

⁷ Ma Iesu i paribelei, “Amau ainelana ana rewapanei mara ma iri e vivibadei, aubaina da taumi eḡa ona aramanei.

⁸ *Wate maranaina Arua Vivivireina au orami ina rui, maranaina taumi rewapana ona vaia. Ma aubaiu ona vitaunola au Jerusalem, Judea, au Samaria ma dobu au anapuna.”

⁹ *I babani vorovei ma au matai God Iesu i ḡaiei au mara. Ma apau i nei da i purui ma tau

* 1:1: Bukana au naona i girugirumi lamna Luke ana Gospel ✧ 1:5: Mrk 1:8 † 1:6: Rome gabemanina Juda i vibadei wei au marana, Mai Jew wei eḡa ita goei, ma i ḡoei da ita virai. ✧ 1:8: Mrk 16:15 ✧ 1:9: Mrk 16:19

eġa ita inana-melei.

¹⁰ Ma tau i ġogouta au mara ma nelara ruaġa ai gara ararapoiri au ririvai i raumairiei.

¹¹ Ma i riwa, "Mai Galili, aiwai weka o maimairiei ma o ġogoutatei? Wei ravana menanarena o inana i ġaenei, amapo nanare ina nememei."

Judas epaiana i vinei

¹² Anina ma Apasol Ola Olive, i voterei ma i ġaira me au Jerusalem lamna eġa uama ma au ġereġere.

¹³ *Ma au Jerusalem i ġeta ma i ġae numana i mamae lana au tepana au vatavatara. Tau ai wava, Peter, John, James ma Andrew, Philip ma Thomas, Batolomeo ma Matthew, James - Apus natuna, ma Simon tauna au naona Zealot† ma Judas - James natuna.

¹⁴ Ma wei ravai mara patapatana i vivitagogiei ma i raraupari gogona, waivine ġelau ma Iesu ana roaroa ma aloi Mary maiteni kampa.

¹⁵ Wei au marana, tauvitumaġana 120 i vitagogiei ma Peter i vomairi ma wenanare awari i babani,

¹⁶⁻¹⁷ "Varevareiu, Judas Iskariot lamna turata tagogi ma maiteni ta nola gogona, wate muriai i voagu da Iesu i pani. Arua Vivivireina wei riwana variaġa gulau David i riwei da ina tupua; ma aiwai i ririwei anina nanare i tupua."

¹⁸ Judas Iesu i amverenei mane vainana aubaina, ma wei manenei doa i gimarai. Ma nai au doana tauna kolanei i peu ma manawana i wanawamai da amoamona i opu.

¹⁹ Ma rava anatapui au Jerusalem wei irageña riwana i nonori, lamna aubaina tau nai dobona ai ponei i viwava Hakeldama, wei anona *Tara Doana*.

²⁰ "Wariaġa Gulau David i girugirumia, nanare i tupua,

Ana animae ina kwakwava,

ma eġa aiai au orana ina mae.

(Psalm 69:25)

Ma

rava ġelauna ana nola ina vaia.

(Psalm 109:8)

²¹ *Lamna aubaina marina awarita, rava ġelauna tana vinei da ina raviepaiai. Tauna ravanana Iesu maiteni ta bababara-nae madeġa tonuġa au orana,

²² John rava i babaitoi au marana ma i nae da Iesu i ġaiei au mara. Ma maiteni tana nola ma rava tana riwei menanarena God Iesu iragelei i vovaimairini."

²³ Ma tau rava ruaġa i vinei, Joseph-Barsabas (ana wava ġelauna Justus) ma Matthias.

²⁴⁻²⁵ Anina ma tau i raupari, "BADA tam rava anatapui orai u aramanei. Ma vieġelai da wei ravai ruaġa, ma metauna u vinei da Judas ana gabu ina vaia da ina viApasol, aubaina Judas i voterelai da i nae ana au gabu."

²⁶ Anina ma tau i vine, ma vinevine Matthias awarina i peu, ma tauna i vi-Apasol, ma Apasol 11 au orai i rui. §

2

Arua Vivivireina i ġairai

¹ Pentecost torelana i ġetai ma tauvitumaġana anatapui numa tagogi au orana i vitagogiei.

*

² Maratagogi gugura ġaeġaena, nonorana me ive vivirewapanana marei i ġairai ma tauvitumaġana i mamae numana i vioai.

³ Tau purapura inanana me ai menamenana i `nanai, i ġairai ma rava tagotagogi ava au kolai i kiala.

⁴ Ma Arua Vivivireina anatapui i vioai ma pona taputapunei ava i bababani Arua ana aguei.

⁵ Nai maranaina mai Jew patupatutui dobu au anatapuna i vitaomana au Jerusalem da Pentecost torelana ita apui.

⁶ Ma patarai kampa i viruberubei, ma i nonori da gugurana lamna tauvitumaġana tau tagotagiava ai ponei i bababani ma tau ai nota i kwa.

⁷ Tau anatapui i baei ma tau ai va i babani vivira i pa, "Wei mai Galili bo?"

☆ **1:13:** Mrk 3:16-19 † **1:13:** Rava ununurana. Wei ravai mai Rome ai gabemani e vivigaviei. ☆ **1:21:** Mrk 1:9; Mrk

16:19 § **1:26:** Wei kalona wenanare: mai Jew wava ġaima muomuoi awari i girugirumi ma e tawatawanei, ma aiai ana namba i eġa lamna tauna ina vaia. Tau i vitumaġana da wei kauana awarinei God tau ina viataiei da aiai ita vinei. (Pro

16:33) * **2:1:** Mai Jew ai Raġona torelana au murina au pom 50 ma Pentecost torelana e vivikarei. Wei riwana anona amapo wei bukana au damona ona iavi ma ona aramanei.

⁸ Ma menanarena da anaputa awarita ata poney e bababani!

⁹⁻¹⁰ Tauta gēlauta mai Parthia, Mede ma Elam, ma mai Mesopotamia, Judea, Capadosia, Pontus ma Eisia, Pirijia, Pamphilia, Egypt ma Libya navanavana, au Sairini au gēregerena, ma gēlauta mai Rome,

¹¹ gēloui mai Jew ma gēloui Jentail wate inibori i vaia da i vimai Jew. Ma gēlauta mai Crete ma mai Arabia. Wate God kaua gēgēaena i kaukaueia, ata poney i bababaniei ma ta nononori!

¹² Taui anapui i vinuanaina, nuanuai i rağarağa ma i bababani vivira, “Wei aiwai kauana e tuputupua?”

¹³ Wate gēloui taui i vinamei i pa, “Wei ravai i uma bua!”

Peter rava awarii i raugugula

¹⁴ Anina ma Peter i vomairi Apasol 11 maiteni, ma ponana gēgēaenei patara awarii i babani, Au rava mai Jew ma anapumi au Jerusalem maemaemi, babani ana tere-kauēi da ona aramanei. Ona rautaniğana kaua.

¹⁵ Wei marinaota, 9 kilok ubaubanai! † Wei ravai eğa ita uma bua me taumi o notanotai nanare,

¹⁶ Wei lamna wariaga peroveta Joel i ririweia e tuputupua:

¹⁷ *Mara au damona,*

Aruau rava anapui awari ana iwaği.

Ma natunatumi nelarai ma waivinei riwau ina jimei,

ma nelara voui mataiei kaua ina inana,

ma babada magumaguri raubontei kaua ina inana.

¹⁸ *Wate nanare, Aruau ana iwaği au taunola nelarai ma waivinei awarii,*
ma ina vitaubabani.

¹⁹ *Ma kaua babai au mara ana kauēi,*
ma au dobu mataira ana vieğai

ai araratana, tara ma bau potopotona.

²⁰ *Ma madega ina waguwarei*

ma nawaravi ina ravitaratarai,

muriai da BADA ana mara gēgēaena ma boruborumana ina nei.

²¹ *Nai au marana aiavo i da BADA awarina e viviğore agu aubaina BADA taui ina vilawani. (Joel 2:28-32)*

²² Ma Peter i babani me:

Mai Israel ona rautaniğana: God Iesu Nasarete i vovai-virewapani da kaua babai, ma mataira gēgēaei i kauēi da ita viataieimi da tauna anina Godei i nei.

²³ *Wate God wariaga i vioge i ma ana goana nanare da Iesu au urami i terei, ma taumi gō'apoapoe ravai ai aguei, Tauna au korosi o tuparatui da o virağeni.

²⁴ *Wate God, Iesu irağelei i vovaimairini, ma irağe iniviarana i vaitawanei ma irağe eğa tagotagogina da tauna ita vojijini.

²⁵ Wariaga David Iesu i bababaniei maranai i riwa:

Tau a inana BADA God au naou mara au anapuna.

Tauna au oieu lamna aubaina eğa ana rovo.

²⁶ *Lamna aubaina nuai ai orau i oai ma menau i morelana,*
ana irağe ma a aramanei da tupuau ma paina-kauēi.

²⁷ *Ma aruau eğa rava irairagei ai au dobu ma voterei,*
ma tam eğa am taunola vivivireina tupuana ma voterei da ina buda.

²⁸ *Tam lawana etanaina u viataieiu,*

ma Tam maiteni a mamae ma a vinuai ai kaua.

(Psalm 16:8-11)

²⁹ Au rava, A riwana-kauemi da amata gulau David i rağe da i doboi, ma ana kokoaga weka e mamae.

³⁰ *Wate David lamna peroveta, ma i aramanei da God i parivainuağani da ana damei gulau ina opu, me tauna nanare.

³¹ Ma David i 'nanai God muriai aiwai ina kauēi ma i riwa,

Keriso ina vomairi me,

ma tupuana eğa rava irairagei ai au dobu ina voterei da ina buda. (Psalm 16:10)

³² Ma God Iesu-na tagogina irağelei i vovaimairini, ma tauai anapui ai a vimatamata.

³³ Ma God i ғаie i ma au oiena i vikialai. Ma Arua vivivireina i verei me i parivainuağana nanare, ma nai Aruana tagogina Iesu awariai i waği, lamna marina o nononori ma o inainana.

† 2:15: Mai Jew taui au bigai sia e aniani ma wain e umaumai.

* 2:23: Mrk 15:24

* 2:24: Mrk 16:6

* 2:30: 2Sa

34 * David eġa ita ġae au mara, ma wate i riwa, **BADA au Bada i riwei**, “*Au oieu ma kiala ma am ġavia au ae karem ana terei.*” (Psalms 110:1)

36 Lamna aubaina mai Israel anapumi ona aramana-kauei da wei ravana Iesu o tupatuparatuia, God i terei da BADA ma Tauvilawana.

37 Ma maranai rava wei riwana i nononori, tau i orai i rautonai da Peter ma Apasol ġelau i riwei, “Varevareia, tauai aiwai ana kauei da ana lawana?”

38 Ma Peter i paribelei, “Taumi tagotagogi ava Iesu Keriso wavanei ona rupena ma ona babaito ma ami ġo’apoapoei ina nota-tawanei, ma God ana pulo Arua Vivivireina ona vaia.

39 Wei parivai-nuaġanana lamna taumi natunatumi maiteni aubaimi. Ma wate nanare mai jentail - aiavoi da e kwatukwatuei ina nei Tauna awarina.”

40 Ma Peter riwa ġelau maiteni rava i vinua-terenei, ma i egari, “God ona vianinei da ina vilawanimi, ma eġa kovogġa ona vaia.”

41 Ma rava maġamaġau Peter ana babani i vitumaġanei ma i babaito ma nai au marana rava 3,000 ai au boru i rui.

Tauvitumaġana i mae gogona

42 Ma tauvitumaġana Apasol ai viaramana i nononori, ma i viboruboru, i amam ma i rarauari gogona.

43 Apasol kaua babai ma mataira ġaeġae maġamaġau i kaukauei ma anapui i rovo ma God i vivirana-kauei.

44 * Ma tauvitumaġana anapui gabu tagogi i vivitagogiei ma aiwai ġariei ai rava maiteni i ġutaġutai.

45 Tau i doa, ai numa, ai wapu ma ai purapura i gimagamarei ma manena ai rava ġelau maiteni i ġutaġutai.

46 Tau mara patapatai au tempol i vivitagogiei, ma ai au numa ana nuaiaii ma ana morelanai i amam gogona.

47 Ma tau i God i vovoepaepai ma rava anapui i vivinuaiini. Ma marana patapatai rava voui i neneiai Iesu awarina ma tauvitumaġana ai boru i viviratai.

3

Peter, oroto aena gwaġagwaġana i vilawani

1 Mara tagogi au bigai 3 oklok, Peter ma John pari aubaina i ġeġae au Tempol.

2 Ma oroto tagogi aena gwaġagwaġana i tupuei, ma mara au anapuna ana rava i avavara neiai da Tempol metaetana, e ġoreġorei, metaeta aiaina, kampa i vivikialai ma rava i ruirui tempol au orana i vivigigimanei mane aubaina.

3 Maranai i 'nanai da Peter ma John aburuna ava da au metaeta ita rui, ma i vibaġai mane aubaina.

4 Peter ma John orotona i 'nana-tunutunui ma Peter i riwa, “Ma inanaiaii!”

5 Ma orotona tau i 'nanai ma i notanotai da aiwai awarii ita vaia.

6 Ma Peter, orotona i riwei, “Awariu silva ma gold eġa wate aiwai awariu lamna ana verem. Iesu Keriso Nasaretei, wavanei ma vomairi, ma babara!”

7 Ma Peter oroto nimana au oieina i vojijini ma i voagui da i vomairi. Ma maratagogi oroto aena ma ae kwarukwaruna i ai ma i virewapana,

8 ma aenei i viauepa ma babara i vikarei. Anina ma tau maiteni i rui au tempol ma tauna tempol oraninei i bababara, i viviauepa ma God i vovoepaepai.

9 Ma rava anapui orotona i 'nanai i bababara ma God i vovoepaepai,

10 ma i aramanei da tauna ravana tagogina tempol metaetana e ġoreġorei *inanana aiaina* au naona, i kiakiala ma i vivigigimana. Ma rava anapui i 'nanai aiwai i tupua wei orotona awarina ma i ba-guratana.

Peter patara awarii i babani

11 Ma orotona Peter ma John i vovojijini ma rava anapui i bana-kauei, ma i viruberubei tau i awari au love love e ġoreġorei, Solomon ana love love. *

12 Ma maranai Peter patarai i 'nanai ma i riwei:

Au rava mai Israel, aiwai aubaina o vivinuanaina? Ma aiwai aubaina o inainana-tunutunui, apamina tauai ai rewapanei bo ai vipatutuei, wei ravana a kauei da i babara?

* 2:34: Psa 110:1 * 2:44: Act 4:32-35 * 3:11: Solomon ana love love tagogi tempol au orana e mamae. Wei lamna gari au ririvana ma ana tuatua maġamaġauna.

13*Wei lamna amamata Abraham, Isaac ma Jacob ai God, ana taunola Iesu i viborumei, ma taumi Tauna o verenei da ita viraġeni, ma Pilate au matana o geduaiei. Pilate i ġoei da ita rupeni wate taumi eġa ota vianinei.

14*Iesu lamna rava vivivireina ma jijimanina, wate o geduaiei. Ma Pilate i ġoei da Iesu ita rupeni, wate taumi o ġoei da tauviraġena i rupeni aubaimi.

15 Ma taumi lawana maemae-nonoana tauvereina o viraġeni, wate God i vilawana-melei, tauai wei a vimatematei.

16 Wei ravana aena gwaġagwaġana Iesu au wavana i vitumaġana ma lamna aubaina i lawana. Taumi o aramanei ana doria menanare, Wate ana tumagaana Iesu awarina i vilawani.

17 Ma au rava marina a aramanei da taumi ami babada maiteni Iesu o viraġeni, aubaina taumi eġa ota aramanei da tauna tauvilawana.

18 Wate wei lamna wariaga God ana peroveta anatapui i ririweia i tupua, God i riwa da ana tauvilawana ina vinuapoapoe.

19 Ami ġoa apoapoe Ona voterei ma ona mae-taviremi God awarina da tauna ami ġo'apoapoe ina nota-tawanei.

20 Ma lamna maranaina God aruami nualawalawana ina verei, God Iesu i vinei da ami Tauvilawana ma ina paritawaneia.

21 Iesu au Mara ina mae da God kaula anatapui ina ravivouni, me God ana peroveta vivivirei wariaga i ririweia nanare.

22*Moses i riwa, "BADA ami God peroveta, me tau nanare, ina terei ma tauna ami dam oinei ina nei. Ma aiwai anatapuna e ririwemi ona rautaniġanana-kauei. †

23*Ma aiwai da wei perovetana eġa ina rautaniġane i lamna God ana rava awariei ina vilamonei."

24 Peroveta Samuel ma muriai Peroveta maġamaġau, kaula i ririweia marina e tuputupua.

25*Taumi nai perovetai natunatui ma taumi maiteni parivainuagaana bagibagina au orana. Au baina God Abraham i riwei, "Am epaepaia awariei dam anatapui au dobu ana viaiaini."

26 Ma maranai God ana taunola i vinei, ma au naona i paritawaneia i awarimi da ita viaiainimi, ma lamnei taumi tagotagogi ava ami ġo'apoapoe ota opu-tawanei ma ota nei Tauna awarina.

4

Jew babadai Peter ma John i etarei

1 Peter ma John rava awari i bababani ma pirisi pulo tauapuina ma tempol taupainii* ai bada ma Sadusi ġelau i † i ġetai.

2 Tau amlói i ġaiġai kaula Peter ma John awari aubaina tau i viviararamana da God, Iesu iragelei i vovaimairini ma wei i viatataiana da God rava anatapui iragelei ina vovaimairini.

3 Tau Peter ma John i pani ma au i pom aubaina panipani au numana i terei da i mae mara.

4 Wate rava maġamaġau riwa i nonori ma i vitumaġana, ma ai maġa nelara 5,000 waivine eġa ita iavi.

5 Ma mara i tom ma Jew babadai, dogadogara ma tarawatu babadai au Jerusalem i vitagogiei.

6 Ma pirisi ġeġetelarana Annas kampa ma Caiaphas, John, Alexander ma pirisi ġeġetelarana ana rava maiteni. ‡

7 Ma tau Peter ma John i neiei da au naoi i vimairini ma i riwei, "Aiwai rewapananei, ma aiwai wavanei wei o kauei?"

8 Arua Vivivireina Peter orana i vioai ma tau i riwei, "Rava ai babada ma dogadogara;

9 tauai kaula aiaina a kauei gwaġagwaġana awarina ma amadodo taumi o vitara-virevirelai, da menanare tauna i lawananei.

10 Ma wei ona aramana-kauei, da taumi ma mai Israel anatapui, da Iesu Keriso Nasaretei o tuparatui, Wate God tauna iragelei i vovaimairini ma tauna wavanei wei orotona au naomi lawalawaina e maimairi.

* 3:13: Exo 3:15 † 3:14: Mrk 15:6-14 ‡ 3:22: Deu 18:15, 18 † 3:22: Mai Jew e ririwa da Moses lamna ai peroveta ġaegaena. ‡ 3:23: Deu 18:19 ‡ 3:25: Gen 22:18 * 4:1: Tempol tau-painina lamna anatapuna au tempol e inainana-vaitetei (purusimani). Tauai pirisi ġeġetelarana ana taunola. † 4:1: Sadusi tauai iragelei vovaimairime eġa ita vitumaġane ‡ 4:6: Mai Rome Caiaphas i vinei da Pirisi ġeġetelarana, poiana Annas epaiana. Wate mai Jew ai au giu da aiwai pirisi ġeġetelarana vaivaina i vaia, tauna anina ina mae da au irage. Luke e ririwa da Annas tauna pirisi ġeġetelarana.

11 Taumi tauvoa nai ġaimana o geduaiei, wate wei ġaimana lamna numa ogona, numa ana tapuna e vovojjini. §

12 —Lamna aubaina Iesu ainelana ina vilawanita. Ma God eġa aiai ġelauna au dobu rewapana ita verei da ina vilawana.”

13 Ma tau Peter ma John ai tepatora inantai ma maranai i aramanei da tau eġa girugirumai, ma i baei. Ma i aramanei da tau Iesu ana tauvotaġotaġo.

14 Ma wate i 'nantai oroto i vivilawania Peter ma John maiteni i maimairi, lamna maranai tau ġamoi i pota.

15 Anina ma Peter ma John i riwei da boru gabuna i opu-tawanei, ma tau avai i vitarairavira vivira.

16 Tau i vitaraviravira-viravira i pa, “Aiwai tana kau ei wei nelarai awari? Rava anatapui au Jerusalem i aramanei da tau kaua babai i kaukauei, lamna eġa tana boviei.

17 Wate tana viġaei da wei kauai eġa ina tua rava ġelau awari, ma riwa bagibaginei tana viġaei da eġa aiai awarina Iesu wavanei ina raugugula.”

18 Anina ma tau i ġorei da i rui me, ma riwa bagibaginei i viġaei da eġa aiai awarina Iesu wavanei ina raugugula bo ina viararamana.

19 Wate Peter ma John tau i paribelei, “Taumi ami nota aiwai. Tauai God ana voteletei bo taumi?

20 Tauai aiwai a inainanaia ma a nononoria babanina eġa ana voterei.”

21-22 Wei Orotona i vivilawani lamna gwaġagwaġana ma ana madeġa 40. Lamna aubaina rava anatapui God i vovoepeapai, ma babada eġa ita aramanei menanare Peter ma John ina kovoġanei. Ma i parivairovorovo-melei ma i paritawanei da i nae.

Tauvitumaġana God i vibaġai agu aubaina.

23 Peter ma John i nae me ai rava awari ma pirisi ġaeġaei ma dogadogara aiwai i ririweia tau i vieġei.

24 *Maranai tauvitumaġana wei riwana i nonori, tau anatapui i raupari gogona God awarina:

BADA tam ai gulau, Tam mara, dobu, boga ma anatapuna au orana maemaei taukaueina.

25 Tam Arua Vivivireinei am taunola, amai David gamonei u babani ma u riwa, *Aiwai aubaina rava awariai e mejimeji,*

ma aiwai aubaina ai oga e taratara labalabai?

26 *Ma dobu ai gulagulai i vokaukaui ma babada ġaeġaei ġelau maiteni i vitagogiei da*

BADA ma ana tauvilawana maiteni i viġaviei. (Psalm 2:1)*

27 *Anina riwa kaua. Wei kauai weka au Jerusalem i tupua, Herod ma Pontius Pilate, Jentail ma mai Israel maiteni i vitagogiei, da am taunola vivivireina Iesu u bulubuloia i viġaviei.

28 Ma tam am rewapanei ma am ġoanei am oga menanare u tarataranei marina nanare i tupua.

29 BADA, nai ravai ai parivai-rovorovo au uram ma am taunola ma vovai-virewapani da ana tepatorai riwam ina raugugulei.

30 Uram ma viloloi da ma vilawana ma kaua babai ma mataira ġaeġaei ma kau ei, am taunola Vivivireina Iesu wavanei.

31 Ma pari au murina, tau mepa i vivitagogiei gabuna i vigu. Ma Arua Vivivireina anatapui orai i vioai. Ma ana tepatorai God riwana i raugugulei.

Tauvitumaġana ġariei i ġutaġutai

32 *Tauvitumaġana anatapui ai nota ma orai tagogi. Ma ai purapura tagogi ma eġa aiwai ita nuanei.

33 Ma Apasol ana tepatorai ma rewapanai BADA Iesu ana iraġe, ma ana vomairi me i raugugulei. Ma God ana viaiaina ġaeġaena tau anatapui awari i peu.

34-35 Ma tau au orai eġa aiai aiwai ita voladaġei aubaina, ai rava ġelau ai doa bo ai numa i gimagimarei ma manena i neneiai Apasol awari i tereterei, ma aiai da aiwai i vovoladaġei nanare i vovoaġui.

36 Me Joseph, tauna Levi ana damei, au Saipras i tupua, ma Apasol tauna i ġoreġorei Barnabas, wei wavana anona lamna tauduġu.

§ 4:11: Mai Jew ai numa ġaime i voavoai. Iesu tauna anina God ana Tempol vouna oġona. (Eph 2:19-21, Isa 28:16).

* 4:24: Exo 20:11 * 4:26: Wei lamna Keriso. ✧ 4:27: Mrk 15:1 ✧ 4:32: Act 2:44-45

³⁷ Tauna ana doa i gimarei, ma manena i nei ai da Apasol awari i terei.

5

Ananias ma Saphaira

¹ Anina ma Ananias awana Saphaira maiteni ai doa navanavana i gimarei.

² Ma airuaga i vianina tagogi da mane navanavana i nuanei, ma Ananias mane navanavana i naiei da Apasol awari i terei.

³ Anina ma Peter tauna i vitaravirevirei, "Ananias aiwai aubaina Satan u vianinei da au oram i rui ma Arua Vivivireina u moru, ma doa u gimigimarei manena navanavana u nuanei?"

⁴ Doa lamna tam garime i da uta gimarei bo ega. Ma maranai u gimarei lamna manena tam garime i da uta verenei, aiwai aubaina nota apoapoeni au oram i rui? Tam ega rava awarina uta moru, wate God awarina u moru."

⁵⁻⁶ Maranaina Ananias wei riwana i nononori, tauna i peu da i'rage. Anina ma nelara i rui da tupuana i umai ma i naiei da i doboi. Ma aiavo i da wei riwana i nonori i rovo kaua.

⁷ Tau i ega ita mae guratana, ora tonuga nanare ma awana i nei, aiwai i tupua ega ita aramanei.

⁸ Ma Peter wavine i paridadanei, "Abe uta riweu, tam awam Ananias maiteni doa o gimigimarei maiana anina wei bo?" Ma tauna i paribelei, "Ee, doa maiana anina nai."

⁹ Ma Peter i riwa, "Aiwai aubaina taumi o vianina da BADA Aruana ota raudadani? Nelarai awam i dobodobo ma inanai ma metaeta da tam maiteni ina avara-opunem."

¹⁰ Maratagogi wavine Peter au ae karena i peu da i'rage. Maranai nelara i rui au numa ma i nanai da wavine i'rage, anina ma i avara-opunei da awana au ririvana i doboi.

¹¹ Lamna maranaina ekalesia anapapai, ma rava aiavo i da wei riwana i nonori i rovo kaua.

Apasol rava magamaagai i vilawani

¹² Ma Apasol mataira ma aniba kauai magamaagai i kaukauei rava awari. Ma tauvitu-magana Solomon ana au lovelove i vivitagogiei.

¹³ Wate rava gelau ai au boru ruina i rovoei, wate rava tau i vivirana-kauei.

¹⁴ Wate nelara ma waivine magamaagai Iesu awarina i vitumagana ma tauvitumagana ai au boru i ruirui.

¹⁵ Ma lamna aubaina rava ai rava doridoriai i avavara-opunei au eta ma ai au animatave i vimataveni, da Peter inii ita vodadani bo ega da gouna tau i ita gouni da ita lawana.

¹⁶ Ma melagai gelau Jerusalem au ririvana ravai magamaagai ai rava doridoriai, gelau arua-apoapoei i ruiruinia i nei ai ma anapapai i vilawani.

¹⁷ Anina ma pirisi gegetelarana ma ana rava mai Sadusi anapapai orai unura i oai.

¹⁸ Ma Apasol i pani, ma panipani au numana i terei.

¹⁹ Wate waguvarai BADA ana anela i nei da panipani numana metaetana i votawanei, ma tau i taravaina-opunei ma i riwei,

²⁰ "Ona rui tempol au orana, ona mairi ma lawana vouna riwana anapapuna rava ona parivere." "

²¹ Anela i ririwei nanare, tau i tempol i rui ma rava viararamanai i vikarei. Nai maranai pirisi gegetelarana ana rava maiteni i getai ma boru gaegaena e gogorei Sanhedrin i terei. Ma rava i paritawanei au panipani numana da Apasol ita nei ai awari.

²² Tau i panipani au numana i geta ma i baina-avei, ma i naeme da i viega.

²³ I pa, "Panipani numana anina i gudu-kauei, ma tauvipaipai au metaeta i maimairi; wate maranai tauai metaeta a votawanei lamna ega ai ai kampa."

²⁴ Maranai tempol taipainina ai bada ma pirisi babadai wei riwana i nonori, tau i vinuanaina da aiwai i tupua.

²⁵ Ma rava tagogi i nei ma i riwa, "Ona rautanigana! Nelara panipani au numana o teretereia, tau i tempol e maimairi ma rava e viararamani."

²⁶ Anina ma tempol taipainina ai bada, ma babada gelau maiteni i nae ma Apasol i nei ai. Tau i rovo ma ega ita egari mepa da rava gaime i ita ravi.

²⁷ Ma Apasol i nei ai boru gegetelarana au naoi, ma pirisi gegetelarana tau i vitara-virevirei.

²⁸ I pa, "A riwana-guratemi da wei ravana au wavana avena ota viararamana, wate ami viararamana i tua da Jerusalem i oai. Ma wei ravana tarana wavuna tauai o vereverelai."

²⁹ Ma Peter Apasol gelau aubai i vitavibabani i pa, "Tauai God ana voteletelei ma ega rava.

³⁰ Taumi Iesu au korosi o tuparatui ma o virageni, wate amamata ai God Tauna i vovaimairini.

³¹ Ma marina Tauna God au oiena e kiakiala, Tauna BADA ma Tauvilawana, Da mai Israel ai go'apoapoe ina rupeni, ma ai go'apoapoe ina nota-tawanei.

³² Ma tauai Arua Vivivireina maiteni wei kauai anatapui mataielai a inanai. Ma nanare God Arua Vivivireina i paritawanei rava votelatelai awari.”

³³ Tau i wei babanina i nonori ma amloi i gāigāi kua, ma i goei da Apasol ita viraḡeni.

³⁴ Wate Pharisi ma tarawatu badana wavana Gamaliel, rava anatapui wei ravana e vivivirei. Tauna Sanhedrin boruna au orana i mairi, ma rava i riwei da Apasol i opunei au doa mara aburuna ava.

³⁵ Anina ma ana rava i riwei, “Mai Israel, ona inana kua ma muriai da aiwai wei ravai awari ona kauai.

³⁶ Mara tagogi oroto wavana Theudas viḡavia i vikarei ma i kauana-melei da tauna rava gaeḡaena, ma rava ai maḡa 400 nanare tauna i votaḡotaḡoi. Ma maranaina tauna i viraḡeni ana tauvotaḡotaḡo i vilamonei ma aiwai anatapuna kampa i kwa.

³⁷ Wate tauna au murina oroto Galiliei wavana Judas i ḡeta, census au marana ma rava maḡamaḡau tauna i votaḡotaḡoi, ma tauna maiteni i viraḡeni, ma ana tauvotaḡotaḡo i vilamonei.

³⁸ Lamna aubaina a ririwemi da wei ravai ona voteretawanei! Mepa da tau i nola ravei, amapo ina peu.

³⁹ Wate mepa da Godei, taumi eḡa tagotagogina da wei ravai ona viḡaei, taumi mepa da God o viviviraviei.”

⁴⁰ Tau Gamaliel ana babani i voteletelei. Ma Apasol i riwei da i rui, ma i wipiei i kwapui ma i viḡaei da Iesu wavanei ina jima, ma i paritawanei da i nae.

⁴¹ Aubaina i aramanei da God tau i vinei da Iesu wavana aubaina ina vinuapoapoe. Anina ma Apasol ana nuaiiai Sanhedrin i opu-tawanei,

⁴² Tau mara patapatana tempol au orana ma au numa God riwana aiaina i rarausugulei ma i viviararamana da Iesu tauna Keriso.

6

Stephen i vinei tauvoaḡu

¹ Tauvitumaḡana ai boru i rarata, ma au orai mai Jew Greek taubabanieina, mai Jew kampa maemaei i viampariariei. Tau i beubeura da ai kaikaibaba ai ḡuta eḡa ita tereterei.

² Anina ma Apasol 12 tauvitumaḡana ai boru i raukwatuei. Ma i riwei, “Tauai Apasol ma ai nola lamna God riwana ata jimejime i ma avena mane nolana maiteni ata kaukauei.

³ Lamna aubaina au rava, awarimi rava 7 ona vinei, tau orai Arua Vivivireina i oai ma nuaulaulai da wei nolana ina kauai,

⁴ Ma tauai ai nola da pari ma God riwana ava ana jime i.”

⁵ Rava anatapui wei ogatarana i vianinei, ma Stephen i vinei, Arua Vivivireina orana i oai, ma ana tumaḡana God awarina i rata kua. Ma nanare Philip, Prokoras, Nikano, Timon, Pamenas ma Nicolas tauna Jentail, Antiokei ma ini bori i vaia ma i vikeresiana.

⁶ Ma wei ravai i nei ai ma Apasol nimai tau i tepai i terei ma i raupariei.

⁷ Anina ma God riwana i vituai ma au Jerusalem rava maḡamaḡau Iesu i vitumaḡanei, ma nanare pirisi maḡamaḡau i vitumaḡana.

Stephen i pani

⁸ Anina ma God Stephen i viaiaini ma i vovai-virewapani da mataira ma kua babai i kaukauei rava awari.

⁹ Wate mai Jew ḡelau i provins nununai i nei mai au Sairini, mai Alexandria, ma Silisia ma Eisia ai parinumana e ḡoreḡorei panipani *waduboi, Stephen ana ḡavia i vomairi.

¹⁰ Wate Arua Vivivireina, Stephen nuaulaula ma riwa i verei ma i bababani da tau i vigaḡopotai.

¹¹ Lamna aubaina tau rava ḡelau i ḡwalai da moruei Stephen ita vibenabenamei, ma ita riwa, “Tauai a nonori Stephen, Moses ma God i viviviboḡi.”

¹² Ma lamnei patara i viamlo-ḡaiḡaini, dogadogara ma tarawatu babadai maiteni. Anina ma tau Stephen i vojijini ma i naiei mai Jew ai Boru Geḡetelarana† awarina.

¹³ Ma tau rava ḡelau i nei ai da moruei Stephen i vibenabenamei, ma i riwa, “Wei ravana mara patapatana Tempol vivivireina ma Moses ana tarawatu i viviviboḡi.

¹⁴ Tauai a nonori i riwa da Iesu Nasaretei tempol ina rikai ma tarawatu Moses i verevereta anatapui maiteni ina virai.”

* 6:9: Wei ravai lamna slave waduboi, marina i voterei da ana ḡoanei e mamae.

† 6:12: Sanhedrin.

¹⁵ Ma rava anapui nai au boruna i kiakiala, Stephen i 'nana-tunutunui, ma i 'nanai da tauna naona i lalalai me anela.

7

Stephen ana babani.

¹ Anina ma Pirisi ġeġetelarana Stephen i paridadanei, “Wei viwavuna, riwa kaua bo?”

² *Stephen i paribelei:

Varevareiu ma amamau, au babani ona rautaniġanei. God boruborumana noita Abraham awarina i eġa au Mesopotamia, muriai da ita nae au Haran.

³ Ma God tauna i riwei, *Am dobu ma am dam ma netawanei da ma nae dobu ana viatataiem lana.*

⁴ *Anina ma Abraham Mesopotamia i netawanei ma i nae da au Haran i mae. Amana i'raġe ma au murina God Abraham i paritawanei da marina dobuna o mamae lana kampa ita mae,

⁵ *Nai maranaina God eġa Abraham doa ita verei, eġa aburu dadadana! Wate i parivainuaġani, da ina verei tauna ma ana epaepaia aubaii. Nai au marana Abraham eġa natunatuna,

⁶ *ma God wenanare Abraham i riwei, *Am epaepaia au dobu ġela ina mae ma ina vitaunola, nai dobuna ravai tauri ina rau-iviapoapelei da madeġa 400 ina kwa.*

⁷ * *Wate ravai, awarii e vivitaunola ana kovoġi, ma muriai mai Israel ina opui ma wei au dobuna ina voepaepaiu.*

⁸ *Anina ma God inibori parivai-nuaġanana bagibagina Abraham maiteni i kauai, ma maranai Isaac i tupua ma au pom vi-8-na Abraham natuna inina i bori. Muriai Isaac natuna Jacob inina i bori, ma nanare Jacob natunatuna 12 anapui inii i bori. Wei babadai lamna tauta noinoita.

⁹ *Jacob natunatuna varej Joseph i unurei ma i gimarei da ita vitaunola au Egypt, wate God tauna awarina i mae.

¹⁰ *Ma ana au nuabola i ġagaloei. Ma God nuaulaula i verei ma i kauai da Egypt ai gulau nuanuana i vaia, anina ma i terei da Egypt i vibadei ma ana numa orana i vibadei.

¹¹ *Ma gomara ġaeġaena i ġeta au Egypt ma au Canaan, ma vinuapoapoe ġaeġaena i tupua. Ma noinoita eġa ai lam.

¹² Ma maranai Jacob i nonori da au Egypt lam, ma noinoita i paritawanei au Egypt, wei ai babara naona.

¹³ Ma muriai i nae me ma wei maranai Joseph i vieġana-melei varevareina awarii, ma kampa mai Egypt ai gulau Pharaoh, Joseph ana numa ravai i aramanei.

¹⁴ *Anina ma Joseph riwa i paritawanei amana Jacob awarina ma i riwei da ana numa ravai anapui, ai maġa 75, ita nei au Egypt.

¹⁵ *Anina ma Jacob i nae au Egypt. Tauna kampa i'raġe ma nanare natunatuna anapui.

¹⁶ Taubeui i naiana-melei au Shekem ma Abraham Hamor natunatuna awarii kokoaga i gimagimaraia, kampa i vimataveni.

¹⁷ *Maranai mara i tuġereġerei da God Abraham i paripari-vainuaġania ita kauai, ata patara i maġa guratana au Egypt.

¹⁸ Ma Pharaoh vouna au Egypt i vibada ma tauna noita Joseph eġa ita aramanei.

¹⁹ *Tauna amamata i morui ma i rau-iviapoapelei, i egari da natunatui melamelai numei i viopuni da ita iraġe.

²⁰ *Wei au marana Moses i tupua, tevera inanana aiaina. Amana ma alona natui i ġamoi da nawaravi tonuġa i kwa.

²¹ *Ma maranai tevera numei i tere-opunei, gulau natuna guguinina tevera i vaia ma i ġamoi da natuna.

²² Ma mai Egypt ai nuaulaula Moses i viararamani ma i viwapana, babani ma nola awarina.

²³ *Moses ana madeġa 40 ma i nota da ita nae ana dam ravai ita raugenari.

* **7:2:** Gen 12:1 * **7:4:** Gen 12:4 * **7:5:** Gen 12:7; 13:15; 17:8 * **7:6:** Gen 15:13-14 * **7:7:** Exo 3:12 * **7:8:** Gen 17:10-14; Gen 21:2-4; Gen 25:26; Gen 29:31-35:18 * **7:9:** Gen 37:28; Gen 39:2-21 * **7:10:** Gen 41:39-41 * **7:11:** Gen 42:1-2 * **7:14:** Gen 45:9-10, 17-18 * **7:15:** Gen 46:1-7; Gen 49:33 * **7:17:** Exo 1:7-8 * **7:19:** Exo 1:10-11; Exo 1:22 * **7:20:** Exo 2:2 * **7:21:** Exo 2:3-10 * **7:23:** Exo 2:11-15

24 Ma i 'nanai da Egyptei, Moses ana rava oina i raviravi, ma tauna turana bainei Egyptei i vunui da i viragēni.

25 Moses i notai da ana rava ita aramanei da God tauna i paritawanei da ita agui da Egypt ita oputawanei. Wate tau i wei ega ita aramanei.

26 Ma maratomna Moses i nae me ma ana rava ruağa i viğaiğaiawa i 'nanai, ma i riwei, "Tamu i ava ma aiwai aubaina o viğaiğaiawa?"

27 Wate gāiawa tauvikareina Moses i vokaririei ma i riwei, "Tam ai i terem da ma vibelai bo tauai ai taurauetara?"

28 Tam ma viragēni me pom Egyptei u viragēni nanare bo?"

29 Maranai Moses wei i nonori tauna Egypt i ruba-tawanei ma i nae au Midian, wei ega ana dobu wate kampa i mae. Muriai dobuna wavinena i ravaği ma natunatuna nelarai ruağa i tupua.

30 *Ma kampa i mae madeğa 40 i kua ma BADA ana anela au mutulua ola Sinai au geregerena tauna awarina i ega, inanana me ai menamenana ai aburuna rugurugui au orana i gēgae.

31 Wei i 'nanai ma i baei ma i nae au geregere da ai arata ita tuvirevirei ma i nonori BADA i riwa i pa,

32 "Tau amamam ai God, Abraham ma Isaac ma Jacob ai God." Maranai Moses wei i nononori i rovo kaukaua ma naona i tere-govaği.

33 Ma BADA i riwa, "Am ae uma ma votawanei! Wei gabuna au tepana e maimairi, lamna doa vivivireina ma Viaiainana.

34 A inanai menanare mai Egypt, natunatu e rarau-iviapoapelei. Ai ora-tou a nonori ma a gairai da tau i ata vai-tawanei. Ma marina ma nei, Tau ana paritawanem au Egypt."

35 *Stephen i riwa:

Wei Moses na tagogina, mai Israel i parivirevirei i pa, "Ai i terem da tauai ma vibelai ma ma rauetarelai?" Moses i paritawanei da ita vibelai ma ita tereopunemi, anela i egaega ai menamenana au poui, ana aguei.

36 *Ma Moses tau i Egyptei i ravena-opunenei ma mataira babai ma vivirewapanai i kaukauei au Egypt, Boga lebalebarina ma ai au vagai madeğa 40 au mutulua.

37 *Wei Moses-na tagogina, mai Israel i riwei, "God muriai peroveta ami damei ina paritawaneai me tau."

38 *Moses Israel patarana maiteni Egypt i opu-tawanei i vitagogiei au ola Sinai ma anela Moses awarina i bababani, tauna kampa noinoita maiteni. Ma riwa mamae-nonoana i nonori ma wei lamna i veredamanei tauta awarita.

39 Wate noinoita Moses i parivirevirei ma au orai i goei da ita nae me au Egypt.

40 *Ma tau i Aaron i riwei, "Nai ravana Moses, Egyptei i taravai-opunelai, tauai ega ata aramanei aiwai awarina i tupua. Ma tauai ai god kokoitau ma kau i da ina rauetaraveniai."

41 *Anina ma bulumakau gaubona kokoitauna i kau i kau, ma pulo i apui awarina ma i amei ma i umei, da aiwai uraiei i kaukauei i vimae-gaegaeni.

42 Wate God tau i mae-puputei ma i voterei da ubona ma nawaravi ma madeğa au mara i vimae-gaegaeni. Wei lamna peroveta nununai i ririweia i tupua:

Rava mai Israel! Maranai madeğa 40 au mutulua.

Tamu ega Tau awariu gamogamo ota vunui ma ota apui tapa?

43 *Tamu ami god Molek ana numa gara ma ami ubona god kokoitauna Rephan o avarai.*

Kokoitau o kau i da ota vimae-gaegaeni.

Lamna aubaina rava borui ami au dobu ina vainimi ma ina naiemi aueia,

Babilon ina netawanei da dobu au gelauna. (Amos 5:25-27)

44 *Noinoita, God ana numagara, i avarai maranai au mutulua i mamae. Moses wei i voai, me God i viatataiei nanare.

45 Muriai Joshua noinoita i rau-etaraveni ma God ana numagara i avarai ma ana aguei i rui ma nai dobuna ravai i viopuni ma ai dobu ta vaia. Ma numagara kampa i mae da gulau David ana au mara.

46 *God, David nuanuana i vai-kau i ma David i vibağa da tauna God ana numa ita voai.

47 *Wate David ega numa ita voai ma natuna Solomon numa i voai.

⁴⁸ Wate God ġeġetelerana eġa rava uranei numa ita voavoai au orana ita maae, me peroveta wariġa i riwa i pa:

⁴⁹⁻⁵⁰ *Aubaina Tau aiwai anata-puna au mara ma au dobu a kauēi. Tapa?*

BADA i riwa, “Mara* au anikiala
ma dobu aeu kareu aniterenana.

Wate numa aiwaina ona voai tau aubaiu? Eġaten!
Tau au animae-kaua mepa? Eġa mepa!

(Isaiah 66:1-2)

⁵¹ Ma Stephen i riwa:

Taumi orami badobadoi. Ma eġa ota ġoġoġi da God ona voteletelei ma taniġami o vopotai da ana riwa eġa ota nononori. Taumi Arua Vivivireina o vivigaviei me noinoimi i kaukauei nanare.

⁵² Noinoimi metau perovetai eġa ita rau-iviapoapoelei. Wariġa perovetai, God ana tauvilawana, ana nei i vinolenolei; Wate noinoimi wei perovetai maiteni i viragēni. Ma marina Tauna i nei ma o vibenabenamei ma o viragēni.

⁵³ God ana anela i paritawaneiai da ana tarawatu noinoita i verei, wate taumi tarawatuna eġa ota voteletelei.

Stephen ġaimēi i viragēni

⁵⁴ Maranai babada wei riwana i nonori ma i meji guratana ma ivoi i uta-ġiriġiriei Stephen awarina.

⁵⁵ Wate Arua Vivivireina Stephen orana i oai, i taepai au mara ma God ana boruma i 'nanai, ma Iesu God au oienā i maimairi.

⁵⁶ Ma i riwa, “Ona inana! Mara metaetana i wanatawanei ma Rava Natuna a inainanai God au oiena e maimairi.”

⁵⁷ Marina tau anata-pui taniġai i vopotai, i vigaragarei ma Stephen aubaina i ruba,

⁵⁸ ma i taina-opune i au doa, taon i opu-tawanei da au ririva ma ġaimēi ravina i vikarei. Ma tauviwavu ai kwama i votawanei ma tevera laragana wavana Saul au aena i vidamni.

⁵⁹ Tau i viraurauei ma tauna i raupari i pa, “BADA Iesu, aruu ma vaia!

⁶⁰ Ma ae-tutunei i peu ma i garara, “BADA ai ġo'apoapoe ma nota-tawanei.” Wenanare i riwa ma i'rage.

8

¹⁻² Ma Saul kampa da Stephen ana irage i 'nanai ma i vianinei. Rava patupatutui ġelau i ana toutoui ma ana tarakwatui i nei ma Stephen taubeuna i naiei ma au kokoaga i terei.

Saul Ekalesia i rau-iviapoapoelei

Nai maranaina rau-iviapoapoe ġaeġaena i vikarei ekalesia awarii au Jerusalem, Ma anata-pui i viruba-tomana au Judea provins ma Samaria provins. Apasol ava au Jerusalem i mae.

³ *Wate Saul i vikarei da ekalesia ai boru ita viamoai. Numa anata-pui i ruini ma nelara ma waivine i taina-opune i ma i paritawanei au panipani-numana.

Philip au Samaria

⁴ Wate tauvitumaġana Jerusalem i rubaruba-tawanei taon ma dobu anata-puna i naeni ma Riwana Aiaina i raugugulei.

⁵ Ma Philip i nae au taon tagogi au Samaria ma kampa BADA ana Vinevine Keriso i raugugulei.

⁶ Maranai patarana, Philip i raruugugula i nonori, ma i 'nanai kaua babai ma mataira ġaeġae i kaukauei tau anata-pui orai taputapune i rautaniġana.

⁷ Tauna arua-apoapoei rava maġamaġau i orai i egari da ana garagararai i viopuopuana, ma nanare rava maġamaġau gwaġagwaġai ma sigesigei i vilawani.

⁸ Ma nuai i ġaeġaena i mae nai au taona.

Simon tauna barabaravuna

⁹ Wenanare, nai au taona oroto tagogi i mae wavana Simon, ma tauna wariġa ava ana baravu i kaukauei ma mai Samaria i baibaiei. Ma i voepaepana-melei da tauna rava ġaeġaena.

¹⁰ Rava labalababa, ma wavai naenaēi anata-pui ana babani i rautaniġana-kauēi ma i ririwa, “Tauna, God ana rewapana e ġoreġorei, Rewapana Ġaeġaena.”

¹¹ Tau i vineneġanana-kauēi aubaina mara nonoa tau Simon ana baravu i baebaei.

* **7:49-50:** Wei anona lamna Bada wenanare natuna i riwei, “Tam au oieu ma kiala ma am ġavia au ae kareu ana tuvaidoedoi” ✠ **8:3:** Act 22:4-5; 26:9-11

¹² Wate tau Philip i vitumaḡanei maranai, God ana vigulau Riwana Aiaina ma Iesu Keriso rava awari i raugugulei. Ma lamna aubaina nelara da waivine i nei da i babataito.

¹³ Simon maiteni i vitumaḡana ma i babataito. Ma Philip mepa i nenaē tauna kampa aubaina kaua babai ma mataira vivirewapanai i kaukauei. Tauna wei pulona i bana-kauēi.

¹⁴ Maranai Aposol au Jerusalem i nonori da mai Samaria, God Riwana i vitumaḡanei, tau Peter ma John i paritawane awari.

¹⁵⁻¹⁶ Ma au Samaria i ḡeta ma tau i rauparie da Arua Vivivireina ita rui au orai. Aubaina tau Iesu wavane awari i babataito. Ma arua vivivireina eḡa ita rui.

¹⁷ Peter ma John urai tau au tepai i terei ma i raupari da Arua Vivivireina au orai i rui.

¹⁸ Maranai Simon i 'nanai da mai Samaria Arua Vivivireina i vaia, maranai Aposol urai au kolai i terei, ma Simon mane i vilololoi,

¹⁹ ma i vibaḡa i pa, "Tau maiteni nai rewapanana ma vereu da rava au kolai urau ana terei ma tau Arua Vivivireina ina vaia."

²⁰ Wate Peter i paribelei i pa, "Anina da God tam am mane maiteni ina tawanem ai au menamenana, aubaina tam e notanotai da God ana pulo manelei ma gimarai!

²¹ Tam wei nolana au orana am gabu eḡa ita mamae, aubaina oram eḡa ita ai God au matana.

²² Am nota apoapoe ma votere-tawane. Ma mae-tavirem BADA awarina ma ma vibaḡai da am nota apoapoe ina nota-tawane.

²³ Aubaina a inanaim da unura oram i oai tauai awariai ma wei notai apoapoei e panipanim."

²⁴ Simon marina Peter ma John i riwei, "Aubaiu BADA awarina ona raupari da aiwai o ririwei eḡa ina tupua awariu!"

²⁵ Ma Peter ma John ai lawana ma BADA Riwana Aiaina ekalesia voui awari i raugugulei. Ma i raugugula nae Mai Samaria ai au taon nununai da i ḡeta au Jerusalem.

Philip ma Ethiopiei

²⁶ Mara tagogi BADA ana anela, Philip i riwei, "Ma vokaukaua ma ma nae au rauanaḡei, etanai au Jerusalem da e ḡaiḡaira au Gaza." (Wei etanaina lamna au mutulua).

²⁷ Anina ma Philip i vokaukaua ma i nae. Ma wei au etanaina oroto Ethiopiei i 'nanai. Tauna mai Ethiopia ai kwin Kandake, ana mane taupainina. Wei orotona i nae au Jerusalem God viborumana aubaina,

²⁸ ma i nenaē-me ana au dobu. Ma ana au chariot i kiala ma wariḡa peroveta Isaiah buka i girugirumia i 'aiavi.

²⁹ Ma Arua Vivivireina Philip i riwei, "Ma nae ma chariot au ririvana ma babara-nae."

³⁰ Anina ma Philip i ruba chariot au ririvana ma i nonori badana peroveta Isaiah ana buka i 'aiavi. Ma Philip i paridadana, "Aiwai e iaivia e araramanei bo eḡa?"

³¹ Orotona i paribelei, "Menanare ana 'ramananei mepa da rava eḡa ita parivai-araramaniu!" Ma Philip i vibaḡai da i ḡeta da au ririvana i kiala.

³² Buka au orana, wei riwana i 'aiavi,

*Tauna i taravaina-naiei me sipu viragenana aubaina
me sipu natuna e genugenuana maranai aparana e boribori,
tauna eḡa aiwai ita latoni.*

³³ Tauna i vijibogi ma i vinimalamalai ma eḡa ita kauana-kauēi awarina.
Aiai ana epaepaia ina babaniei.

Aubaina ana mara au dobu i vaitawanel."

(Isaiah 53:7-8)

³⁴ Ma orotona, Philip i paridadanei, "Isaiah e babaniana-melei bo rava ḡelauna e babaniei?"

³⁵ Ma Philip, wei riwana awarina i vikarei ma riwa ḡelau maiteni ma Iesu Riwana Aiaina i viararamani.

³⁶ Ma i nenaē da waira i 'nanai ma Ethiopiei i riwa, "Ma inana waira noi, aiwai aubaina da eḡa ana babataito?"

³⁷ *

³⁸ Badana, chariot taurubeina i riwei, "Chariot ma vojijini!" Ma tauna ma Philip i ḡaira waira au orana ma Philip, badana i babataitoi.

* 8:37: Buka wadubo nonoana vs 37 eḡa ita mamae.

³⁹ Maranai wairei i ġeta, BADA Aruana maratagogi Philip i vai-tawanei ma turana eġa ita inana-melei, ma ana morelanana i nae ana au dobu.

⁴⁰ Wate Philip au Asotus i raueġa ma dobuna i naeni ma Riwana Aiaina i raugugulei da au Caesarea taon i ġeta.

9

Saul i vitumaġana

¹ Wate Saul amapo da i mejimeji ma i ġoeġoei da BADA ana tauvitumaġana ita viraġeni. Ma i nae Pirisi Ġetelarana awarina,

² ma i vibaġai da pepa ita girumi boru-numai babadai awarii au Damaskas da rewapana ita verei da Iesu ana etanai tauvitumaġanai, nelara ma waivine ita pani ma ita nei ai au Jerusalem.

³ Ma Saul, Damaskas i tuġereġerei, nanare ma lalalaina marei i ġairai da tauna i ravilalai.

⁴ Tauna i peu au doa ma pona i nonori awarina i babani i pa, "Saul, Saul! Aiwai aubaina e rarau-iviapoapoeleu?"

⁵ Saul i paridadana, "Tam ai ai bada?"

Ma pona i paribelei, "Tau Iesu, tauna e rarau-iviapoapoele!"

⁶ Marina ma vomairi ma ma rui au Damaskas, ma kampa aiwai ina riwem ma kau ei."

⁷ Nelara Saul maiteni i nena i mairi kwakwa, ana gamopotai, tau i pona i nonori wate eġa ai ai ita inana i.

⁸ Ma Saul au doa i matamatave i vomairi ma matana i kala, wate eġa aiwai ita inana i. Ma ana rava i raunimavoai ma i taravaina-naiei au Damaskas.

⁹ Ma au pom tonuġa eġa ita inana, eġa ita am bo ita uma.

¹⁰ Au Damaskas tauvitumaġana i mae wavana Ananias. BADA ana au inana i viatataiei i pa, "Ananias!"

Ma i paribelei, "Bada, tau weka!"

¹¹ BADA tauna i riwei, "Etanai wavana Etanai Jijimanina ma vaia da Judas ana au numa, kampa oroto Tarsusei wavana Saul ma baiei. Tauna marina e rarau-pari awariu.

¹² Ma ana au inana i 'nanai oroto wavana Ananias i nei awarina ma urana au inana i terei da ita inana-me."

¹³ Wate Ananias i paribelei, "Bada, rava maġamaġau i riweu da wei ravana ana kaua i apoapoe kaua tauvitumaġana awarii au Jerusalem!

¹⁴ Ma weka i nei pirisi ġaeġaei ai rewapani da ai ai wavam e viviborumei ina pani."

¹⁵ Wate BADA, Ananias i riwei, "Ma nae! Tau a vinei da aubaiu ina vitaunola ma wavau ina jimej, Jentail ma ai gulagula awarii ma nanare mai Israel awarii.

¹⁶ Tau ana viatataiei da aubaiu ina jima ma rau-iviapoapoe ġaeġaena ina nei awarina."

¹⁷ Anina ma Ananias i ġeta au numa ma i rui. Ma urana Saul au tepana i terei ma i riwei, "Vareiu Saul, BADA Iesu, Tauna au etanai awarim i eġa maranai weka u nenei, i paritawaneu awarim da ma inana me ma Arua Vivivireina oram ina vioai."

¹⁸ Maratagogi purapura inanana me iana wenavina au matana i peu, ma tauna, inana me. Ma i vomairi ma i babataito.

¹⁹ Ma i am ma ana rewapana i vai-melei.

Saul au Damaskas i raugugula

²⁰ Ma tauna maratagogi i nae ma pari au numai i rarauugula da Iesu anina God natuna.

²¹ Tau i aiavo i da Saul i nonori i ba kaua ma tau i ava i babani vivira i pa, "Wei ravana tagogina, rau-iviapoapoe ġaeġaena Iesu ana tauvitumaġanai awarii i kaukauei au Jerusalem bo? Tauna i nei weka nolana tagogina aubaina da tauvitumaġana ita pani ma ita naiei Pirisi babadai awarii bo."

²² Wate Saul ana raugugula i virewapana kaua ma lamnei mai Jew au Damaskas i aramane i da Iesu anina Keriso, Vinevina, ma lamna aubaina ana babani eġa ita parivirevirei.

²³ Ma au pom biaga au murina Jew babadai i viogatara da Saul ita virageni.

²⁴ Mai Jew marai ma waguvarai taon garina au metaetana i vipaipai da Saul ita viraġeni. Wate Saul ai ogatara riwana i nonori.

²⁵ Ma waguvarai tauvitumaġanai ġelau i bada Saul i taravaini ma iriga ġaeġaena au orana i poai ma gavogavo aburuna taon au garina, kampa ġuravei i tere-ġairei au doa ma i ruba.

²⁶ Saul i ġeta au Jerusalem ma maranai i ġoei da tauvitumaġanai ai au boru ita rui. Wate tau i roveoi ma eġa ita vitumaġane i da tauna Iesu ana tauvotaġotago.

²⁷ Wate Barnabas tauna i taravaini ma i naiei Apasol awarii, ma i riwei menanare au etanai Saul, BADA i 'nanai ma aiwai awarina i babaniei. Ma menanare au Damaskas ana tepatorana i raugugula Iesu wavane.

²⁸ Anina ma tau Saul i taravaini ma maiteni i mae ma Jerusalem i naeni ma ana tepatorai i raugugula BADA wavane.

²⁹ Ma nanare Saul mai Jew pona Greek taubabanieina maiteni i babani ma i viparipariġai, ma tau i viogatarata tauna ita virageni.

³⁰ Maranai tauvitumaġana ġelau wei i nonori, ma Saul i taravaina-naiei au Caesarea da i paritawane au Tarsus.

³¹ Anina ma ekalesia au Judea, Galili ma Samaria ana nuubai i mae. Ma Arua Vivivireina ana aguei ekalesia ai tumaġana i vovai-virewapani, Ma ai boru i rarata, ma tau BADA i vivirana-kauei.

Aeneas ma Dorkas

³² Nai maranaina Peter dobu maġamaġau i naeni, ma God ana tauvitumaġana awarii i ġeta au Lidda.

³³ Kampa oroto wavana Aeneas i nelaġai, tauna gwaġagwaġana madeġa 8 ana au aravi i matave.

³⁴ Peter i riwa, "Aeneas, Iesu Keriso i vilawanim! Ma vomairi ma am aravi ma noui!" Ma maratagogi i lawana.

³⁵ Anina ma rava maġamaġau au Lidda ma Sharon wapuna melagaina, i mae-tavirei BADA awarina.

³⁶ Au Joppa tauvitumaġana tagogi wavana Tabitha (Greek ponanei lamna Dorkas) tauna marana patapatana kaua maġamaġau aiiai i kaukauei molamokai aubai.

³⁷ Wei marana tauna i doria ma i raġe ma tupuana i oġai ma numa vatavatara au aidamo, i vimataveni.

³⁸ Lidda, lamna Joppa au ġereġerena ma maranai tauvitumaġana i nonori da Peter au Lidda, tau ai rava ruaga i paritawane da Peter i egari i pa, "Laġilaġina ma nei!"

³⁹ Ma Peter tau maiteni i nae da i ġeta ma i taravaina-ruiei au numa vatavatara. Kaika-iababa maġamaġau ana toutoui Peter i mairi kwaviviroi. Maranai Dorkas lawalawaina ma kwama da gara i popoia Peter i viatataiei.

⁴⁰ Wate Peter anatapui i vibaġai da i opu au doa, ma ae-tutune i mae-ġaira ma i raupari, ma taubeu i riwei, "Tabitha, ma vomairi!" Tabitha matana i kala ma maranai Peter i 'nanai, i vomairi da i kiala.

⁴¹ Peter urana i viloloi ma i voagui da i vomairi. Ma tauvitumaġana anatapui ma kaika-iababa maiteni i kwatueiai, ma wavine lawalawaina tau i verei.

⁴² Ma wei riwana dobu Joppa i naeni ma rava maġamaġau Iesu i vitumaġanei.

⁴³ Peter au Joppa i mae au pom biaġa nanare Simon ġamoġamo opina taurauġaroġaroieina ana au numa.

10

Peter ma Cornelius

¹ Au Caesarea oroto* wavana Cornelius, tauna mai Italy sorodia boruna ai bada.

² Tauna rava jijimanina ma patupatutuna, ma ana numa ravai maiteni God tauraduneleina. Ma molamolakai i paipaina-kauei ma marana patapatai i raraupari God awarina.

³ Au bigai tagogi 3 oklok nanare i raraupari ma ana au inana, God ana anela au aiaina i 'nanai, i nei awarina ma i riwa, "Cornelius!"

⁴ Cornelius ana rovona anela i 'nana-tunutunui ma i riwa, "Au bada, menanare!"

Ma anela i paribelei, "Am pari ma am verena molamolakai awarii, i ġeta God awarina me pulo apuapunana ġabuna.

⁵ Ma marina nelara ġelau ma paritawane au Joppa ma ravana wavana Simon wavana ġelauna Peter ina taravainiai.

⁶ Tauna rava wavana Simon, ġamoġamo opina taurauġaroġaroieina awarina e mammae gera au ririvana."

⁷ Maranai anela i nae, Cornelius ana taunola ruaga i ġoreiai, ma ġelauna lamna sorodia, tauna ana tauvipaipai, tauna God tauvitumaġaneiana.

⁸ Tauna aiwai anatapuna tau i riwei ma i paritawane au Joppa.

Peter Cornelius i raugenari

* 10:1: Wei ravana jentail.

⁹ Maratomna au benai nanare maranai nelarai Joppa i tuġereġerei, Peter i ġeta numa au tepana da ita raupari.

¹⁰ Ma am i 'raġe ma i ġoei da aiwai ita ani, maranai tau lam i vovokaukauei, ma Peter matanei rauboni i 'nanai.

¹¹ I 'nanai mara i wanatawanei ma purapura inanana me puru ġaeġaena au adana 4 i vojijini ma marei i tere-ġaireiai au dobu.

¹² Au orana lamna sia tapuna ma tapuna, tetetei me mota ma kiu au aidamo lavelavei.

¹³ Ma pona i riwa, "Peter ma vomairi, ma viraġena ma ma am!"

¹⁴ Wate Peter i paribelei, "Eġa! Lamna eġa melanai ana kauei. Eġa melanai lam viviġana ata am-dadani."

¹⁵ Wate pona i babani me, "Aiwai God i viviaiainia, eġa ma riwa da i apoapoe."

¹⁶ Mara tonuġa wenanare i tupua ma me marana puruna i ġaiana-melei au mara.

¹⁷ Ma Peter aiwai i 'nainanai anona i vinua-notenotei, nanare ma Cornelius nelara i paripari-tawanei, tau Simon ana numa i nelaġai ma i ġeta ana au metaeta.

¹⁸ Tau i paridadana, "Weka rava wavana Simon-Peter e mamae bo eġa?"

¹⁹ Peter amapo da wei i vivinua-notenotei maranai Arua vivivireina i riwa, "Simon, nelara tonuġa e baibaiei!"

²⁰ Lamna aubaina ma vomairi ma ma ġaira au gabaura, eġa ma geduai, aubaina tau a paritawanei awarim."

²¹ Peter i ġaira ma awarii i riwa, "Tau mi tau o baibaiei bo, Ami ġoana aiwai?"

²² Ma nelarai i paribelei, "Tau mi Cornelius mai Rome ai sorodia ai bada i paritawanelai, tauna rava jijimanina ma God tauvoepaepana, ma mai Jew maġamaġau tauna e vivivirei. Anela vivivireina i riwei da uta nei ana au numa da aiwai u araramanei uta riwei."

²³ Ma Peter nelarai i ġorei da i rui au numa ma kampa i matave.

Peter Cornelius ana au numa

Ma maratomna anatapui i nae, Tauvitumaġana ġelau i Joppa maiteni i vomairi.

²⁴ Ma au pom ġelauna tau au Caesarea i ġeta. Cornelius tau i paipaini, ma ana numa ravai ma ana rava i ġorei da i nei.

²⁵ Ma maranai Peter i rui i riwa, Cornelius Peter i 'nanai ma i mae-ġaira au ae karena ma ana vivirana i raudune.

²⁶ Wate Peter tauna i voepai ma i riwa, "Ma vomairi, Tau rava ota me tam."

²⁷ Peter ma Cornelius i bababani ma i rui i riwa au numa. Ma i 'nanai da patara tauna i paipaini.

²⁸ Peter tau i riwei, "Tau mi o aramana-kauei da tauta mai Jew ata tarawatu e viviġaeta da Jentail maiteni tana mae-gogona bo tana raugenari. Wate God i viatataieu da eġa rava ana ġorei rava apoapoena bo miramirana.

²⁹ Lamna aubaina maranai u vibaġaiu da ata nei, Tau au nota aiainei a nei. Tau ata paridadanem, Marina ma riweu aiwai aubaina au riwa u paritawanei?"

³⁰ Cornelius i paribelei, "Au benai wenanare au pom 4 marina i kwa, au numa a raraupari, nanare ma rava ana gara ararapoirina ma namanamarina au naoiu i raumairiei.

³¹ Ma i riwa, 'Cornelius! God am pari i nonori ma am verena molamolakai awarii i vinuaiaiei!"

³² Ma nelara ma paritawanei au Joppa da Simon e ġoreġorei Peter awarina. Tauna Simon, ġamoġamo opina taurauġaroġaroena ana au numa e mamae."

³³ Lamna aubaina da am riwa laġilaġina ava a paritawanei, ma i ai da tam u nei. Tau mi anatapuiai marina weka God au matana a vivipaipai da BADA aiwai i riwem ana nonori."

Peter ana babani

³⁴ Ma Peter babani i raukarei, "Marina a inana-kauei da God rava anatapui e vaivaia da tagogina.

³⁵ Wate dobu dobuai ravai God e vivivirei ma kua aiiai e kaukauei, Tauna wei ravai e ġoeġoei,

³⁶ Tau mi o aramanei God Riwana Aiaina i paritawanei mai Israel awarii da rava ina mae-kaua God maiteni, maranai Iesu Keriso ina vitumaġanei ma tauna ai lawana ina vibadei.

³⁷ Tau mi o aramanei Iesu aiwai i kauei Judea au anatapuna, au Galili i vikarei maranai John babataito ai kua i raugugulei.

³⁸ God Arua Vivivireina ma rewapana Iesu Nasaretei i verei da dobu maġamaġau i naeni ma kua aiiai i kaukauei, ma rava au orai arua apoapoe i rui i riwa, i vilawani.

³⁹ –Aiwai anatapuna au Judah provins ma au Jerusalem i kaukauei tau mi anatapuiai a vimatematei ma a bababaniei. Tauna au korosi i tutui da i'raġe.

⁴⁰ Wate God tauna iraḡelei i voepa-melei aupom au vitonuina ma i kauēi da ḡelauai awariai i eḡa.

⁴¹ Eḡa rava maḡamaḡau i tauna ita inanai, anina tauvimatamata i vinevinei awari ava i ḡeta. Lamna tauai maiteni a uma ma am ana vomairi au murina.

⁴² Ma i eḡariai da dobu au anatapuna ana raugugula ma ana jima da God Iesu i vinei da rava anatapui lawalawaii ma irairaḡei ina rauetarei.

⁴³ Peroveta anatapui i jimeī da maranai rava Iesu i vitumaḡanei, Tauna wavinei God tauai ai ḡo'apoapoe ina vaitawanei."

⁴⁴ Maranai Peter i bababani ma Arua Vivivireina i ḡairai ma rava i raurautaniḡana i vioai.

⁴⁵ Ma mai Jew Joppei i nenei Peter maiteni, i ba kaua maranai God Arua Vivivireina i paritawana ḡairei Jentail awarii.

⁴⁶ Au baina mai Jew i nonori tau i pona tapunei i bababani ma God i vivimae-ḡaeḡaeni. Anina ma Peter i riwa,

⁴⁷ "Tui Arua Vivivireina i vaia me tauta. Wei lamna aubaina eḡa aiai ina viḡaeta da wei ravai tana babataitoi."

⁴⁸ Ma tau Cornelius ana numa ravai maiteni ma ana rava ḡelau Iesu Keriso wavanei i babataitoi, ma tau Peter i vibaḡai da maiteni ita mae mara aburuna.

11

Peter ana babani

¹ Apasol ma tauvitumaḡana au Judea provins i nonori da Jentail maiteni God riwana i nonori ma i vitumaḡana.

² Ma maranai Peter i ḡeta me au Jerusalem tauvitumaḡana mai Jew ḡelau tauna i eni i pa,

³ "Tam Jentail ai au numa u rui, ma maiteni u am!"

⁴ Anina ma kaua menanare i tuputupuanei anatapuna Peter tau i parivereī:

⁵ I riwa i pa:

Maranai a raraupari au Joppa ma matauei kaua a inanai, ma purapura inanana me puru ḡaeḡaena adana 4 i vojijini ma marei i tere-ḡaireiai awariu.

⁶ Au orana a inana lamna ḡamoḡamo maramaraḡamai ma moduei, tetetei me mota ma kiu au aidamo lavelavei.

⁷ Ma pona a nonori i pa, "Peter ma vomairi, ma viraḡena ma ma am!"

⁸ Tau a paribelei, "Eḡa! Lamna eḡa melanai ana kauēi. Eḡa melanai lam viviḡana ata am-dadani."

⁹ Wate pona marei mara viruaina i babani, "Aiwai purapurana God i riwa da i ai, tam eḡa ma riwa da i apoapoe."

¹⁰ Mara tonuḡa wenanare i tupua, ma puruna i ḡaiana-melei au mara.

¹¹ Nai maranaina mai Caesarea ai rava tonuḡa i paripari-tawaneiai, au metaeta i raumairiei.

¹² Ma Arua Vivivireina i riweu da eḡa aiwai ana notai ma orau taputapunei ana nae. Mai Joppa tauvitumaḡana 6 maiteni a nae ma ravana ana au numa a rui.

¹³ Cornelius i riwelai da anela awarina i eḡa, ma i riwei, "Rava ma paritawanei au Joppa da rava wavana Simon Peter ina neiai."

¹⁴ Tauna wei riwana ina neiai ma lamnei tam ma am numa ravai maiteni ina vilawanimi.

¹⁵ Ma babani a raukarei ma Arua Vivivireina i ḡairai da tau i vioai me au naona awarita i tupua nanare.

¹⁶ *Anina ma Iesu aiwai i ririwei a notai, "John wairei i babataito, wate taumi Arua Vivivireinei ina babataitoimi."

¹⁷ Inanana au aiaina da God Jentail pulona tagogina i verei, me tauta i verevereta maranai Iesu Keriso ta vitumaḡanei, ma tau aiai da God ata viḡaei?

¹⁸ Tui i vigamopotai maranai wei i nonori, ma God i viborumei i pa, "Riwa kaua da God Jentail maiteni i vianinei da ina rupena ma ina lawana."

Ekalesia au Antiok

¹⁹ *Ekalesia ḡelau rau-iviapoapoe i rovoei maranai Stephen i viraḡeni ma i vilamonei au uama. ḡelau i ruba nae au Phonisia, au Saipras ma Antiok, ma kampa Iesu Riwana Aiaina i raugugulei mai Jew ava awarii.

²⁰ Wate ekalesia gēlauri mai Saipras ma mai Sairini i nae au Antiok Jentail awarii ma Iesu Riwana Aiaina i raugugulei.

²¹ BADA ana rewapana tau i au orai i mae ma Jentail maḡamaḡauri i vitumaḡana ma i mae-tavirei BADA awarina.

²² Wei riwana i ḡeta ekalesia awarii au Jerusalem, ma tau i Barnabas i paritawanei au Antiok.

²³⁻²⁴ Maranai i ḡeta ma i 'nanai da God ravai i viaiaina-kauei, tauna i vinuai ai ma i egari da BADA awarina ina vipatutu orai taputapunei. Barnabas tauna rava aiaina, Arua Vivivireina orana i oai ma ana tumagaana i rata, ma God ana aguiē, i rauguga ma rava maḡamaḡauri i taini BADA awarina.

²⁵ Ma Barnabas i nae au Tarsus da Saul ita baiei.

²⁶ Ma i nelaḡai ma i nei ai au Antiok, ma kampa tauvitumaḡana maiteni i mae madeḡa tagogi i kwa, ma patara gaegaena awarii i viararamana. (Weka au Antiok lamna i vikarei da tauvitumaḡana i viḡorei Kerisiana)

²⁷ Wei au marana peroveta gēlauri Jerusalem ei i ḡairai.

²⁸ *Peroveta tagogi wavana Agabas i vomairi ma God ana rewapanei i vieḡa da gomara e nenei au naoui dobu au anapapuna (Caesar Claudius ana vibada au marana gomarana i nei).

²⁹ Tauvotaḡotaḡo au Antiok i vianina da tau i ava ita kauana-guratei da mane vounaina ita kauei da ai rava ekalesia au Judea ita voagui.

³⁰ Tau i nanare i kauei ma manena Barnabas ma Saul au urai i terei ma tau i ekalesia ai babada au Jerusalem i verei.

12

James i viraḡeni ma Peter i pani

¹ Lamna maranai, gulau Herod Agrippa* i raukarei da ekalesia gēlauri i rau-iviapoapelei.

² James, John tuana uana sodei i bori-tuini.

³ Ma maranai Herod i 'nanai da mai Jew wei kauana i vinuai ai, ma ana sorodia i egari da Peter maiteni ita pani da au pani numana ita terei. Wei kauana Palawa Bagibagina ana au torela i tupua.

⁴* Ma Peter i pani ma au pani numana i terei ma sorodia 16 tauna i paini. [Sorodia 16 i terei da borui 4 ma i vipaipai.] Herod i goei da Peter ita vojijini da raḡona torelana au murina ma au deba ita rautarei.

⁵ Ma lamna aubaina Peter au pani numana i vojijini mara aburuna. Wate ekalesia i raurapari guratana God awarina Peter aubaina.

Peter pani numanei i tere-opunei

⁶ Ma nai waguvaraina, ma maratonna da Peter ita rautarei, Peter sorodia ruaḡa au poui i matamatave. Urana seinei i raḡini sorodia ruaḡa au urai, ma sorodia gēlauri au metaeta i vipaipai.

⁷ Maratagogi BADA ana anela i eḡa ma pani numana i ravilalai. Ma Peter i vogugui da matana i kala ma i riwei, "Laḡilaḡina ma vomairi!" Ma sein au urana i dabarara.

⁸ Ma Peter i riwei, "Ma vigara ma ae uma ma oteni." Ma nanare i kauei. Ma i egari, "Am kwama potopotona ma oteni ma ma votaḡotaḡoiu."

⁹ Peter anela i votaḡotaḡoi da pani numana i opu-tawanei, wate eḡa ita aramanei anela aiwai i kaukauei, tauna i notai i rauraboni.

¹⁰ Tau i, sorodia boruna ruaḡa au doa i netawanei, da i opu au metaeta iramei, wei e opuopu au taon. Metaeta ainelana i wanatawanei aubaii ma i opu. Tau i etanai tagogi i ḡairani ma maratagogi anela tauna i voterei.

¹¹ Peter ana nota i nememei ma i riwa, "Wei anina riwa kaua! BADA ana anela i paritawaneiai da Herod au urana i vaitawaneu, da mai Jew aiwai i notanotai da ita tupua lamna eḡa ita tupua."

¹² Maranai ana nota i nememei tauna i nae Mary ana au numa. (Mary lamna John alona. John wavana gēlauna Mark). Kampa rava maḡamaḡauri i vitagogiei ma i raurapari.

¹³ Peter au metaeta i raupewapewa ma taunola wavana Rouda i nei da metaeta ita votawanei.

* 11:28: Act 21:10

* 12:1: Tauna gulau Herod 1 goḡana.

* 12:4: Exo 12:1-27

14 Ma Peter ponana i nonori ma i aramanei da tauna, ma i vinuaiiai guratana da eġa metaeta ita votawanei ma i ruba-rui da i vinolanola i pa, “Peter au metaeta e maimairi!”

15 Wate tau i eġa ita vitumaġanei ma i riwei, “Tam ma bubual!” Wate tauna i riwa bagibagi. Ma tau i riwa, “Nai Peter ana anela.”

16 Wate Peter i rarau-pewapewa ma maranai tau i metaeta i votawanei ma i 'nanai da tauna, taui orai i auepai.

17 Peter urana i voepai da rava i genuana ma i riwei menanare BADA pani numanei i tere-pune. Ma i riwei, “James[†] ma ekalesia ġelau i wei ona pariverei.” Ma Peter i nae au dobuġela.

18 Maranai mara i tom kampa au pani numana nuabola ma vinuanaina ġaġaena i peu sorodia awarii da aiwai i tupua Peter awarina

19 Herod, ana sorodia i egari da Peter i baiei wate eġa ita nelaġai. Lamna aubaina sorodia 16 i etarei ma i viragēni. Muriai Herod Judea i netawanei ma i nae au Caesarea da ita mae mara aburuna.

Herod iraġe

20 Marina Herod amlona i ġaiġai kaua Taia ma Sidon ravai awarii, lamna aubaina tau i ana borui i nei da Herod maiteni wei i babanie. Tauti Herod ana taunola ġaġaena Blastus, i taravaini da ita voagui. Tauti rom i vibaġei Herod maiteni. Aubaina ai lam Herod ana dobie i nenei.

21 Ma marana i ġetai da Herod maiteni ita viboru ma tauna ana vigulau garana i vigarei ma ana au anikiala i kiala ma awarii i babani.

22 Ma patara ana babani i nonori ma i logoi i pa, “Wei lamna god e bababani ma eġa rava!”

23 Maratagogi BADA ana anela Herod i vipeuni au doa ma motamota orana i ani da i'raġe, aubaina tauna rava ai voepaepa i vinuaiiaiei ma eġa rava ita riwei da BADA ita voepaepa.

24 Ma ekalesia BADA riwana i rarausugulei ma rava maġamaġai i nenei BADA awarina ma ekalesia i rarata.

25 Maranai Barnabas ma Saul ai nola au Jerusalem i vikwai, tau i John-Mark i taravaini da maiteni i nei au Jerusalem.

13

Barnabas ma Saul i viaiaini ma i paritawanei

1 Kerisiana au Antioch au orai peroveta ma taugiu wavai wenanare, Barnabas, Simeon (e ġoreġorei Gawara), Lusias Sairinie, Manaan (Tauna gulau Herod Antipas maiteni i rata tagogi), ma Saul.

2 Mara tagogi maranai tau i ujuju ma BADA i voepaepa i Arua Vivivireina i riwa i pa, “Tau, Barnabas ma Saul a vinei, ona tereriei au nola aubaina.”

3 Anina ma uji ma pari au murina tau i urai Barnabas ma Saul au tepai i terei ma God ruaġai i viaiaini ma i paritawanei.

Au Saipras

4 Ma Arua Vivivireina Barnabas ma Saul i paritawanei da i ġaira au Selusia ma kampa i amkuka damana au bonabona Saipras.

5 Ma au Salamis i ġota ma i nae mai Jew ai au boru numana ma God riwana i rausugulei. John-Mark tau i maiteni i nae da ai tauagu.

6-7 Tauti bonabonana i kwaviviroi da au Paphos taon i ġeta. Weka Jew ei barabaravuna ma peroveta morumoruna i nebelei wavana Bariesu. Tauna bonabonana ana gavena Segius Paulus i vituranei, Segius Paulus rava nualaulaunana ma i ġoei da God ana babani ita nonori ma lamna aubaina Barnabas ma Saul i rausugulei.

8 Wate barabaravuna Bariesu (Greek ponanei lamna Elimas) Saul ma Barnabas i viġaviei da gavena ana tumagana ita viapoapoeni.

9 Saul wavana ġelauna Paul, Arua Vivivireina orana i oai ma barabaravuna matana i nana-tunutunui.

10 Ma i pa “Tam Satan natuna ma kaua aiaii ma jijimani tauviapoapoenina! Tam morumoru kaukauam ma gwalagwalamerum. Ma amapo da BADA ana kaua ma voviravirai da moru.

11 Ma marina BADA urana ina kovoġim da matam ina apoapoe mara aburuna ma eġa madeġa lalalaina ma inanai.” Maratagogi matana i vinawanawa ma i gimtona ma nare da were i voladaġa-nae da rava au urana ita vojijina.

[†] 12:17: Iesu ana tevera

¹² Maranai gavena i 'nanai aiwai i tupua ma i vitumağana, aubaina tauna BADA ana viararamana i bana-kauei.

Paul God Riwana Aiaina i jimejime i au Antiok taon au Pisidia

¹³ Paul ana rava maiteni Paphos i voterei ma i amkuka damana au Perga taon au Pamphilia provins, Ma weka John-Mark tau i voterei ma i naeme au Jerusalem.

¹⁴ Perga i voterei ma i rui da au Antiok taon au Pisidia provins. Ma au Sabate i rui au boru-numana ma i kiala.

¹⁵ Ma rava ġelau, Moses ana tarawatu bukana ma peroveta ġelau ai buka i 'avi, ma babada riwa i paritawane i Paul ma Barnabas awari i pa, "Varevareiu! Mepa da awarimi nota aiwai da ota voağui ai lamna marina ona ġei da ona babaniei."

¹⁶ Paul i vomairi ma urana i voepai da rava i genuana ma babani i vikarei i pa:

Mai Israel ma taumi ega mai Jew ai God tauviborumeina, ona rautaniğaneu!

¹⁷ *Mai Israel ai God noinoita i vinei, ma i vimaurai ai au mae au Egypt, ma ana rewapana ġaegane i dobunei i taravaina-opunei.

¹⁸ *Madeğa 40 au mutulua ami kaua apoapoei ami beura ma ami gunura anapui aiauei.

¹⁹ *Dam ġaegaei 7 i vipupui au Canaan ma dobuna mai Israel i verei da i viğariana-nonoei.

²⁰ *Wei anapuna madeğa 450 au orana i tupua. Wei au murina God taurauetara† i terei da tau i vibadei da peroveta Samuel ana mara.

²¹ †Anina ma rava God i vibağai da gulau ita verei. Ma God Saul, Kish natuna Benjamin ana damei i terei; ai gulau da madeğa 40 i kwa.

²² †Ma God Saul i tere-opunei ma David i terei ai gulau. Ma wenanare i riwa i pa, "Tau a aramane da David, Jesse natuna orau ana rauoğara, ma au ġoana anapuna ina kauei."

²³ Muriai me God i parivainuağani nanare, Mai Israel ai Tauvilawana, Iesu David ana damei i nei.

²⁴ *Muriai da Iesu ita nei, John mai Israel anapui awari i jima da ai ġo'apoapoe ina voterei ma ina mae-tavirei God awarina ma ina babataito.

²⁵ *Ma John ana nola au damona i riwa, "Taumi o notanotai da tau Tauvilawana bo? Ega! Tau ega tauna. Wate ona rautaniğana, rava au muriu e nenei tauna i ġetelara, tau ega tagotagovina da ana ae uma ġuravana ana rupeni."

²⁶ Varevareu - Abraham natunatuna ma taumi Jentail God tauviborumeina, God tauta awarita, kwakokwakoi vilawanai riwana i paritawaneiai!

²⁷ Mai Jerusalem ai babada maiteni God ana Tauvilawana i vinua-nainei, ma lamnei Iesu i kovogi, Peroveta wei lamna i jimejime i au Sabate marana patapatana.

²⁸ *Tau i ega ana apoapoea aiwai ita nelağai da Iesu ita virağeni, wate Pilate i vibağai da ita virağeni.

²⁹ *Maranai rava ai babada maiteni, ai nuabola Iesu awarina i kauana-paiei me peroveta i ririwei nanare, ma tupuana au korosi i tere-ğairei ma au guba i vimataveni.

³⁰ Wate God Iesu irağelei i vovaimairini.

³¹ *Ma au pom mağamağau Iesu tau maiteni au Galili da i ġeğae au Jerusalem awari i ega. Wei ravai marina e vivimatamata rava awarii.

³² Marina tauai Riwana Aiaina a paripariveremi. Wei parivainuağana wariaga noinoita awari i kauei.

³³ Ma God nanare i kauei tauta eda muri aubaita, da Iesu irağelei i vovaimairini, au Psalm viruaina wenanare I girumi,

Tam natu.

Amadodo Tau a viananem.

(Psalm 2:7)

³⁴ God Iesu irağelei i vovaimairini da ega tupuana ina buda. Me i girugirumi nanare i pa,

Au viaiaina vivivireina David a parivainuağani tam ana verem.

(Isaiah 55:3)

³⁵ Psalm ġelauna wenanare i girumi,

A 'ramane i da Tam am Messiah-Tauvilawana tupuana ega au kokoaga ma voterei da ina buda.

(Psalm 16:10)

³⁶ Maranai David i mammae ma God ana nola i kauei ma i'rağe, ma amamana maiteni i doboi ma tupuana i buda.

* 13:17: Exo 1:7 * 13:18: Num 14:34 * 13:19: Deu 7:1 * 13:20: (a) Jdg 2:16; (b) 1Sa 3:20 † 13:20: Wei ravai lamna ai ġavia babadai ma ai tauravena ma taurauetara Judge. ‡ 13:21: (a) 1Sa 8:5; (b) 1Sa 10:21 § 13:22: (a) 1Sa 13:14; (b) 1Sa 16:12 * 13:24: Mrk 1:4 * 13:25: Mrk 1:7 * 13:28: Mrk 15:13-14 * 13:29: Mrk 15:42-47 * 13:31: Act 1:3

³⁷ Wate God Iesu iraḡelei i vovaimairini ma tupuana eḡa ita buda.

³⁸⁻³⁹ Lamna aubaina au rava, ona aramanei da Iesu awarinei God ami ḡo'apoapoe ina nota-tawanei. Rava anatapui da Iesu e vivitumaḡanei, ai ḡo'apoapoe e notanota-tawanei ma ai viturana e viviaiaini. Wei Moses ana tarawatu eḡa ita kaukauei.

⁴⁰ Ona paina-melemi da peroveta aiwai i ririwei eḡa awarimi ina tupua. Aubaina i riwa;

⁴¹ *Ona rautaniḡana vivijiboḡami,*

kaua ḡaeḡaena ana kauai da Ona baei ma ona iraḡel

Aubaina ami au lawana kaua ḡaeḡaena ana kauai da taumi ona vitumaḡana-avei.

⁴² Paul ma Barnabas i opuopu ma rava i nei ma i vibaḡa-guratei da ita nememei au Sabate ḡelauna da Tauvilawana ana kaua ita babanana-kauai.

⁴³ Boru i kwa da rava i vilamonei, mai Jew borui ma ḡelau marina ina bori i vaia da i vimai-jew, tau Paul ma Barnabas i votaḡoi, ma i riwana-guratei da Iesu ana aguei ina mae jijina.

⁴⁴ Au Sabate ḡelauna taon ravai anatapui i ḡeta da Iesu riwana aiaina ita nonori.

⁴⁵ Maranai mai Jew wei patarana i 'nanai ma orai unura i oai ma Paul i vikaua-morumoruei ma i vitepaubaubai.

⁴⁶ Ma Paul ma Barnabas ana tepatorai i babani, "God riwana a jimei awarimi au naona, wate taumi wei riwana o geduaiei. Wei e viviatataiana da taumi lawana mamae-nonoana eḡa ota ḡoeḡoei. Lamna aubaina ana voteremi ma God riwana ana jimei Jentail awarii.

⁴⁷ BADA wenanare riwa bagibaginei i riwelai,

Tau a vinemi da lalalaina Jentail awarii,

da rava anatapui au dobu ona riwei menanare ai ḡo'apoapoe a nota-tawanei ma a vilawani. (Isaiah 49:6)

⁴⁸ Maranai Jentail wei riwana i nonori, tau i vinuai ai kaua ma BADA Riwana Aiaina i voepaepai, ma tau da God i vinei lawana mamae-nonoana ita vaia, i vitumaḡana.

⁴⁹ Ma BADA Riwana Aiaina i vituai nai au paratana.

⁵⁰ Wate mai Jew Jentail waivinei manemanei ma mai Jew ḡelau i egari da Paul ma Barnabas ai ḡavia i vomairi ma dobunei i viaḡaḡana-opunei.

⁵¹ * Anina ma tau i aei pokauna i rauabuabui da ita viatataiei da BADA eḡa ita vinuai ai awarii ma i nae au Ikoniam taon.

⁵² Wate Arua Vivivireina kerisiana voui au Antiok orai i oai ma i vinuai ai kaua.

14

Paul ma Barnabas i jima au Ikoniam.

¹ Kauana tagogina i tupua au Ikoniam. Paul ma Barnabas i nae mai Jew ai au boru numana ma menanare i babaninei da mai Jew ma Jentail maḡamaḡau i vitumaḡana.

² Wate mai Jew ḡelau eḡa vivitumaḡana Jentail i kelari ma ai nota i barai da Paul ma Barnabas i geduaiei.

³ Avena ma Paul ma Barnabas kampa i mae guratana ma ana tepatorai BADA ana aguei i jimajima. Ma kaua babai ma vivirewapanai maḡamaḡau i kauai. Wei i vimataira da ai jima lamna riwa kaua.

⁴ Taon i kai ḡelau mai Jew aubai i mairi ma ḡelau Aposol aubai i mairi.

⁵ Ma mai Jew ma Jentail ḡelau i vioga da Paul ma Barnabas ḡaime ita viraurauai.

⁶ Wate tau riwana i vaia ma dobuna i ruba-tawanei ma i nae au taon ḡaeḡaei Listara ma Derbi au Laikonia provins ma taon au ririvai.

⁷ Ma weka Riwana Aiaina i jimana-naiei.

Rava i notai da Paul ma Barnabas god

⁸ Au Listara oroto aena ḡokokokarana, alona manawanei gwaḡagwaḡana i vinatunei ma eḡa ita babara dadana.

⁹ Kampa i kiala ma Paul i bababani i rarautaniḡanei. Paul matana i tawanei ma i 'nanai da tauna i vitumaḡana da ita lawana

¹⁰ ma i garara awarina, "Aemei ma mairi!" Ma orotona aenei i mairi ma babara i vikarei.

¹¹ Maranai patara i 'nanai Paul aiwai i kauai tau i ava ai ponei i babani vivira, "god ruaga i ḡairai awarita me *rava."

¹² Tau i riwa da Barnabas lamna mai Greek ai god Zeus[†] ma Paul i vitauvibani aubaina i riwa da tauna Hermes.

¹³ Zeus ana pulo gabuna, taon au giana, Zeus ana pirisi patara maiteni bull ma berana ulaulai i neiai taon au metaetana da Apasol ita puloi.

¹⁴ Wate maranai Paul ma Barnabas wei riwana i nonori, tau ai gara i sikai ma i ruba-opu patara awarii ma i garara,

¹⁵ *¹⁵ “Aiwai aubaina wei kauana o kaukauei? Tauai rava ota me taumi nanare! Tauai Riwa Aiaina a neneiai da nai kauai kwakwavi ona voterei ma ona nae BADA lawalawaina ona viborumei. Tauna mara ma dobu ma boga ma aiwai anapuna au orai i kauai.

¹⁶ Wariaga tauna rava i voterei da ai goanei i mae.

¹⁷ Wate marana patapatai e viviatataiem i tauna e mamae ma ana nuavaina e verevereta, garewa marei ma maura ma lam e vereveremi ma au orami nuai ai e oaoai.”

¹⁸ Apasol i bababani ma i kauana-guratei da ravai ita vi^gaei da tau i avena ita puloi.

Mai Listara Paul g^aime i virauraei.

¹⁹ Mai Jew g^elalui Antiok ei ma Ikoniamei i nei ma patarana i egari da Paul g^aime i virauraei ma taonei i taina-opunei, i notai da tauna irage.

²⁰ Wate maranai vivituma^ganai i g^eta da i mae-kwaviviroi, tauna i vomairi ma i naeme au taon.

Aupom g^elauna tauna ma Barnabas i nae au Derbi.

²¹ Paul ma Barnabas Riwana Aiaina i jimei au Derbi ma ekalesia voui ma^gama^gau i rui. Ma i nae me au Listara, Ikoniam ma Antiok.

²² Metauna au dobuna i jimajima kampa tauvituma^gana i ririwana-guratei ma i vovai-virewapani da ina mairi-jijina ai au tuma^gana i pa, “Piripiri ma^gama^gau au orana ona rui wate au murina God ana au vibadana ona rui.”

²³ Paul ma Barnabas ekalesia nununai ai babada i vinei ma i raupari ma i uji BADA awarina, da ai ekalesia ma ai babada ina paini.

²⁴ Anina ma au Pisidia provins i verautua da i nae me au Pamphilia provins.

²⁵ Au Perga BADA riwana i jimei ma i g^aira au Atalia.

²⁶ Ma kampa i amkuka ma i nae me au Antiok au Syria provins, weka ai nola i vikarei, maranai ekalesia kampa God i viba^gai da tau i viaiaini ai au nola ma i paritawanei ma marina ai nola e vivikwai.

²⁷ Ma kampa i g^eta ma ekalesia i vitagogiei, ma aiwai anapuna God ana aguei i kaukauei rava i vie^gei, ma menanare Iesu metaeta i votawanei da Jentail maiteni Tauna i vituma^ganei.

²⁸ Ma kampa tauvituma^gana maiteni i mae guratana.

15

Boru au Jerusalem

¹ Wate nelara g^elalui Judeaei i g^airai au Antiok ma ekalesia i viaramani i pa, “Mepa da e^ga inibori ona vaia Moses ana tarawatu e ririwei nanare, God taumi e^ga ina vilawanimi.”

² Ma karuwa^gawa^ga g^ae^gaena i bauni Paul ma Barnabas maiteni. Ma tau Paul, Barnabas ma rava g^elalui i vinei da i g^ae au Jerusalem da Apasol ma babada ita inana wei babanina aubaina.

³ Ma i paritawanei au Jerusalem, Ma ai au va^gai ekalesia au Phonisia ma Samaria provins i parivere menanare Jentail i mae-tavirei God awarina. Ma tau i vinuiai kaua maraina wei i nonori.

⁴ Maranai i g^eta au Jerusalem, ekalesia ma Apasol i nei da i nebelei. Tau i parivere menanare kaua anapui God ana aguei i tupua.

⁵ Wate ekalesia g^elalui mai Pharisi, i vomairi ma i babani guratana i pa, “Jentail anina da inibori ina vaia ma ona egari da Moses ana tarawatu ina voteletelei.”

⁶ Apasol ma babada i viboru da wei babanina i okei.

⁷ *⁷ Ma i vitarapiri guratana ma Peter i vomairi ma tau i riwei i pa, “Au rava! O aramanei da au orata God i vineu da Riwana Aiaina ana jimei Jentail awarii da tau ina nonori ma ina vituma^gana.

⁸ *⁸ God rava anapui ai nota e aramanei, ma Jentail Aruana Vivivireina i verei me tauta

[†] **14:12:** Zeus lamna mai Greek ai god g^ae^gaena. Rava ai vituma^gana da godna e vivilawani. Hermes lamna Zeus natuna ma tauna lana Tau-vinolanolana. Zeus ma god g^elalui aubaii. Rava i notai da Hermes lana e kauwei da rava e babana-kauwa ma ai babara e aiiai. Wate nanarena e notanotai da tauna kauwa aiaina e vivitupui ma e kauwei da rava e vivinatuna kauwa. * **14:15:**

nanare. Wei matairana i viatataieta da God i vianina.

⁹ Tauna Jentail ma tauta e vaivainita da tagogina, ma ata vitumaḡanei orata i viaiaiani.

¹⁰ Marina aiwai aubaina God o viviamlo-ḡaiḡaini? Tauta amamata maiteni eḡa tata virewapana da tarawatu tata vojijina-kauei. Wate marina wei vitana Jentail ta verevere-damanei.

¹¹ Eḡateni! Tauta anapaputa ta vivitumaḡana da BADA Iesu ana aguei tana lawana, ma nanare Jentail maiteni.”

¹² Rava anatapui i genuana ma Barnabas ma Paul i rautaniḡanei, tau i bababani menanare ana au vaḡai God ana aguei kua aniba ma vivirewapana i kauei Jentail awarii.

¹³ Maranai i babani vorovei, James* babani i vikarei, “Au rava ona rautaniḡaneu.

¹⁴ —Peter† au naona i pariveremi menanare God Jentail i raugenari ma ḡelau i vinei da tauna ḡarinei.

¹⁵ Ma Peroveta nununai wei kauai i bababaniei marina nanare e tuputupua:

¹⁶ *Wei au murina ana nememei,
ma David ana numa gara ana voa-melei.*

*Ana vituramairini
ma ana kauei da ina virewapana me.‡*

¹⁷ *Da rava mamae-terenai*

BADA ina baiei,

Wate Jentail a raugorei da ḡariuei, BADAi riwa.

(Amos 9:11-12)

¹⁸ *Wariaḡa da marina wei ta aramanei.*

¹⁹⁻²¹ —◊Lamna au baina eḡa tana kauei da ina pipiripi Jentail aubaii, tau e mamae-tavirei God awarina. Wate pepa tana girumi ma tana egari da lam e pulopuloei god morumorui awarii eḡa ina ani, eḡa ina viawawana labalababa, ḡamoḡamo uai e kikiki eḡa ina ani ma sia ana tarana eḡa ina ani. Aubaina wariaḡa da marina Moses ana tarawatu e raugugulei boru au numai Sabatena patapatana.”

Pepa i girumi Jentail awarii

²² Ma Apasol, babada ma ekalesia anatapui rava ḡelau i vinei ma i paritawanei au Antiok au Syria provins Paul ma Barnabas maiteni. Tau ai babada ruaḡa i vinei wawai Judas wavana ḡelauna Barsabas ma Sailas.

²³ Ma wei pepana au urai i terei,

Aposol, ekalesia babadai, varevareimi.

Jentail ekalesia au Antiok, Syria provins ma Silisia provins. Varevareiai, egualau!

²⁴ Tauai riwana a vaia da rava ḡelau ai au boru i ḡairai ma ai viararamani i vinuabolaimi ma i visina-viraviraimi, wate tauai nai ravai eḡa ata paritawanei.

²⁵ Lamna aubaina tauai a viboru ma a vianina da taupariverena ata paritawaneiai, ata rava Paul ma Barnabas maiteni,

²⁶ tau i verena-melei ma ai lawana eḡa ita vinuabolei BADA Iesu Keriso wavana aubaina.

²⁷ Judas ma Sailas a pariparitawanei da taui ḡamoie i ina riwemi aiwai tauai a girumi.

²⁸ Arua Vivivireina ma tauai ai ḡoana da eḡa vita ḡaeḡaena ana veremi, anina wei tarawatuna ava.

²⁹ Lam god morumorui i puloi eḡa ona ani,

Eḡa tara ona umai, Eḡa ḡamoḡamo uana kikikina vioana ana tarana ona ani.

Eḡa ona viawawana labalababa,§

Mepa da wei tarawatu ona vojijina-kauei, taumi kua aiaina o kaukauei.

Egualau kua.*

³⁰ Ma nelarai i paritawanei da i ḡaira au Antiok, ma ekalesia i rieiai da pepa i verei.

³¹ Ma tau i 'avi ma i vinuaiai kua pariverena aiaina aubaina.

³² Judas ma Sailas tau i God ana peroveta ma i babani guratana awarii ma wei tau i vinuaiaiei ma ai tumaḡana i vovai-virewapani.

* **15:13:** Iesu ana tevera † **15:14:** *Peter wavana ḡelauna Simon.* ‡ **15:16:** Maranai God David ana numagara e bababaniei lamna David ana vidadana vouna e ririwei ma eḡa ana epaepaia. ☆ **15:19-21:** Lev 18:6-23; Lev 17:10-16

§ **15:29:** Viawawana labalababa ḡelau wei: Rava ḡelau awawai maiteni e viawawana. (Exo 20:14, Deu 5:18) Mane aubaina e viawawana (Lev 19:19, 1 Cor 6:15) Am femili ravai o viviaiwaneie (Lev 18:22, Rom 1:26-27) ḡamoḡamo e viviaiwaneie (Lev 18:23) Rava eḡa uta ravaḡi ma e viviaiwaneie (Eph 5:3) Rava u egari da u viawawaneie. (Gen 34:7, Deu 22:25-28) * **15:29:** Kua ḡaeḡaena lamna eḡa ini bori ma Iesu ana aguei, u korosi i take aubaita.

³³ Ma kampa i mae mara aburuna ma ekalesia ana nuubai i paritawana-melei au Jerusalem.

³⁴ †

³⁵ Wate Paul ma Barnabas au Antioch i mae, ma tau i maiteni BADA Riwana Aiaina i viararamani ma i raugugulei.

Paul ma Barnabas i vilamonei

³⁶ Ma muriai Paul, Barnabas i riwei, “Tana nae dobu au anata-puna mepa BADA Riwana Aiaina ta raugugulei ma ekalesia tana raugenari, ma tana inana i tau i anina bo ega.”

³⁷ Barnabas i goei da John-Mark ita taravaini.

³⁸ *Wate Paul wei notana ega ita goei aubaina au naona John tau i au Pamphilia i ruba-tawane i mae ega ita maiteni ita nola.

³⁹ Ai vipariparinigai i apoapoe guratana da tau i vilamonei. Barnabas, Mark i taravaini ma kukei i damana au au Saipras.

⁴⁰ Paul, Sailas i vinei. Ma ekalesia, BADA i vibaagai da ana aguei tau i ai au nola ina paini.

⁴¹ Tau i Syria da Silisia i naeni ma ekalesia i raugenari ma i vinua-terenei.

16

Timothy Paul ma Barnabas maiteni i nae

¹ Paul i nae au Derbi da au Listara, kampa tauvota-gota-go i mae wavana Timothy. Tauna alona Jew ei ma kerisiana, Wate amana Jentail.

² Ekalesia au Listara ma Ikoniom Timothy i voepaepana-kauei.

³ Paul i goei da tauna ita taravaini ana au vaagai, lamna aubaina ini bori i verei aubaina mai Jew kampa i aramanei da tauna amana Jentail.

⁴ Maranai taon nununai i nenaeni, ma ekalesia kampa i paripari-verei Apasol ma babada au Jerusalem ai nota, ma i riwei da tarawatu i ririwei ina vota-gota-go.

⁵ Ma ekalesia ai vituma-gana i vovai-virewapana i tauvituma-gana voui i ruirui marana patapatai.

Paul ana rauboni

⁶ Arua Vivivireina Paul ana rava maiteni i viga-ei da ega BADA riwana ita jime i au Eisia provins, ma Pirijia ma Galatia paratana i naeni.

⁷ Maranai i nei Maisia ana au provins ma i goei da ita damana au Bithinia provins. Wate Iesu Aruana ega ita vianinei.

⁸ Ma Maisia i verautuini da i nae au Troas.

⁹ Waguvaraina Paul ana au inana i 'nanai oroto Macedonie i maimairi ma i viviba-gai i pa, “Ma damana i au Masedonia da ma voaguia-i!”

¹⁰ Paul ana rauboni au murina tau i a vioga da la-gila-gina ana vomairi Masedonia provins aubaina. Tau i a vituma-gana da God i go-re-lai da Riwana Aiaina kampa ana jime i.

Paul i nae au Philipai.

¹¹ Au Troas tau i amkuka, a viaruana damana au Samotreis bonabonana a geta ma au pom-gela a kuka-nae au Neapolis.

¹² Ma kampa da a babara nae au Philipai taon au Masedonia provins, weka mai Rome ai sorodia ai bareki gaegaena i mae, kampa a veraumae.

¹³ Ma au Sabate taon a opu-tawane ma a nae au waira, a notanotai da kampa boru gabuna wate ega. A kiala ma waivine rua-ga ota kampa i rauriei awari a babani.

¹⁴ Taurautanigana tagogi lamna Jentail wavinena wavana Lidia ma ana dobu Thaiataira. Tauna gara lebalebarina maiana gaegaena taugimareina ma God i vituma-gane i, ma God orana i votawane da aiwai Paul i bababaniei i rautaniganana kauei.

¹⁵ Maranai wavine ana numa ravai i babaito ma i raugore-lai i pa, “Ona nei au numa mepa da o notanotai da tau kerisiana ririwa kauana.” Ma i egariai da ana au numa a mae.

Paul ma Sailas au panipani numana au Philipai

¹⁶ Mara tagogi a nena-e boru au gabuna ma taunola guguini a nebelei, Tauna au orana arua apoapoena i mae ma lamnei aiwai amapo da ina tupua i vivie-gai. Ma mane gaegaena i kaukauei ana taniwaga aubaina.

† 15:34: Buka waduwaduboi au orai vs 34 ega ita mamae “Wate Sailas i goei da kampa ita mae.” * 15:38: Act 13:13

17 Tauna Paul ma tauai i votaḡotaḡoi ai ma i garagarara “Wei nelarai God ḡeḡetelarana ana taunola! E vivinolanola menanare God e vivilawananei.”

18 Wei kauana i kauai au pom biaḡa da Paul i viamlo-ḡaiḡaini da i mae-tavirei ma arua apoapoena i riwei, “Iesu Keriso wavane i a egaegarim da wavine ma opu-tawanei!” Maratagogi arua apoapoena wavine i opu-tawanei.

19 Maranai taunola uguini ana taniwaga i aramanei da ai mane etanaina i vine-boai, tau Paul ma Sailas i vojijini ma i taina naiei au deba Gabemani awarii.

20 Tau i nei ai taurauetara awarina ma i riwa, “Wei nelarai mai Jew wei dobuna ravai e vivinuaragaḡai.

21 Tau i ata rava kaua ḡelau i viviararamani ma wei ata giu e teretereḡairei.”

22 Ma patara i rui Paul ma Sailas vunuai aubaina. Ma gabemani Paul ma Sailas, ai gara i sikai ma wipiei i kwapui.

23 I vunu-kauai ma i tawana-ruiei au panipani numana. Ma numana badana i egari da ita paina-kauai da eḡa ita ruba.

24 Anina ma Panipani badana tau i tawana-ruiei, panipani numana au orana ma aei, ai vivitaini au orana i raḡita-jijini.

25 Nubautuvai Paul ma Sailas i rarauari ma i welawela God awarina ma panipani ḡelau i rarautaniḡana.

26 Nanare ma lolo ḡaeḡaeotana dobuna i gui. Ma maratagogi pani numana metaetana i wana-tawatawanei ma panipani anapui ai sein i dabarara.

27 Pani numana badana i vomairi ma ita inanai da metaeta wanatawanana ma i notai da panipani i ruba ma lamna aubaina ana sod i lavui da ita viraḡena-melei.

28 Wate Paul i garara, “Eḡa ma vunu-melem! Tauai anapui weka!”

29 Pani numana badana ana taunola i ḡorei da lalalaina ita neiai ma i ruba-rui ma ana sisisisina i mae-peu Paul ma Sailas au naoi.

30 Ma i opunei au doa ma i paridadanei, “Babada aiwai ana kauai da ana lawana?”

31 Tau i paribelei, “BADA Iesu Keriso ma vitumaḡanei ma ma lawana, am numa ravai maiteni.”

32 Ma God riwana i raugugulei tauna ma ana numa ravai awari.

33 Nai maranaina avena da waguvarai, pani numana badana Paul ma Sailas i naiei ma keroi i oḡai, Ma maratagogi tauna, ana numa ravai maiteni i babataito.

34 Paul ma Sailas i ḡai ei ana au numa da i viambagibagi. Tauna ana numa ravai maiteni i vinuai kaua da marina God i vitumaḡanei.

35 Ma marana i tom ma tauetara ana taunola* i paritawanei pani numana badana awarina ma i egari i pa, “Nelara ma voterei da ina nae.”

36 Pani numana badana Paul i riwei, “Taurauetara i egariu da ana voteremi da ona nae. Marina ana nuaubami ona nae.”

37 Wate Paul, taurauetara i riwei, “Tauai eḡa ita rautarelai ma i vunu-kaulau patara au matai. Ma avena da tauai mai †Rome, wate marina i ḡoi da govogovaḡanei ina paritawanelai bo? Eḡateni kaua! Ona voterei da taurauetara ina nei weka da ina naiei!”

38 Tau i nei au panipani ma i riwa, “Tauai a kauana-boai, ai ḡo’apoapoe ona nota-tawanei.”

39 Ma i tere-opunei ma i vibaḡa-guratei da dobuna ita oputawanei.

40 Ma Paul ma Sailas pani numana i opu-tawanei ma i nae Lidia ana au numa ma kampa kerisiana maiteni i viboruboru ma i vovai-virewapani. Anina ma tau i dobuna i netawanei.

17

Au Thesalonika

1 Paul ma Sailas Amphipolis taon ma Apolonia taon i voterei da i nae au Thesalonika taon. Weka mai Jew ai boru numana i mamae.

2 Ma i rui au boru numana au Sabate me mara patapatai i kaukauei nanare, kampa Sabate tonuḡa rava awari God riwana i viararamani.

3 Ma God riwanei i viararamana da Keriso ina vinuapoapoe ma iraḡelei ina vomairi me, “Wei ravana a bababaniei awarimi, tauna Iesu Keriso.”

4 Mai Jew ḡelau orai i taini ma tau i votaḡotaḡoi. Ma nanare Jentail nelara maḡamaḡagau God taurauduneleina ma waivine wavai naenaie maḡamaḡau.

* 16:35: vs. 20 ma inana. † 16:37: Mai Rome ai tarawatu lamna, “Eḡa rava Romei ma kwapu labalababai bo ma pani da au naona ma rautarelei.” Rome Israel i vibadei Iesu ana au mara.

⁵ Wate mai Jew i unura ma rava ora-potapotai maḡamaḡau i etanai i tami ma au taon vikaruwaḡawaḡa i vikarei. Ma oroto wavana Jason ana numa i ruini Paul ma Sailas i baibaiei da ita opunei patara awari.

⁶ Wate maranai eḡa ita nelaḡai tui Jason ma kerisiana ḡelau i taina-naiei taon babadai awari, ma i garara, “Wei ravai dobu au anatapuna apoapoe maḡamaḡau i kauēi, marina i ḡetai ata au dobu.”

⁷ Ma Jason, Paul ma Sailas i taravaini ana au numa. Tui Caesar ana tarawatu e viviaḡai ma e ririwa da gulau ḡelauna e mamae wavana Iesu.

⁸ Maranai patara ma taon babadai wei babanina i nonori tui amloi i ḡaiḡai kaua,

⁹ ma Jason i egari da mane ḡaeḡaena i vimaiei da eḡa mae boaboa ḡelauna ina vitupui. Ma tui Jason i voterei da i nae.

Au Berea

¹⁰ Ma waguvarai tauvitumaḡana Paul ma Sailas i paritawanei au Berea. Maranai kampa i ḡeta, ma i rui au boru numana.

¹¹ Mai Berea i viaiaii, eḡa me mai Thesalonika. Tui i rautaniḡana ma i votelatela ma marana patapatana God ana buka i 'aiavi da ita aramanei da Paul aiwai i bababaniei lamna riwa kaua.

¹² Ma lamnei mai Jew maḡamaḡau i vitumaḡana, ma nanare mai Greek waivinei wavi naenaei ma nelara.

¹³ Maranai mai Jew au Thesalonika paratana i nonori da Paul God riwana i raraugulei au Berea, tui maiteni i nae kampa, ma rava i rauegari da ḡavia ita vikarei.

¹⁴ Maratagogi kerisiana Paul i paritawanei au gera wate Sailas ma Timothy au Berea provins i mae.

¹⁵ Ma nelara Paul i tauvigwanigwaniei da au Athens, ma Paul nelarai i riwei ma i paritawanei au Berea da Sailas ma Timothy ita riwei da laḡilaḡina ita nei awarina.

Paul au Athens i raugugula

¹⁶ Ma Paul au Athens ana rava i paipaini, ma i 'nanai da kampa kokoitau i maḡa kaua ma i vinuabola kaua.

¹⁷ Mai Jew ma mai Greek God tauviborumeina awari i jima guratana au pari numana ma nanare au deba, aiavi da i ḡeta ma i rautaniḡana.

¹⁸ Ma rava ḡelau nuaulaulai i ḡetai ma maiteni i vitarapiri, tui e ḡoreḡorei mai Epicure ma mai Stoic*, tui lawana ai kaua tauviararamanai. Ma ai rava ḡelau i paridadana, “Wei ravana aiwai e voḡavoḡanei?” Ḗelau i riwa, “Mepa da tauna dobu ḡelau ai god e bababaniei.” Tui wenanare i babani aubaina Paul Iesu Riwana Aiaina ma ana iraḡe ma ana vomairi me, i raugugulei.

¹⁹ Ma i taravaini ma i naiei ai au boru e ḡoreḡorei Areopagus ma i riwei, “Ma nei ma a ḡoei da am viararamanana vouna e bababaniei, ata aramanei.

²⁰ Kaua ḡelau e babaniei tauai a vivinuanaini, ma a ḡoei da ana aramanei anona aiwai?”

²¹ (Taumana ma mai Athens marana patapatatai ai nola eḡa aiwai, da kaua voui ina virarautuei ma ina nononori.)

²² Ma Paul babadai au naoi i mairi ma i riwa:

Dogadogara mai Athens! A inana da taumi vipatupatutumi ami god awarii,

²³ A bababara ma ami pulo aniapunana a inainanai, ma tagogi a inana au tepana i giruma, “Wei God eḡa ata araramaneia aubaina.” Wei Godna o viviborumei wate eḡa ota aramanei. Tau ana riwemi nai Godna aiavi.

²⁴ Tauna God mara ma dobu ma aiwai anatapuna au orana i kauēi. Ma tauna mara ma dobu badana, ma numa rava uranei e voavoai au orana eḡa ita mamae.

²⁵ Ma eḡa rava ai agu ita paipaini, tauna agu eḡa ita ḡoeḡoei. Aubaina tauna rava lawana ma lavutu ma anatapuna e vereverei.

²⁶ Au karena rava tagogi i kauēi ma nai ravanei dam patarai i vitupua ma dobu i maeni. Tauna ainelana rava ai mara i terei da ina mae ma ina iraḡe ma animae paratana i aiterei.

²⁷ God wenanare i kauēi da rava tauna ina baiei da mepa ina nelaḡai. Wate tauna au ḡereḡereta, eḡa au uama.

* **17:18:** Mai Epicure rava wavana Epicurus ana viararamana i votaḡotaḡoi. I viararamana da lawana ana ano lamna nuaiaii. Da tui aiwai da tupuai ma matai ana rauoḡara, e vivinuaiaiei. Ma aiwai da e virovorovi bo inivara e verevereia. Tui wei lamna e geduḡeduaiei. Tui e ririwa da God rava eḡa ita vinuavaini Stoic rava wavana Zeno ana viararamana e votaḡotaḡoi. I viararamana da rava ma ai maiteni au ririvata ta mamae (nature) ita vivirei, Tui ai ḡoana ma ai erawa ita teretawanei ma ita vinuannotanota kaua ma avena rava ḡelau ai agu ita raunenelei. Tui e ririwa, “Nuaiaii lamna kaua e vovoterei da mena ina tupua nei nanare ina tupua.” ✱ **17:24:** 1Ki 8:27; Act 7:48

²⁸ Taugiruma gēlauna Greekei i riwai pa, “Taunei ta mamae ma ta bababara ma anapapuna ta kaukauei.”† Ma wate ami taugiruma gēlauna i girumi i pa, “Tauai nanare tauna natunata.”‡

²⁹ Ma tauta God natunata, ega tana notai da God lamna me kokoitau, goldei bo silvei i kauei. Rava uraiei ma ana nuaulaulauei i kauei.

³⁰ Wariaga rava God ega ita aramanei wate God tau i 'nana-tawanei, wate marina anapaputa egaegarita da tana rupena ma tana mae-tavireta awarina.

³¹ Aubaina mara i vinei maranai rava anapapui aiainei ma jijimaninei ina kovoḡi. Rava i vinei da taunei ina kovoḡa. God wei ravana iraḡelei i vovaimairini lamna ina vimataira rava awari da ravana anina tauna.

³² Maranai Paul iraḡelei vomairina i babaniei, rava i nonori ma gēlaui tauna i vinamei wate gēlaui i riwa, “Tauai a goei da muriai wei babanina ma babaniana-melei.”

³³ Ma Paul ai boru i opu-tawanei ma boru i gudu.

³⁴ Wate gēlaui i vitumaḡana ma Paul i votaḡotaḡoi. Tagogi lamna Dionisius, Areopagus boruna au orana, ma wavine wavana Damaris, ma rava gēlaui.

18

Paul i nae au Corinth da rava awari Iesu ita jimei

¹ Paul Athens i netawanei ma i nae au Corinth.

² Kampa Akwila tauna Jew au Pontus i tupua, marinaota au Italy* da i nei awana Prisila maiteni. Aubaina Rome ai gulau Claudius mai Jew anapapui i viaḡaḡei da Rome i opu-tawanei. Paul i nae da tau i ita inana.

³ Paul tau i maiteni i mae, tau i tauampopo, (ḡamoḡamo opina ma gara i popopoi numa aubaina ma i gimagimarei) me Paul ai nola tagogina.

⁴ Sabate patapatana au pari numana tauna mai Jew ma Jentail awari i jima guratana da orai ita sinavirai.

⁵ Maranai Sailas ma Timothy au Masedonia da i ḡetai, Marina Paul BADA riwana ava i raugugulei mai Jew awarii da Iesu tauna anina God ana Vinevine Keriso.

⁶ Wate mai Jew Paul i viḡaviei ma riwa apoaponei i ririwei. Ma tauna ana gara i rauabuabui ma awari i riwa, “Mepa da o kwako, lamna ona viwavu-melemi, ega tau ona viwavuu! Marina da e nena, ana nae Jentail awari.”

⁷ Ma tau i voterei ma i nae Jentail wavana Titus Justus ana au numa i mae, tauna God tauviborumeina ma ana numa pari numana au ḡereḡerena.

⁸ Crispus, pari numana ai bada, BADA i vitumaḡanei ana numa ravai maiteni, ma mai Corinth maḡamaḡai Paul i rautaniḡanei, i vitumaḡana ma i babataito.

⁹ Waguvara tagogi BADA Paul ana au inana i babani i pa, “Ega ma rovo, ma babani ma ega ma genuana.”

¹⁰ Aubaina Tau tam maiteni. Ma rava ega ina rau-iviapoapoelem aubaina au tauvotaḡotaḡo i maḡa wei au dobuna.

¹¹ Ma Paul kampa i mae madeḡa tagogi ma nawaravi six, ma God riwana i jimei.

¹² Wate maranai Galio i vi-Gavena au Akaia provins, mai Jew kampa i vitagogiei ma Paul i vojijini ma i naei Gavena awarina da ita rauetarei.

¹³ Ma tau i viwavui 'pa, “Wei orotona ana moruei rava orai e taitaini da God e viviborumei ma ata tarawatu e viviaigai.”†

¹⁴ Ma Paul gamona i laḡi da ita babani ma Galio i babani mai Jew awari i pa, “Mepa da taumi wei ravana o viviwavui da kua gaḡaei bo kua apoapoe aubaina, lamna tau au nola da ata rau-taniḡanemi.”

¹⁵ Wate wei taumi ami babani ami wava ma ami tarawatu, ana voterei au urami. Tau ega wei kauai ana rauetarei.”

¹⁶ Ma etara numanei i viaḡaḡana-opunei.

¹⁷ Tau anapapui pari numana ai bada Sothenis i vojijini ma i vunui etara numana au naona wate Galio tau i 'nana-tawanei.

† **17:28:** Epimenides Ciritei au 6 century BC. ‡ **17:28:** Aratus Silisiei 3 century BC. * **18:2:** *Rome taon lamna taon Gaegaena au Italy ma ai kapital AD. 49 au orana kampa viḡaiḡaiawa Gaegaena da wavalatona Claudius mai Jew i riwei da dobuna i netawanei.* † **18:13:** Mai Jew e ririwa da Paul ega tau i vitumaḡana oina ita viararamani ma wei Rome ai tarawatu i vianinei, wate e ririwa da Paul rava taparoro vouna e viararamani ma wei Rome ana tarawatu e viviaigai, lamna aubaina tau i goei da Rome ai bada Paul ina kovoḡi. Ma inana Act 16:20-21 ma 17:7.

Paul i nae me au Antiok au Syria

¹⁸ Paul i mae mara aburuna tauvitumaḡana maiteni au Corinth ma wagei i nae au ḡereḡere au Cenkirei waga ai au animae. Prisila ma Akwila maiteni. Ma kampa Paul ana parivainuḡana aubaina aparana i ḡari, ma anatapui i nae au Syria

¹⁹ Tau i au Ephesus i ḡeta ma Paul, Prisila ma Akwila i voterei. Ma i nae au boru numana Mai Jew awari i jima.

²⁰ Rava i vibaḡai da ita mae mara aburuna wate tauna eḡa ita vianina.

²¹ Wate maranai i opu da ita nae ma tau i riwei, “Ana nememei mepa da God ana ḡoana, ma Ephesus i netawanei ma wagei i damana.”

²² Maranai i ḡeta au Caesarea ma i nae au Jerusalem da kerisiana i raugenari ma i nae au Antiok.

²³ Au Antiok i mae mara aburuna ma Galatia provins ma Pirijia provins i naeni ma kerisiana i vovai-virewapani.

Apolos mai Ephesus awari i raugugula

²⁴ Wei marana Apolos tauna Jew, au Alexandria da Egypt da i nei au Ephesus. Tauna BADA riwana ma ana giruma i aramana-kauei ma rava bababanina.

²⁵ Rava ḡelau, Apolos BADA ana etanai babanina, i viararamani, ma ana tepatorana i jima ma Iesu ana kua ma ana lawana i viararamana-kauei. Wate tauna John Taubabaito ana babataito babani ava i aramanei.

²⁶ Ma i vikarei da ana tepatorana i raugugula au boru-numana. Wate maranai Prisila ma Akwila tauna ana babani i nonori. Ma i ḡorei da maiteni i nae ai au numa ma BADA ana etanai ana babani i viaramana-kauei.

²⁷ Maranai Apolos i nenaē au Akaia, kerisiana Apolos i vovai-virewapani. Ma kerisiana au Akaia ai pepa i giruma da ita parivere i da tauna ita nebelei. Maranai au Akaia i ḡeta ma tau i God ana aguei i vivitumaḡana, agu ḡaeḡaena i verei.

²⁸ Tauna ana babanai au deba mai Jew i vovaiubai. Ma God riwana i vaia ma lamnei rava i viararamani da Iesu anina Keriso.

19

Paul au Ephesus

¹ Apolos au Corinth taon Akaia provins i mae, ma Paul ola i taḡoni da au Ephesus i ḡeta. Kerisiana ḡelau kampa

² ma i paridadanei i pa, “Arua vivivireina o vaia bo eḡa maranai o babataito?”

Tau i paribelei i pa, “Eḡa, Tauai eḡa ata aramanei da Arua vivivireina e mamae.”

³ Ma Paul i paridadana, “Aiwai babaitona o vaia?”

Tau i paribelana, “John ana babataito a vaia.”

⁴ *Paul i riwa, “John ana babataito lamna mataira da tau ai ḡo’apoapoelei i mae-tavirei; ma mai Israel i riwei da Tauna au muriu e nenei ona vitumaḡanei lamna Iesu.”

⁵ Maranai wei i nonori ma i aramanei tau i babataito BADA Iesu wavanei.

⁶ Ma Paul urana au kolai i terei ma Arua vivivireina au orai i rui. Ma i vikarei da pona tapunei i bababani ma God riwana i raugugulei.

⁷ Tau nelara iavana twelve.

⁸ Paul i nae au boru-numana ma kampa nawaravi tonuḡa au orana ana tepatorana mai Jew awarii i bababani. Da rava orai ita sinavirai da BADA ana vigulau ita vitumaḡanei.

⁹ Wate ḡelau kampa orai i bagibagi ma eḡa ita ḡoei da ita vitumaḡana, ma patara au matai Iesu ana etanai i vijiboḡi. Ma Paul tau i voterei ma kerisiana i taravaini ma i nae Tairanus ana au numa, ma kampa i viararamana ma i giugiu pompom.

¹⁰ Ma nanare i mae madeḡa ruaḡa i kwa, da mai Jew ma Jentail ravai maḡamaḡai au Eisia provins maemaē BADA riwana i nonori.

Sceva natunatuna

¹¹ Ma God ana rewapanē Paul kua ḡaeḡaei ma aniba i kaukauei,

¹² lamna avena wate rava ai aḡesi da ai nola garai i naiei Paul awarina da i vodadani ma i naei da rava doridoriai i vodadani, ma arua apoapoei i opu-tawanei ma i lawana.

¹³ Mai Jew ḡelau i dobuna i naeni ma arua apoapoei i viviaḡana-opunei ma i raudadana Iesu wavanei da arua apoapoei i viviaḡaḡei. Tau i arua apoapoei i riwei i pa, “Iesu wavanei, taune i Paul e raraugugula, Tau a eḡarim da ma opu.”

* 19:4: Mrk 1:4, 7-8

¹⁴ Skeva, pirisi ai bada natunatuna nelarai seven wei kauana i kaukauei.

¹⁵ Wate mara tagogi arua apoapoena i paribelei, “Iesu a aramanei ma Paul a aramanei ma taumi aiavo?”

¹⁶ Ma rava au orana arua apoapoena maemaena i auepai ma tau i vunui da ega ita vikalokaloei. Ai gara i sika-naei ma ana kovakovai ma tararatai numei i viopuopuana ma i viruberubei.

¹⁷ Mai Jew ma Jentail ravai au Ephesus maemaiei wei riwana i nonori ma rovo orai i gaei ma Iesu wavana i vivirana-kauei.

¹⁸ Ma^gama^gau i vituma^gana ma i nae kerisiana awarii ma ai go’apoapoe i rupeni.

¹⁹ Tauvituma^gana voui ma^gama^gau parapara^umai,* ai buka i vidamni au deba ma i apui. Maranai bukai ai maia i ’avi da silver 50,000[†].

²⁰ Kaua babai me wei, Iesu riwana i vibabarai nai au dobuna ma rava ma^gama^gau i vituma^gana.

²¹ Wei anapapuna au murina Paul au orana i vinua-notanota da au Masedonia da Akaia ita verautuini da ita damana au Jerusalem ma i riwa, “Ana nae au Jerusalem ma muriai ana nae da Rome ana inanai.”

²² Ma Paul ana taugu ruaga Timothy ma Erastus i aiparitawanei au Masedonia provins, ma tauna kampa i mae mara aburuna au Eisia provins.

Vigai^gaiawa au Ephesus

²³ Iesu ana babani ma ana kaua vouna aubaina, ma vigai^gaiawa gae^gaena i tupua au Ephesus.

²⁴ Silver taunoleina wavana Demetrius, mai Greek ai god wavinena ana numa taparoro kokoitau i rarau-garog^oroi da i gimigimarei, ma wei nolana mane gae^gaena e neinei silver taunoleina nai au dobuna aubai.

²⁵ Ma tau anapapai ai rava nolana tagogina e kaukauei maiteni i rau^goreiai ma i riwa, “Au rava, o aramanei da ata maura wei nolanei ta vaivaia.

²⁶ Ma o inanai ma o nonori menanare wei ravana Paul e kaukauei, Rava ai nota i sinavirai da ma^gama^gau god Artemis raudunena i voterei au Ephesus ma dobu Eisia paratana anapapuna. Ma e ririwa da ‘rava god i rau^garog^oroi, lamna ega god.’

²⁷ Tauta tana inana kaua da wavata ma ata mane ani kauana ega ina apoapoe. Ma ata god getelarana Artemis ana numa taparoro ma wavana ega ina vijibogi, ega au Eisia provins ava ma dobu au anapapuna.”

²⁸ Maranai patara wei babanina i nonori tau i meji kaua ma i vigaragarei, “Artemis mai Ephesus ai god i getelera!”

²⁹ Ma tau i garagarara rava nai au dobuna i nonori ma tau maiteni i garara labalababa. Anina ma patara Gaius ma Aristakas i vojijini tau ruagai mai Masedonia Paul ana tauvig-wanigwaniana, ma i rubana-naiei nai dobuna ana boru gabuna.[‡]

³⁰ Paul i goei da patara au naoi ita rui da ita babani wate kerisiana ega ita vianinei.

³¹ Wate nanare Paul ana rava gelau i gabemani tauna i vigaie da ega ina nae au boru.

³² Patara i vinuanaina, i logologo i ma i garagarara labalababa ma ega ita aramanei aiwai aubaina weka i nei.

³³ Mai Jew oroto tagogi i dudu-opunei au naoi wavana Alexander ma patara gelau i garara awarina da ita babani. Alexander urana i voepai da tau ita genuana ma tauna ana rava aubai ita babani.

³⁴ Wate maranai i aramanei da tauna Jew. Tau anapapai pona tagoginei wenanare i garagarara, “Tauta mai Ephesus ata god Artemis i getelera!” da *hour* ruaga i kwa.

³⁵ Ma taon badana patara i riwei da i genuana ma i riwa, “Au rava mai Ephesus, rava anapapai au dobu i aramanei da tauta tauvipapai mai Ephesus ai god getelarana Artemis ana numa taparoro ma ana gaima vivireina mare i peuai aubaina.

³⁶ Ega aiai wei ina vikaua-moruei. Lamna aubaina orami ina rau^oei ma ega aiwai apoapoena ona kauei.

³⁷ Wei ravai o neiai weka wate tau ega au numa taparoro aiwai ita danenei bo ata god ita riwana-boei.

* **19:19:** Au Deu 18:10-14 God ana rava e vigaie da ega ina parauma. † **19:19:** Dracma coin tagogi lamna tau-vobagibagi ana maia au pom tagogi aubaina. Marina lamna million biaga. ‡ **19:29:** Dobuna ana boru gabuna lamna numa gae^gaena. Ega poewana, ma inanana me nawaravi gebona. Rava ma^gama^gau 26,000, nanare ina kiala **meeting place**. Rava e nene kampa da kalo tapuna ma e raraubi^g.

³⁸ Mepa da Demetrius ana rava maiteni e viviwavui tau i nae ina rauetara ma ami viwavu ona naei kampa taurauetara awarina.

³⁹ Ma mepa da ami nuabola gēlauri e mamae lamna taon babadai ai au boru ona babanie ma ona tere-jijimani.

⁴⁰ Ma amadodo aiwai i tupua, tau a rovo da ina viwavuita mae-boaboa aubaina. Wei vikaruwagaŋana anona eŋa, ma mepa da Rome ina paridadana ma tauta menanare tana paribelananei.

⁴¹ Anina ma boru i gudui ma rava i vilamonei.”

20

Paul i nae au Masedonia ma Greece

¹ Vikaruwagaŋa au Ephesus taon i kwa ma au murina Paul kerisiana i raukwatueiai da i vinua-terenei, i viegualaei ma i netawane da i nae au Masedonia provins.

² Ma dobu na gaeŋana i naeni ma kua maŋamaŋaui kerisiana i vinua-terenei. Anina ma au Akaia* i gēta.

³ Kampa nawaravi tonuŋa i mae. Tauna i vokauka da ita nae au Syria ma wate i nelaŋai da mai Jew gēlauri viragenana i vivioatarei lamna aubaina da i nae me au Masedonia.

⁴ Nelara gēlauri i votagotaŋo tau lamna Piras natuna Sopater ana dobu Berea; Aristakas ma Sekundus, mai Thesalonika, ma Gaius tauna ana dobu Derbi; ma Tijikus ma Trophimus ai dobu Eisia provins; ma Timothy.

⁵ Tau i wagei i ainae au Troas ma kampa i painiai.

⁶ Ma palawa bagibagina torelana au murina, wagei Philipai taon au Masedonia provins a netawane. Ma aupom 5 au murina au Troas a gēta ai rava awari, kampa aupom 7 a mae.

Au Troas, Paul Eutikus iraŋelei i vovaimairini

⁷ Wiki au karena - Sunday tauai a vitagogelai voepaepa ma BADA ana amogona aubaina, ma kampa Paul i jima da nubautuva, aubaina maratonna da ita nae.

⁸ Numa vatavatara au tepana a vitagogelai, ma kampa rampa maŋamaŋaui i ararata.

⁹ Orotu laragana wavana Eutikus au windo i kiakiala ma Paul i raraugugula, ma tauna matana i pota kua da i raunauvuru, ma kampa au tepa dewadewana i peu-ŋaira da au doa i raei. Maranai tau i ŋaira da ita voepai, tauna irairagenana.

¹⁰ Paul i ŋaira, i matave-tepani ma i rapai ma rava i riwei i pa, “Eŋa ona vinuabola, tauna lawalawaina!”

¹¹ Anina ma Paul i gae me au numa ma kerisiana maiteni BADA ana amogona amna i ani ma awari i babani maratom. Ma Paul nai dobu na i netawane.

¹² Tau i laragana lawalawaina i naiei au numa ma rava orai i raei.

Paul i amkuka au Miletus

¹³ Paul aenei i nae au Assos ma tauai i riwelai da wagei ana nae au Assos da tauna kampa ana vigerui.

¹⁴ Ma au Assos a vigerui ma a nae au Miletus

¹⁵ Maratonna bonabona Kios au gēreŋerena a nae. Ma marana i tom au Samos a gēta, ma maratom gēla au Miletus a gōta.

¹⁶ Paul i ŋoei da jijimanina ina nae ma avena ita rui au Ephesus, eŋa ita ŋoei da au Eisia provins ina mae-guratana. Tauna i vipaparana ma mepa da tagotagogina au Jerusalem ina gēta muriai da Pentecost torelana.

Paul kerisiana au Ephesus i netawane

¹⁷ Au Miletus Paul riwa i paritawane au Ephesus taon kerisiana babadai awari da ita nebelei.

¹⁸ Maranai au Ephesus taon i gētai ma tau i riwei i pa:

O aramane i lawana menanare maranai vovounai weka au Eisia provins a gētai.

¹⁹ Mai Jew i ŋoei da ita rau-iviapoepoleu wate tau a vilamolomona ma ana toutou BADA awarina a vivitaunola.

²⁰ O aramane da maranai God Riwana Aiaina awarimi a raugugulei, riwa aiaina aniguimi eŋa ata tajjini. Au deba a raraugugula rava maŋamaŋaui au naoi, ma ami au numa a viaramanimi

²¹ Riwa bagibagina mai Jew ma Jentail a verei, A riwei da ita rupena ma ita mae-tavirei God awarina ma Iesu ita vitumaŋane.

* 20:2: Marina e gōreŋorei Greek.

22 Ma marina Arua Vivivireina i riweu da ana nae au Jerusalem. Eġa ata aramanei kampa aiwai awariu ina tupua.

23 Wate taon nununai awari a nenaē ma Arua Vivivireina e vivieġeu da amapo ina paniu ma au deri ina tereu ma ina rau-iviapoapoeleu.

24 Ma mepa da ina virageņui, wei lamna eġa kaua ġaeġaena tau awariu. Wate kaua ġaeġaena lamna BADA Iesu nola i verereu da ana vikwai. Wei nolana lamna, God ana iviaiai maemaena, riwana ana raugugulei.

25 Maġamaġaumi awarimi a nei ma God ana vigulau a raugugulei wate marina a aramanei da amadodo da i nenaē, naou eġa ona inana-melei.

26-27 God ana vilawana ogatarana rava aubai eġa ata govaġi awarimi lamna aubaina riwa bagibaginei a ririwemi da mepa da rava au babani eġa ina vitumaġanei ma ana lawana maemaē-nonoana ina vine-boai, lamna eġa tau au wavu.

28 Taumi babada ma ona paina-melemi, nanare tauvitumaġana tau aiavo i da Arua vivivireina au urami i teretereia. Ona inana-vaitetei me sipu taupainana ana sipu e paipaini. Tau lamna God ana vinevine taranei i ġimarai.

29 A aramanei da ana nae ma au muriu tauraugugula morumorui ina nei awarimi ma rava ai tumaġana ina viapoapoeni, me auou moduei sipu au boruna virageņa aubaina.

30 Ma rava ġelau i ami au dam oina ina vomairi ma ina viararamana ma moruei rava orai ina taini da tau i ina votaġotaġoi.

31 Lamna aubaina matami ina kala ma ona aramanei da madeġa tonuġa marai ma waguvarai a notanotaimi ma ana toutou a viararamanimi.

32 Ma marina God au urana a tereteremi. Ana agu e verereoiimi ona vivitumaġanei. Wei aguina e vovaivirewapanimi, ma ami pulo ina veremi, aubaina taumi God natunatuna viaiainai.

33 Ma tau eġa rava ana mane bo ana purapura ata rauoġarei

34 Taumi o aramana-kauē da tau nimauei a nola da mane a vaia da tau au taubagibagi turau aubai.

35 Nanare, a viatataiemi da ona nola guratana da mane ona vaia ma molaka ona voagui. Iesu ana babani eġa nuanuami ina vuru, Tauna i riwa i pa, “Verena i ai kaua eġa me vainana.”

36 Paul i babani vorovei ma anapui i mae-ġaira au doa ma i raupari.

37-38 I vinolanola i pa, “Amapo eġa naou ona inana-melei.” Wei riwana i vinuabolai da i vitouana, Paul i taragwabi ma i vigia-laġolaġonei. Ma i naiei da au waga i vigeruei.

21

Paul ana vaġai au Jerusalem

1 Ephesus kerisiana babadai a viegualuei ma wagei jijimanina a nae au Cous bonabonana ma ubaubanai a nae au Roudes bonabonana, kampa da a damana au Patara taon.

2 Weka waga ġelauna i nenaē au Phonisia a gerui,

3 da au Saipras bonabonana a rubatawanei, au kelakelauai da a nae au Taia au Syria provins a ġota, da purapura ita viopuni.

4 Kampa tauvitumaġana a baiēi ma aupom 7 maiteni a mae. Arua Vivivireina kerisiana i riwei da Paul awarina aiwai ina tupua, ma lamna aubaina Paul i viġaei da eġa ina nae au Jerusalem.

5 Ma mara i ġetai da ata vomairi, kerisiana awawai maiteni da natunatui taon i voterei ma anapui i a ġaira au gera, a raupari gogona.

6 A viegualau da tauai au waga a geru ma tau i nae-me ai au numa.

7 Au Taia ma a nae au Tolemais taon a ġeta. Tauvitumaġana kampa a nebelei ma aupom tagoġi maiteni a mae.

8 *Ma marana i tom ma dobuna a voterei ma a nae au Caesarea, kampa God riwana taujimeina Philip ana au numa a mae, tauna oroto vi-7-na au Jerusalem i vinevinei da lam taupainina.

9 Tauna natunatuna waivinei 4 eġa tavitavinei, tau God ana riwa i vivieġai rava awari.

10 *Aupom vomaġau i kwa, kerisiana wavana Agabas, tauna nanare God riwana i vivieġai, Judeaei i ġairai au Caesarea.

11 Ma i nei awariai da Paul ana tairoro i vaia ma tauna urana ma aena i raġina-melei ma i riwa i pa, “Arua Vivivireina e ririwa, da Jew babadai wei tairorona taniwagana wenanare ina raġini, ma Jentail au urai ina terei.”

¹² Maranai wei riwana a nonori, tauai kerisiana ġelau maiteni Paul a vibaġana-guratei, da avena ita nae au Jerusalem.

¹³ Wate i pa, “Aiwai aubaina o vivitouana ma orau o viviapoapoeni! Tau a vokaukaua nonoa da ina raġiniu, wate eġa lamna ava ma ina viraġeniu au Jerusalem, BADA Iesu a vovotaġotaġoi aubaina.”

¹⁴ Tauai a viviġaei ma eġa tagotagogina da nuanuana ata sinavirai lamna aubaina riwanana a voterei ma a riwa a pa, “BADA ana ġoanei nanare ina tupua.”

¹⁵ Wei au murina a vokaukaua ma a vomairi au Jerusalem.

¹⁶ Kerisiana ġelau mai Caesarea I naielai Nason ana au numa ma kampa a mae. Tauna oroto Saiprasiei, ma Iesu votaġona i vikareni maranaina rava vovounai i vikarei da Iesu Riwana Aiaina i rarau-gugulei.

Paul, James i raugenari

¹⁷ Maranai au Jerusalem a ġeta kerisiana ana nuaiiai i nebelelai.

¹⁸ Maratom ġela Paul maiteni a nae da* James a raugenari,† dogadogara anatapui kampa.

¹⁹ Paul tau i viegualauei ma ana au vaġai God aiwai i kaukauei Jentail awari anatapuna tau i pariverei.

²⁰ Maranaina wei riwai i nonori, tauai God i voepaepai ma Paul i riwa i pa, “Turaiai u aramanei mai Jew ai maġa tausand nanare weka Iesu e vivitumaġanei, ma God ana tarawatu e vovotaġo-kauai.

²¹ Wate rava Jew kerisiana weka au Jerusalem am kaua i vibenabenaie, da tam Jew Jentail maiteni e mamae e viararamani da Moses ana tarawatu ina gedugeduai. Ma u riwei da natunatui ini eġa ina bori ma ai kaua ġelau eġa ina votaġotaġoi.

²² Tau i aramanei da tam u ġetai, Marina aiwai tana kauai?

²³ Aiwai a ririwemi ona kauai. Au nelara 4, tauai parivainuagana bagibagina God awarina i kauai.

²⁴ Ma taravaini ma ona nae au Tempol ma ona viaiaina-melemi ma ma vimaia da tauai viaiaina pulona ina kauai. Anina ma tauai kolai ina ġari ma rava anatapui ina aramanei da tam Moses ana tarawatu anina e vovotaġotaġoi, ma babani au naona lamna anatapuna moru kaua.

²⁵ *Ma Jentail marina i vivitumaġana aubaii pepa a girumi ma wenanare a riwei, sia e pulopuloei kokoitau awarii eġa ina ani, Tara eġa ina umai, Rava ġamoġamo uai e kikiki tarai eġa ita toi-tawanana, eġa ona ani. Eġa ona viawawana labalababa.”*

²⁶ Anina ma marana i tom Paul nai nelarai 4 maiteni i viaina-melei God au matana. Muriai Paul i rui Tempol au orana ma i vinolanola pirisi awarii da mara aiwai tauai ai viaiaina ina voterei. Ma maranaina pulo ita terei tauai tagotagogi ava aubai.

Paul i pani.

²⁷⁻²⁹ *Ma aupom 7 aburuna ava da ita kwa ma Jew ġelau au Eisia provins maemae tau Paul i 'nanai Tempol au orana. Au naonei tau Paul i 'nanai oroto Ephesusei wavana Trophimus maiteni, au taon i bababara ma i notai da tauna Trophimus i ruiei Tempol au orana. Tau Paul i vojijini ma i garara i pa, “Nelara mai Israel ona nei, ona voaguiai! Wei orotona dobu anatapuna e nenaeni ma rava anatapui e viararamani da mai Jew ma ata tarawatu ma Tempol i parivirevirei. Tauna Jentail i neiai gabuna au vivivireina ma i tuvaidoedoei God au matana!”

³⁰ Ma rava anatapui i nonori da au Tempol viġaigaiawa i tupua ma anatapui kampa i ruba. Ma Paul i vojijini ma i taina-opunei au doa ma Tempol metaetana i gudui.

³¹ Maranai tau Paul viraġenana i kaukauei, Mai Rome sorodia ai bada ġaeġaena i nonori da viġaigaiawa ġaeġaena i tupua au Tempol.

³² Tauna lagilagina ana sorodia ma ai babada i vaini ma i ruba kampa, maranai rava tau i 'nanai, Tau Paul vununa i voterei.

* **21:18:** Wei lamna Iesu ana tevera. Act 12:17; 15:13 ma Mrk 6:3 † **21:18:** Mane anatapui ai au vaġai i tami bo rava i puloi i verei damanai mane taupainina i verei ☆ **21:25:** Act 15:29 ‡ **21:25:** Viawawana labalababa wei anatapuna e vaivaipai: Rava ġela awana oroto bo wavine maiteni e viawawana (Exo 20:14, Deu 5:18); Rava ġela maiteni e viawawana mane bo purapura aubaina (Lev 19:29, 1 Cor 6:15); Natuom maiteni e viawawana, me oroto natuna wavinena maiteni bo wavine natuna orotona maiteni (Lev 18:6); Orotu ma oroto bo wavine ma wavine e viawawana (Lev 18:22, Rom 1:26-27); Rava ma ġamoġamo e viawawana (Lev 18:23); Rava ġela, eġa awaoim maiteni e viawawana (Eph 5:3); Rava ġelau e gaegari da maiteni ma viawawana. (Gen 34:7, Deu 22:25-28). ☆ **21:27-29:** Act 20:4

³³ Sorodia ai bada i nei Paul awarina da i vojijini ma ana sorodia ruaḡa i riwei da seinei Paul urana au urai i pani jijini. Anina ma tauna patara i vitara-virevirei i pa, “Wei aiai orotona? Aiwai i kauēi?”

³⁴ Patara au orana rava ḡelau babani tagogi i gararei, ma rava ḡelau babani tapuna i gararei. Rava were da nare i garagara da sorodia ai bada menanare ita nelaḡai gaiawa karena aiwai, lamna aubaina ana sorodia i egari da Paul ita naiei, ai au bareki.

³⁵ Maranai Paul bareki tetena i tutuḡereḡerei, patara i ḡaiawa guratana aubaina sorodia Paul i voepai da i avarai da ita gagaloēi.

³⁶ Patara amapo da tau i vovotaḡotaḡoi ma i garagara i pa, “Ona viraḡeni, ona viraḡeni!”

Paul patara awarii i babani.

³⁷ Maranai tau aburuna ava da au bareki ita rui, Paul Greekei sorodia ai bada i riwei i pa, “Anina bo eḡa da awarim ata babani?”

Ma tauna i auepai ma i riwa i pa, “Tam Greek u aramanei bo?”

³⁸ Tau a notai da tam Egyptei, rorova ai babada u viḡaviei, Ma rava 4,000 orai potapotai u opunei au mutulua, Tam nai ravana bo?”

³⁹ Paul i paribelana i pa, “Eḡa! Tau Jew ei, au taon Tarsus a tupua, au Silisia provins, a vivibaḡaim da rava awari ana babani.”

⁴⁰ Tauna i vianina ma Paul au tete i mairi. Tauna urana i voepai da patara garara i voterei. Maranai tau i genuana, Paul tau awarii ai ponanei i babani i pa.

22

¹ “Amamau ma varevareiu, ona rautaniḡaneu ma ana viatataiemi da tau eḡa aiwai ata kauana-boai.”

² Maranai patarana Paul i nonori da tau i ponei i bababani, tau i genuana ma i rautaniḡana.

³ I riwa:

Tau Jew ei, Tarsus au Silisia provins a tupua wate weka au Jerusalem a rata ma a giruma.

Amamata ai tarawatu a girumei ma au tauviararamana Gamaliel.^{*} A ḡoana-guratei da God ata voepaepa-kauēi me taumi anatapumi nanare.

⁴ Tau Iesu ana etanai tauvotaḡotaḡoina a rau-iviapoapoelei da ḡelau i raḡe. Nelara ma waivine a pani ma au numa panipani a tawana-ruiei.

⁵ Pirisi ḡeḡetelarana ana boru ḡeḡetelarana[†] maiteni i aramanei da tau a ririwa kaua. Tau ai vianina pepana i vereu da ai rava au Damaskas ata verei ma a nae au Damaskas da kerisiana ata pani ma a neiai da kovoḡa ita vaia weka au Jerusalem.

⁶ Aubenai Damaskas a tuḡereḡerei ma maratagogi lalaina gamrina ḡaeḡaena marei i ḡairai da i tunuai.

⁷ A peu au doa ma pona a nonori i pa, “Saul! Saul! Aiwai aubaina e rarau-iviapoapoeleu?”

⁸ Tau a paribelei, “Bada tam aiai?”

Tauna i paribelei, “Iesu Nasaretei e rarau-iviapoapoelei.”

⁹ Rava maiteni a nenaē lalalaina i 'nanai wate babani eḡa ita nonori.

¹⁰ A paridadana a pa, “Bada Aiwai ana kauēi?” Ma Tauna i riwa i pa, “Ma vomairi ma nae au Damaskas. Kampa rava am nola ina pariverem.”

¹¹ Lalalaina gamrina i rata guratana ma matau i kamoi da eḡa ata inainana. Ma tauvigwanigwaniana au urai i voa ma i naieiu au Damaskas.

¹² Orotu wavana Ananias kampa i mae tauna God i voepaepai ma ana tarawatu i vovojijina-nonoei. Mai Jew tauna i vivirana-kauēi.

¹³ I nei da au ririvau i mairi ma i riwa, “Vareiu Saul ma inana me!” Nai marana a inana me.

¹⁴ Anina ma i riwa, “Amamata ai God i rautanim, da ana ḡoana ma aramanei, ana Taunola Jijimanina[‡] - matamei ma inana, ma riwana taniḡamei ma nonori.

¹⁵ Aiwai u inainana i ma u nononori ma vimatematei rava anatapui awarii.

¹⁶ Marina aiwai e paipaini! Tauai ana babataitoim ma BADA awarina ma raupari da am ḡo'apoapoei ina oḡa-tawanei.”

¹⁷ Anina ma a nae au Jerusalem. Au Tempol a rarauari ma matauei kaua a inana.

¹⁸ A inana BADA awarii i bababani i pa, “Rava weka am jima tau aubai eḡa nonorana ita ḡoeḡoei. Laḡilaḡina Jerusalem ma opu-tawanei.”

^{*} 22:3: Act 5:34-39 ^{*} 22:3: Gamaliel tauna tauviararamana ma rava aiala Paul ana au mara. Tauna Pharis ma boru ḡetelarana (Sanhedrin) au orana. [†] 22:4: Act 8:3; 26:9-11 [†] 22:5: Sanhedrin [‡] 22:14: Rava Jijimanina bo bulobulona, lamna Iesu wavana. Paul eḡa Iesu wavana ita latoni mepa da taurautaniḡana mai Jew ita viamloḡaigaini.

¹⁹ Wate tau a paribelei, “BADA wei ravai i aramanei da pari numai a nepai da kerisiana a vunui ma a pani-naiei.

²⁰ *Ma maranai am peroveta Stephen tarana i toi, tau kampa a maimairi ma ana iraġe a vianinei ma ġaima tautawanai ai gara a paipaini.”

²¹ Ma BADA i riweu, “Ma nae a paripari-tawanem aueia Jentail awarri.”

Paul e ririwa da tauna Romei

²² Patarana Paul i rarautaniġane i ma maranai wei babanina i kauei tau i meji guratana ma i vigaragararei i pa, “Ona viraġena-tawanei, eġa ina mael!”

²³ Tau i vigaragararei, ai kwama i kwajikwajiei ma pokau i tawatawanei awarina.

²⁴ Ma sorodia ai bada sorodia i egari da Paul i naiei ai au bareki. Ma i riwei da Paul ita wipi da ita vieġa aiwai aubaina ana rava amloi i ġaiġai ma awarina i garagarara.

²⁵ Ma urana ruaġa i terepai au aidamo ma i raġiraġini da ita wipi ma Paul sorodia ai bada i riwei i pa, “Tau Rome-ei, Eġa ota etareu ma o vunuvunu-labalababai. Lamna menanare?”

²⁶ Maranai sorodia ai bada wei i nonori ma i nae da ai bada ġaeġaena i pariverei. Ma tauna i vitara-virevirei i pa, “Aiwai e kaukauei? Wei ravana Rome-ei!”

²⁷ Sorodia ai bada i nae Paul awarina ma i paridadanei, “Ma riweu! Riwa kaua da tam Rome-ei bo?”

Ma Paul i paribelei, “Ee, lamna riwa kaua!”

²⁸ Sorodia ai bada Paul i riwei, “Tau mane ġaeġaena Rome gabemanina a verei da a vimai Rome.”

Paul tauna i riwei, “Tau a tupua da Rome-ei.”

²⁹ Sorodia i ġoei da Paul ita etarei wate maratagogi ita ġori-melei. Ai bada ita ġori ma i rovo-kaukaua maranai i aramanei da i kauana-boai da Paul, Rome-ei seinei i pani.

Paul Jew ai boru ġetelarana S au naoi i mairi.

³⁰ Au maratamna sorodia ai bada i ġoei da ita aramana-kauei mai Jew ai viwavu aiwai Paul awarina. Ma lamna aubaina Paul ana seini i votawatawanei ma i opunei boru ġetelarana au naona i vimairini.

23

¹ Paul boru ġeġetelarana i 'nana-jjini ma i riwa, “Varevareiu tau au nola God awarina i jjimmana ma orau aiaina da wei paratana.”

² Ma Pirisi ġeġetelarana Ananias rava ġelauna Paul au ririvana i maimairi i egari da Paul i raunavanavai.

³ Ma Paul Ananias i riwei, “God ina raunavanavaim, tam morumorum! Moses ana tarawatuei e rarauetareu wate maranai am rava u riwei da i raunavanavaiu tam tarawatu u viaigai.”

⁴ Tau Paul au ġereġerena i maimairi Paul i riwei, “Aiwai aubaina God ana Pirisi Ġetelarana e vivijiboġi?”

⁵ Paul i paribelei, “Varevareiu eġa ata aramanei da tauna God ana Pirisi ġeġetelarana. Au buka i terei da *Eġa God ana taunola ma parivai-apoapoeni.* (Exodus 22:27)

⁶ *Anina ma Paul i 'nanai da Sadusi ma Pharisi ġelau i kampa ma ponana i rata ma i riwa, “Varevareiu tau Pharisi, amau maiteni Pharisi. A vivitumaġana da God rava iraġelei ina vovaimairini wei lamna aubaina taumi o etaetareu!”

⁷ Maranai wei i latoni Pharisi ma Sadusi viparipariniġai i raukarei ma boru i kai da ruaġa.

⁸ *Aubaina Sadusi e ririwa da rava e irairage lamna eġa ita vovomairi me, ma anela da aruarua eġa ita vivitumaġanei, wate Pharisi wei anatapui e vivitumaġanei.

⁹ Gaiawa ġaeġaena i tupua ma tarawatu babadai ġelau i tau Pharisi, i vovomairi ma i babani guratana i pa, “Tauai eġa aiwai apoapoena ata inandai wei ravana awarina! Mepa da anela bo Bada Aruana tauna awarina i babani?”

¹⁰ Viġaiġaiawa ġaeġaena i tupua ma sorodia ai bada i rovo mepa da rava Paul ina viaisikasikai ma sorodia i egari da i rui ma Paul i taravaina-opunei ma ina naieiau bareki.

¹¹ Ma waguvarai ġelauna, BADA Paul au ririvana i mairi ma i riwei, “Tepam ina tora! Me aubaiu u jima au Jerusalem nanare aubaiu au Rome ma jima.”

Mai Jew i vioga da Paul ina viraġeni

¹² Ubaubanai mai Jew ġelau i vitagogiei ma i viogatara ma i parivainuagana da eġa ina am bo ina uma da Paul ina viraġeni.

¹³ Nelara 40 nanare i vianina da Paul ina viraġeni.

14 Tau i nae pirisi babadai ma dogadogara awarii ma i riwei, “Tauai parivainuāgana bagibagina a kauēi da ega ana am da Paul ana viraḡeni.”

15 Taumi Boru ḡeḡetelarana maiteni ona moru ma riwa ona pari-tawanei sorodia badana awarina da Paul ina neiāi ma ona vitara-virevirei da riwa kaua ona vaia. Tauai ana vipaipai da ana viraḡeni muriai da weka ina ḡetai.

16 Wate maranai Paul avuna wei ogatarana i nonori ma i nae sorodia ai au bareki ma Paul i pariverei.

17 Ma Paul sorodia badana i ḡoreiai ma i riwei, “Wei laragana laḡilaḡina ma naiei ami bada awarina da ana riwa ina riwei.”

18 Ma i naiei ai bada ḡaeḡaena awarina ma i riwei, “Panipani wavana Paul riwa i paritawanei awariu ma i riweu da wei laragana ata neiāi awarim aubaina am riwa awarina.”

19 Sorodia ai bada ḡaeḡaena laraga i vinimavoai ma i maeria ma i paridadanei, “Am riwa aiwai ma riweu?”

20 I riwa, “Mai Jew i riwa da ita vibaḡaim da au maratomi Paul uta naiei ai au Boru ḡeḡetelarana, Wei anapuna moru.

21 Wate ega ma rautaniḡanei aubaina rava 40 nanare pota e paipaini da ina viraḡeni. Tau i vioga da ega ina am da Paul ina viraḡeni. Tau i vokaukaua ma am vianina ava e paipaini.”

22 Ma bada laraga i riwei da ega aiai ina riwei ma i paritawanei.

Tau Paul i paritawanei Gavena Felix awarina.

23 Anina ma sorodia ai bada ḡaeḡaena babada ruaḡa i ḡoreiai ma i riwei, i pa, “Sorodia sod ravai 200, aiera ravai 200 ma hos ravai 70 ma vaia ma ona vokaukaua da waguvarai 9 oklok ona vomairi.

24 Hos biaḡa ona vaia Paul aubaina da aiaina ona naiei gavena Felix awarina au Caesarea.”

25 Ma sorodia ai bada pepa wenanare i girumi:

26 Tau Claudius Lisias, a girugiruma awarim au bada vinualaulaunam, Gavena Felix. Egoalau.

27 Mai Jew wei orotona i vojijini ma ita viraḡeni, wate maranai a nonori da tauna Rome-ei ma lamna aubaina au sorodia maiteni a opu da au urai a vaitawanei.

28 A ḡoei da ata aramanei ana apoapoe aiwai, da ata naiei ai Boru ḡeḡetelerana awarina.

29 Ma a nelaḡai da viwavuna lamna tauiva ai tumaḡana kauai ma Rome ana tarawatuei lamna tauna ega aiwai apoapoena ita kauēi da ata viraḡeni bo ata pani.

30 Maranai riwana a vaia da mai Jew i ḡoei da govagovaḡanei tauna ita vunui. Lamna maratagoga a paritawanei awarim, ma nanare tauviwavu a riwana-guratei da kampa ina ḡetai da ai viwavu ina kauēi.

31 Ma sorodia ai babada i ririweia nanare i kauēi ma waguvarai Paul i taravaini ma i naiei da au taon Antipatris i ḡeta.

32 Au maratomi aiera ma sod sorodiai i naeme au Jerusalem ma hosi sorodia Paul i naei au Caesarea.

33 Maranai hosi sorodiai au Caesarea i ḡeta pepana ma Paul gavena i veredamanei au urana.

34 Gavena pepa i 'avi ma Paul i paridadanei metauna provins-na u tupua ma i riwa, “Silisia.”

35 Gavena i riwa i pa, “Am etara ana nonori maranai am tauviwavu ina ḡetai.” Ma sorodia i naiei Herod numa i voavoaiana da ita inana-vaitetei.

24

Paul Gavena Felix au naona i mairi

1 Aupom 5 au murina Pirisi ḡeḡetelarana Ananias ma dogadogara i ḡaira au Caesarea ai taurauetara wavana Tertelus maiteni.

2 Ma Paul i ḡoreiai gabemani au naona. Ma Tertelus i vomairi ma viwavuna i vikarei:

Au bada Felix *vinualaulaunam, Am vibadanei ta mae ubauba ma ata nota ega aiwai. Ma kaua vouii ma aiaii u kaukauei ata dobu voana aubaina i voagu-kaueta.

3 Anapuaia mepamepa a mamae a vinuaia kua tam awarim.

4 Wate ega ata ḡoei da ana visina-viraviraim. Ma lamna aubaina a ḡoeḡoei da uta rautaniḡaneu mara aburuna ava.

* **24:2:** Felix ana au vibadana lamna ega ita ai. Tertelus lamna Felix i gwalagwalamerui da Paul ita viwavui ma ita pani. Felix rava vita ḡaeḡaei i verei da madeḡa ruaḡa i kwa Sisaiei Nero wei ravana i viopuni. Gavia ḡaeḡaena i tupua ma Jew Rome i viḡaviei ma tau i Jerusalem i rikai da ega aiwaina ita mae.

⁵ Tauai a nelaḡai da wei ravana lamna orana potapotana ma viḡaiḡaiawa tauvikareina mai Jew awarii dobu au anatapuna. Tauna boru vouna e ḡoreḡorei mai Nasaret[†] ai bada.

⁶ Tau i ḡoei da Tempol maiteni ita tuvaideoeoi ma lamna aubaina a pani.

⁷ ‡

⁸ Ma ruetarei ma ma nelaḡai da ai viwavu lamna anatapui riwa kaua.

⁹ Ma mai Jew Tertelus au murina i mairi ma i riwa, “Wei babani anatapui riwa kaua!”

¹⁰ Anina ma Gavena Felix Paul i raumotemotei da ita babani. Paul babani i vikarei i pa:

Au bada vinualaulaunam, a aramanei da tam madeḡa biaḡa wei dobuna ai taurauetara lamna aubaina tau ana nuaubau ana babani aubaiu.

¹¹ Am rava ina riwem da tau pom ota aupom 12 nanare a ḡeta memei au Jerusalem da BADA ata voepaepai.

¹² Au tauviwavu eḡa ita nelaḡaiu ata viḡaiḡaiawa au Tempol bo au boru-numana bo mepa nanare au Jerusalem.

¹³ Ma ai viwavu tau awariu menanare tana aramanei da lamna riwa kaua?

¹⁴ Wate riwa kaua da tau amamata ai God a voepaepai ma BADA Iesu ana etanai, a votaḡotaḡoi ma tau i ririwa da wei lamna taparoro morumoruna. Wate nanare Moses tarawatu i girugirumi ma God ana peroveta nununai i girugirumia anatapuna a vivitumaḡanei.

¹⁵ Tau God awarina a vitumaḡana guratana me ravai nanare, da tauna muriai rava anatapui iraḡelei ina vilawana-melei, ravai aiiai ma rava apoapoei.

¹⁶ Lamna aubaina a kaukauana guratei da orau ina ai rava ma BADA awarii.

¹⁷ *Jerusalem a netawanei madeḡa biaḡa i kwa ma pom ota a nememei da molamolakai ata puloi ma pulo ata kauai God awarina. §

¹⁸ Tau aiiau, maranaina i nelaḡaiu au Tempol viaina pulona a kaukauai. Eḡa patara maiteni ma eḡa visinaviravira.

¹⁹ Wate mai Jew ḡelau Eisia provinsei i nei kampa. Tau i mepa marina! Ita nei au naom da ai viwavu ita terei.

²⁰ Bo babada weka ita riweta au apoapoe aiwai maranai boru ḡeḡetelarana au naona a mairi.

²¹ *Wate mepa da maratagogi awarii a garara a pa, “A vitumaḡana da God rava anatapui iraḡelei ina vovaimairini! Lamna aubaina tau weka a maimairi!”

²² Felix tauna BADA Iesu ana Etanai riwana i aramana-kauai, boru i gudui ma i riwa, “Maranai sorodia ai bada Claudius Lisias ina nei, ma ina pariblem.”

²³ Ma sorodia ai bada i egari da Paul ita inana-vaitetei ma ita voterei da ita bababara ma ana rava ita nei da ita raraugenari.

Paul Felix i viaramamani

²⁴ Aupom biaḡa au murina Felix awana Drusila maiteni i nei. Drusila lamna wavine Jew ei. Ma riwa i paritawanei da Paul i nei, ma rava ai tumaḡana Iesu Keriso awarina i babaniei ma Felix i rautaniḡana. *

²⁵ Wate maranai Paul babani i vikarei da God ana ḡoana, da rava lawana aiaina ma jijimanina ina maeni, ma erawa kauai ma ḡo'apoapoe ina geduaiei, aubaina mara e nenei maranai rava anatapui ina etarei. Felix wei babanina i nonori tauna i rovo ma Paul i riwei, “Ma nae! Ma maranai ana ḡoem lamna ana kwatuem.”

²⁶ Ma Felix i ḡoeḡoei da Paul tauna manelei ita ḡwalai ma lamna aubaina mara i maḡa i raukwatuei ma awarina i babani.

²⁷ Madeḡa ruaḡa au murina Felix i rautom ma ana gabu Posias Festus i vaia. Felix i ḡoei da wavana ita ai mai Jew awarii lamna aubaina Paul au numa panipani i votere-tawanei.

† 24:5: Wava Nazarene lamna Iesu ana tauvotaḡotaḡoi e babaniei aubaina tauna Nasaretei. Maranai Tertelus tau i ḡorei Nazarene Lamna Kerisiana e vivijiboḡi. Jew Jerusalem ei ma Judea Provins anatapuna mai Gallii provins ravai e inainana ḡairei, (John 1:46 ma iavi). Tauna wate e ririwa da menanare Paul e tapataparoro nei lamna mai Rome ai tarawatu e vivaigai. ‡ 24:7: Verse 7 lamna buka waduwaduboi biaḡava au orana e mamae, wate buka Greek ponanei i girugirumi maḡamaḡaiu wei ves-na au orana eḡa. * 24:17: Act 21:17-28 § 24:17: Madeḡa 5 i kwa ma Paul i nememei au Jerusalem da ita mae mara aburuna da tauvitumaḡana ita vovai virewapani ma ana babara ma nolana aiaina ita virarautuei. (Act 18.22) * 24:21: Act 23:6 * 24:24: Mepa da Drusila Jew wavinena awarinei Felix wei ravai e ḡoreḡorei tauvitumaḡana i aramanei. Drusila lamna Herod Agrippa natuna guguinina umauna ana madeḡa 20. Tauna wavalatona Siriei i ravaḡi wate i voterei maranai ana madeḡa 16 da Felix i ravaḡi. Wei lamna ana tavine viruiaina ma Felix ana tavine vitonuina.

25

Paul i vibağa da Sisa au naona ita mairi

¹ Festus i ġeta au Caesarea da ana nola ita vikarei ma aupom vitonuina i ġae au Jerusalem.

² Weka pirisi ġeġetelarana ma dogadogara Festus i nebelei ma ai viwavu Paul awarina tauna i verei.

³ Ma Festus i vibaġai da ita voagui da Paul ita paritawanei au Jerusalem. Tau i ava i vioga da Paul au etanai ita viragēni.

⁴ Wate Festus i paribelei i pa, “Paul au deri au Caesarea ma tau a ġaiġaira me kampa aupom ruaga au murina.

⁵ Mepa da Paul aiwai i kauana-boai lamna ami Babada maiteni ana ġaira da kampa ami viwavu ina terei.”

⁶ Aupom 8 da 10 nanare au murina Festus i ġaira me au Caesarea ma maratonna au numetara i kiala ma ana sorodia i eġara da Paul ita ruieiai au naona.

⁷ Maranai Paul i ruieiai, ma Jew babadai Jerusalem ei i ġairai i nei awari ma ina viwavui, kua maġamaġau apoapoei aubaii. Wate tau i ai viwavu anatapui anona eġa.

⁸ Paul wei *viwavui i vinua-nainei ma i pa, “Tau eġa aiwai apoapoena ata kauē mai Jew ai tarawtu awarina bo ai Tempol awarina bo Caesar awarina.”

⁹ Wate Festus i ġoei da mai Jew ita vinuaiaini lamna aubaina Paul i paridadanei i pa, “E ġoeġoei bo eġa da tana ġae au Jerusalem ma etara?”

¹⁰ Paul i riwa, “Tau marina Caesar ana au etara gabuna a maimairi, weka ina etareu. Tam u aramana-kauē da tau eġa aiwai apoapoena ata kauē mai Jew awarii.

¹¹ Wate mepa da aiwai apoapoena a kauē lamna ma viragēni. Tau eġa iragē ata rovōei. Wate mepa da wei lamna viwavu moru lamna eġa ai ai ana rewapana ita mamae da ina veredamaneu. Tau a vivibaġa Caesar awarina!”

¹² Festus Caesar ana dogadogara ai nota i vaia ma i paribelana i pa, “Tam u vibaġa Caesar awarina, Anina Caesar awarina ma nae.”

Festus Paul ana babani gulau Agrippa i pariverei

¹³ Aupom biaġa au murina gulau Agrippa[†] novuna Benisi maiteni i nei au Caesarea da gavena vouna Festus i raugenari da ita viegualaei.

¹⁴ Ma i mae aupom vomaġauna ma Festus Paul i rarauetara gulau i pariverei i pa, “Felix panipani tagogi weka i voterei.

¹⁵ Ma maranai a nae au Jerusalem mai Jew ai pirisi babadai ma dogadogara ai viwavu i neiai awariu ma i vibaġai da Paul ita viragēni.

¹⁶ —Ma a riwei da tauai mai Rome ai tarawtu e ririwa da eġa rava ana kovōġa labalababai da au naona ana rauetarei. Tau i ina ġetai da ai viwavu taurauetara au naona ina mairi da ina gagaloana-melei.

¹⁷ Maranai tauviwavu maiteni weka a ġetai. Tau eġa ita vipaipai ma maratonna a eġara da ravana i neiai da ita etara.

¹⁸ Tauviwavu i vomairi ma a notai da aiwai apoapoena aubaina ita viwavui wate eġa.

¹⁹ Anina kua biaġa ava ai taparoro kauaii, ma rava tagogi irairagēna wavana Iesu i vitarapiriei. Wate Paul e ririwa da Iesu lawalawaina.

²⁰ Tau nuanuau i raġaraġa menanare riwa kua ana vainei ma Paul a paridadanei da i vianina da maiteni ita ġae au Jerusalem da kampa ita etarei.

²¹ Wate Paul i vibaġa da Caesar ana viwavu ina rautaniġanei. Ma sorodia a eġari da au numa panipani ina paini da ana paritawanei Caesar awarina.”

²² Ma Agrippa Festus i riwei, “A ġoei da ravana ana babani ana rautaniġanei.”

Ma Festus i paribelei, “Anina, au maratom ma rautaniġanei.”

Gulau Agrippa Paul i rautaniġanei

²³ Au maratonna gulau Agrippa ma Benisi gulau garai i oteni ma ana gabemani babadai ġaeġae maiteni, i arana-ruiei au boru numana. Festus ana sorodia i eġari da Paul i ruieiai.

²⁴ Festus i riwa, “Gulau Agrippa ma anatapumi o rieiai weka, wei ravana o inainanai! Tauna mai Jew au Jerusalem ma weka au Caesarea e ġoeġoei da ina iragē.

²⁵ Wate tau a nelaġai da tauna eġa aiwai ita kauana-boai da ina iragē. Wate i vibaġa da Caesar tauna ina rauetarei. Lamna aubaina a pariparitawanei Caesar awarina.

* **25:8:** *Paul au Tarsus i tupua wate tauna wavana Rome gabemanina awarina. Lamna aubaina tauna ana rewapana e mamae da ana nuabola ina naiei au Rome da Caesar ina rauetarei.* † **25:13:** *Wei lamna Herod Agrippa 11, Herod Agrippa 1 natuna.*

²⁶ Wate Caesar aiwai ana riwei, eġa ata aramanei aiwai ana girumi? Lamna aubaina a neiai awarimī ma tam gulau Agrippa maiteni da tana babaniei da nota ona vereu da aiwai ana girumi.

²⁷ Aubaina eġa ita ai da panipani ana paritawanei Caesar awarina ma ana viwavuna eġa!”

26

Paul ana gudu i tarai

¹ Ma Agrippa Paul i riwei, “A vianinem da ma babani.” Ma Paul urana i voepai ma ana gudu tarana i vikarei

² i pa:

I ai kua gulau Agrippa da amadodo tam au etara e rarautaniġane i da Jew babadai ai viwavu awariu ana tere-vaijijimani.

³ Tau aramanei da tam mai Jew ai giu ma ai paripariġai u aramanana-kauei. Lamna aubaina a vivibaġaim da au paribelana ma rautaniġanana-kauei.

⁴ Mai Jew anatapui au lawana i aramanei, aburu da marina, au dobu oina da au Jerusalem.

⁵ *Tau i rorova ava i aramaneu ma ina riwem da tau ai boru bagibagina ma pipiripina, Pharisi au orana a rui ma tarawatu anatapuna a vojijina-kauei.

⁶ Ma marina a vitumaġana da God aiwai noinoita i parivainuaġani ina kauei. Ma lamna aubaina tau weka a maimairi.

⁷ Wei parivai-nuaġanana ata dam 12 e vipaipaiei da ina nei lamna aubaina ata rava i vipatutu ma marai ma waguvarai God e viviborumei. Au gulau wei vitumaġanana aubaina mai Jew e viviwavuii.

⁸ Aiwai aubaina o notanotai da God eġa tagotagogina da rava iragelei ina vovaimairini?

⁹ *Tau au naona a notai da aiwai anatapuna ata kauei da Iesu Nasaretei ata viġaviei.

¹⁰ Ma anina lamna a kauei au Jerusalem. Piri si ġeġetelerana babadai pepa i verei ma lamna i vovai-virewapaniu ma kerisiana vivivireii maġamaġai au numa panipani a terei, ma nanare ai irage a vianinei.

¹¹ Mara maġamaġai boru numai a naeni da kerisiana a vununaiei da ai tumaġana ita boviei. Amlou i ġaigai kua da dobu ġelau i naeni kerisiana a baibaiei.

¹² Mara tagogi piri si babadai au Jerusalem pepa i vereu da rewapana i vereu ma a nae au Damaskas.

¹³ Ma aubenai nanare, tau au etanai a nenaie ma a inanai, lalalaina marei i ġairai ma i lalalai, gamrina madeġa i ġetawane! Au rava maiteni a bababara i lalalai.

¹⁴ Anatapuiai a vipeuana au doa ma pona Hebrewi awariu i bababani. I riwa, “Saul, Saul aiwai aubaina e vivigavieu? Tam e ġoeġoei da Tau ma viapoapoeniu wate eġa da tam e vivipoapoena-melem!”

¹⁵ Ma a paridadana, “Bada tam aiai?”

Ma BADA i paribelei, “Tau Iesu, ravana tauna e vivigaviei.

¹⁶ Wate ma vomairi. Tau a nei awarim da vaivai ata verem da ma vitaunola Tau aubai, ma amadodo aiwai u inanai ma aiwai ana viatataiem, ma vimatamatei rava awariu.

¹⁷ Tau ana galoem am rava mai Israel awarii ma nanare Jentail ravai awari, ma ana paritawanem Jentail awarii,

¹⁸ da matai ma vikalai, da ai lawana apoapoe ina voterei ma ina nei au lalalaina, ma Satan ana rewapana ina votere-tawane i ma ina nei God awarina. Tauna ai ġo’apoapoe ina nota-tawane, ma ina taravaini natunatuna rarautanii, ai tumaġana awariu aubaina.”

¹⁹ Lamna aubaina Gulau Agrippa, tau riwa marei au inana a inanai a voteletelei.

²⁰ *Au naona a jima mai Jew awarii au Damaskas ma nanare au Jerusalem ma Judea anatapuna ma muriai Jentail maiteni awarii. A jima da ai ġo’apoapoe ina votere-tawane i ma ina mae-tavirei God awarina, ma ai lawana ina vimataira da ai kua apoapoe i voterei-tawane.

²¹ Wei babanii aubaina mai Jew au Tempol i vojijiniu ma i ġoei da ita virageniu.

²² Wate God i vilawaniu da marina, ma weka a maimairi da a vimatamata rava muomuoi ma nanare rava ġaeġaei awarii. Aiwai a bababaniei lamna peroveta nununai ma Moses i ririweta ina tupua.

²³ *Taufi i riwa da tauvilawana Keriso ina vinuapoapoe. Ma tauna ina irage ma ina vinoa da ina vomairi me ma wei matairana ina vinolanola da tauna God lalalaina mai Jew ma Jentail aubaii.

²⁴ Weka Festus i vionaḡi ma i garara Paul awarina, “Tam u bua! Am aramana i vibuaiim!”

²⁵ Wate Paul i paribelei, “Au bada Festus tau eḡa ata bua. Tau aiwai a babaniei lamna riwa kaula ma babani anona.

²⁶ Wei kaula eḡa govagovaḡana ma aramanei da Gulau Agrippa anatapuna i aramanei, ma lamna aubaina ana tepatorau wei kauai ana babaniei awarina.”

²⁷ Paul Gulau Agrippa i riwei i pa, “Peroveta e vititumaḡanei bo eḡa? A aramanei da nanare!”

²⁸ Ma Agrippa i paribelei, “U notai da tau laḡilaḡina ma sinaviraiu da ana vikerisiana!”

²⁹ Paul i paribelei, “Laḡilaḡina bo amapo, a raraupari God awarina da tam ma rava anatapui wei au boruna ina tupua-vira me tau nanare wate eḡa sein maiteni.”

³⁰ Anina ma gulau ma gavena ma Benisi i vomairi ma i nae.

³¹ Ma anatapui i nenaē ma i babani vivira ma i vianina i pa, “Wei ravana eḡa aiwai apoapoena ita kauē da tana viraḡeni bo tana pani.”

³² Ma Agrippa Festus i riwei, “Mepa da eḡa ita vibaḡa ḡae Caesar awarina, lamna marina tata rupeni.”

27

Paul wagei i vaḡai nae au Rome

¹ Festus mara i tereterei i ḡetai da tauai ata nae au Rome. Paul ma tau ma panipani ḡelau maiteni au waga a geru ma a vaḡai Rome aubaina. Rome ai sorodia badana wavana Julius au urana i terelai. Tauna Caesar ana sorodia vinevinena.

² Waga Adaramitei i nei da a geru ma wagana i ḡota-nae au Eisia provins gerana. Orotu wavana Aristakas ana dobu Thesalonika au Masedonia provins tauna maiteni i geru.

³ Au maratamna au Sidon taon a ḡota, Julius ivina i ai Paul awarina ma i voterei da i opu au gera da ana rava ita raugenari ma ana ḡoana aiwai ita vibaḡei.

⁴ Muriai wagei a opu da a nenaē ma ive i verau-matamataniai ma lamna aubaina bonabona au Saipras ma dobu ḡaeḡaena au pouna au mulaḡina ambori.

⁵ Ma boga ḡaeḡaena a bori da Silisia provins da Pamphilia provins gerai a voterei da au Maira taon a rui au Lisia provins

⁶ Au Maira taon kampa sorodia badana mai Egypt ai waga Alexandriei i nenaē au Italy kampa i vigeruaii.

⁷ Ma aupom maḡamaḡai nuatauai a ruba ma a voia guratana da Cinidus taon a tuḡereḡerei wate ive i verau-matamataniai da kampa waga a virai da Crete bonabonana ma mutu Samone au poui au mulaḡina a nae.

⁸ Ma kampa nuatauai bonabona Crete gerana a naeni aubaina mara i apoapoe ma a ḡeta dobu e ḡoreḡorei U Aiaina, Lasea taon au ḡereḡerena.

⁹ Mara ḡaeḡaena a vine-boai au vaḡai* ma Rupena Ujina marana boiboḡi i kwa,† marina lamna ive ma rabama ai mara ma boga babarana i vinirovorovo.

¹⁰ Ma Paul i riwa, “Nelara, malana a vaivaia da ata vaḡai ina apoapoe kaula ma waga ma purapura tana vine-boa-pai. Ata lawana maiteni tana vineboai.”

¹¹ Wate sorodia ai bada, kapena ana babani i rautaniḡanei ma eḡa Paul da kampa ata mae ma eḡa ata nae.

¹² Wei gabuna eḡa ita ai wei ivena au marana ma rava maḡamaḡai i goei da waganei ata nae da Phinix una, Crete au bonabonana da kampa ata mae da bodu ita kwa. Wei u ḡaeḡaena ma mutuii lavarata ma rauanaḡa e vinoa-vereverei, da au mulaḡina e mamae.

Kojikojira Ḡaeḡaena

¹³ Maranai rauanaḡa i vikarei ma waga ravai i notai da marina mara aiaina da ita nae au Phinix una. Ma anika i taini ma Crete bonabona geraei i nae.

¹⁴ Ma eḡa barana ita uama ma kojikojira‡ olei iveiai.

¹⁵ Ive wagana i verau-matamatani ma waga eḡa tagotagogina da ita vobelei ma i voterei da ive waga i avara-opunei.

¹⁶ Bonabona aburuna Kauda gerana au mulaḡina a ruba ma kampa a voia guratana da dingy a terepai au waga da a ragita-jjini.

* 26:23: Isa 42:6; 49:6 † 27:9: Eng. *Atonement* bo *Yom Kippur* marana wei lamna September bo October rabama ma ive ai mara ‡ 27:14: Kariwabu ḡaeḡaena

17 Wei i kauana vorovei ma ġuravei waga au gabaurina da waga adana i raġita-kwawiviroi. Tau i rovo mepa da au maratete ina amġaena au Syrtis,[§] Libya au gerana. Lamna aubaina ġuravei ai da kuka, i raġita-tagogei ma au boga i viorereni da waga ita bibi. Ma i voterei da kojikojira waga i avara-naiei.

18 Maratomna kojikojirana i rarau-guratanelei da purapura ġelau i boga a viorereni.

19 Aupom vitonuina tau i waga purapurai i viorereni au boga.

20 Kojikojira i ruba da aupom biaġa da madeġa ma ubona i purui. Ravai ai nota i kwa.

21 Wei au marana rava au waga am i kauana-avei, anina ma Paul i vomairi ma tau i riwei, “Nelara ota rautaniġaneu ma Crete eġa tata oputawanei, amapo waga eġa tata viapoapoeni ma ata purapura eġa tata vineboai.

22 Wate a ririwana-guratemi da eġa orami ina peu! Aubaina avena da waga ina monu wate eġa ina iraġe.

23 God lamna tau au BADA ma ana taunola tau. Waguvarai God ana anela i paritawaneiai awariu.

24 Ma i riwa, ‘Eġa ma rovo! Tam anina da Caesar au naona ma etara! Ma ġelauna lamna God ana nuavaina maemaena rava anatapui maiteni e vaġavaġai ina lawana.’

25 Lamna aubaina tepami ina tora! Aubaina tau God a vivitumaġane i ma menanare i ririweia nanarena ina tupua.

26 Wate tauta au maratete tana amġaena.”

27 Kojikojira i avara-naielai au Mediterranean Bogana da aupom 14 i kwa ma nubautuva waga ravai malana i vaia da tau i gera i tuġereġerei.

28 Ma barawa au ġiana ġaima i raġini ma au boga i tawanana-ġairei da topa ana gabinou ita aramanei. Ma i aramanei da 40 meter ma i mae aburuna ma i raudadana-melei lamna marina 30 meter.

29 Ma tau i rovo mepa da rabama waga au kira ina viairikarika lamna aubaina waga au ipuna anika 4 i tawana ġairei ma i vipaipai da mara ina tom tawanana.

30 Ma waga ravai ai kaua i kaukauei da ita ruba-govaġa. Ma i vioga da dingie i ita opu waga au naona da anika ita dubara-naiei, ma lamna aubaina dingy i teretere-ġairei au boga,

31 Wate Paul sorodia ai bada maiteni i riwei, “Mepa da waga ravai ina rubatawanemi lamna anatapumi ona iraġe.”

32 Ma sorodia dingy ġuravana i borituini ma dingy kwakwawina i peu au boga ma i avara-naiei.

33 Ma maratomtomi Paul rava anatapui i egari da ita am, i pa, “Tau i marina aupom 14 rovo i kauemi ma eġa ota am.”

34 “Tau a vivibaġa-guratemi da ona am da ona viwapana, eġa ai ai tagogi ina iraġe.”

35 Paul i babani vorovei ma au matai palawa i vaia, BADA i vieġualau i ma i vogimai ma i ani.

36 Ma rava anatapui inana ma orai i bagibagi ma am i vikarei.

37 Tauai anatapuiai 276 au waga.

38 Ma rava anatapui i am da i am-iaua. Ma witi baikei au boga i viorereni da waga ita votelatela i da au gera ita ġota da avena ita amġaina.

Waga au maratete i amġaena

39 Marana i mara i tom tawanana tau i dobu i ‘nanai wate gerana eġa ita aramanei, wate U inana i gerana aiaina ma i notai da gerana aiaina da waga kampa ita viġaeni.

40 Anina ma anika ġuravai i viaituituini, ma labilabi i tere-ġairei, ma waga au naona kuka voaburune i votawatawanei ma gera aubaina i ruba.

41 Wate waga au maratete i amġaena da i tapaiei, ma rabama waga ipuna i viairikarika.

42 Sorodia i ġoei da panipani ita viraġeni, da avena ita toa-ġaira au gera ma ita viruberubei.

43 Wate sorodia ai bada i ġoei da Paul ita vilawani ma i viġaei, anina ma ai viogatarea eġa ita kauai. Ma tau ai avoi toa i aramanei i egari da i viauepa au boga ma i toa-ġaira au gera.

44 Ma ġelau aiwai da i tenatenam i vidauei. Ma nanare anatapui lawalawaii au gera i ġota.

28

Paul au Malta bonabonana

1 Marana i ġota au gera ma a aramanei da tauai au Malta bonabonana.

2 Dobuna ravai i nebelelai ma ivii i ai kaua awariai. Garewa atuna i vikarei ma i ubauba, ma tau i au gera ai i viviri.

3 Ma Paul ai ragorago i ġuna da ai au tepana i teretere i mota ġaiġaiawana ai bolana malana i vaia da i opui ma Paul nimana i ani.

§ 27:17: Wei lamna maratete.

4 Dobuna ravai i 'nanai da motana Paul au nimana i dawedawe ma i pari-ararava, "Wei ravana lamna tauviraġena ma eġa ita monu wate ata god* e ririwa da tauna eġa ina lawana."

5 Wate Paul motana i viaikwajjei da ai au menamenana i rauai ma tauna eġa ita kero.

6 Rava i vipaipai da Paul nimana ita dodo bo ita peu da ita iraġe. Wate maranai i vipaipai guratana ma i 'nanai da tauna anina, tau i ai nota i virai ma i riwa da tauna god ġelauna.

7 Au gerana a ġotaġota - lana au ġereġerena lamna dobuna badana Publius ana wapu ġaeġaena. Tauna i taravainiai ma i paina-kauelai da aupom tonuġa

8 Publius amana i doria manawa ruba ma iniġuġura i vaia da i matamatave, Paul i rui inanana aubaina ma urana au tepana i terei ma i raupariei ma i vilawani.

9 Anina ma rava anapapai doridoriai au bonabona i nei ma i vilawani.

Paul au bonabona Malta da i nae au Rome

10-11 Kampa mai Malta maiteni a mae nawaravi tonuġa. Ma ravai i voagu-kauelai ma maranai ata vomairi, ai ġoana vaġai aubaina anapapuna i verelai. Ma waga ġelauna a gerui lamna mai Alexandria ai waga bodu aubaina kampa i mae. Waga au naona lamna ai god ruuġa kokoitai i tai†.

12 Kampa ma a amkuka-nae da au Sairakius a ġota ma a mae aupom tonuġa

13 Kampa da ambori damana au Regium ma maratonna rauanaġa i wanabauni ma amkuka ma geraei a ruba da maratom ġela au Puteoli a ġota.

14 Kerisiana kampa a nelai ma i riwelai da maiteni a mae wiki tagogi. Anina ma a babaranae da au Rome taon a ġeta.

15 Kerisiana au Rome riwaiiai i vaia da a nenei ma i ġei da ita nebelelai, ġelau i ġei au taon e ġoreġorei Vaġavaġai Tonuġa ai Numa ma ġelau i ġae Apus ana au maket. Maranai Paul wei ravai i 'nanai, ma i vinuaii kava ma God i viegualauai.

16 Maranai au Rome taon a ġeta tau Paul numa i verei da ainelana i mae ma sorodia i terei da i 'nana-vaitetei.

Paul au Rome i raugugula

17 Ma aupom tonuġa au murina Jew babadai kampa maemaei i raugoreiai ma awarii i babani, "Varevareiu tau eġa aiwai ata kauana-boai ata rava awarii bo amamata ai tarawatu ata viaġai. Wate au Jerusalem i panui ma i veredamaneu Rome gavena awarina.

18 Mai Rome i etareiu ma i ġoei da ita rupeniu aubaina eġa aiwai apoapoenata ata kauai da ina viraġeniu.

19 Wate Jew babadai wei eġa ita ġoei ma lamna aubaina Rome babadai a riwei da tau eġa ana mae wate ana ġae au ġaeġaena Caesar awarina da ita rauetareiu. Wate lamna eġa au rava ata viviġaviei, eġa.

20 Lamna aubaina a ġoremi weka da tata babani gogona, ma ata riwemi da tau a vipanipani aubaina a vitumaġana da mai Israel ai tauvilawana wariaġa i ririwei boiboġi i nei."

21 Tau i paribelei, "Tauai eġa pepa Judeaei ata vaia bo ai rava riwa ita neiai.

22 Tauai aramanei da ravai anapapai kerisiana boruna e paripari-virevirei. Wate tauai a ġoei da am nota ana vaia."

23 Ma tau mara i terei da Paul maiteni ita viboru, ma patara i ġetai mepa Paul i mamaelana. Ma ubaubanai Paul God ana vigulau jimana i vikarei da waguvarai i vorovei. Moses ana tarawatu ma peroveta nununai ai au buka i mairi ma i jima. I ġoei da orai ita taini da Iesu ita vitumaġanei.

24 Ana babaniei ġelau orai i taini ma ġelau eġa ita vitumaġana.

25 Ma taui ava babanina i viparipariniaiei ma muriai da ita vilamonei Paul wei riwana tagogi i latoni i pa, "Arua Vivivireina riwa kava Peroveta Isaiah ponanei amamami i riwei i pa:

26 *Ma nae am rava mai Israel awari da ma riwei,*

ona nononora wate eġa ona araramanei

ona inana wate eġa anona ona aramanei.

27 *Aubaina wei ravai orai i bado.*

Taniġai i gudui,

Tau matai i vopotai.

Mepa da tau mataiei ita inainana,

taniġaiei ita nononora

oraiei ita araramanei,

* **28:4:** God wavinena wavana kava aiaina bo kava jijmanina (Justice). † **28:10-11:** Wei lamna mai Rome ai god raġaraġa wawai Castor ma Pollux ruaġai e ġoreġore Dioscuri bo raġaraġa marei, Tau lamna god Zeus ma Leda natunatui.

⊙ **28:19:** Act 25:11

ma ita mae-tavirei awariu ma ata vilawani.

(Isaiah 6:9-10)

²⁸⁻²⁹ –Lamna aubaina ona aramanei da God Riwana Aiaina vai-melana aubaina i paritawanei Jentail awarii. Tau i ina rautaniġana.”

³⁰ Paul kampa numa i vivimaiei ma i mae madeġa ruaġa taputapuna. Ma rava maġamaġaui i nenei da i rarausenari ma wei i vinuaiaiei.

³¹ Ana tepatorana God ana vigulau ma Iesu Keriso riwana Aiaina i jimei. Ma eġa ai ai ita viġaei.